

SC.17.Pl.6



MAG3222







1



# F. JOSEPHI AUGUSTINI O R S I

ORDINIS PRAEDICATORUM

Sac. Indicis Congregationi a Secretis

DE IRREFORMABILI

## ROMANI PONTIFICIS

In definiendis Fidei Controversiis iudicio

*Adversus quartam Cleri Gallicani Propositionem*

**AB ILLUSTRISSIMO J. B. B.**

Meldenſi Episcopo propugnatam.

**TOM. I. PARS SECUNDA:**

Accedit Dissertatio circa modum, ab Illustrissimo Petro  
de Marca propositum, conciliandi Summam ejusdem.


ROMANI PONTIFICIS auctoritatem cum libertate  
suffragiorum in Synodis Oecumenicis.



**ROMAE, MDCCXXXIX.**

Typis Sacrae Congregationis de Propaganda Fide.

**SUPERIORUM FACULTATE.**



# T O M I P R I M I

## P A R S S E C U N D A.

*De reliquis Conciliis Occumenicis differitur: &  
quaedam pro nostra sententia generalia ar-  
gumenta illustrantur & vindicantur;  
ac praesertim illud, quod ex eo-  
rumdem Conciliorum con-  
firmatione petitur.*



### C A P U T X X X.

„ **S**ynodus Nicaena secunda, seu generalis septima,  
„ more antecedentium Synodorum, de Adriani I.  
„ litteris quaestionem habet: Locus egregius, quo ea-  
„ dem Synodus docet, vim illam ineluctabilem in Ec-  
„ clesiae Catholicae consensione esse positam. pag. 1

#### A R T I C U L U S P R I M U S.

*Unius Sedis Apostolicae auctoritas obtinuit, ut Iconoma-  
chi ante septimam Synodum generalem, ab omnibus  
cum in Oriente, tum in Occidente Catholicis pro hae-  
reticis & ab Ecclesiae Catholicae communione praeci-  
sis, haberentur.* 2

#### A R T I C U L U S I I.

*De eodem argumento differitur: Ostenditur, dogma de  
cultu Sacrarum Imaginum propositum fuisse ab Ha-  
driano tanquam certum ac retractationi minime ob-  
noxium: eundemque fuisse septimae Synodi sensum;*

ac

ac nullius esse momenti, quae contra *Bossuetum* oppo-  
nit. 11

„ Galli Synodum septimam, seu Nicaenam secundam  
„ Adriano Praefide habitam pro oecumenica non ha-  
„ bent, eo quod ad illam nec ipsi, nec alii Occiden-  
„ tales vocati essent: Egregius ea de re *Jacobi Sirmondii*  
„ locus: Romanorum Pontificum de Gallis senten-  
„ tia. 21

### ARTICULUS PRIMUS.

*Septima Synodus, Nicaena secunda, reapse oecumenica  
fuit: & olim Galli immerito hunc illi titulum dene-  
garunt.* 22

### ARTICULUS II.

*Ex rejecta per Gallos Nicaena secunda Synodo nihil con-  
fici potest adversus Sedis Apostolicae summam & in-  
declinabilem auctoritatem.* 27

### ARTICULUS III.

*Gallicanorum Praefulum & scriptorum de cultu Imagi-  
num adeo est implexa sententia, aut scribendi ratio,  
ut ab Ecclesiae Romanae doctrina, si benigna illis ad-  
hibeatur interpretatio, nequaquam in fidei summa di-  
scedere videantur. Quae praecipua ratio est, cur eo-  
rum dissensionem aliquandiu Romani Pontifices tole-  
rarunt.* 38

### ARTICULUS IV.

*Gallorum Scriptorum, ac potissimum Parisiensis Conven-  
tus Episcoporum, quatenus secundam Nicaenam Sy-  
nodum, & ipsas Hadriani Epistolas, & probatum ab  
Ecclesia Romana sacrarum Imaginum cultum aperte  
vellicant & reprehendunt, nulla omnino habenda  
ratio*

*ratio est, nec aliqua esse debet auctoritas.* 48

## CAPUT XXXII

Octava Synodus generalis, Constantinopolitana quarta, aeque ac ceterae, de Romanorum Pontificum judiciis iudicat: traditam sibi a Christo, ut & Romanae Ecclesiae, ligandi ac solvendi potestatem agnoscit & exercet: post Synodi iudicium, nulla iam appellatio, nulla alia spes est. 59

## ARTICULUS PRIMUS.

*Nicolaus I. & Hadrianus II. in causa Phorii & Ignatii summam & ineluctabilem, & Synodi oecumenicae retractationi & iudicio nullo modo subiectam, auctoritatem exercuerunt.* 60

## ARTICULUS II.

*De eodem argumento ex aliis ejusdem octavae Synodi Actionibus.* 71

## CAPUT XXXIII.

Concluditur argumentum ab octo primorum Conciliorum auctoritate repetitum: Eorum acta Adversarii nec considerasse videntur. S. Gelasii, & S. Gregorii locus de irretractabili Ecclesiasticorum iudiciorum auctoritate. 83

## CAPUT XXXIV.

Alia Concilia generalia memorantur: in iis perstitit antiqua traditio, ut summae quaestiones ad Concilia generalia referrentur, nec Pontifex non decerneret, nisi sacro approbante Concilio: Referuntur quatuor Lateranensia oecumenica Concilia, sub Callixto II. sub Innocentio II. Alexandro III. Innocentio III. & Lugdunense primum sub Innocentio IV. 85

## ARTICULUS PRIMUS.

*Decreti S. Gregorii VII. adversus Investituras ante primam Lateranensem Oecumenicam Synodum firma & irretractabilis auctoritas : De illius sanctitate & aequitate nunquam in legitimis Synodis disceptatum : De his tantum in Ecclesia Catholica disputatum; 1. An haeresis esset, investituras a Gregorio damnatas tanquam licitas usurpare? 2. An, & quibus temperamentis tolerari posset earum usus ad graviora mala, & schismatis periculum avertendum?*

88

## ARTICULUS II.

*De secundo Lateranensi Generali Concilio: Ex S. Bernardo probatur, opus non fuisse Synodo oecumenica ad retractandam Innocentii II. electionem, quod in eam Christiani orbis pars maxima consentiret: unde conficitur, irretractabiles jure suo fuisse plerasque illarum causarum pro quibus generales Synodi celebratae sunt.*

107

## ARTICULUS III.

*De Conciliis Lateranensibus III. & IV. & de prima Synodo Lugdunensi.*

114

## CAPUT XXXV.

*Concilium Lugdunense II. sub Gregorio X. de reconciliandis Graecis: Hujus Acta praecipua referuntur.*

122

## ARTICULUS UNICUS.

*Ex Gregorii X. ad Graecorum Imperatorem litteris, & ex formula fidei Graecis proposita, nec non ex primo Canone Concilii Lugdunensis probatur, irretractabilem esse Ecclesiae Romanae in proponendis fidei dogmatibus auctoritatem.*

123

CA-



## CAPUT XXXVI.

- » Decretum Concilii Lugdunensis II. de Papae auctori-  
 » tate producitur: Ostenditur, nihil favere Adversa-  
 » riis. 130

### ARTICULUS UNICUS.

*Probatur Graecos in Concilio Lugdunensi II. agnovisse  
 in Ecclesia Romana, & Romanis Episcopis ad fidei  
 dogmata definienda summam & indeclinabilem pote-  
 statem.* 132

## CAPUT XXXVII.

- » Idem ex Graecorum in Basileensi & Florentina Syno-  
 » dis doctrina, Eugenique Papae ac Latinorum con-  
 » sensu ostenditur. 148

### ARTICULUS PRIMUS.

*Quae Bossuetius ex Florentina Synodo in medium ad-  
 fert, aut nihil probant adversus Romani Pontificis  
 ineluctabilem auctoritatem; aut probant, vel secun-  
 dam Synodum Lugdunensem non fuisse oecumenicam,  
 vel retractationi ac novo examini subjectas esse ipsas  
 quoque Conciliorum generalium dogmaticas defini-  
 tiones.* 149

### ARTICULUS II.

*Aliquot Florentinorum Patrum loca, quibus diserte Ro-  
 mano Pontifici in definiendis fidei dogmatibus iner-  
 rantia tribuitur, ab Episcopi Meldensis exceptionibus  
 vindicantur.* 153

## CAPUT XXXVIII.

- » Viennense Concilium sub Clemente V. Ejus aevi Scri-  
 » ptor nobilis Guillelmus Mimatensis Episcopus, Spe-  
 » culator dictus, a Papis jussus de habendo Concilio  
 » scribere, quid senserit. 164

*To. I. Par. II.*

*b*

*AR-*

## ARTICULUS UNICUS:

*De sensu hujusce propositionis: Ad solum Romanum Pontificem pertinet eorum quae sunt fidei, declaratio, seu judicium &c.* 163

## CAPUT XXXIX.

» Lateranensis Synodus sub Julio II. ex ea Conciliorum  
» necessitas, & auctoritas. 171

## ARTICULUS UNICUS.

*Ex Quinti Concilii Lateranensis Actis ostenditur, supremam Romani Pontificis auctoritatem cum Conciliorum Generalium, quaecumque ea sit, necessitate & auctoritate, optime cohaerere.* 172

## CAPUT XL.

» Post Lutheranam pestem, Concilii generalis habendi  
» necessitas ab omnibus, atque adeo a Romanis Pontificibus, agnoscitur: Ea re Concilium Tridentinum convocatur. 178

## ARTICULUS UNICUS.

*Ex Conciliorum generalium necessitate ac celebratione aut nostram sententiam minime labefactari; aut eodem telo ipsam quoque appeti Ecclesiae Catholicae, & ipsorum Conciliorum generalium auctoritatem.* 179



# LIBER SECUNDUS

*Quo Meldensis Episcopi liber decimuster-  
tius examinatur & confutatur. p.188*

## CAPUT PRIMUM.

- „ Objectio de confirmatis a Romano Pontifice Synodis  
„ generalibus proponitur; dissolvendae hujus ratio  
„ atque ordo explicatur. 189

## CAPUT II.

- „ Quid sit confirmare Ecclesiastico stylo; & quid auto-  
„ ritatis invehat: Confirmari decreta non modo ab  
„ aequalibus; sed etiam ab inferioribus passim. Tum  
„ speciatim explicatum, non modo a Romanis Pon-  
„ tificibus Conciliaria Decreta, sed & a Conciliis  
„ etiam particularibus Romanorum Pontificum decre-  
„ ta confirmari. ibid.

## ARTICULUS UNICUS.

*Quam dispar sit ea confirmatio, quae a singulis seorsim  
Episcopis aut Synodis Provincialibus Conciliorum ge-  
neralium aut Romanorum Pontificum decretis; &  
quae a Romanis Pontificibus Conciliorum gestis &  
Canonibus adhibetur. Hac porro recte probari, ma-  
jorem esse Romani Pontificis, quam Concilii Oecume-  
nici auctoritatem. 191*

## CAPUT III.

- „ Quid in confirmandis Conciliis gestum sit; Nicaena,  
„ Constantinopolitana, Ephesina Synodi; nihil in his  
„ de illa, quam quaerimus confirmatione actum; de  
„ Ariminensi Synodo; de Epistolis Eutherii & Hella-

„ dii ad Sixtum III. adversus Ephesinā decreta: Chri-  
„ stiani Lupi vanae notae. 202

### ARTICULUS PRIMUS.

*De Synodis Nicaena, Constantinopolitana, & Arimi-  
nensi: Quomodo in duabus prioribus adprobandis, &  
altera irritanda Sedis Apostolicae auctoritas emicue-  
rit.* ibid.

### ARTICULUS II.

*De Synodi Ephesinae confirmatione, deque Eutherii &  
Helladii litteris ad Sixtum III., & in eas Christiani  
Lupi notis.* 216

### ARTICULUS III.

*De iisdem Eutherii & Helladii litteris adversus Aufo-  
rem notae, quae buicce Capiti in Opere Meldenfis Epi-  
scopi subjuncta est.* 222

### CAPUT IV.

„ De Ephesino Latrocinio: Quid Leo egerit: ut ultimam  
„ sententiam futurae universali Synodo reservavit.  
pag. 237

### ARTICULUS UNICUS.

*S. Leo secundam Ephesinam Synodum supremo ac perem-  
torio iudicio nullam & irritam declaravit.* 239

### CAPUT V.

„ A Chalcedonenſi Synodq nullam in fidei negotiis con-  
„ firmationem petitam: Cujusmodi sit ea, quam S. Leo  
„ ultro dederit. 245

### ARTICULUS UNICUS.

*Quantum in confirmatione Apostolica ponderis ac mo-  
menti sit, ex Concilii Chalcedonenſis decretis, aut de  
fide, aut ad fidem quodammodo pertinentibus, demon-  
stratur.* 247

CA-

## CAPUT VI.

„ Quintum, sextum, septimum, octavum Concilium. 254

## CAPUT VII.

„ Reliquae Synodi usque ad Tridentinam. . . . . ibid.

## CAPUT VIII.

„ De Canonibus Conciliorum generalium a Sede Apo-

„ stolica confirmatis vel infirmatis : Constantinopoli-

„ tani Canones, praesertim III. Chalcedonenses Cano-

„ nes, praesertim XXVIII. . . . . 255

## ARTICULUS UNICUS.

*Ex Concilio Chalcedonensi ejusque Canonibus demon-*  
*stratur, ex Romani Pontificis consensu vel dissensu*  
*pendere, quod rata vel irrita sint, quae a Conciliis*  
*Oecumenicis decernuntur.* . . . . 256

## CAPUT IX.

„ Recapitulatio eorum, quae de confirmatione ex Con-

„ ciliorum actis dicta sunt : Hinc confutantur allati a

„ quibusdam Recentioribus Pontificiae confirmatio-

„ nis effectus : Ecclesiae consensus quatenus ultima

„ Synodi bene gestae testificatio : Sancti Gelasii lo-

„ cus. . . . . 267

## ARTICULUS UNICUS.

*Sufficere Romani Pontificis confirmationem sive adpro-*  
*bationem, nec opus esse omnium omnino Ecclesiarum*  
*consensione, ut aliqua Synodus, & Oecumenica & le-*  
*gitima, adeoque erroris expers judicetur.* . . . . 268

## CAPUT X.

„ Andreae Duvallii de confirmatione sententia confuta-

„ tur ; nempe quod ante eam Conciliorum anathemata

„ valeant tantum sub spe rati : Concilii octavi locus

„ egregius. . . . . 276

CA-

## CAPUT XI

- „ Ex antedictis resolvitur illud, duodecim saeculis inau-  
„ ditum, quod Episcopi jurisdictionem omnem a Papa  
„ mutuentur; quodque Papae assistant, ut Consiliarii  
„ tantum, non ut Judices. 277

## CAPUT XII

- „ Quo sensu dictum sit ab Antiquis, a Petro, & per Pe-  
„ trum esse Episcopatum. S. Augustini locus. 279

### ARTICULUS PRIMUS.

*Aliquot Scripturae locis probatur, Episcopalem omnem  
jurisdictionem & auctoritatem, aut a Petro & Ro-  
mano Pontifice manare, aut esse omnino Romano Pon-  
tifici subjectam.* 281

### ARTICULUS II.

*Patrum loca vindicantur, quibus eadem doctrina, ac de  
eodem re Ecclesiae traditio, apertissime adseritur, &  
continetur.* 289

## CAPUT XIII.

- „ Patres ante Augustinum. Alii Augustini loci: Tradi-  
„ tio sequentis aetatis. 296

### ARTICULUS PRIMUS.

*Haec Christi Domini verba: Tu es Petrus &c. Et tibi dabo  
claves &c. Ad unam & singularem S. Petri personam  
retulit: constans veterum Patrum & Ecclesiae tradi-  
tio, quae ante & post S. Augustinum obtinuit.* 298

### ARTICULUS II.

*De Sancti Cypriani mente atque sententia operosius disse-  
ratur: Aliqua item de S. Optato Milevitano, aliisque  
Patribus & Auctoribus, quorum testimoniis Bossue-  
tius S. Augustini doctrinam & interpretationem con-  
firmat.* 305

AR-

## ARTICULUS III.

*Admissa S. Augustini expositione, non posse ex cap. XVI. Matth. Petri primatum adversus haereticos demonstrari: Eam tamen expositionem textui minime cohaerere, ex ipsis Protestantibus demonstratur. Petro eo loci super universam Ecclesiam, non modo distributive, verum & collectivae, tributam fuisse supremam auctoritatem.* 317

### CAPUT XIV.

- „ Cleri Gallicani ab antiqua traditione ducta sententia;
- „ Conventus generalis anni 1655. adversus Johannem Bagotium acta memorantur. 323

### CAPUT XV.

- „ Authoris Anonymi de jurisdictione Episcopali a Summo Pontifice profecta, vanae commentationes: Sancti Gregorii loci: Bellarmini objectio: S. Felicis tertii locus. 324

### CAPUT XVI.

- „ Loci S. Johannis Chrysostomi, a novissimo Authore Anonymo objecti. ibid.

### CAPUT XVII.

- „ Alius Chrysostomi locus in Acta Apostolorum. 328

### CAPUT XVIII.

- „ Sancti Augustini locus ab eodem Anonymo objectus;
- „ contra Conciliorum auctoritatem indeclinabilem. pag. 331

### CAPUT XIX.

- „ Alii loci Augustini ab eodem objecti: An Papa Ecclesiam Catholicam repraesentet. ibid.

## CAPUT XX.

„ Repetuntur & urgeptur, quae pro Parisiensium sen-  
 „ tentia, ab auctoritate & convocatione Concilio-  
 „ rum generalium dicta sunt: Confutantur yana suf-  
 „ fugia: Bellarmini etiam responsionibus antedicta  
 „ firmantur.

331.



CA-





## CAPUT XXX.

„ Synodus Nicaena secunda, seu generalis se-  
 „ ptima, more antecedentium Synodorum;  
 „ de Adriani Primi litteris quaestionem ha-  
 „ bet: Locus egregius, quo eadem Synodus  
 „ docet, vim illam ineluctabilem in Eccle-  
 „ siae Catholicae consensione esse positam.



Tex ipso titulo apparet, idem in praesenti,  
 quod in praecedentibus Capitibus argu-  
 mentum obtruditur; quo nimirum Sedi  
 Apostolicae ac Romanis Pontificibus adim-  
 mere Bossuetius nititur vim ineluctabilis  
 auctoritatis, propterea quod Tarasius & septima Synodus  
 consensum Adriani I. litteris praebuerunt, eisdemque sub-  
 scripserunt, explorata prius earumdem cum sacrarum lit-  
 terarum & veterum Patrum testimoniis consensione.  
 Quam parum huic argumento momenti ac roboris insit;  
 etsi jam saepius demonstravi; non piget tamen, aliis ex  
 hac ipsa septima Synodo & Iconomachorum damnatione

*To. I. Par. II.*

A

peti-

petitis rationibus idem uberius ostendere: ut quoniam Adversarius nihil omittit eorum, quae ad suum systema utcumque fulciendum, & labefactandam Sedis Apostolicae auctoritatem idonea ipsi videntur; nos pariter nihil omittamus eorum, quae ad ejusdem majestatem tuendam, sacra eadem monumenta suppeditant.

## ARTICULUS PRIMUS.

*Unius Sedis Apostolicae auctoritas obtinuit, ut Iconomachi ante septimam Synodum generalem, ab omnibus cum in Oriente, tum in Occidente Catholicis pro haereticis & ab Ecclesiae Catholicae communione praecisis, haberentur.*

**I**conomachos, antequam septima Synodus generalis fidei Catholicae solennem definitionem ederet, imo & antequam ipsa convocaretur, pro haereticis cum in Oriente, tum in Occidente habitos esse; idque ex una Sedis Apostolicae auctoritate, plura sunt, quae invicte demonstrant.

Primus, qui nefariam haeresim, ubi primum in Oriente caput extollere caepit, anathemate damnavit, fuit Gregorius II. sanctissimus Pontifex, quemadmodum praeter Auctores Graecos, Theophanem, Zonaram, & Cedrenum, qui id aperte testantur; & Leonem ipsum Isaurum Imperatorem eodem anathemate notatum fuisse perhibent; haud obscure indicant, cum Hadrianus Papa in Epistola ad Carolum Magnum, ubi Romani Concilii meminit hoc Pontifice adversus Iconomachos celebrati; tum

Ana-

Anastasio Bibliothecarius in vita ipsius Gregorii II. ubi narrat, quod acceptis *iussionibus*, quibus decreverat Imperator, ut nulla imago cujuslibet Sancti, aut Martyris, aut Angeli ubicumque haberetur; maledicta enim omnia asserbat: Et si acquiesceret in hoc Pontifex, gratiam Imperatoris haberet: Si & hoc fieri praepediret, a suo gradu decideret. Respicens ergo pius Vir profanam Principis *iussionem*, jam contra Imperatorem quasi contra hostem se armavit, renuens haeresim ejus, scribens ubique cavere se Christianos, eo quod orta fuisset impietas talis. Et infra loquens de Anastasio ab eodem nefario Imperatore in Sancti Germani Patriarchae Constantinopolitani Sedem intruso; qui missa Romam Synodica, dum tali haeresi eum consentientem reperiret, Vir sanctus non censuit eum fratrem aut Confacerdotem solito vocari; sed rescriptis commonitoriis, nisi ad Catholicam converteretur fidem, etiam extorrem a sacerdotali officio esse mandavit: Imperatori quoque suadens salutaria, ut a tali execrabili miseria declinaret, scriptis commonuit. Haec in ea Synodo, cujus meminit Hadrianus Pontifex gesta esse, satis verosimile est. Quo autem zelo fideique ardore universus Occidens huic Sanctissimi Pontificis decreto paruerit, pluribus exponit ipsemet S. Gregorius in priore Epistola ad Leonem Isaurum Imperatorem: At enim inquit, eos (Romanos) perterrefacis, aisque: Romam mittam, & imaginem Sancti Petri confringam; sed & Gregorium illinc Pontificem vinctum adduci curabo, sicut Martinum Constantinus (Constans) adduci iussit. Scire autem debes, ac pro certo habere . . . . quod Occidens universus ad humilitatem nostram convertit oculos: ac licet tales non sumus nos, illi tamen magnopere nobis confidunt, &

*in eum, cujus denuncias te imaginem everfurum atque deleturum, Sancti scilicet Petri, quem omnia Occidentis regna velut Deum terrestrem habent. Quod si hoc velis experiri, plane parati sunt Occidentales ulcisci etiam Orientales, quos injuriis affecisti. Et infra: Totus Occidens Sancto Principi Apostolorum fidei fructus offert. Antea vero narraverat, quod quum aliquot ex Romanis, & ex Francia, ex Vandalis, ex Mauritania, ex Gotthia, & ex toto interiori Occidente, Constantinopoli sacrilegos Imperatoris ausus vidissent, eosque deinceps in suis singuli regionibus ac provinciis narrassent; tunc projecta, inquit, laureata tua, quam antea agente ipso Pontifice cum honore susceperant, conculcarunt, & faciem tuam conciderunt, ac delectu habito Longobardi & Sarmatae, ceterique, qui ad Septemtrionem habitant, miseram Decapolim incursionibus infestarunt &c. Qua de re videtis & Anastasium Bibliothecarium in ejusdem Sancti Pontificis vita.*

Gregorii Secundi vestigiis sequutos Romanos Pontifices instituisse, Gregorium (III.) Zachariam, & Stephanum (II.), & iterum Stephanum (IV.) Hadrianus Papa testatur in Epistola ad Carolum Magnum (cap. V.) quos inquit, *reperimus pro Sacrarum Imaginum erectione in Spiritu Sancto ferventes, rectae fidei zelum habere. Potissimum autem refert, Concilium 79. Episcoporum a Gregorio Secundo ad confessionem beati Petri Apostolorum Principis habitum, fuisse a Stephano Papa cum Episcopis partium Franciae atque Italiae in Lateranensi Synodo confirmatum. Quo de fusius Anastasius Bibliothecarius in ejusdem Stephani vita. Narrat etiam in eadem Epistola laudatus Pontifex, relictam susceptamque fuisse*

in

in eodem Concilio, quod Stephanus *pro Sacris Imaginibus una cum diversis Episcopis in partibus Franciae, seu Italiae fecit*; susceptam inquam, probatamque fuisse Synodicam trium Orientis Patriarcharum ad Paulum Romanum Pontificem Epistolam, in qua se se cum Romana Ecclesia venerari sacras Imagines profitebantur. Ex quibus apertissime constat, Francos Episcopos idem tunc temporis cum Romanis Pontificibus & Orientalibus orthodoxis de sacrarum Imaginum veneratione sensisse. Id quod etiam confirmari potest ex Synodo Gentiliacensi Pippini jussu, Pauli Romani Pontificis & Constantini Copronymi Legatis praesentibus, anno DCCLXVII. celebrata; de qua haec scribit Ado Viennensis in Chronico: *Facta est Synodus anno Incarn. Dom. 767. & quaestio ventilata inter Graecos & Romanos de Trinitate & utrum Spiritus Sanctus sicut procedit a Patre ita procedat a Filio: & de Sanctorum Imaginibus, utrumne fingendae aut pingendae erant in Ecclesiis*. De eadem etiam scribit Regino Abbas, & locum designat. Pippinum enim testatur illius anni Pascha in Gentiliaco celebrasse, atque in eadem Villa Synodum magnam habuisse inter Romanos & Graecos de Sancta Trinitate, & de Sanctorum Imaginibus. Romanos autem Pauli Papae Legatos, omnes interpretantur; qui nimirum una cum Pippini Legatis Constantinopoli cum Graeci Imperatoris Legatis reversi, apud Pippinum Regem tunc erant, tantisper ab eo detenti, dum Synodus ista cogeretur. De hac quippe ipsa Synodo accipienda videntur quae Paulus Papa Pippino rescribit Epist. XXVI. inter Carolinas: *Direxistis nobis Excellentiae vestrae Christianitas, significans de missis nostris, vestrisque, atque Graecorum, qui a Regia urbe reversi sunt, eos*  
apud

*apud vos esse detentos, interim quod aggregatis vestris Sacerdotibus atque Optimatibus, conicere seu perpetrare valeatis, quid de his, quae vobis directae sunt, respondendum sit. Et quidem nobis de hac re aliter confidendum non est a vobis responderi, nisi quae ad exaltationem sacrosanctae spiritualis matris vestrae Romanae Ecclesiae, atque orthodoxae fidei pertinere noscuntur. Duo nimirum Graecorum legationis erant capita; unum de repetendis Italiae regionibus a Pippino Ecclesiae Romanae attributis; alterum de quaestionibus superscriptis: in quorum altero Sedis Apostolicae dignitas & amplitudo, in altero fidei Catholicae sinceritas petebatur. Quamquam autem nescimus, quid Synodus decreverit, attamen spe sua frustratum non fuisse Pontificem, & consentaneum fuisse Romanae Ecclesiae doctrinae Patrum Gentiliacensium decretum, inde conicere est, quod Stephanus IV. Pauli Successor duobus post annis, hoc est, anno 769. ex eodem Francorum regno Episcopos petiit, qui ipsi ad profligandam Iconomachorum haeresim in Lateranensi Synodo adessent. Duodecim ergo ex praecipuis Galliarum Civitatibus, scilicet Wilcarius Senonensis, Lullus Moguntinus, Gavienus Turonensis, Addo Lugdunensis, Herminardus Bituricensis, Daniel Narbonensis, Tilpinus Rhemenfis, Herulfus Lingonensis, aliique tres, quorum sedes ignorantur, Romam perrexerunt; ac decretum Gregorii secundi de colendis Sanctorum Imaginibus, una cum Stephano Papa aliisque Italiae Episcopis confirmarunt, & Synodicam trium Orientis Patriarcharum de eodem argumento Epistolam adprobarunt: quae proinde totius Galliae per ea tempora fides ac doctrina censeri debet.*

Non

Non secus atque Occidentales, Orientis Episcopos & Monachos aliosque Catholicos & orthodoxos in Apostolicae Sedis doctrina, & fide quievissent, ejusque praesidio & auctoritate munitos adversus Iconomachos decertasse, multis momentis evinci potest. Nam primo id aperte docet Hadrianus Papa in epistola citata ad Carolum Magnum: *Recte, inquit, dictum est, quia Deus misertus est Ecclesiae Constantinopolitanae, & obviavit veritati sanctae Catholicae & Apostolicae Ecclesiae, quae semper justitiam tenuit, ut scriptum est:*

Justitiae sedes, fidei domus, aula pudoris:  
*Quam justitiam, fidem, atque pudorem, ut confessa est, Ecclesia Constantinopolitana amplectens, quando ab errore conversa est fecit pacem: quia tantummodo ipsa sola Sedes Constantinopolitana resistebat olitanae orthodoxae fidei. Nam Sedes Alexandrina, seu Antiochena, & Hierosolymitana semper nobiscum tenuerunt priscam traditionem, scilicet orthodoxam fidem, ut apud nos Synodica earum pro sacrarum Imaginum stabilitate habere monstratur. Et in alio ejusdem Epistolae capite: Theodorus Patriarcha Hierosolymorum, cum ceteris praecipuis Patriarchis, videlicet Cosma Alexandriae, & Theodoro alio Antiochiae, dudum praedecessori nostro sanctae recordationis quondam Paulo Papae miserunt propriam eorum rectae fidei Synodicam, in qua & de sacratissimis Imaginibus subtili narratione, qualiter una cum nostra sancta Catholica & Apostolica universali Romana Ecclesia ipsi & ceteri Orientales orthodoxi Episcopi, & Christianus populus sentiant, & in earundem sanctarum Imaginum veneratione sincero mentis affectu ferventes in fide existunt, studuerunt intimandum.*

Quum

Quum Paulus Regiae urbis Patriarchatum voluntaria in Monasterium ad agendam poenitentiam secessione, propterea quod Copronymi Pseudosynodo consensum praebuerat, abdicasset; in ejus locum S. Tarasius, agentibus Imperatoribus Constantino & Irene, suffectus est; qui tamen oblatam dignitatem admittere recusavit, donec Augustis persuasit, ut ipsorum ope oecumenica Synodus cogeretur. Quae vero ratio Tarasium impulit, ut Synodum Oecumenicam peteret? Quid Synodo oecumenica opus esse judicavit? Numquid, ut jam a pluribus annis turbatis Ecclesiae rebus, & Regiae Urbis Patriarchis & Orientis Imperatoribus de Imaginum cultu ab Ecclesia Romana aliisque Patriarchalibus Sedibus dissentientibus, haeresique in Pseudo-Synodo Constantinopolitana a CCCXXXVIII. Episcopis roborata; Ecclesiae Romanae traditio in Synodo oecumenica discuteretur, & Synodico examine inquireretur, an ab Ecclesiae Romanae doctrina dissentientes justo ac legitimo anathemate percellerentur? Nequaquam ob ejusmodi causam Synodo oecumenica opus esse Tarasius judicabat; qui nimirum pro certo habebat, adhuc tot Episcopis & Imperatoribus reluctantibus, haud irritum esse Anathema, quo Sede Apostolica praecunte, ab omnibus Occidentalibus & plerisque Orientalium Iconomachi feriebantur. Petebat ergo & omnino volebat haberi Synodum oecumenicam, ut pax redintegraretur, ut communem Ecclesiae Catholicae fidem Constantinopolitana Ecclesia complecteretur, ut reliquo Ecclesiae corpori tanta ejus & adeo illustis portio conjungeretur. En sanctissimi Viri verba: *Horrendum conamen ad exiguitatem meam & temerarium studium: causa vero timoris & meae refutationis haec est. Aspicio*  
*enim*



enim & video Ecclesiam, quae super Petram Christum Deum nostrum fundata est, scissam nunc & divisam, & nos alias atque aliter loquentes, & aliter eos Christianos, qui in Oriente unius nobiscum (quod nimirum pertinet ad alia dogmata) sunt fidei: sed & his concordantes Occidentales, & nos ab omnibus illis alienatos, & a se per singulos dies anathematizatos habere. Dira poena est anathema, procul a Deo emittit, & e regno caelorum persequitur, & ducit in tenebras exteriores. Nescit Ecclesiae lex vel terminus, vopos & oqos, sectam sive contentionem..... Et petimus nos fratres, ut reor & vos, quoniam scio vos timorem Dei habere, a piissimis & orthodoxis Imperatoribus nostris Synodum universalem colligi, ut efficiamur nos, qui unius Dei sumus, unum &c. Et si quidem jusserint orthodoxiae propugnatores, Imperatores videlicet nostri postulationi meae justae annuere, consentio & ego, & jussionem eorum implebo: sin autem, impossibile mihi est hoc facere, ne subijciar anathemati. Cur non interim, donec Synodus Oecumenica cogeretur, adversus sententiam & anathema Sedis Apostolicae sese tueretur aut recursum ad Principes, aut appellationem ad Senatum tanquam ab abusu? Nimirum ignorabat sanctissimus Vir ejusmodi strophas & artes, quibus hodie Refractarii quaecumque Sedis Apostolicae & Ecclesiae fulmina eludere se posse arbitrantur; qui utinam aliquando haec, quae statim subjungo, S. Tarasii verba serio & ex animo cogitarent: Ne, inquit, subijciar anathemati, & inveniar condemnatus in die Domini nostri, & justus Judicis; ubi neque Imperatores, neque Sacerdotes, neque Principes, neque hominum multitudo poterit eripere me. Haec, inquam, serio perpendant, qui Sedis

Apostolicae & Ecclesiae anathematis aut Principum, aut Parlamentorum, aut aliquot Episcoporum ac secundi ordinis Sacerdotum, aut promiscuae multitudinis auctoritatem opponunt. Porro idem quod Tarasius, sentiebat inclytus ille Confessor & Ecclesiarum Magister S. Theodorus Studites lib. II. Epist. CXXIX. ad Leonem Sacellarium, ubi contendit, non esse coram Imperatore de sacris Imaginibus disceptandum, quoniam iudicium de sacris Ecclesiae dogmatibus, non ad Imperatores pertinet & seculi potestates, sed primò loco ad Romanum Pontificem; & sub illo ad ceteros Patriarchas; quamquam & ex solo Romano Pontifice accipi & peti posse fidei Catholicae certitudinem, paullo post expresse definit: *Non enim*, inquit, *de rebus seculi carnisque sermo est, de quibus iudicandi penes Imperatorem potestas est, & iudicium seculare, sed de divinis ac caelestibus dogmatibus, quae aliis commissa non sunt quam iis, quibus ipse Deus Verbum dixit: Quaecumque ligaveritis &c. Quinam autem hi sunt, quibus hoc iussum fuit? Apostoli & eorum Successores. Quinam porro sunt Successores? Qui Romanam nunc primam Sedem tenet: qui Constantinopolitanam secundam, qui Alexandrinam, & Antiochenam, & qui Hierosolymitanam. Haec quini vertex potestas Ecclesiae: penes hos divinatorum dogmatum iudicium. Imperatorum vero & Praesidium est opem ferre & comprobare quae decreta sunt, & reconciliare qui carnaliter dissident ac discrepant. Haud aliud quicquam de divinis dogmatibus, neque a Deo traditum est; nec si fiat stabit. Inde colligit, quod nequicquam frendentibus ac reluctanter Imperatoribus, & Pseudo-Synodo trecentorum triginta & octo Episcoporum, ratum fuerat Deoque probatum anathema,*

ma, quod a ceteris Patriarchis vibratum fuerat: *Propterea explosa & rejecta fuerunt circa divinarum Imaginum dogma, ea quae sub Constantino quondam, & Leone regia potentia atque audacia in Conciliabulo acta & perperam dicta sunt: quorum caussa divisa haec nostra Ecclesia fuit a ceteris quatuor, anathematismis affecta perennibus, approbante Spiritu Sancto. Post haec, Deo miserante, erectum est cornu fidei orthodoxae, magna Irene Imperium obtinente cum surculo suo; quo tempore quae divulsa erant coaluerunt usque ad proximum Leonem. Reliqua S. Confessoris verba sequenti Articulo describemus.*

## ARTICULUS II.

*De eodem argumento differitur: Ostenditur, dogma de cultu Sacrarum Imaginum propositum fuisse ab Hadriano tanquam certum ac retractioni minime obnoxium: eundemque fuisse septimae Synodi sensum; ac nullius esse momenti quae contra Bossuetius opponit.*

**N**imirum in suis ad Tarasium litteris, quas septima ipsa Synodus suscepit, jubebat Hadrianus, ut antequam Concilium celebraretur, Copronymi Pseudo-Synodus damnaretur; aperteque declarabat, eum non alia ratione frui posse Sedis Apostolicae communione, nisi doctrinae formam τῆς ἀληθείας ab Ecclesia Romana propositam amplecteretur, ac sincere & ex animo studeat, ut in suum locum sacrae Imagines restituerentur, & Christianorum cultui & obsequiis exhiberentur: *Sed vestra Sanctitas eisdem*

piissimis Imperatoribus, & triumphatoribus alacriter suggerat, ut in primis Pseudo-syllogus ille, qui sine Apostolica Sede inordinare & insyllogistice factus est adversus venerabilium Patrum traditionem contra divinas Imagines, anathematizetur praesentibus Apocrifariis nostris, & omne zizanium eradicetur ab Ecclesia, & Domini nostri Jesu Christi sermo compleatur, quia portae inferi non praevalerunt adversus eam: Et rursus: Tu es Petrus, & super hanc petram &c. Cujus Sedes in omnem terrarum orbem primatum tenens refulget, & caput omnium Ecclesiarum Dei consistit. Unde idem beatus Petrus Apostolus Domini praecepto pascens Ecclesiam, nihil dissolutum dimisit, sed tenuit semper & retinet principatum. Cui si adhaerere cupit vestra Sanctitas, & nostrae Apostolicae Sedis, quae est caput omnium Ecclesiarum Dei, sacram & orthodoxam formam incorrupte & incontaminate, ex profundo cordis & sinceritate mentis custodire studet, ut revera orthodoxa & Dei cultrix consistens hoc primum Omnipotenti Deo offerat sacrificium, ut ex persona nostra praedictorum..... Imperatorum nostrorum sublimia vestigia obsecret, & ut in conspectu Dei per terribile illos adjuvet iudicium, ut sacras Imagines in.... Regia urbe, & in omni loco in antiquum statum restituere & stabilire jubeant, conservantes traditionem hujus sacrae ac Sanctissimae Romanae Ecclesiae, & persequentes ac abominantes malignorum & haereticorum errorem per certamen vestrum & fidelem sollicitudinem: si autem sacras ac venerabiles Imagines illis in partibus non restituerint, consecrationem vestram recipere non audemus; & maxime si sectatus fueris eos, qui non credunt veritati.

Quod

Quod fieri jubebat Hadrianus, reapse praestitum est. Nam Actione I. ipso statim Synodi initio quaesitum est, quomodo recipi deberent Iconomachi, qui ad Ecclesiae Catholicae communionem admitti postularent: statutum est autem, ut non reciperentur nisi tanquam haeretici & ab haeresi revertentes; jussique sunt, quemadmodum Hadrianus statuerat, ut variis anathematismis configerentur Pseudosynodum Copronymi, tum singulos Iconomachorum errores. Haec constant ex libello seu confessione fidei, quam Basilius Ancyranus Episcopus in Synodo legit, & quae ita auspicatur: *Legislatio est Ecclesiastica canonice tradita defursum ab initio tam a Sanctis Apostolis, quam a successoribus eorum &c. ut ab haeresi quacumque ad orthodoxam confessionem & traditionem Catholicae Ecclesiae conversti, in scriptis suam abnegent haeresim, & fidem consiteantur orthodoxam. Unde & ego Basilius Episcopus Civitatis Ancyrae proponens uniri Catholicae Ecclesiae, Hadrianoque sanctissimo Ppae &c. praesentem hanc confessionem meam facio in scriptis, & offero vobis, qui ex Apostolica auctoritate potestatem sumpsistis. . . . Credo igitur & profiteor &c. Et infra: Projiciens & anathematizans ex tota anima & tota mente Synodum, quae ex stoliditate & dementia congregata, & septima Synodus nominata est &c. Et rursus: Haec ita confiteor, & bis assentior: & idcirco in simplicitate cordis recta mente, Deo mihi testimonium perhibente, hic subiectos facio anathematismos: Christianorum calumniatoribus, id est, Imaginum confractoribus, anathema. . . . His, qui non salutant sanctas & venerabiles Imagines, anathema &c. Haec quidem ita confiteor, & bis assentior, & ex tota corde, anima, & mente pronun-*

nuncio. Si vero, quod absit, ex diabolica summissione aliquo tempore voluntarie vel non voluntarie aversus fuero ab istis, quae jam professus sum, anathema sim a Patre, Filio, & Spiritu Sancto, atque a Catholica Ecclesia, seu sacro ordine penitus alienus. Similis est & ejusdem tenoris fidei libellus, quem in eadem Actione Synodo obtulit Theodosius Episcopus Ammori, cujus hoc est initium: *Confiteor, & polliceor, & recipio, amplector, atque adoro principaliter intemeratam Iconam Domini nostri Jesu Christi &c.* Et infra: *His, qui non adorant venerabiles Iconas, anathema. His, qui blasphemiam dicunt in pretiosas & venerabiles Iconas, anathema.... His, qui non docent diligenter cunctum Christi amatorem populum adorare venerabiles Iconas sacras & adorandas omnium Sanctorum, qui in saeculo Deo placuerunt, anathema. His, qui ambigui sunt, & non ex animo fatentur, se sacras Imagines venerari, anathema.* Has fidei professiones, hos anathematismos proferre iussi sunt, qui ad Ecclesiae Catholicae communionem adspirabant, antequam ulla per Synodum fidei definitio ederetur, imo antequam ulla circa fidem deliberatio fieret, antequam ullum examen institueretur: idque unum in hac prima actione quaesitum est, an & quomodo suscipiendi essent haeretici, qui ab haeresi ad Ecclesiam Catholicam revertebantur; nec dubitabant Patres, aut in quaestionem vocabant, imo pro certo habebant, Iconomachos haeticos esse, haeticam esse eorum doctrinam, & certissimum esse fidei Catholicae dogma, Ecclesiae de cultu Imaginum traditionem: quae tamen primo in disputationem venire debebant, si verum est, quod Bossuetius tantopere contendit, ideo Synodos Oecumenicas

con-

congregari, ut sacrorum dogmatum examen instituitur, de illis deliberatio & inquisitio fiat, ac postremo firmum & ineluctabile, & quod parendi necessitatem adferat, iudicium consequatur. Hic autem videre est, Iconomachos ante ullum Synodi examen pro haereticis habitos, & coactos esse priora dogmata velut haeretica abjicere ac detestari, & Ecclesiae dogma de cultu sanctarum Imaginum velut ad fidem pertinens profiteri, sibi que ipsos anathema dicere, si aliquando ab hac fidei professione discederent.

His peractis, Actione tertia lectae sunt Hadriani ad Imperatores, & ad Tarasium litterae, de quarum susceptione haec habet Illustrissimus Bossuetius: „Cum Adrianus Primus veram de colendis *ἡ εἰκών*, seu relativo cultu, Christi & Sanctorum Imaginibus doctrinam septimae Synodo per litteras, more priorum Pontificum exposuisset; Patres quoque more majorum eas litteras Synodice examinerunt. Lectis enim Epistolis duabus Sancti Pontificis, altera ad Imperatorem, altera ad Synodum; quaesitum ita est per Legatos Apostolicae Sedis: *Dicat nobis sanctissimus Patriarcha Tarasius Constantinopolitanae urbis Episcopus, si consentiat literis sanctissimi Papae senioris Romae*. Rogatus in eam formam Tarasius, consentire se profitetur. *Nam & ipsi nos, inquit, scrutando scripturas, & syllogistice approbando rimati sumus: Sic quod confessi sumus; confitemur, & confitebimur; consonamus, & vim lectarum literarum confirmamus*. Supplendum ex Graeco post; *scripturas rimati*, hoc quoque, *& patris doctrinis docti*: quod etiam vulgata & antiqua lectio retinebat.

Patet ergo, a Tarasio ita approbatas Adriani Epistolae,

„ las, quod rem iple perpendens, eas Scripturis, tradi-  
 „ tioni, eique, quam ipse ab antiquo hauserat, fidei con-  
 „ formes esse senserit, factaque inquisitione intellexerit :  
 „ post quae Tarasii verba, *sancta Synodus dixit : tota*  
 „ *sacratissima Synodus ita credit, ita sapit, ita dogma-*  
 „ *tizat* : Quibus verbis tota Synodus se Adriano auctori,  
 „ ac Tarasio ex intellecta ac perpensa ratione approban-  
 „ ti, consentire declarat ; atque ut res constaret clarius ;  
 „ a Legatis Apostolicis Synodus interrogata est in hanc  
 „ formam : *Dicat nobis sancta Synodus, si admittat lit-*  
 „ *teras sanctissimi Papae senioris Romae, an non ?* quod  
 „ de re explorata, deque irreformabili iudicio quaeri ;  
 „ neque recta ratio, neque fides finit. Ad eam rogatio-  
 „ nem sancta Synodus dixit : *Sequimur, & suscipimus,*  
 „ *& admittimus.*

Haec ideo integra descripsi, ut inde Lector intelligat,  
 quam parum tutum sit, ex sola librorum lectione, quos  
 adeo frequentes Adversarii in lucem emittunt, certum de  
 hisce controversiis iudicium proferre, nisi etiam ipsos  
 adeat fontes, & Conciliorum & Patrum textus suis ipse  
 oculis lustret. Nihil enim adeo universum Meldensis Epi-  
 scopi systema ab imis fundamentis convellit, quam haec  
 ipsa Tarasii verba, quibus Hadriani Epistolae se se recipere  
 profitetur ; dum tamen haud mutila, quemadmodum ab  
 Adversario producta sunt, ut ea in rem suam converteret,  
 sed integra referantur : Haec enim integra verba sunt ;  
 quibus Legatorum interrogationi Sanctissimus Patriarcha  
 respondit : *Sacratissimus Paullus Apostolus, qui illustra-*  
 „ *tus est lumine Christi, & genuit nos per Evangelium,*  
 „ *cum Romanis scriberet, approbans studium sinceræ fidei*  
 „ *eorum, quam in Christum verum Deum habebant, sic*  
 „ *ait :*



ait: Fideſ vestræ annuntiatur in universo mundo. Hoc TESTIMONIUM SEQUI NECESSARIUM EST, ET INCONSULTE AGIT, QUI HUIC CONATUR RESISTERE. Unde *Hadrianus praeſul Senioris Romae, quum eſſet particeps eorum, qui praedicto testimonio muniri meruerunt, scripſit expreſſe ac veraciter piis Imperatoribus noſtris, atque ad humilitatem noſtram, affirmans bene ac optime ſe habere antiquam traditionem Eccleſiae Catholicae. Nam & ipſi nos ſcrutando ſcripturas &c.* Sequuntur verba quae ſola Boſſuetius deſcripſit. Quis autem hîc non videat, duplicem adferri rationem, ob quas Hadriani Epiſtolam neceſſario ſuſcipere oportebat: quarum prior ex Eccleſiae Romanae auctoritate petebatur, cujus fidem Apoſtolus commendaverat; cujus testimonium ſequi Tarasius neceſſarium eſſe pronunciat, & inconſulte agere, qui illi conantur reſiſtere? Itaque ne Paulo Apoſtolo contradicat, ne illius testimonio reſiſtat, Eccleſiae Romanae fidem ac traditionem Hadriani litteris expoſitam, ſe ſe amplecti, ſequi ac ſuſcipere profitetur. Alteram vero rationem inde Tarasius petebat, quod ipſe etiam ſcrutando ſcripturas & veterum Patrum traditionem; his conſonum eſſe perpenderat ſacrarum Imaginum cultum, quem ſuis Hadrianus litteris commendabat. Hanc Tarasii reſponſionem univerſa Synodus probavit, & amplexa eſt. Inde autem luce clarius ac maniſeſtius apparet, quam nullius roboris ac momenti ſit argumentum, quod Boſſuetius toties inculcat ex eo derivatum, quod Romanorum Pontificum epiſtolae ideo a Conciliis probatae ac ſuſceptae ſunt, quod eas Patres Scripturarum ac Patrum testimoniis conſonas repererunt. Patet enim ex adlatis Tarasii verbis, quod haec ratio alteram non oppugnat aut labefactat,

quae ex Sedis Apostolicae auctoritate petitur. Ac profecto, si ea tantum ratione suscipiendae essent Romanorum Pontificum Epistolae, quod eas legitimo praemisso examine, Scripturarum ac Patrum testimoniis consonas judicamus, & non etiam propria auctoritate valerent, neque ut hic docet Patriarcha Tarasius, parendi necessitatem adferrent; antequam Patres in hac septima Synodo Hadriani litteris subscriberent, audire debuissent ac sedulo examinare sacrarum litterarum ac Sanctorum Patrum de cultu Imaginum testimonia: quod tamen factum non est; sed antea, hoc est, Actione secunda Hadriani litteris subscripserunt; postea vero, hoc est, Actione quarta Tarasius Synodo suavit, ut sacrarum librorum & veterum Patrum testimonia in medium adducerentur, ac sedulo examinerentur: quod utique alio spectare non poterat, quam ad ampliorem jam notae & creditae veritatis manifestationem: quod & ipsa Tarasii verba haud obscure significant. Sic enim ait: *Per antecedentes proxime actiones, flatu Domini omnitenentis nos docente secundum Proverbiatorem, veritatem meditatam est guttur nostrum; quia litteris, quae lectae sunt Sanctissimorum Virorum, Orientis videlicet & Occidentis, concordantes effecti sumus.* Itaque de veritate doctrinae, quam Epistolae continebant, quas ipso praeunte Synodus universa susceperat, Deique omnipotentis spiritu adflata probaverat, nullatenus ambigebat. Quid ergo petit, ut in medium adferantur Sanctorum Patrum volumina? ut nimirum *ex ipsis*, inquit, *haurientes potemus singuli gregem nobis commissum.* Taliter enim & *in omnem terram exhibit sonus noster, & in fines terrae verborum virtus nostrorum: pro eo quod non transferimus terminos, quos posuerunt Patres nostri; sed Apostolice*

*ſtolice docti, tenemus traditiones, quas accepimus.* Id eſt, hoc pacto compertum omnibus erit, ipſique etiam rebelles ac refractarii ſuis explorabunt oculis, quod nequaquam veterum Patrum traditiones exploſimus, quum litteris Hadriani ſubſcripſimus.

Confirmari haec poſſunt ex iis, quae in ſexta Aſtione peracta ſunt: lecta ſunt enim dearticulate praedatoriae Synodi acta, quae Conſtantinopoli Conſtantino Copronymo auctore, celebrata fuerat; lecta ſunt, inquam, ejuſmodi acta cum ſatis proluxa ad ſingula capita Epiphanii Diaconi conſutatione: at vero iubente Hadriano, totaque Synodo conſentiente, repetitis anathematifinis jam pluries conſixa fuerant dirisſque devota cuncta illius Pſeudo-Synodi geſta. Quo ergo referri potuit haec amplior eorum diſcuſſio & refutatio, niſi ut magis conſtaret de aequitate iudicii, quod in adulteram legitima Synodus protulerat?

Ex his porro colligitur, nihil pariter ad praefentem controverſiam roboris ac momenti eſſe in iis quae Boſſuetius ſubjungit; quorum ſumma eſt, juxta ſeptimae Synodi definitionem „ſummam & ineluſtabilem certitudinem in Eccleſiae Catholicae conſenſione, immo in Spiritus Sancti univerſam Eccleſiam docentis magiſterio eſſe poſitam. Quis vero Catholicorum ignorat, aut negat, univerſam Eccleſiam in iis quae ad fidem & mores pertinent, errare non poſſe, ejuſque de his rebus firmum eſſe & ineluſtabile iudicium? Itaque ſacrae Synodi verbis, quae Boſſuetius refert, & hanc continent certiffimam veritatem, utroque pollice ſubſcribimus. Verum, ipſomet auctore Tarasio, & ejuſdem aevi illuſtriſſimo Confeſſore ac fidei & veritatis invicto praecone & athleta S. Theodo-

ro Studitâ, praeterea docemus, tum firma esse & indeclinabilis auctoritatis Ecclesiae universae judicia, quum illis tamquam caput Romanus Pontifex praestit; quum eo auctore fiunt, perinde ac si Petrus ipse vel ipse Christus adesset; denique quum ejus decretis ac doctrina velut oculo diriguntur. Ejusmodi fuisse latum a septima Synodo in Iconomachos judicium, & conscriptam ab ipsa de cultu Imaginum definitionem, docet nos ipse Tarasius in Epistola ad Hadrianum Actione octava ipsius septimae Synodi in haec verba: *Quum omnes sedissemus, caput fecimus Christum. Jacebat enim in sancta sede Evangelium sanctum &c.* Et quum praelatae primitus vestrae fraternae Sanctitatis litterae legerentur, communi considebamus corona, spiritualibus eduliis tanquam in regalibus coenis fruantes, quae Christus per literas tuas epulantibus prae-parabat: & sicut oculus totum corpus rectitudinis & veritatis semitam ostendebas. Sic ergo dirupta membra in unum conveniebant; sic vera consonantia confirmabatur; sic Catholica Ecclesia unitatem recipiebat. Deinde illud etiam adjungimus, quod superius idem Tarasius docuit; ex sola quoque Romanae Ecclesiae ac Romani Pontificis auctoritate parendi necessitatem adferri; & siquidem in Synodum coalescere non possit universa Ecclesia, aut vero id non expediat, ex solo Romano Pontifice petendam esse & accipiendam fidei Catholicae certitudinem; quemadmodum sequentibus verbis aperte docet S. Theodorus Studites epistola superiori articulo laudata ad Leonem Saccellarium: *Fieri ergo nulla ratione potest, Domine, . . . . ut coalescat haec Ecclesia, non consentientibus quinque Patriarchis. Quod si roget quispiam, quo pacto id fieri possit? Si excedant, inquam, Dei Ecclesiis heterodoxi;*  
 & pro-

Et propriam sedem recipiat quondam Nicephorus sacer Patriarcha. Qui coacto eorum conventu, cum quibus certamen sustinuit; (si fieri non possit, ut ab aliis Patriarchis adsint Vicarii; quod certe fieri potest, si velit Imperator Occidentalem adesse, cui et potestas summa defertur Synodi Oecumenicae;) attamen pacem conficiat et conjunctionem, Synodicas suas ad primae Sedis Praesulem mittendo. Quod si hoc minime probet Imperator; deflexitque, ut ipse ait, a veritate Nicephorus Patriarcha; mittenda est ad Romanum ex utraque parte legatio, ET INDE FIDEI ACCIPIENDA EST CERTITUDO. καὶ ἔτι διὰ τὸ ἀσφαλὲς τῆς πίστεως. Quid clarius? Ἀσφαλὲς, certum, immobile, quod labefactari non potest, quod postremo denique aevo, ut ipse Bossuetius monet, re antiqua, novo vocabulo, *infallibile* appellatum est. Itaque si universa Ecclesia, quinque praeiunctis Patriarchis, in Synodum convenire non poterat, ex Romano Pontifice petenda erat & accipienda immobilis & irretractabilis, & *infallibilis* fidei certitudo.

## CAPUT XXXI.

- „ Galli Synodum septimam, seu Nicaenam se-  
 „ cundam Adriano Praefide habitam pro oecu-  
 „ menica non habent, eo quod ad illam nec  
 „ ipsi, nec alii Occidentales vocati essent;  
 „ Egregius ea de re Jacobi Sirmundi locus:  
 „ Romanorum Pontificum de Gallis sententia.

**G** Allos olim septimam Synodum repudiasse, com-  
 pertum omnibus est; cur autem repudiarint, ejus-  
 que



que Synodi decretis repugnarint „ causa , inquit Bossuetius, fuit, non quod de Synodi oecumenicae auctoritate dubitarent; sed quod Nicaenam secundam ad quam vocati non essent, pro Oecumenica non agnoscebant: immo in Francofordiensi Synodo, ex Galliae ac Germaniae Ecclesiis congregata, praesentibus etiam Romanae Ecclesiae Legatis, respuebant: quod quia maxime ad rem nostram spectat diligentissime considerare nos oportet. Et nos etiam totam hanc rem satis implexam, & partium studio densissimis tenebris involutam, pro virili illustrare conabimur. Quamquam enim Meldensis Episcopus, se illam diligentissime pertractaturum spondeat; attamen ea tantum per summa capita delibat; quae illius causam juvare posse videntur; pluribus omis- sis, quae aliam profecto huic negotio faciem induent, si diligenter ac sedulo perpendantur.

## ARTICULUS PRIMUS.

*Septima Synodus, Nicaena secunda, reapse oecumenica fuit: & olim Galli immerito hunc illi titulum denegarunt.*

**S**I quae haecenus cum in Oriente tum in Occidente opinio ac disciplina obtinuerat, deposito partium studio consideretur, aperte nobis constabit, id unum absolute ad Synodum oecumenicam celebrandam sufficere visum esse, ut quod pertinet ad Orientales, de quorum damnandis erroribus agebatur, primarum Sedium Episcopi vel per se ipsos, vel per suos Vicarios, reliquorum vero insignis aut notabilis numerus interessent. Quod vero  
ad

ad Occidentales id unum sufficere visum est, ut eis Sedes Apostolica per suos Vicarios praeesset. Hac certe opinione Tarasius, & Orientis Imperatores imbuti erant; quum Synodum oecumenicam celebrare volentes, id unum ex Hadriano petierunt, ut suos in Orientem Legatos mitteret: Ita enim apud Constantinum & Irenem in Epistola ad Patres secundi Concilii Nicaeni Tarasius loquitur: *Et quia Synodum universalem posco fieri, dum Vicarii tam a Papa Romano, quam ab Orientis Principibus Sacerdotum inveniuntur.*

Eadem quoque Hadriano Papae mens inerat, quum acceptis Imperatorum & Tarasii litteris de Oecumenica Synodo celebranda; satis & ipse esse putavit, si suos ex Occidente Legatos mitteret; nec alias Ecclesias hac de re sollicitandas existimavit: Porro, inquit S. Pontifex Tarasius scribens, *post confessionem fidei vestrae notum factum est nobis, quod vestra venerabilis sanctitas postulaverit ab . . . . Imperatoribus nostris, qui ad gloriam Dei facti sunt, quo fieret universalis Synodus; & repromiserint coram omni Christiano populo suo, supplicationi vestrae pie annuentes, Synodumque in Regia urbe fieri desinientes. Nos autem, quemadmodum in ipsorum Diva continebatur iussione, dilectos nobis & approbatos atque prudentes Sacerdotes pro statu sacrarum Imaginum, ut prisco illis in partibus ordine constituantur, cum magno desiderio & maximo gaudio destinavimus.*

Tertio idem colligitur ex litteris Tarasii ad Summos Sacerdotes, id est, Patriarchas Alexandriae, Antiochiae, & Hierosolymae, ubi quum antea dixisset; *Ab Imperatoribus Synodum universalem petivimus; & postulationi nostrae pie annuerunt;* postea subjungit: *Unde rogamus*  
San-

*Sanctitatem vestram usque ad duos loci servatores ( seu Vicarios ) mittere , cum Deiloqua epistola sua . . . Id ipsum enim & a Praefule senioris Romae petivimus . Quod proinde sufficere existimabat , ut oecumenica Synodus haberetur .*

Hoc ipsum sentiebant & ipsimet Orientales in suis ad Tarasium litteris , quae cum illis Tarasii probatae sunt Actione tertia septimae Synodi : *Ne molesta* , inquiunt , vobis appareat trium Apostolicarum Sedium almorum Patriarcharum , & sanctissimorum Episcoporum , qui sub ipsis degunt absentia , non ex proprio eorum accidens proposito &c. Hoc autem subtilius est considerandum , etiam ab ipsa sacra & universali sexta Synodo , in qua nullus eorum , qui per idem tempus in his partibus Episcopi erant , convenisse repertus est propter obscoenorum obtinentiam. Sed nullum ex hoc sanctae adbaesit Synodo praedictum . . . . praecipue quum sanctissimus & Apostolicus Papa Romanus concordaverit , & in ea inventus sit per Apocrifarios suos. Et nunc sanctissimi, hoc cum auxilio Dei similiter fiat . Nam sicut tunc illius fides in orbis terrae personuit fines ; ita & Synodi , quae nunc per gratiam Dei congreganda est per interventionem vestram , & ejus qui moderatur Apostolorum Principis sedem , praedicabitur in omni loco , qui sub sole est ; videlicet ; quae tyrannice destructa sunt erigens , & in antiquam & Apostolicam reformans traditionem. Synodum sextam inter oecumenicas recensitam fuisse animadvertunt , propterea quod ejus decretis Romanus Pontifex consenserat ejusque dogmata confirmaverat , eique per suos Legatos siue Apocrifarios adfuerat . Quamquam autem illi & Legati totius Occidentis interfuerant , horum tamen nullam men-



mentionem faciunt, rati sufficere Romani Pontificis per suos Legatos praesentiam: quemadmodum & septimam hanc Synodum velut oecumenicam habendam esse pronunciant, propter solam ex Occidente interventionem ejus, qui moderabatur, Apostolorum Principis Sedem.

Johannes Diaconus Actione sexta hujusce septimae Synodi ex eo probat, habitam Constantinopoli sub Constantino Copronymo Pseudo-Synodum, falso se se ac nullo jure oecumenicam praedicasse, quamvis illi ingens Episcoporum numerus, idest trecentorum triginta & octo interfuerat, propterea quod eam *neque receperunt, neque concordaverunt reliquarum Praesules Ecclesiarum, sed anathemati hanc transmiserunt*. Quinam vero sunt illi Ecclesiarum Praesules, quorum dissensione factum est, ut irrita essent quae tot Episcopi constituerant, & celebratum ab eis Concilium vim oecumenicae Synodi non haberet? Ex Oriente quidem tres Patriarchas commemorat; ex Occidente vero solum Romanum Pontificem, & Sacerdotes qui circa ipsum erant, τῶν περὶ αὐτὸν ἱερέων, hoc est qui Romanum Clerum, aut qui veluti Romano Pontifici familiarem eique tunc jugiter adhaerentem Synodum constituebant: *Non enim habuit adiutorem illius temporis Romanorum Papam, vel eos qui circa ipsum sunt Sacerdotes, nec etiam per Vicarios ejus, neque per encyclicam epistolam, quemadmodum lex dicitur Conciliorum. Sed nec consentientes sibi Patriarchas Orientis, Alexandriae scilicet, Antiochiae, & sanctae Civitatis, vel comministros & Summos Sacerdotes, qui cum ipsis existunt*.

Eandem legem, seu veterem morem, juxta quem legitima Synodus absque Romani Pontificis consensione

celebrari non poterat, commemorat etiam S. Theodorus Studites lib. I. Epistola XXXIII. ad Leonem III. ubi queritur, a Moechis, sive adulterarum Imperatoris nuptiarum approbatoribus haeticam fuisse Synodum coactam, qui *ne orthodoxam quidem*, inquit, *absque cognitione vestra; ut antiquus mos obtinet, cogere potuerunt*. Qui etiam in alia Epistola superius laudata ad Leonem Sacellarium satis aperte significat ad Synodum oecumenicam satis esse, *ut ab aliis*, hoc est *Orientis Patriarchis adsint Vicarii . . . .* & *Occidentalem interesse*, cui, inquit, & *potestas summa defertur Synodi oecumenicae*.

Denique ipsa secunda Nicaena Synodus, cui cum Tarasio Regiae Urbis Patriarcha, religiosissimi duo Monachi Johannes & Thomas, qui sedium Orientalium locum tenebant; & Episcopi CCCL. eximii vitae sanctitate, eruditionisque praestantia; & Archimandritae multi cum Monachis quamplurimis, qui Patrum confessum sanctitatis & doctrinae splendore magnifice decorabant; clarissimi item Senatores aliquot missi ab Imperatoribus, interfuerunt; tanta, inquam, Synodus ubique se se Oecumenicam vocat. Quod quamquam, ut ait Bossuetius, Gallos offendit; patietur tamen, nos aliquot Episcoporum Galliae opinioni, (quorum, ut deinceps ostendemus, hac de re nullius momenti apud nos ob plures rationes esse debet auctoritas) tantorum Virorum ac tantae Synodi praeferramus auctoritatem; quibus persuasum erat, ad Synodum oecumenicam constituendam satis esse, ut illi ex Occidentalibus solus Romanus Pontifex per suos Legatos adesset.

## ARTICULUS II.

*Ex rejecta per Gallos Nicaena secunda Synodo  
nihil confici potest adversus Sedis Apostolicae  
summam & indeclinabilem auctoritatem.*

**P**Robatur eadem ratione, qua Bossuetius probat, ex repudiata per Gallos hac ipsa Nicaena Synodo nequaquam labefactari Conciliorum generalium auctoritatem; „ Cur enim, *inquit*, Patres nostri Ecclesiae Gallicanae „ Praefules ejus Synodi decretis repugnarent, causa erat; „ non quod de Synodi oecumenicae auctoritate dubitarent; sed quod Nicaenam secundam, ad quam vocati „ non essent, pro Oecumenica non agnoscebant: proindeque ita eos in hac quaestione versatos esse, etiam Sirmundus Bossuetio laudatus animadvertit, ut sibi non cum oecumenico Concilio, sed cum peculiari Graecorum Synodo, rem esse contenderent. Hac ergo eadem ratione probamus ex rejecta per Gallos Nicaena Synodo nihil colligi posse ad labefactandam summam & inconcussam Sedis Apostolicae in dirimendis fidei controversiis auctoritatem. Quum enim Nicaenam Synodum Gallicani Praefules impetebant, non modo eam pro Oecumenica non habebant; ac propterea nihil ex eorum in hanc Synodum disputationibus confici potest adversus generalium Conciliorum auctoritatem; verum & a Romano Pontifice nondum solenni ritu probatam & confirmatam acceperant: quare servata ea quae debetur Sedi Apostolicae reverentia, eam a se rejici posse existimabant.

Hadrianus sub finem Epistolae, quam pro Nicaenae

Synodi defensione scripsit ad Carolum Magnum, certiorum eum reddit, quemadmodum se cum Orientalibus in hac causa hactenus gesserit. Narrat enim, se Legatos misisse Constantinopolim Petros duos, qui *statim Concilium fieri jusserunt: sed ab haereticis seditione facta, in Sicilia Insula Missi nostri sine responso reversi sunt: Et demum post eos mittentes, iterum Constantinopolim eos ascendi fecere. Et sic Synodum istam secundum nostram ordinationem fecerunt, et in pristino statu sacras et venerandas Imagines erexerunt. Ita factum esse dicit, ut haeretici Imaginum eversores ad fidem orthodoxam sanctae Catholicae et Apostolicae Ecclesiae reversi sint. Et ideo ipsam suscepimus Synodum. Nam si eam minime recepissemus, et ad suum pristinum vomitum erroris fuissent reversi, (hoc est ad Imagines abolendas) quis pro tot millium animarum Christianarum interitu habuit reddere rationem ante terribile tremendum divini Judicis examen, nisi nos solummodo? Mox ista subjungit: Nos vero adhuc pro eadem Synodo nullum responsum eidem Imperatori reddidimus: metuentes, ne ad eorum reverterentur errorem.*

„ Quibus verbis; inquit Petavius (a), in-

„ dicat Hadrianus, se Nicaenam illam quidem Synodum

„ approbasse: nondum tamen publico, &, ut Juriscon-

„ sulti loqui solent, authentico testimonio ratam habuisse:

„ se: quam posteriora tempora Bullam instituere dicere.

„ Cujus rei illud etiam argumento esse potest, quod Acta

„ Synodi ejusdem ad Carolum misit in Gallias, ac de illis

„ conventum Episcoporum indici praecepit, ut testatur

„ Hincmarus. Nondum ergo pro Oecumenica eam habendam esse decreverat, quando ad Carolum illius

„ Acta

(a) Tom. VI. Theolog. Dogmat. lib. XV. cap. XII. num. VI.

- „ Acta destinavit, & Carolini Operis auctor ejusdem Synodi refutationem elucubravit: quod post triennium ab Nicaena peracta Synodo, hoc est anno Christi 790: contigisse, Rex ipsemet in Praefatione demonstrat; quinto antequam Francofurtum convenirent Episcopi.

Hincmarus, quem Petavius laudat, haec habet de septima Synodo in Opusculo quinquaginta Capitulorum ad Hincmarum Laudununensem Capitulo vicesimo: *Septima vocata universalis Pseudo-Synodus de Imaginibus; quas quidam confringendas, quidam autem adorandas dicebant; neutra vero pars intellectu sano diffiniens sine auctoritate Apostolicae Sedis, non longe ante nostra tempora, Constantinopoli est a quampluribus Episcopis habita, & Romam missa: quam etiam Papa Romanus in Franciam direxit. Unde tempore Karoli Magni Imperatoris, jussu Apostolicae Sedis, generalis est Synodus in Francia, convocante praefato Imperatore, celebrata; & secundum scripturarum tramitem traditionemque Majorum, ipsa Graecorum Pseudo-Synodus destructa, & penitus abdicata. De cujus destructione non modicum volumen, quod in Palatio adolescentulus legi; ab eodem Imperatore Romam est ad quosdam Episcopos missum. Ex quibus verbis merito laudatus Petavius colligit, quod quum Patres Francofordienses Nicaenam Synodum, vel ei potius falso affectam Interpretis dolo vel imperitia doctrinam, improbabant, nondum oecumenicam & ab Hadriano probatam esse sciebant; utpote cujus ad illos Acta miserat Pontifex, utique considerata & recognoscenda, ut ex adlatis Hincmari verbis apparet.*

Eadem quoque Nat. Alex. observat Dissert. VI. in Histor. saec. VIII. §. VIII. Francofordienses Patres nihil;

in-

*inquit*, se remittere arbitrati sunt de observantia erga Sedem Apostolicam sua, rejiciendo Synodum, quam Oecumenicam non censebant, & quae ab ipso Pontifice sollemniter confirmata non erat: Licet enim Synodum septimam suscepisset Hadrianus, non tamen eam confirmaverat sollemni more, missa ad Imperatores, & ad omnes totius orbis Ecclesias Epistola. Id testatur ipse in Epistola Apologetica pro cultu Imaginum ad Carolum Magnum. *Et infra*: Ex his quae superius diximus, constat, quam leviter & temere Anonymus quidam ex Protestantium grege dissertator (Dulix Carentonicus Minister is esse dicitur) Conciliorum universalium a Romano Pontifice confirmatorum definitiones ad examen revocari posse, colligat ex libris Carolinis, & ex Synodis Francofordiensi & Parisiensi, ex Jona Aurelianensi, Dungalo, Agobardo, Hincmaro &c. qui Synodum septimam rejecere. Cum enim illam pro Oecumenica non haberent, nec eam ritu sollemni confirmasset Hadrianus Papa, nec ejus Successores ad eam recipiendam Gallos, Germanos, Britannos, Italosque Praefules urgerent oeconomia quadam; inde argumentum duci non potest, quo probetur, licere Synodorum Oecumenicarum (*a Pontifice sollemniter confirmatarum*) definitiones ad examen revocare. Certe Pontifices Hadriani successores Synodum Nicaenam II. inter Oecumenicas non statim computasse, fatetur Anonymus ille Calvinista, laudatque Nicolaum I. & Romanam sub ipso Synodum anno 867. habitam, sex tantum Synodos universales numerantem: *Auctoritate*, inquit, *Principis Apostolorum Petri & Pauli, atque venerandorum sex universalium Conciliorum, omni caritatis officio exutus sit*. Epistolam quoque ejusdem Pontificis ad Adonem

Vien-

Viennensem laudare potuisset: cum enim initio sui Episcopatus fidei suae Professionem ad Nicolaum I. direxisset, professus se probare quatuor Synodos generales, nulla ceterarum mentione facta, ita ipsi rescribit Nicolaus... *Volumus, pariterque Sanctitatem vestram rogamus, ut sub omni celeritate dirigatis, qualiter vos de ipsa quinta & sexta Synodo sentiatis.* Qua in Epistola nullam mentionem facit septimae Synodi Nicolaus I. &c. Hadrianus quoque II. Epistola XXXIV. quae est ad Carolum Calvum, sex tantum Synodos universales recenset... Denique quamvis Galli Germanique Praefules jure egissent, cum Nicaenam Synodum II. improbavere, ac rejecere (quod tamen non concedimus) non sequeretur, jure Lutheranos & Calvinistas Tridentinam Synodum ad examen revocare ac rejicere, ut contendit Anonymus Dissertator. Synodum namque Nicaenam II. Romani Pontificis auctoritate celebratam, ejusque definitionem Legatis ejus suffragantibus editam dubitabant Galli & Germani Praefules: unde necesse habuit Hadrianus I. Carolum Magnum ea de re facere certiore in Epistola Apologetica, in qua etiam, ut vidimus, eam a se nondum sollemniter confirmatam fuisse significabat, quamvis susceptam fateatur: *Ipsam, inquit, suscepimus Synodum: sed, adhuc pro eadem Synodo nullum responsum eidem Imperatori reddidimus.* Ex quibus verbis elicitur, multum interesse inter ea, quae Romani Pontifices privatim, & quae sollemniter probant; nec esse ejusmodi distinctionem, inter ea quae privato judicio fiunt, & quae sollemniter, vel ut modo loquimur, ex Cathedra definiuntur; non esse, inquam, ejusmodi distinctionem, ut Adversarii contendunt, recentium Romanae Curiae Theologorum inventum.

Pro-

Profecto quod pertinet ad Francofordienses Patres , & Carolini Operis auctorem, adfirmare omnino debemus, eos nequaquam cogitasse, quum Nicaenam Synodum oppugnabant, rem sibi esse cum Apostolica Sede, aut ejus a se decreta convelli, aut impeti auctoritatem. Nam in eo ipso Concilio, in eo ipso Opere, quo Nicaenam Synodum aggrediuntur; Sedis Apostolicae auctoritatem summo opere colunt ac venerantur, illius judicio suos Canones ac decreta subjiciunt, illam se in omnibus sequi profitentur; in ejus fide ac doctrina nec maculam nec rugam agnoscunt; eam in fidei quaestionibus consulendam, ejusque judicio indivulsa adhaerendum esse docent; denique ipsas quoque Ecclesiae Romanae ceremonias in officio Ecclesiastico, in celebratione Missarum, in Cantu, aliisque ritibus Ecclesiasticis se nuper amplexos esse gloriantur. Paulinus Patriarcha Foro-Julien-sis, & alii Praefules ex Italia ad Francofordiensem Synodum convocati, sub finem litterarum, quas Episcopis Hispaniae scribunt, sententiae contra haereticos prolatae subjungunt haec verba: *Reservato per omnia juris privilegio Summi Pontificis Domini & Patris nostri Hadriani primae Sedis beatissimi Papae.* Et Carolus Rex in litteris ad eosdem Episcopos Hispaniae testatur, consultum a se Romanum Pontificem de causis in Concilio postea tractatis: *Jussimus*, inquit, *Sanctorum Patrum Synodale ex omnibus undique nostrae ditionis Ecclesiis congregari Concilium..... Imo & ad beatissimum Apostolicae Sedis Pontificem de hac nova inventione nostrae devotionis ter quaterque direximus Missos, scire cupientes, quid Sancta Romana Ecclesia, Apostolicis edocta traditionibus, de hac respondere voluisset inquisitione.* Ac paullo post, quanti faciat antiquas traditiones

&amp; ju-



& judicium Sedis Apostolicae, sic edocet: *Apostolicae Sedi & Catholicis traditionibus tota mentis intentione, tota cordis alacritate me conjungo. Quidquid in illorum legitur libris, qui divino Spiritu afflati, toti orbi a Deo Christo dati sunt Doctores, indubitanter teneo.* Haec autem, inquit Cointius (a), quomodo convenire possunt cum anathemate, quod contra Synodum Nicaenam secundam in Concilio Francofordiensi prolatum dicitur? Episcopos Synodi Francofordiensis in tam parva non habemus existimatione, ut eos aliter sensisse, aliter locutos esse censeamus. Absit igitur, ut tam praeclaros Antistites, Carolumque Regem Catholicum, secundae Synodo Nicaenae coram Legatis Summi Pontificis arbitremur adversatos esse, vel ipsi Hadriano Papae restitisse. Unde colligit laudatus Auctor, non secundam Nicaenam pro cultu sacrarum Imaginum Catholicam Synodum, sed aliam adversus eandem Constantinopoli ab Haereticis celebratam, Francofordienses Patres damnasse. Quae tamen opinio paucos hodie defensores habet. Quare id potius dicendum, Nicaeni decreti damnationem ideo cum laudatis textibus convenire, quod nondum illud ab Ecclesia Romana probatum esse sciebant; imo, ut deinceps ostendemus, prout ipsis exhibitum fuerat, ejusdem Ecclesiae Romanae traditionibus adversari merito videbatur.

Sed longe luculentiora sunt verba, quibus Carolini Operis auctor suam in Sedem Apostolicam observantiam testatam esse voluit. Nihil enim, ut etiam Nat. Alexan. animadvertit, dici potest magnificentius de Romanae Sedis Summique Pontificis Primatu, de ejus in causis fidei judicandis praerogativa & summa auctoritate, de necessi-

To. I. Par. II.

E

tate

---

(a) Tom. VI. Annal. Eccl. Franc ann. 794. num. XXXVI.

tate fovendae cum Ecclesia Romana & Apostolica Sede  
 communionis, quam quod lib. I. cap. VI. ex Gallicanae  
 & Germanicae Ecclesiae sententia scriptum est : „ Ante-  
 „ quam discutiendorum testimoniorum, quae absurde  
 „ Orientales in sua Synodo taxaverunt, sylvam ingre-  
 „ diamur, dignum duximus, ut qualiter Sancta Romana  
 „ Ecclesia ceteris Ecclesiis a Domino praelata, & a Fide-  
 „ libus consulenda sit, prosequamur. Praesertim quum  
 „ non ab aliis scripturis, nisi ab his, quas illa inter Ca-  
 „ nonicas recipit, testimonia sint sumenda; nec aliorum  
 „ Doctorum, nisi eorum, qui a Gelasio, vel ceteris illius  
 „ Sanctae Sedis Pontificibus suscepti sunt, dogmata sint  
 „ amplectenda. *Et recensito Sancti Augustini testimo-*  
*nio, subjungit:* „ Nam cum hic cunctis per orbem con-  
 „ stitutis sedibus Apostolicas generaliter praeferat Sedes;  
 „ multo magis illa omnibus praeferenda est, quae etiam  
 „ ceteris Apostolicis Sedibus praelata est. Sicut igitur  
 „ ceteris Discipulis Apostoli, & Apostolis omnibus Pe-  
 „ trus eminet: ita nimirum ceteris Sedibus Apostolicae,  
 „ & Apostolicis Romana eminere dinoscitur. Haec enim  
 „ nullis Synodicis constitutis ceteris Ecclesiis praelata  
 „ est, sed ipsius Domini auctoritate primatum tenet di-  
 „ centis: *Tu es Petrus, & super hanc petram aedificabo*  
*Ecclesiam meam* &c. . . . Haec ergo sanctae fidei spiri-  
 „ tualibus munita armis, & a fonte lucis & origine boni-  
 „ tatis salutaribus satiata fluentis, & horrendis atrocibus-  
 „ que haeresum obsistit monstris, & melliflua praedica-  
 „ tionis pocula Catholicis per orbem ministrat Ecclesiis:  
 „ Nam beatissimus Hieronymus vir divinis legibus, &  
 „ multarum linguarum peritia eruditus, dum Bethleemi-  
 „ ticis moraretur in arvis; & a B. Damafo Romae posito  
 „ de

„ de difficilibus consuleretur quaestionibus, cum pro  
„ caussis fidei vice versa consuluisse dinoscitur: & sive  
„ tacendarum sive dicendarum hypostascon, vel quibus  
„ in Orientalibus partibus communicare debeat, humil-  
„ limis apicibus, ut apices accipiat, deprecatur.....  
„ Unde datur intelligi, sanctos & eruditos viros per di-  
„ versas mundi partes praedicationis & scientiae lampade  
„ coruscantes, non solum a Sancta Romana Ecclesia  
„ non recessisse, sed etiam tempore necessitatis ob fidei  
„ corroborationem ab ea adjutorium implorasse. Quod  
„ regulariter, ut praefati sumus & exemplis docuimus,  
„ omnes Catholicae debent observare Ecclesiae, ut ab ea  
„ post Christum ad muniendam fidem adjutorium pe-  
„ tant, quae non habet maculam, nec rugam, & porten-  
„ tosa haeresum capita calcit, & fidelium mentes in fide  
„ corroborat. A cujus sancta & veneranda communione  
„ multis recedentibus, nostrae tamen partis nunquam re-  
„ cessit Ecclesia; sed ea Apostolica eruditione instruente,  
„ & eo a quo est omne donum optimum & omne datum  
„ perfectum tribuente, semper suscepit reverenda charis-  
„ mata. Quemadmodum nihil magnificentius dici potuit  
ad commendandam Sedis Apostolicae auctoritatem; ita  
nihil procacius, nihil contumeliosius, nihil atrocius ad-  
versus haeticam Synodum proferri potuit, quam quod  
iste Auctor in Nicaenos Patres effutiit. Non igitur no-  
verat eam Synodum ejusque fidem ac doctrinam a Roma-  
no Pontifice rite probatam, vel a Sede Apostolica sollem-  
niter confirmatam. Quid enim absurdius animo fingi pos-  
set, quam ut sub ipsum Operis initium adeo magnificis  
verbis doceret, in fidei quaestionibus esse Sedem Aposto-  
licam consulendam; & Majorum exemplo probaret id esse

amplectendum quod ipsa tradit; id esse improbandum quod ipsa improbat; id esse tacendum vel dicendum quod ipsa praescribit; nullamque in ejus fide ac doctrina maculam esse vel rugam: in ipso autem Opere Synodum ac doctrinam ab ipsa Romana Ecclesia probatam, ac sollemniter confirmatam, velut haeticam & Idololatricam infrunito ore proscinderet? Sed longe ad nostrum propositum majoris momenti sunt quae sequuntur: „Quae (*nostrae*  
 „ *partis Ecclesia*) dum a primis fidei temporibus cum ea  
 „ perstaret in sacrae religionis unione, & ab ea paullo distaret, quod tamen contra fidem non est, in Officiorum  
 „ celebratione, venerandae memoriae Genitoris nostri,  
 „ Illustrissimi atque Excellentissimi Viri Pipini Regis  
 „ cura & industria, sive adventu in Gallias Reverentissimi  
 „ & Sanctissimi Viri Stephani Romanae Urbis Antistitis, est ei etiam in psallendi ordine copulata: ut non  
 „ esset dispar ordo psallendi, quibus erat compar ardor  
 „ credendi: & quae unitae erant unius sanctae legis sacra  
 „ lectione, essent etiam unitae unius modulationis veneranda traditione: nec sejungeret officiorum varia celebratio, quas conjunxerat unice fidei pia devotio.  
 „ Quod quidem & nos conlato nobis a Deo Italiae Regno fecimus, Sanctae Romanae Ecclesiae fastigium sublimare cupientes, Reverentissimi Papae Hadriani salutaribus exhortationibus parere nitentes; scilicet ut plures illius partis Ecclesiae, quae quondam Apostolicae Sedis traditionem in psallendo suscipere recusabant, nunc eam cum omni diligentia amplectantur: & cui adhaeserant fidei munere, adhaereant quoque psallendi ordine: quod non solum omnium Galliarum Provinciae, & Germania, sive Italia, sed etiam Saxoniae, &  
 „ quae-

„ quaedam Aquilonaris plagae Gentes, per nos Deo an-  
 „ nuente ad verae fidei rudimenta conversae, facere no-  
 „ scuntur; & ita Beati Petri Sedem in omnibus sequi cu-  
 „ rant, sicut illo pervenire quo ille Clavicularius exstat;  
 „ desiderant. Ad quam beatitudinem nos pervenire, &  
 „ in Sanctae Ecclesiae consortio & unione ille nos faciat  
 „ perseverare, qui Ecclesiam suam in Petro dignatus est  
 „ fundare: & ipso interveniente, cujus Cathedrae sumus  
 „ sequaces, regni caelorum cujus ille claviger factus est,  
 „ mereamur effici compotes. Qui cum Romana Eccle-  
 „ sia Sedeque Apostolica non modo in fidei dogmatibus;  
 „ verum & in ordine psallendi & in Officiorum celebratio-  
 „ ne consentiebant, atque ea re gloriabantur; iine *de re*  
*maxima*, ut ait Bossuetius, *nempe de interpretandis pri-*  
*mae tabulae praeceptis* ab eadem Sede Apostolica dissen-  
 „ tirent; exploderentque Synodum, quam ab Hadriano Re-  
 „ gni caelorum Clavigeri successore sollenniter confirma-  
 „ tam acceperant? Nemo profecto id sibi unquam persua-  
 „ deat. Ac proinde, quemadmodum Ecclesiae Gallicanae  
 „ Praefules Nicaenam Synodum rejiciendo, Concilii Oecu-  
 „ menici auctoritatem nequaquam labefecerunt, propte-  
 „ rea quod eam Synodum pro oecumenica non habebant:  
 „ ita nec de Sedis Apostolicae auctoritate quidquam deli-  
 „ barunt, propterea quod eandem Synodum nondum à  
 „ Romano Pontifice jure ac sollenniter, ut jam ostendimus,  
 „ confirmatam noverant.

## ARTICULUS III.

*Gallicanorum Praesulum & scriptorum de cultu Imaginum adeo est implexa sententia, aut scribendi ratio, ut ab Ecclesiae Romanae doctrina, si benigna illis adhibeatur interpretatio, nequaquam in fidei summa discedere videantur. Quae praecipua ratio est, cur eorum dissensionem aliquandiu Romani Pontifices tolerarunt.*

**F**Rancofordiensis Synodi Patres, Carolini Operis auctorem, Jonam Aurelianensem, Agobardum, Dungalum, Walafridum Strabonem, & Conventus Parisiensis Episcopos in fidei summa ab Ecclesiae Romanae, & Synodi Nicaenae doctrina & de cultu Imaginum decretis, nequaquam dissensisse, pluribus demonstrant, aut demonstrare satagunt Clarissimi Viri, Mabillonius (a), & ex eo Pagi (b), Nat. Alex. (c), Thomassinus (d) & alii, quos per otium consulere poterit harumce rerum curiosus lector. Petavius quoque fatetur (e), quod horum si quis opinionem accuratius indagare studeat, rem esse perplexam ac difficilem cognoscet; neque quid illis in animo fuerit, liquido satis & perspicue constare.

Ut ut autem sit de privatis Scriptoribus, de Francofordiensi Canone certum est, quod editam a secunda Nicaena Synodo fidei definitionem, & Hadriani, Tarasii, &

---

(a) Praefat. in' Acta SS. O. S. B. Tom. IV. num. III.

(b) Ad An. 825. num. 1. & seqq.

(c) Dissert. VI. in Hist. Saec. VIII.

(d) De Incarn. lib. XII. cap. XII.

(e) Tom. VI. Theolog. Dogm. lib. XV. cap. XVI. num. I.

& Orientalium lectas susceptasque in eadem Synodo Epistolas, quibus potissimum monumentis quae ad doctrinam seu dogmata pertinent continentur, nullatenus vellicat ac reprehendit. Diserte id ac perspicue demonstrant Illustrissimus Petrus de Marca (a), & ex eo Thomassinus (b) ac mox laudatus Petavius (c); qui observat, Francofordiensis Concilii Canone non damnari Synodum ipsam oecumenicam Nicaenam, aut ullam ejus sanctionem de Imaginibus, & harum cultu ac veneratione: sed cujusdam Episcopi sententiam in illius acta relata: vel, ut verius dicam, inquit, non sententiam ipsam, qualem Episcopus ipse pronuntiavit, sed pravam illius interpretationem ex inscitia profectam. Hoc ut aperte constet, primum verba Episcopi illius, (fuit autem Constantinus Constantiae in Cypro Episcopus) ita referam, ut in Hadriani Apologia, & in Carolino libro concepta sunt: *Quod infauste & praecipitanter sive insipienter Constantinus Constantiae Cypri Episcopus dixit*: „ Scipio & amplector honorabiliter sanctas & venerandas „ Imagines, & quae secundum servitium adorationis, „ quae substantiali & vivificatrici Trinitati emitto &c. In actis porro septimae Synodi graece editis, Actione tertia, primo loco posita est Epistola Tarasii ad Orientales Patriarchas tres, deinde responsa Orientalium: quibus lectis aliquot Episcoporum, qui in Nicaena erant Synodo, sententiae proponuntur, quibus Epistolas illas approbant. Has inter Constantini Constantiae Episcopi una legitur hujusmodi: *Constantinus sanctissimus Episcopus*  
Con-

---

(a) Lib. II. de Concor. Sac. & Imp. cap. XVII. num. II.

(b) De Incarn. lib. XI cap. XIII.

(c) Ubi sup. cap. XII. num. XI.

*Constantiae Cypri dixit &c.* „His consentio, & con-  
 „cors sum, suscipiens, & cum honore amplectens san-  
 „ctas & venerandas Imágenes; ac latræ adorationem soli  
 „super substantiali & vivificæ Trinitati defero &c. Ex  
 his inter se comparatis perspicue cognoscimus, Acta illa  
 Synodi septimæ, quæ ex Graecis Latina facta missa sunt  
 in Gallias, istuc depravata fuisse. Siquidem Graeca longe  
 aliud significant, quam Latina, cujusmodi in Hadriani  
 Apologetico, & libro Caroli leguntur, ac sanum & Ca-  
 tholicum sensum illa continent, nimirum Imágenes ad-  
 mittendas esse, & honore afficiendas; sed non eo genere  
 adorationis colendas, quod soli Deo tribuitur, ac *λατρεία*  
 dicitur; at in Latinis contrarium docetur: nempe Imagi-  
 nes eodem latræ cultu prosequendas, quo Sanctissimam  
 Trinitatem afficimus. Hinc illa odiosa septimæ Synodi &  
 hostilis infectatio, quæ apud Gallos percrebuit, ortum ac-  
 cepit. Quamobrem merito Francofordienses Patres non  
 tam septimam damnare Synodum, (quam nondum Oe-  
 cumenicam, & ab Hadriano probatam esse scirent, utpote  
 cujus ad illos Acta miserat Pontifex, utique consideranda  
 & recognoscenda, ut Hincmarus testatur) quam falsam &  
 nefariam sententiam, quam fraude vel inscitia Interpretis  
 intextam Actis ipsis deprehenderant. Itaque falso ab scri-  
 ptoribus nostris proditum est, & hætenus creditum, Fran-  
 cofordiensem Synodum damnasce Nicaenam septimam &  
 Oecumenicam, ut ex Canone ipso manifeste liquet. Qui  
 error ex eo manasse mihi videtur, quod Carolinum opus  
 illud inter Acta Francofordiensis Synodi, & in eodem scri-  
 nio collocatum est, quod Hincmarus indicat. Sed nos de  
 Synodi ipsius decreto & Canone loquimur: quem, eum  
 ceteris ignotum antea, nuper in lucem edidit R. P. Sir-



mundus, non sine laude commemorandus. Nihil igitur ad rem facit, quod Episcopi illi, qui Francofordiae conveniunt, vel de Synodo Nicaena, vel de Imaginum cultu non satis recte ac Catholice senserunt; uti superiori Capite dixi, & paullo post uberius ostendam. Non enim id agitur modo, quid illi privatim ac viritim opinati sint: sed quid canonice ac synodice statuerint in Francofordiensi Concilio, quod sane cum Nicaenae ipsius decreto Synodi exacte convenit, nec vel minimum dissentit. Haec laudatus Petavius.

Eadem fere & Illustrissimus Petrus de Marca animadvertit, atque inter cetera illud observat: Verborum sono tantum Graecos a Gallis, non re ipsa dissensisse, cum illi venerationem tantum *τιμωτική* sive *honorariam* Imaginibus tribuerent &c. Quare Scholion illud, quod adjectum erat ad textum Exodi in eo Codice veteris Testamenti, qui servabatur in Patriarchio Constantinopolitano, summo applausu exceptum est a Patribus in actione quinta septimae Synodi, cujus Scholii haec sunt verba. *At vero, si facimus similitudines Christi, non ut similitudinem adoremus, sed ut mens videndo ad superiora volet.* Quod omnino concinit cum iis, quae Gregorius Magnus docuit in Epistolis ad Serenum Massiliensem Episcopum, quem sequi velle, & Gallicani Episcopi, & Hadrianus in Apologetico ad Carolum profitebantur. Non est autem, quod aliquis miretur, a Concilio Francofordiensi tam alienam sententiam Nicaenae Synodo affingi, ut par Imaginibus honor cum eo, qui defertur Sanctae Trinitati, ab ea decretus fuisse dicatur. Neque enim abscisse hoc a Synodo decretum fuisse adfirmari poterat, cum in fidei definitione a Patribus edita, ex Majorum traditione usus Imagi-

num confirmetur tanquam utilissimus ad renovandam *πρωτοτίπων μνῆμω*, seu recordationem; & earum Imaginum sola honoraria veneratio, ei similis, quae Codici Evangeliorum & vasis sacris deferatur, diserte sancitur; non autem *vera latría quae divino Numini competit*, ut conceptis verbis Synodus profitetur. Ea definitio praesente Synodo (quae Nicaea Constantinopolim translata erat, unde Synodi Constantinopolitanae nomen accepit) coram Constantino Augusto & Irene ejus matre relecta est, & totius Synodi acclamationibus & Principum subscriptionibus confirmata: Quare Concilium Francofordiense non repudiavit definitionem septimae Synodi (quod observatione dignum mihi videtur) sed quod *scriptum habebatur*, ut loquitur Concilium, nempe in actis septimae Synodi, scilicet honorem Deo debitum Imaginibus esse tribuendum. Haecenus Petrus de Marca, qui subinde demonstrat, vitio interpunctionis & barbarae interpretationis accidisse, ut contraria sententia a Concilio Francofordiensi Constantino Cypri Episcopo affingeretur.

Ex his colligo, Francofordiensem Canonem optime conciliari posse cum debita erga Sedem Apostolicam ejusque decretales Epistolas reverentia, contra atque Meldensis Episcopus sequentibus verbis docet: „ Neque tantum  
 „ Concilii Francofordiensis tempore Nicaenam secundam Synodum respuebant, cum ejus acta ignorarent  
 „ fere, sed etiam toto Caroli Magni Regno, ac diutissime  
 „ postea. Constabat interim Romanos Pontifices in eadem cum Nicaena secunda Synodo ivisse sententiam,  
 „ atque ab Hadriano editam ea de re ac missam ad Synodum Epistolam decretalem, cui Synodus confessisset.  
 „ Agitata postea res est missis ultro citroque scriptis; edi-

„ ti-

„ tique libri adversus Nicaenam Synodum, qui ex Ca-  
 „ roli nomine Carolini appellantur. His responsum est  
 „ ab ipso Adriano pro Nicaenis dogmatibus: neque eo  
 „ secius nostri cum Carolo Magno in sententia perstiteret.

Nicaenae Synodi Acta, uti non semel ex Hincmaro observavimus, utique recognoscenda & examinanda (nam ea nondum rite ac sollenniter probaverat) Hadrianus Papa miserat in Gallias. Patres Francofurti congregati ea ad Synodum adferri jusserunt: *Allata est in medium*, in-  
 „ quunt, *quaestio de nova Graecorum Synodo, quam de adorandis Imaginibus Constantinopoli fecerunt*. Ex Synodi Actis quaedam unius ex Episcopis sententia excerpta est, quae prout in Latino Codice efferebatur, merito Patres offendit; ideoque damnata est. *In qua*, in-  
 „ quunt, *scriptum habebatur, ut qui Imaginibus Sanctorum, ita ut Deificae Trinitati, servitium aut adorationem non impenderent, anathema judicarentur. Qui supra sanctissimi Patres nostri omnimodis adorationem & servitutem renuentes contemserunt, atque consentientes condemnaverunt*. Quid hoc ad Epistolam ab Hadriano missam ad Synodum? Numquid in ea scriptum habebatur, ut qui Imaginibus sanctorum, ita ut Deificae Trinitati, servitium aut adorationem non impenderent, anathema judicarentur? Nondum quidem, ut saepe dictum est, sextam Synodum Romanus Pontifex confirmaverat: verum etsi illam ab Hadriano confirmatam accepissent, nihil ex eo Canone confici posset adversus Romani Pontificis incrantiam. Pontificis enim confirmatio non omnia completitur, quae viritim ac speciatim a quocumque ex Episcopis proferuntur, sed ad solam fidei definitionem refertur & Canones, aut alia scripta dogmatica, quae rite ac sol-

lenniter univerſa Synodus adprobavit . Quare Francofor-  
 dienſes Patres ea ſubire cogitatio potuit , adprobaſſe qui-  
 dem Hadrianum fidei definitionem a ſeptima Synodo edi-  
 tam , quae ipſius Epistolae decretali conſona erat : nec ta-  
 men probatam ab eo fuiſſe Constantini Cyprii Episcopi  
 ſententiam , a qua perinde atque ipſi , Romanus Pontifex  
 diſſentiebat . Id quod ipſe Hadrianus in Epistola Apologe-  
 tica ad Carolum Magnum ſatis aperte ſignificat ; nempe  
 Synodi mentem & Eccleſiae ſententiam petendam eſſe ex  
 fidei definitione , non autem ex privati Episcopi verbis .  
 Quum enim in Capitulis , quae Carolus ad Pontificem mi-  
 ſit , ſuperius deſcripta Constantini Episcopi verba ſepti-  
 mae Synodo objicerentur , haec Hadrianus reſpondit : *Ex*  
*pravae revertentes haereſi , totis niſibus eorum tentave-*  
*runt ſanctae Catholicae & Apoſtolicae in ipſorum confeſ-*  
*ſione ſatiſfacere Eccleſiae ; & ideo talem adorationem ſe*  
*confeſſi ſunt pro ſacris Imaginibus credere , qualis in deſi-*  
*gnatione Synodi conſtituta eſt inter cetera :* „ Reordinari  
 „ venerandas & ſanctas Imagines &c. Quantum enim fre-  
 „ quenter per imaginariam reformationem videntur , tan-  
 „ tum & qui eas aſpiciunt , aſſurgunt ad primae formae  
 „ memoriam & dilectionem , & ut his oſculum & hono-  
 „ rabilem ſalutationem reddant , nequaquam autem ſe-  
 „ cundum fidem noſtram veram culturam , quae decet  
 „ ſolam divinam naturam ; ſed quemadmodum ſigno  
 „ pretioſae & vivificae Crucis , & ſanctis Evangeliiſ , &  
 „ ceteris ſacris ornatis &c. Ex quibus verbis apparet ,  
 nec Hadrianum ipſum tuendam ſuſcepſiſſe Constantini  
 Episcopi ſententiam , prout in Latinis Codicibus legeba-  
 tur . Quod etiam Petro de Marca obſervatum eſt : *Huius*  
*reprehenſioni* , inquit loco ſuperius laudato , *reſpondet*  
*qui-*

*quidem Hadrianus, sed Constantini lapsum non excusat, quamvis aliam fuisse mentem Synodi Nicaenae, ex definitione fidei doceat, quae divinum cultum soli Deo asserit . Potuit ergo Francofordienſis Synodus eam damnare Constantini ſententiam, nec tamen Hadriani Epistolae decretali, ipsiusque menti ac doctrinae refragari ; quemadmodum potuit Hadrianus ipse Constantini lapsum non excuſare, & tamen Nicaenae Synodi doctrinam & fidei definitionem tueri . Hincque facile intelligitur, quod quibusdam valde durum ac difficile intellectu videtur ; nimirum auſos eſſe Patres Francofordienſes coram Pontificis Legatis Nicaenam Synodum tam acri cenſura perſtringere . Non enim Nicaenam Synodum, vel Hadriani, Tarsii & Orientalium dogmaticas Epistolae, aut fidei definitionem, quas Romae probatas ignorare non poterant, & cujus utique damnationi Legati reſtitiffent ; ſed ſententiam, quam nemo Catholicorum probare poterat, damnaverunt .*

Itaque ex laudato Canone confici non poteſt, Gallicanos Praefules vel a Nicaena Synodo vel ab Eccleſia Romana omnino & absolute de colendis Imaginibus diſcrepaſſe . Quod etiam ex aliorum id temporis de hoc argumento lucubrationibus non omnino conſtat . Quamquam enim longius quam Francofordienſes Patres proceſſi ſunt, & quandoque omnem videntur ſacris Imaginibus cultum abrogare ; alia tamen loca apud eos paſſim occurrunt, in quibus non niſi nimium ac ſuperſtitioſum cultum oppugnare, modicum autem ac temperatum admittere videntur . Quae ratio eſt, cur aliquandiu eorum diſſenſionem Romani Pontifices tolerarunt, quod nempe illos de fidei ſumma neſiquam ab Eccleſia Romana diſſentire cre-

credebant. Id patet ex Hadriani I. responsione ad Capitula Caroli Magni; in quibus quidem plurima sunt, quae sacrarum Imaginum cultui palam refragari videntur; ultimum autem Capitulum non ei penitus adversari, imo & aliquem, sobrium tamen ac moderatum admittere, ipse Pontifex animadvertit: quum id se de Imaginibus tenere profiteantur, quod juxta S. Gregorii Epistolam ad Serenum Massiliensem Episcopum universa tenebat ac sequebatur Ecclesia: *Ultimum Capitulum est:* „ Ut sciat Dominus  
 „ Apostolicus & Pater noster, & cuncta simul Romano-  
 „ rum Ecclesia, ut secundum quod continetur in Episto-  
 „ la beatissimi Gregorii, quam ad Serenum Massiliensem  
 „ Episcopum direxit; permittimus, imagines Sanctorum,  
 „ quicumque eas formare voluerint, tam in Ecclesia;  
 „ quamque extra Ecclesiam, propter amorem Dei, &  
 „ Sanctorum ejus &c. Et quia sensum Sanctissimi Grego-  
 „ rii sequi in hac Epistola universalem Catholicam Ec-  
 „ clesiam Deo placitam, indubitanter libere profitemur.  
 De hoc Capitulo ita Carolo Regi Hadrianus Papa respon-  
 dit: *Hoc sacrum & venerandum Capitulum multum  
 distat a totis supradictis Capitulis. Et idcirco eum  
 agnovimus vestrae a Deo servatae orthodoxaeque Re-  
 galis Excellentiae esse proprium in eo ubi rectae fidei  
 plena penitus confessa est sensum sanctissimum Grego-  
 rii sequi.* Adlatisque pluribus cum ex ea ad Serenum,  
 tum ex aliis Epistolis S. Pontificis testimoniis, demon-  
 strat, sibi omnino de hac re cum S. Gregorio in suis ad  
 Constantinum Augustum & Irenem litteris convenire:  
*Ita vero & nos eundem ipsum irreprehensibilem & or-  
 thodoxum sensum S. Gregorii Papae sequentes & ample-  
 ctentes, dudum Irene & Constantino Imperatoribus pro*  
*sacris*

*sacris Imaginibus praedicandis emisimus* &c. Et infra : *Quidquid namque de Sanctis Patrum Opusculis aliquantula ibidem exaravimus testimonia, in eodem sensu atque tenore, ut praesentem diximus, cum Praedecessore nostro S. Gregorio Papa, eundem sensum fidei tenentes, emisimus praedicantes.* In eundem quoque sensum editam a septima Synodo fidei definitionem conspirare, inferius testatur; quiquid fecus dixisse Constantinus ille privatus Episcopus ferebatur; ideoque se se Synodum illam, tanquam S. Gregorii & Ecclesiae Romanae doctrinae in fidei definitione consonam suscepisse : *Et sicut de Imaginibus Sancti Gregorii sensum* & nostrum &c. (f. in S. Gregorii sensu & nostro) *continebatur : ita & ipsi in eadem Synodo definitionem confessi sunt, bis osculum & honorabilem salutationem reddidere ; nequaquam, secundum fidem nostram, veram culturam, quae decet soli divinae naturae . . . . Et ideo ipsam suscepimus Synodum* &c. In hac porro Ecclesiae Romanae fide ac doctrina & Carolum ipsum firmiter permanere non dubitat; ideoque tanquam Catholico Regi prospera ei cuncta adprecatur : quare nec mirandum, si & ipse Carolus Magnus cum Hadriano I. ut Bossuetius observat, non tantum „ religionis obse- „ quio, sed etiam singulari atque intimo amicitiae vincu- „ lo conjunctissimus vixit : & interim a Leone III. saepe „ ad auxilium invocatus, & Imperiali corona fuit insignitus . Non autem eam non interruptae cum Carolo Rege & Gallicanis Episcopis communionis legitimam rationem esse putamus, quam idem Bossuetius statim subjungit, quod nempe „ quae ad fidem spectare viderentur ; „ non in unius Romani Pontificis autoritate, sed in Ec- „ clesiae universae consensione posita esse constabat . Ve-

rum,

rum, ut ostendimus & Hadriani verbis probavimus, ea hujusce rei legitima ratio erat, quod nequaquam in fidei summa Hadriano I. & sequutis Pontificibus, ab Ecclesia Romana dissentire Carolus ipse & Galliarum Episcopi videbantur.

## ARTICULUS IV.

*Gallorum Scriptorum, ac potissimum Parisiensis Conventus Episcoporum, quatenus secundam Nicaenam Synodum, & ipsas Hadriani Epistolas, & probatum ab Ecclesia Romana sacram Imaginum cultum aperte vellicant & reprehendunt, nulla omnino habenda ratio est, nec aliqua esse debet auctoritas.*

**P** Ost Francofordiensium Patrum; Episcoporum qui Ludovico pio imperante Parisiis convenerunt, Bosluetius objicit auctoritatem; qui profecto non iis se se limitibus continuerunt, quibus Francofordiensis Canon conceptus erat; sed aperte jam & abrupte non in unius Episcopi sententiam latina versione depravatam, aut in Graecorum supersticiosum, ut ipsis videbatur, Imaginum cultum; sed in universam Synodum, in ipsas Hadriani Epistolas, denique & in ipsos Ecclesiae Romanae in collendis Imaginibus ritus, insurrexerunt. Hac vero in re contendimus ac pluribus rationibus demonstramus, nullam prorsus eorum habendam esse rationem, omnemque illis abrogamus auctoritatem. Id autem ne temere facere existimemur, observamus imprimis, Gallicanos scriptores & Episcopos, quum probatum Nicaenae Synodo, adeo-



adeoque & Hadriano & Ecclesiae Romanae, colendi Imagines ritum vellicare ac reprehendere ausi sunt, a Majorum suorum exemplo ac religione apertissime descivisse. Nam Stephano Quarto Romano Pontifice, praecipuarum e Galliis Ecclesiarum Antistites ad Lateranensem Synodum invitati, in eandem cum Orientalibus & Ecclesia Romana, non modo de retinendis ac minime frangendis, verum & colendis & honore ac veneratione prosequendis sacris Imaginibus sententiam consenserunt. Testatur id aperte, nec semel in Epistola ad Carolum Magnum Hadrianus Papa, quemadmodum superiori Capite, articulo primo breviter indicavi, nunc autem integris ejus prolatis textibus uberius demonstrabo: „Theodorus Patriarcha „Hierosolymorum, *inquit laudatus Hadrianus*, cum „ceteris praecipuis Patriarchis, videlicet Cosma Alexan- „driae, & Theodoro alio Antiochiae, dudum Praede- „cessori nostro sanctae recordationis quondam Paulo „Papae miserunt propriam eorum rectae fidei Synodi- „cam: in qua & de sacratissimis Imaginibus subtili nar- „ratione qualiter una cum nostra sancta Catholica & „Apostolica universali Romana Ecclesia ipsi & ceteri „Orientales orthodoxi Episcopi, & Christianus populus „sentiunt, & in earumdem sanctarum Imaginum veneratione sincero mentis affectu ferventes in fide existunt, „studuerunt intimandum. Quam Synodicam in Latino „interpretatam eloquio Praedecessor noster quondam „sanctissimus Dominus Stephanus Papa in suo Concilio, „quod & ipse pro sacris Imaginibus, una cum diversis „Episcopis in partibus Franciae seu Italiae fecit, susci- „pientes ac relegentes, placuerunt, tam de diversis „Francorum Patrum testimoniis, quam de symbolo fi-

„ dei &c. *Et in alio ejusdem Epistolae Capite* : Praede-  
 „ cessores nostros, *inquit*, videlicet beatissimos Pontifi-  
 „ ces, Gregorium, & Gregorium, Zachariam, & Ste-  
 „ phanum, Paullum, & iterum Stephanum, reperimus  
 „ pro sacrarum Imaginum erectione in Spiritu Sancto  
 „ ferventes, rectae fidei zelum habere. Pro quo Domi-  
 „ nus Gregorius Papa secundus junior, una cum 79. san-  
 „ ctissimis Episcopis, ante confessionem B. Petri Apo-  
 „ stolorum Principis praesidens, multorum Sanctorum  
 „ Patrum testimonia roborantes, venerari & adorare sa-  
 „ cras Imagines in eorum Concilio censuerunt. Porro  
 „ Praedecessor noster sanctae recordationis quondam Do-  
 „ minus Stephanus Papa, similiter cum Episcopis par-  
 „ tium Franciae atque Italiae praesidens in Basilica Sal-  
 „ vatoris Domini nostri Jesu Christi, quae appellatur  
 „ Constantiniana, Praedecessoris sui venerabile Conci-  
 „ lium confirmans atque amplectens, magis magisque &  
 „ ipse, una cum omnibus Episcopis praesidentibus, San-  
 „ ctorum Patrum testimoniis adhaerentes, adorare atque  
 „ venerari sacras Imagines statuerunt. *Et rursus in alio*  
 „ *Capite* : Praedecessor noster sanctissimus Dominus Gre-  
 „ gorius Secundus junior Papa in suo sacro Concilio,  
 „ (quod & in alio Concilio Praedecessoris nostri Domi-  
 „ ni Stephani Papae, una cum Sacerdotibus partium  
 „ Franciae atque Italiae susceptum ac veneratum est) in  
 „ eo ipso praesidente sanctissimo ac beatissimo quondam  
 „ Domino Gregorio Papa, per semetipsum similiter di-  
 „ xit . . . . *Quanto debemus puro corde & animo sculptum*  
 „ *Christum Deum nostrum, sanctamque semper Virginem*  
 „ *ejus Genitricem Mariam, Apostolos quoque, vel omnes*  
 „ *Sanctos Dei per eorum sacras Effigies atque Imagines cole-*

re vel adorare, & ad propitiandum nobis petere & relaxari delicta? Nos non ob aliud nomen imagines facimus & adoramus, sed pro nobis incarnato Verbo Dei &c.

„ Et ne aliquis propter adorationem, quae a Praedecessoribus nostris sanctissimis Praefulibus promulgata est, oblatrare praesumat, sciat ipsos talem adorationem docuisse, qualem Praedecessor noster Sanctus Gregorius egregius Doctor & Papa in Epistola sua, quam in praefato Concilio Domini Stephani Papae Herulphus Episcopus ( *Lingonensis* ) provinciae Galliarum Civitatis protulit, ubi inter cetera Secundum ( *Secundinum* ) Servum Dei inclusum Galliae docuit dicens: *Scimus, quia tu Imaginem Salvatoris. ideo non petis, ut pro Deo aut quasi Deum colas, sed ob recordationem Filii Dei, ut in ejus amore recalescas, cujus te Imaginem videre consideras* &c. quae postmodum, ut ex superioribus patet, Hadrianus ostendit cum suis ad Constantinum & Irenem litteris, & septimae Synodi definitione planissime convenire: unde aperte colligitur, Gallicanos Episcopos, Stephano Quarto Summo Pontifice, eandem de cultu Imaginum fidem cum Ecclesia Romana & Orientalibus coluisse, neque ab ipso adorationis vocabulo, quod eos postea tantopere offendit, abhorruisse. Unde etiam illud consequens est, quod quum ii, qui Ludovico pio Imperatore floruerunt, a majorum suorum exemplo & auctoritate desciverint, nulla prorsus eorum ratio habenda sit, omnique eis pariter in hac re auctoritas adimenda.

Multo autem amplius ac potiori jure omnis eorum auctoritas cadit, si consideremus, unde in eis orta est hostilis ejusmodi & aperta primum Graecorum, postmodum autem & Romanorum rituum infectatio. Libet id Nat.

G. 2.

Alex.

Alex. verbis exponere: Proclives erant, inquit (a) Galli nostri, & ipse imprimis Imperator Carolus Magnus ad credendum, Graecorum levitatem in eum errorem lapsam esse, ut supremam adorationem Imaginibus deferrent. Offensus enim erat Constantino Graecorum Imperatori Carolus, quod repudiata sorore sua, quam ipsi desponderat, Mariam Armenam duxisset. Hinc inter Principes & gentem utramque offensio & invidia. Politica itaque studia Carolum Magnum, & Gallicanos Germanosque Praefules in partes traxere contra Synodum a Graecis Nicaeae celebratam (hanc enim pro Oecumenica non habebant) in eam strinxere calumum: atque ut ingenii acumine & eruditione Graecis erant superiores, invidiose disputavere; ex aequivoco adorationis nomine ab ipsis usurpato, & ex Constantini Episcopi sententia, litigandi occasionem sumere &c. Convitiis etiam Graecos & eorum Synodum afficiunt. Uno verbo totum Opus Carolinum sui Auctoris in Graecos offensionem & invidiam spirat. Unde mirum non est, quod ex praejudicatae mentis affectu ipse existimaverit, Nicaenam Synodum adorationem supremam, seu cultum latriae Imaginibus sanxisse, eoque nomine ipsam impugnaverit impotentius. Quod ait Nat. Alex. Gallos id temporis ingenii acumine & eruditione Graecis fuisse superiores; vereor an omnes admittant. Non enim facile concederem, plures hoc aevo fuisse in Galliis ingenii acumine & eruditione superiores S. Johanne Damasceno, SS. Germano, Tarasio, & Nicephoro Regiae urbis Patriarchis, & S. Theodoro Studita, aliisque qui in Oriente hoc eodem saeculo floruerunt, & vitae sanctitate, & gloria confessionis insignes fuisse, quae Doctores Ecclesiae miri-

---

(a) Dissert. V. in Hist. Eccl. Saec. VIII. §. VII.

mirifice exornant, eorumque doctrinae plurimum ponderis & auctoritatis addunt. Profecto si de Gallis scriptoribus ex eorum adversus Imagines lucubrationibus iudicium facere debemus, non est certe cur eorum ingenii acumen & eruditionem admiremur, aut eos in hoc argumento pertractando his dotibus Graecis Scriptoribus praestitisse jactemus. Nam praeter criticae artis usum, quo equidem neque Galli admodum excellebant, ceteris omnibus ornamentis Graeci hujusce aetatis Gallis Scriptoribus antecellebant. Ceterum eandem fere causam dissensionis Gallos inter & Graecos & Abbas Fleurius adfert de Carolino Opere differens (a): „ Tout cet écrit fait voir „ une grande prévention des François contre les Grecs. „ Ils les chicanent sur plusieurs points de peu d'importance : emploient quantité d'expressions dures, de „ mauvais raisonnemens & de preuves hors du sujet. Il „ est certain d'ailleurs que le Roi Charles avoit alors „ sujet d'être mal content de l'Imperatrice Irene. Car „ dès l'an. 782. elle avoit envoié demander a Charles „ Rotrude sa fille pour le jeune Constantin . . . & toute- „ fois six ans après elle rompit le traité &c.

Ejusmodi ergo offensionis & invidiae motibus & affectionibus, quae maxime rationis lumen obnubilant, Galli praeoccupati, primo in Francofordiensi Synodo, tanquam Nicaeni Concilii, privati Episcopi sententiam damnaverunt: postmodum autem longe majore audacia Carolini Operis Scriptor tum in quatuor libris, tum in Excerptis, quae Carolus Magnus ad Hadrianum transmissit, in ipsam universam Synodum ejusque acta impetum fecit: denique Conventus Parisiensis Episcopi ipsum quoque

---

(a) Hist. Eccl. Tom. 9. ad an. 790. num. XLVII,

que Hadrianum ejusque cum ad Constantinum & Irenem, tum ad Carolum Magnum Epistolas audacissime lacerrunt. Ubi enim semel affectibus in transversum abripitur animus, nullius auctoritatis obice retinetur, quin majora audeat. Porro hujusmodi aestus in omnibus horumce Scriptorum monumentis apparet, qui omnem illis auctoritatem adimit. Quum enim animo instituissent probatam Graecis ac Romanis de Imaginum cultu doctrinam lacefsere, cum quibus re ipsa & in fidei summa conveniebant, non habebant quo pedem figant; ac modo unius latriae, modo autem omnem prorsus sacrarum Imaginum cultum reprobare videbantur; & omnis eorum de hoc argumento disputatio obscura & implexa est, in semet ipsa incurrens, & quamquam Catholicas quandoque sententias habet, *plura tamen sunt*, quae vix ab Iconomachorum haeresi defendi possunt. Quod ingenue fatetur Cl. Dionysius Petavius, cujus hîc de aliquot ejusmodi Scriptoribus judicia proferam. De Carolino Opere loquens: In tanta; *inquit* (a) varietate ac dissensione decretorum atque dictorum, quam in Opere illo licet animadvertere, difficile est unum aliquod fixumque statuere de eo, quod proposuimus; utrum solam latriam ab Imaginum, quem probavit, usu repulerit; an omni illas honore ac veneratione spoliatas, ad simplicem Basilicarum ornatum, & ad Sanctorum, rerumque quas illi praeclare gesserunt, memoriam adhibendas putaverit. Quod ego posterius veri arbitrator esse similis. Sed ita tamen, ut cum hoc absolute destinasset animo, paullatim occaecatus inscitia Scriptor ille, ac contradicendi libidine, & ardore disputandi longius provectus, de Idololatria, vetitoque in lege veteri cultu  
simu-

---

(a) Tom. VI. Theol. Dogm. lib. XV. cap. XVI. num. IV.

simulacrorum nonnulla identidem asperferit, quae nec ad causam quidquam pertinerent, & apud indoctos ac minus acres rerum inquisitores valerent ad concitandam invidiam: qui mos est hodiernorum Iconomachorum ex Lutheri Calvinique faece &c. *Et infra num. V.* De Jona Episcopo Aurelianensi par est judicium; hoc est non minus ambiguum & perplexum. *Ac rursus:* Jonae de Imaginibus sententia non minus, quam Carolini operis, implicata est & obscura; imo in semet incurrit, ac minime cohaeret. Ejusque opinione exposita, qua Crucem coli & adorari permittit; Imaginum autem adorationem idololatriae condemnat: *Haec sunt*, inquit, *ad ineptiam & inscitiam implicata*. Num. VIII. Walafridus quoque Strabo Abbas Augiae . . . dubius & ipse natat, prorsusque supra memoratis Popularibus suis assentitur; ac de Idolis neque fabricandis, neque colendis eandem cantilenam occinit: neque tamen Imagines Sanctorum aboleri, immo vero adhiberi praecipit. *Prolatisque aliquot hujusce Auctoris testimoniis;* In his, inquit, Walafridi aeltus & jactatio perspicua est. Quorsum enim illa cautio de idolis; ac divino cultu Sanctorum Imaginibus non tribuendo pertinet? &c. Quanti, rogo, facienda ejusmodi Scriptorum auctoritas, qui & inscitia, & contradicendi libidine & ardore obcaecati, non modo a suis Majoribus desciverunt; sed neque secum ipsi consentiunt, sanumque sensum plane exuisse videntur?

Quoniam vero potissimum Parisiensis Conventus Meldensis Episcopus nobis objicit auctoritatem; quo in pretio haberi debeat, & cujus illa ponderis ac momenti sit, ex eodem Petavio, & Cl. Sirmundo discamus. Petavii loco citato num. VII. postquam de Jona Aurelianensi  
dis-

differt: Non absumilis est, *inquit*, & eodem inscitiae tincta fuco illa Pseudosynodi Parisiensis Epistola, quae Ludovico Pio Imperatore, & ejus nomine missa Romam est ad Eugenium Secundum. Nam perinde est anceps, & ambigue concepta. Non placet illius Scriptoribus Orientalium facinus, qui sacras Imágenes sustulerant; nec eorum Synodum probant, quae Constantini *stercorei* tempore illud ipsum decreverat. Sed ut *Imágenes erigere licitum*, sic *adorare nefas* arbitrantur.... In quo eodem, ac superiores, quos paullo ante memoravimus, errore lapsi, & eodem modo refellendi sunt. Haec Petavius.

Ex Sirmundo autem describit quidem Bossuetius ejusdem Pseudo-Synodi Parisiensis historiam; sed quod de illa pro suo candore judicium Vir diligentissimus protulit, silentio involvit. Est ergo nobis locus iste supplendus: nam praeter ea, quae Meldensis Episcopus ex ipso refert, ait etiam, plura se quae in hujus Conventus actis continentur, praetermittere, quod Gallorum hujus saeculi ab Imaginum adoratione, ut alias dictum est, abhorrentium HAERESIM redoleant. Nam ut de aliis nihil dicatur, in quibus, Hadriano Papae & Synodo Nicaenae iniquiores sunt, in ista sua Collectione Sanctorum Patrum sententias eo detorquere conantur, ut Imágenes indebito, ut videri volebant, cultu adorandas non esse statuunt: & Eugenium in Epistola ita scribentem faciunt, ut de Imaginibus, eas ne habere vel non habere, adorare vel non adorare placeat, liberum cuique in Ecclesia permitti velit; quasi haec in mentem summo Pontifici venire, aut illi persuaderi a se posse confiderent. His igitur praetermissis, quae absurda sunt, ideoque a Bellarmino & Baronio maximis Cardinalibus accurate refutata, atque a Gallis postea  
ipsis,



ipsis; mutato consilio, receptaque Imaginum veneratione, damnata; reliquum est &c.

Non modo Sirmundus haereseos notam Gallis inurit, verum & laudatus Petavius, eos in eodem cum mitioribus quibusdam Orientis Iconomachis luto versatos fuisse, haud semel adfirmare non dubitat. Adlato enim quodam Patriarchae Nicephori testimonio: Haec, *inquit* (a), & alia plura Nicephorus de Cruce & Imagine Christi contra Orientales Iconomachos sui temporis. Eadem etiam adversus Occidentales & Gallicanos eodem saeculo sunt a Catholicis objecta, quae sane ἀναρτίσθηται sunt & invicta. Nam EADEM ET ISTI PRAVITATE OPINIONIS IMBUTI ERANT, & confusione judicii, ut & magno in honore crucem haberent adorarentque, & Imaginibus eundem cultum negarent; tametsi non eas, ut illi, violarent ac profligarent. Quamquam non defuere inter Orientales illos Iconomachos, qui Imagines nulla afficiendas injuria censerent: sed sic habendas esse, ut neque venerandae essent, neque dehonestandae: quod temperamentum secutos esse nostrates, supra docuimus.... Quocirca posteriori isti generi Iconomachorum videntur accensendi Occidentales illi, quos hoc capite descripsi. Qui quidem &c. Horum igitur, quatenus a secunda Nicaena Synodo & a Sede Apostolica dissentiebant, eadem habenda est ratio, eodemque loco apud nos esse debet auctoritas, atque aliorum Iconomachorum: nam & illi horum haeresim redolebant, ut ait Sirmundus, vel ut ait Petavius, eadem pravitate opinionis imbuti erant. Hoc tantum, ut idem Petavius animadvertit (b), inter utrosque distabat;

To. I. Par. II.

H

quod

(a) Ubi sup. num. X & XI.

(b) Ibid. cap. XI. num. VIII.

quod Occidentales illi Iconomachi *minime tum haeretici judicati* sunt; sive quod in meliorem partem eorum verba, alias implexa & ambigua, Romani Pontifices interpretabantur, & verbis eos potius, quam rebus ipsis ac sensibus ab Ecclesia Romana, & Nicaenae Synodi definitione dissentire judicabant; sive quod eorum dissensionem prudenti oeconomia tolerare aliquandiu maluerunt; quam Gentem ac Principes ingentibus tum beneficiis sibi devinctos ab Ecclesiae Romanae communione repellere, & in eam conjicere *irrevocabilem pertinaciam*, quam, ut ait Bossuetius, *ad extremum ab Eugenio metuebant*; & quae proprie haeresim constituit, & vinculum pacis & communionis abruptit.

Hic autem animadvertere est, quam infelici & nullius auctoritatis exemplo, Petrus de Marca (\*), aliique Gallicanae Ecclesiae, ut vocant, libertatum vindices ac defensores, id juris Francorum Regibus & Ecclesiae Gallicanae adferant, ut de Synodis recipiendis vel rejiciendis disceptationem sibi liberam esse judicent; praesertim si per Legatos suos rebus gerendis non interfuerunt: Quum enim illi, quorum primum (quod ad fidem pertinet) exemplo nituntur, a Majorum suorum vestigiis deflexerint: quum Sedis Apostolicae auctoritatem, & Nicaenam Synodum repellendo, tam turpiter erraverint: quum sola Romanorum Pontificum indulgentia factum sit, ut non pro haereticis haberentur: quum & ipsi tandem suum errorem agnoverint ac damnarint; an non hinc potius discere deberent, quam non tutum sit, Regum & peculiaris Ecclesiae judicio id juris tribuere, ut de Synodis Apostolicae Sedis auctoritate probatis recipiendis aut rejiciendis disce-

---

(\*) Lib. II. de Concor. Sac. & Imp. cap. XVII. num. III.

disceptationem liberam habeant , eorumque Canones , maxime qui ad fidem pertinent , ad examen revocent , deque illis aut admittendis aut improbandis deliberent ?

## C A P U T   X X X I I .

„ Octava Synodus generalis , Constantinopolita-  
„ na quarta , aequae ac ceterae , de Romano-  
„ rum Pontificum judiciis judicat : traditam  
„ sibi a Christo , ut & Romanae Ecclesiae , li-  
„ gandi ac solvendi potestatem agnoscit &  
„ exercet : post Synodi judicium , nulla jam  
„ appellatio , nulla alia spes est .

**P**AUCIS , quae ad hanc Synodum pertinent , Boffuetius absolvit : Nec mirum : pauca enim reapse in hujusce Synodi actis occurrunt , quae illius causam utcumque , aut vel specie tenus , ut in ceteris , juvare possint . At quam illum materies deficit , tam mihi redundat . Quare vela mihi contrahenda sunt : nimius enim essem , si omnia huc congerere vellem , quae in octavae Synodi actis ad Sedis Apostolicae majestatem & auctoritatem amplificandam utcumque faciunt . Delectum itaque habebo , eaque hic tantum loca describam , quae , ad causam , qua de agimus , propius pertinere videntur .

## ARTICULUS PRIMUS.

*Nicolaus I. & Hadrianus II. in caussa Photii & Ignatii summam & ineluctabilem, & Synodi oecumenicae retractationi & iudicio nullo modo subiectam, auctoritatem exercuerunt.*

**P**Atet id multis argumentis, ac primo & potissimum ex libello, quem Hadrianus ad Synodum per suos Legatos transmisit ab omnibus subscribendum, imo & reipsa subscriptum, qui ad eandem Synodum admitti voluerunt. In hoc itaque libello, qui prima Synodi actione lectus est, & cui omnes de quibus poterat esse suspicio subscribere coacti sunt, imprimis inerrantiae praerogativa Sedi Apostolicae vindicatur: *In sede Apostolica immaculata est semper Catholica reservata religio, & sancta celebrata doctrina; idque juxta ipsius Christi sententiam dicentis: Tu es Petrus, & super hanc petram aedificabo Ecclesiam meam.*

Hoc veluti jacto firmissimo fundamento, quaecumque ab eadem Sede Apostolica, ejusque Pontificibus Nicolao I. & Hadriano II. de Sancti Patriarchae Ignatii & Photii caussa statuta fuerant, citra ullum Synodicum examen, ab omnibus, quorum intererat, tanquam certissimae & inconcussae Catholicae fidei & Ecclesiasticae disciplinae regulae recepta sunt: *Ab hujus ergo fide atque doctrina separari minime cupientes, & Patrum, & praecipue Sanctorum Sedis Apostolicae Praesulum, sequentes in omnibus constituta, anathematizamus omnes haereses, simul*  
cum

cum Iconomâchis. Anathematizamus etiam Photium &c. Sequimur autem sanctam Synodum & amplectimur, quam beatae recordationis Papa Nicolaus... celebravit: simul & quam tu (Summe Pontifex Hadriane) ipse nuper egisti; & omnia quae in his statuta sunt, secundum decreti vestri moderationem, venerabiliter conservabimus; recipientes quos recipiunt, & damnantes omnes, qui in illis damnati sunt; & praecipue jam dictum Photium, & Gregorium Syracusanum &c. Porro de venerabilissimo Ignatio Patriarcha nostro, & de iis, qui ex parte hujus sunt, quod auctoritas Apostolicae Sedis vestrae decrevit, tota mente sequimur &c. Quoniam, sicut praediximus, sequentes in omnibus Apostolicam Sedem, & observantes ejus omnia constituta, speramus, ut in una communione, quam Sedes Apostolica praedicat, esse mereamur, in qua est integra & vera Christianae religionis soliditas; promittentes etiam, sequestratos a communione Ecclesiae Catholicae, id est non consentientes Sedi Apostolicae, eorum nomina inter sacra non recitanda esse mysteria. Hunc Libellum a S. Nicolao Papa concinnatum fuisse in Synodo, ut videtur, Romana, Anastasius Bibliothecarius testatur, qui etiam refert, eum ab omnibus Metropolitanis & Episcopis ceterisque Clericis Constantinopolitano Throno subjectis fuisse subscriptum, qui ad Synodum oecumenicam admitti voluerunt, ita ut nullus vel Antistitum vel reliquorum Clericorum in Synodalem fuerit conventum receptus, qui non secundum exemplar hujus Codicilli Chirographum scripsit, & Missis Sedis Apostolicae Ecclesiae Romanae minime deferendum porrexerit. Quod si Concilium cogeretur, ut Ignatii Photii-que causa a Romanis Pontificibus judicata retractaretur,

ac novo subjiceretur examini, non utique sub ipsum Synodi initium, vel antequam in Synodum Episcopi reciperentur, exhibendus illis erat libellus, quo decreta per Sedem Apostolicam Photii & actorum ejus damnatio; Sancti vero Ignatii in Urbis regiae Sedem restitutio continebatur, sed hujusce libelli subscriptio vel ad finem Synodi differenda erat, vel postquam omnia de integro fuissent per Synodum retractata. Subjungit Anastasius, quosdam eorum qui subscripserant, cum Ignatio Patriarcha & Basilio Imperatore conquestos fuisse, non ideo quidem quod ante Synodi solenne judicium subscribere coacti fuerant, sed quod *Ecclesiam Constantinopolitanam tanta subjectione Romanae subdi Ecclesiae permiserant, ita ut banc ei tamquam Dominae ancillam tradidissent*. Itaque Chirographa Sedis Apostolicae Vicariis tradita furtim auferri permisit Imperator. At reddi sibi expugnarunt iidem Romanae Ecclesiae Vicarii: & Imperator ad unum omnia restituens, his eos verbis adlocutus est, quae idem Anastasius refert, qui tum Constantinopoli apud eundem Imperatorem agebat: *Ego quidem ut Magistrum Ecclesiasticorum negotiorum Sedem Apostolicam per meos legatos adii; & ideo vestram praesentiam praestolatus sum, ut vestro decreto & solertia Ecclesia nostra remedia sanitatis reciperet, & nos non nostris motibus, sed vestrae sententiae pareremus. Ergo Chirographa, qua a nostris Sacerdotibus, & a cunctis Clericis salubriter exegistis, recipite; & spirituali Patri nostro Sanctissimo Papae repraesentate; ita ut si quis eorum per abrupta vitiorum vel deviarum pravitatum solito incedere more tentaverit, his quodammodo habenis ab eo refraenetur, & talibus locis ad rectum justitiae tramitem revocetur*. Nulla iis Episcopis

Cle-

Clericisve iustior aut plausibilior repetendorum ac retinendorum Chirographorum fuisset causa, quam indicta, imo & jam inchoata Synodi oecumenicae celebratio, si haec ideo indicta fuerat, & jam reapse habebatur, ut Ecclesiae Romanae decreta, quae libello continebantur, cuius exigebatur subscriptio, ad examen revocarentur. Jure enim obtendere potuissent, se se Oecumenicae Synodi decretis parituros; ac tum demum libello subscripturos, quum illum Synodus Oecumenica comprobasset. Non id autem Episcopi praetexebant; (quod profecto legitimum fuisset Meldenis Episcopi doctrinae consecrarium) sed nimiam servitutem, qua Ecclesiae Romanae Constantino-politanae subjiciebatur; quod nimirum in eo libello *Sanctorum Sedis Apostolicae Praesulum sequi se in omnibus constituta*, profitebantur. Imperator autem in Ecclesiae Romanae decretis ineluctabilem vim & auctoritatem agnoscebat iisque parendi indeclinabilem necessitatem; quum Sedem Apostolicam per suos Legatos tanquam Ecclesiasticorum negotiorum Magistram, sese adiisse praedicabat, ut ejus decretis turbatus Ecclesiae Constantino-politanae status componeretur; & non quidem ut ejus sententia, quae laudato libello continebatur, Synodico examini subjiceretur, verum *ut vestrae*, inquit, *sententiae pareremus*.

Actione secunda plures Episcopi, Presbyteri, Diaconi & Subdiaconi, qui a Sanctis Patriarchis Methodio & Ignatio fuerant ordinati, postmodum autem ad Photium defecerant, poenitentia e libellum Sedis Apostolicae legatis obtulerunt; qui ab eis in pristinos gradus his verbis recepti sunt: *Suscipimus vos secundum praeceptionem Sanctissimi Papae nostri Hadriani propter confessionem libelli*

*libelli poenitentiae vestrae*. Quibus ab Episcopis responsum est: *Et nos adoramus vos, & suscipimus vos Judices, & judicium vestrum tanquam ex persona Filii Dei habemus*. Verum antequam illis suarum dignitatum insignia restituerentur; Legati Sedis Apostolicae libellum ab aliis Actione I. subscriptum, his quoque subscribendum obtulerunt: *Detulimus, inquit, libellum a Sancta Romana Ecclesia, a Sanctissimo Papa Hadriano, mandatum ab eo accipientes, exigere a vobis fieri ipsum libellum: Vultis ergo facere quod jussu est a Sanctissimo Papa Hadriano?* Episcopi dixerunt: *Volumus, & placet nobis, & subscribimus*. Quumque eorundem Legatorum jussu Libellus in conspectu omnium lectus fuisset; rursus iidem Legati Episcopos interrogarunt: *Libellum hunc audistis? Placet vobis? Scribite illum*. Et rursus: *Suscipitis omnia, quae edita sunt a Sancta Romana Ecclesia?* Reverendissimi Episcopi dixerunt: *Placet, scribimus, & suscipimus omnia*. Haec dicta gestaue sunt universa spectante Synodo; & nemo ex Patribus conquestus est, quod omnia ex praescripto Sedis Apostolicae peragerentur; & quod antequam ullum decretorum ejus Synodicum examen institutum fuisset, non modo Photius pro damnato ac dejecto haberetur, verum & ii incunctanter reciperentur, quos illa recipiendos sanxisset.

Actione tertia lecta primum est Epistola Basilii Imperatoris ad Summum Pontificem Nicolaum; sed quae ipso praemortuo, ab Hadriano ejus successore recepta est: hac porro significat Imperator, se se adulterum Photium e Sede, quam tyrannice invaserat, dejecisse: Ignatium vero, *secundum judicium & justificationem, quae, inquit, in diversis Epistolis vestris inventa est . . . . per aequam*



aequam & iustam veritatem ad proprium thronum revocasse. Quaerit autem, ut haec ipsa, quamquam ab eo decreta, iterum adprobentur; reliquis ab eo finis imponatur; & quae horum consecutaria erant, ejus pariter auctoritate terminentur: *Reliquis autem finem imponendum*, imo vero & haec eadem approbandum, atque horum sequenti a terminandum, *spirituali sanctitati vestrae dimissimus*: id est, formam ab eo praescribi desiderabat, quae in variis Lapsum generibus suscipiendis servanda esset: *de quibus*, inquit, *decretum & judicium mittere paternam sanctitatem vestram praescribentes* (hoc est, antea scribentes) *poposcimus*, & *nunc expetimus*. Verum interim pro iis supplicat, qui ceciderant & poenitentiae locum requirebant, & ad legitimum suum Pastorem Ignatium revertebantur; ne videlicet ipso jubente repellentur, sed misericorditer ac blande susciperentur: ac demum petit Sedis Apostolicae Legatos Constantinopolim mitti, ut, inquit, *certificetur expressius & purius Ecclesia nostra, cujus voluntatis sanctitas tua super utrisque consistat*. Non eos itaque mitti postulabat, ut rationem redderent Synodo judicii ab Ecclesia Romana prolata, neque ut cum Synodo negotio finem imponerent; verum ut judicium Sedis Apostolicae, quo totum negotium terminabatur, causaequae finis imponebatur, celebrandae Synodo, non modo Apostolicis litteris, verum & viva voce, certius & expressius intimarent.

Secundo in eadem Actione lectae sunt litterae Sancti Patriarchae Ignatii ad eundem Sanctum Pontificem Nicolaum, sed eo mortuo, Hadriano secundo redditae, quae in eandem quidem cum praecedentibus Basilii Imperatoris sententiam conspirant, sed longe vividioribus verbo-

rum ac sententiarum luminibus splendent. Primum autem agnoscit ac profitetur, verba illa Christi: *Tu es Petrus &c.* ad solum Petrum, ejusque successores Sedis Apostolicae Praefules pertinere; indeque probat, solum Romanum Pontificem, unum esse ac singularem summumque medicum curandis universae Ecclesiae vulneribus divinitus constitutum: *Eorum vulnerum atque livorum, qui in membris hominum consistunt, multos medicos protulit ars . . . . eorum vero, quae in membris sunt Christi . . . . & Sponsae Catholicae & Apostolicae Ecclesiae, unum & singularem, praecellentem atque catholicissimum Medicum ipse princeps summus . . . . & solus ex toto magister Deus omnium produxit; videlicet tuam fraternam sanctitatem, & paternam almitatem: propter quae dixit Petro magno & summo Apostolorum: Tu es Petrus &c. Et iterum: Tibi dabo claves &c. Tales enim beatas voces non secundum quamdam utique sortem Apostolorum Principi solum circumscripsit, & definiuit, sed per eum ad omnes, qui post illum secundum ipsum efficiendi erant summi Pastores & diviniissimi sacrique Pontifices Senioris Romae, transmisit: & ideo ab olim & prisco tempore in exortis haeresibus & praevaricationibus eradicatores & interemtores malorum ziganiarum, & tabefactorum & penitus insanabiliter aegrotantium membrorum multi multoties facti sunt eorum, qui sanctitatem & summam Paternitatem tuam illic praecesserunt; successores scilicet Principis Apostolorum, & illius zelum in fide, quae secundum Christum est, imitantes: & nunc nostris temporibus beatitudo tua digne tractavit datam sibi a Christo potestatem. Deinde suam & Photii causam solius Romani Pontificis auctoritate penitus direm-*

rem-

remtam ac terminatam agnoscit; & illius quidem dejectionem, suam vero restitutionem, ac redditam Ecclesiae pacem solius Apostolicae Sedis decretis acceptas refert; iisque verbis exponit, quibus ad haec retractanda, aut firmitus stabilienda, nullò fuisse opus Concilio manifeste significat: Photium *opere manus Pontificalis, & Apostolicae potestatis tuae a communi Ecclesiae refecasti corpore; & summo te Petro aequiparans, tamquam novum Ananiam, sententia potentium verborum tuorum occidisti; & privatione spiritualis vitae, ut alterum Simonem, per anathema morti transmisisti. Et nos qui injuriam passi sumus, sicut iustissimus, & fratrum amicissimus, & iuste iustificasti, & Ecclesiae, quae apud nos est, & proprio throno, propter quae sategisti atque scripsisti, utpote Apostolicae & summae potestatis susceptor, digne ac rationabiliter restituissti, & fluctum, qui hinc inerat, dissipasti, & tranquillitatem Ecclesiis contulisti.* Denique varia & ipse Lapsorum genera enumerat, quorum causas Romano Pontifici examinandas proponit, ut quae forma in iis recipiendis servanda esset, ab ipso praescriberetur: iisque latius expositis; *haec igitur, inquit, sunt capitula, pro quibus exposcimus solutionem & ordinationem in scriptis mitti humilitati nostrae.*

Denique lecta est in hac eadem Actione Epistola Hadriani II. ad Ignatium: qua inter cetera, cognoscere illum ac certissime scire vult, se a Nicolai decessoris sui decretis nullatenus discessurum. *Quamobrem, inquit, & in his, super quibus a nobis dispositiones & discretionones exigis, nil sequendum, praeter ejus divinitus inspirata decreta conspiciamus.* Praesertim vero Gregorii Syracusani & Photii ordinationes irritas esse decernit: *quia sic se habet, in-*

quit, per decessorem meum Apostolicae Sedis decretum, CUJUS JUDICIUM NUSQUAM PRAECIPIUNT SACRI CANONES RETRACTARI; dum tamen censeant, eam in aliorum quaeque renovanda seu definienda negotia perscrutari: nosque convenit, ut praetulimus, ejus in omnibus constituta sectari. Denique, ut alia omittam, Ignatio praecipit, ut omnino curet, peractam Romae latrocinium Photii Conciliorum damnationem ab omnibus in Synodo subscribi, & in Ecclesiarum archivis recondi ac sedulo conservari: Ergo Fraternitas tua curet necesse est, ut sententiarum capitula, quae Synodice in Ecclesia Dei, ubi sanctum Corpus Apostolorum Principis Petri requiescit, pro abolendis profanis Conciliis Constantinopoli à Photio tam adversus Sedis Apostolicae reverentiam, quam adversus sanctimoniam tuam congregatis, communiconsonantia promulgarimus, apud vos in Synodo cunctorum subscriptione roborentur, & in singularum archivis Ecclesiarum provide recondantur.

Post lectionem Epistolae Sanctissimi Vicarii senioris Romae dixerunt: *Est canonice ac Synodice acta Epistola haec?* Sancta & universalis Synodus dixit: *Canonica & ordinata &c.* Ex quibus verbis colligit Bossuetius, de Romani Pontificis judicio Synodum judicasse. Mirum profecto, Legatos Sedis Apostolicae Synodi examini & judicio subicere voluisse Epistolam illam, qua tam diserte statuebatur, non licere cuiquam ejusdem Sedis Apostolicae judicia retractare: similiter Synodum ad eam Epistolam retractandam aggressam esse, quam Canonicam, idest Canonibus consonam agnoscendo, hoc ipso juxta sacros Canones irretractabilem fatebatur. Nec dici potest, Canones quos in suis litteris Hadrianus laudat, solum privatis per-

personis, aut particularibus Synodis, non autem Conciliis oecumenicis adimere facultatem judicia Romani Pontificis retractandi: ut enim mox demonstrabimus, Legati Sedis Apostolicae etiam de generalibus Synodis laudatos Hadriano Canones intelligebant; ac proinde nulla ratione defendi potest, quod quum Legati Patres interrogarunt, Canonica ne ipsis videretur Hadriani Epistola, eam Synodi iudicio subicere voluerint.

Actione quarta quum Procères a Basilio Imperatore deputati pertinaciter flagitarent, ut Photius ejusque asseclae ad Synodum vocarentur, ipsisque praesentibus sententia legeretur in eos per Sedem Apostolicam pronunciata, ex eisque audiretur, quid causationis adferrent; quumque in eorum sententiam & Episcopi transiissent: aegre tamen eorum petitioni Legati Sedis Apostolicae acquieverunt; veriti nimirum, ne secus atque per Canones statutum erat, Romani Pontificis iudicium retractari per Synodum videretur. Quare palam protestati sunt, ad maiorem dumtaxat rerum ab Ecclesia Romana iudicatarum manifestationem, a se pervicaces Photianos in Synodo auditum iri: *Nobis, inquit, non licet rescindere iudicium sacrorum Romanorum Pontificum: hoc enim contrarium est Canonici institutis: quoniam praesentes illic per proprios Missos, & Romae demorantes contra se sententiam, & prolatam damnationem in Photium, & in manus impositionem ejus & audierunt & liquido didicerunt. Verumtamen ut manifestiorem eis justam iudicationem Sanctae Romanae Ecclesiae faciamus, ingrediantur, & exaudiant legi Synodicas definitiones, & iudicia Beatissimi Papae Nicolai, & certificentur magis ac magis.* Ex quibus verbis duo sane magni momenti coll-

liguntur. 1. Quod quum Canones vetant, Romanorum Pontificum judicia retractari; lex ista non modo particulares, verum & generales Synodos comprehendit. Cavebant enim Legati, ne S. Nicolai Papae de Photio ac de Photianis iudicium, contra atque per Canones statutum erat, retractari in hac Synodo videretur; quam imprimis Photiani tamquam universalem agnoscere cgebantur: id enim primum ab eis exigendum esse decrevit Metrophanes Smyrnenfis Metropolitae, qui primus petitioni Procerum de Photio ejusque asseclis in Synodo audiendis annuendum existimavit: *Nunc ergo*, inquit, *exigantur in scriptis fateri, si hanc sanctam & universalem Synodum, & quae ab ea judicantur, admittunt.* 2. Ex iisdem Legatorum verbis colligitur, judicia Romanorum Pontificum in Synodis generalibus recenseri ad majorem dumtaxat eorumdem iudiciorum manifestationem, non autem quod ea retractandi jus aliquod iisdem Synodis competat. Quare hoc tantum loco quaecumque Meldenfis Episcopus ex Synodis generalibus adversus nostram doctrinam colligit argumenta, penitus evertuntur.

Denique in eadem Actione tres Sancti Nicolai I. Epistolae lectae sunt, duae ad Michaëlem Imperatorem, altera ad Photium, in quibus jus & auctoritas Sedi Apostolicae adseritur ad omnia Ecclesiastica negotia irretractabiliter terminanda. In prima ad Michaëlem observat Nicolaus, plures habitos esse Sanctorum Patrum conventus, a quibus, inquit, *& deliberatum ac observatum existit; qualiter absque Romanae Sedis Romanique Pontificis consensu nullius insurgentis deliberationis terminus daretur.* In altera ad eundem Imperatorem, *Sanctam, Catholicam, & Apostolicam, caput omnium Ecclesiarum,*

Ro-

Romanam scilicet Ecclesiam, quae semper Sanctorum Patrum sincerissimas auctoritates in omnibus suis actibus sequitur ..... proculdubio quae agenda aut ambigenda fuerint IRRETRACTABILITER cuncta disponere, ordinare atque definire posse, disertis verbis adfirmat. Denique in tertia, quae est ad Photium non minus diserte docet, Sanctam Romanam Ecclesiam per Beatum Petrum Principem Apostolorum, qui Dominico ore primatum Ecclesiarum suscipere promeruit, omnium Caput esse, & ab ea rectitudinem atque ordinem in cunctis civitatibus, & Ecclesiasticis institutionibus, quas secundum Canonicas & Synodicas Sanctorumque Patrum sanctiones inviolabiliter atque irrefragabiliter retineret, requirere ac sectari. Et ideo consequens est, ut quod ab hujus Sedis Rectoribus plena auctoritate sancitur, nullius consuetudinis praepediente occasione, proprias tantum sequendo voluntates, removeatur, sed firmitus atque inconcusse teneatur.

## ARTICULUS II.

*De eodem argumento ex aliis ejusdem  
octavae Synodi Actionibus.*

**A**ctione quinta animadversione potissimum digna sunt haec Legatorum seu Vicariorum Sedis Apostolicae verba: Nos ergo non novum aliquod vel recens judicium judicabimus, aut introducemus, sed vetus ex multo tempore judicatum quidem a sanctissimo & beatissimo Papa Nicolao, firmatum autem a sanctissimo Papa Hadriano: & non possumus transferri vel removeri  
a pa-

a paternis definitionibus & legibus, nequē declinare ad dexteram, neque ad sinistram: Scriptum est enim: „Au-  
 „ di, fili mi, leges Patris tui, & ne repellas jura Matris  
 „ tuae. An verbis disertioribus profiteri poterant, inde-  
 clinabile esse ac prorsus irretractabile Ecclesiae Romanae  
 judicium? Paulo post autem subjungunt: *Quid ergo placet*  
*vobis sensus iste, an non? Et si quidem placet, talia sunt*  
*nostra, & nostrae Sedis: quod si apud vos non fuerint*  
*acceptabilia, nos tamen super montem excelsum Synodi*  
*ascendemus, & exaltabimus in fortitudine vocem no-*  
*stram, evangelizantes vobis & consequentiam, quae fa-*  
*cta est, (id est, rei gestae seriem, processumque Juridi-*  
*cum: ita haec verba Bossuetius exponit.) & ore pro-*  
*mulgata est Sanctorum Patrum nostrorum a gratia Spiri-*  
*tus Sancti.... Ad haec quid dicit sancta Synodus? San-*  
*cta & universalis Synodus exclamavit: Recipimus omnia*  
*valde quippe sunt discreta, & congrua, & consona Ec-*  
*clesiasticis regulis. Refert haec verba etiam laudatus Bos-*  
*fuetius, iisque subjungit: „Ita sanctae Synodi accipiunt*  
*„ & Sanctae Sedis decreta, & monita Legatorum, facto*  
*„ examine, ratione perspecta. Mirum & hoc profecto,*  
*quod in hoc ipso loco, in quo Legati tam diserte, ut jam*  
*observavimus; profitentur retractationi obnoxia non esse*  
*Romanae Sedis judicia, ea Synodi examini subicere ju-*  
*dicentur. Mirum & illud, quod Synodus retractare cre-*  
*datur ejusdem Sedis judicium, ubi verbis Legatorum con-*  
*cinit & applaudit, quibus illud prorsus irretractabile de-*  
*finitur. Denique nec illam horumce verborum: Evange-*  
*lizantes vobis & consequentiam, quae facta est: horum;*  
*inquam, verborum interpretationem, non admittimus;*  
*quam Bossuetius commentus est; ut iis nimirum rei gestae*



series, & processus juridicus significetur: haec enim Patres antea didicerant, ut ex iis verbis, quae Legati praemiserant, perspicuum est: *Vidistis, fratres, vidistis & audistis, quae ex multo tempore dicta & gesta sunt de hujusmodi causa.* Quare illis verbis significari putamus sententiam ab Apostolica Sede adversus Photium & pro Ignatio prolatam: Ajunt enim: *Evangelizantes vobis & consequentiam, quae facta est & ore promulgata est Sanctorum Patrum nostrorum a gratia Spiritus Sancti:* quae in sententiam diffinitivam competunt, non in rei gestae seriem, aut processum juridicum. Sensus itaque est: „ Quod si ea quae nostrae Sedis & nostra sunt, apud vos „ non fuerint acceptabilia; nos tamen sententiam Patrum nostrorum ore per gratiam Spiritus Sancti Romae „ promulgatam, hinc rursus exaltantes in fortitudine vocem „ nostram sollemniter promulgabimus.

Actione sexta plura notanda occurrunt. Primo enim Legati Sedis Apostolicae se ad Synodum missos fuisse docent, non ut cum ipsa judicium a Nicolao I. & Hadriano II. in duabus Romanis Synodis latum retractarent; *Verum ut illud, inquit, defendere in hac sancta Synodo debeamus.* Et infra: *Nos neque subvertimus neque rejudicamus judicium Sanctae Romanae Ecclesiae sub undecima indictione factum contra Photium Moechum & tyrannum ac pervasorem, atque sequaces ejus.*

Deinde iidem Romanae Sedis Vicarii seu Legati, memoratis iisdem Nicolai & Hadriani Synodicis Canoniceque judiciis, his verbis Basilium Imperatorem, qui sacro coetui praefens aderat, adloquuntur: *Sanctissimus Hadrianus nos famulos suos direxit in hanc Urbem ad manifestationem veri & justii judicii in conspectu Impe-*

*rii vestri, & sanctae universalis Synodi: ita ut non habeant vocem repedationis, vel appellationis; sed quemadmodum jam judicati sunt, & dejecti in saeculum maneat.* Refert & haec verba Illustrissimus Bossuetius, qui & haec statim observat: „En tantum per Synodum „universalem appellationis sublata spes omnis; neque „a decreto resilire datur, sed fixa & aeterna manet sententia. Quid amplius? Sic se habet Ecclesiasticorum „judiciorum ratio, non tantum in fidei quaestionibus, „sed etiam in iis, quae statum & pacem omnium Ecclesiarum spectant. Sic ille in rem suam convertit, quae pro nostra sententia plane decretoria sunt. Ajunt enim Legati, se non ad retractandum, vel iterato examini subjiendum Ecclesiae Romanae judicium ad Synodum advenisse, verum ad illud eidem Synodo manifestandum, in eaque sollemniter promulgandum; ac post ejus promulgationem, nullum esse ab ejusmodi Ecclesiae Romanae judicio appellationi locum. Haec enim non ad Synodi universalis, sed ad Romani Pontificis auctoritatem pertinere, tum per se patet, tum evidentius perspicitur ex his, quae statim iidem Legati subjungunt: *Et Ecclesiae Orientalium, gratia Dei, nobiscum sentiunt, stabiliunt, damnant, & anathematizant similiter, usque in consummationem saeculi.* Quae ad consensum Synodi pertinent cum Ecclesiae Romanae judicio; ideoque quae praemiserant, solam spectabant Romani Pontificis auctoritatem.

Tertio in eadem Actione „Episcopi, qui Photio se „obligatos putabant, ab his vinculis per haec verba Synodi, inquit Bossuetius, liberantur: *Sanctissimi Vicarii senioris Romae, & nos, qui reliquarum Sedium Vicarii*  
su-

*sumus, haec omnia dissolvimus hodie, gratia Jesu Christi, qui dedit nobis summi Sacerdotii potestatem juste ac congrue ligandi atque solvendi. Addunt: Spiritus enim Sanctus, qui locutus est in sancta Romana Ecclesia, credimus, quod & in Ecclesiis nostris locutus exstiterit. Haec neque hoc ordine prolata sunt, neque totius Synodi verba sunt, sed Eliae Presbyteri, qui locum obtinebat, seu Vicarius erat Theodosii Hierosolymorum Patriarchae. Haec tamen Bossuetius tamquam totius Synodi verba refert, ac statim subjungit: „En Episcopalis coetus, a Christo profectam, & una cum Romana Sede exerci- „ tam supremam Ecclesiae potestatem! Perinde atque aliquis nostrum neget, adesse Synodo oecumenicae, cui Romanus Pontifex omnium Ecclesiarum Caput, vel per seipsum, vel per suos Legatos praesidet, adesse, inquam, potestatem relaxandi juraamenta, quae *violenter & coacte*, ut statim Elias declarat, extorta fuerant. Nullus pariter nostrum negat adesse a Christo Oecumenicae Synodo ejusmodi potestatem. Sed, praeter Romanum Pontificem, quo illa ordine a Christo in ceteros Episcopos derivetur, Elias non explicat: Stephanus autem Dorensis Episcopus, S. Sophronii ejusdem Hierosolymitanae Ecclesiae Patriarchae ad Romanam Sedem Legatus, in magna illa sub Martino I. Lateranensi Synodo palam dixit: quod *Claves regni caelorum ipse tantummodo magnus secundum veritatem & princeps Apostolorum meruit Petrus*. Alia plura in hac eadem Actione notanda essent; sed ea libens praetereo, ne nimium protrahatur oratio.*

Plurima quoque in Actione septima occurrunt, quae huc transcribi deberent: Sed ne longius excurram, ea tantum seligo, quae majoris momenti esse videntur. Initio

actionis quum Bahanes procerum primus Photianos vehementer urgeret, ut Romanae aliarumque Patriarchalium Sedium iudicio acquiescerent; Eufchemo Caesareae Capadociae Photianus Episcopus temere & abrupte in haec verba respondit: *Ego is quae per rationem non sunt acta, & qui non sectantur Canones SS. Apostolorum, & sanctorum ac universalium Synodorum, non tantum si Romanus vel Hierosolymitanus sit, sed & si Angelus de caelo veniat, & non conveniat sano verbo, neque pareo, neque sequor.* In aliis Actionibus iidem Schismatici Romanorum Pontificum, & aliorum Patriarcharum iudicio auctoritatem Canonum objecerunt: quos illi nunc imitantur qui Romanis Pontificibus, aliisque per universum orbem Catholicis Episcopis S. Augustini aliorumque Patrum, ac veterum Conciliorum testimonia verbaque opponunt. Hos autem cum Photianis egregie idem Bahanes Patritius refellit: *Homines, dicite, unde estis? De caelo estis? de abyssu estis? An de terra, in qua nos degimus? Et ostendite hac ora, quia si ve haeresis mota est, si ve schisma emerfit in qualibet parte? Et sensit aliquis extra quatuor Patriarchia & salvatus est? Et audio vos. Hodie quatuor Patriarchia, imo vero quinque condemnatione condemnant vos: quid vobis videtur ad haec? Est, qui adjuvet vos? Dicite.* Quam facile haec in paucos illos, qui Apostolicae Sedis dogmaticis constitutionibus, quas ceteri per universum orbem Episcopi receperunt, adhuc reluctantur, intorqueri possint, nemo est, qui non videat. Porro eorum alia esse non solet, quam haec eorundem Schismaticorum ad illa Bahanis verba responsio: *Canones Sanctorum Apostolorum, & Sanctorum Conciliorum: ita & novi Refractarii: Testimonia veterum Patrum & Con-*

ci-

ciliorum nos adjuvant, & adversus universae Ecclesiae auctoritatem tuentur. Verum nos eis rursus illa ejusdem Bahanis ingerimus: *Dicite, qui Canon vos adjuvet, & ubi posuerit Dominus Canones? In Ecclesiis suis, an in aliquo alio loco? & ubi Ecclesiae sint hodie, & ubi praedicetur Evangelium: Est alius locus, praeter quem tenent Sanctissimi isti Vicarii? Dicite.* Quibus verbis illud aperte significat, Canonum, quemadmodum & fidei depositum, eorumque interpretationem credita tunc fuisse quinque illis primariis Ecclesiis, quae Patriarchales dicebantur, & a quibus ceterae per universum orbem Ecclesiae pendebant, quarum sola nunc superest Romana Sedes, qua ceterae continentur, cujusque auctoritate reguntur. Ubi & illud animadvertendum, quod superiori Capite probatum est: ad Synodi oecumenicae auctoritatem satis tunc esse visum; si ex Occidente Romanus Pontifex, alique Orientis Patriarchae per suos Legatos adessent, & consensum praebere: Quod non semel & in aliis Actionibus refricatur. Ita Actione superiore Basilius Imperator eisdem Photianos adloquens, ait: *Utique nostis & vos, & universitas, quae sub sole est, quia protectione veri Dei nostri quinque Patriarchia orbis terrarum recta sentiunt, & non est laesio fidei: & ideo quidquid judicant, necessario debetis recipere. Ut autem apparet, non creditis, quod ea, quae dicta sunt, illinc existunt: si enim credidissetis, non utique judicium eorum reprobare penitus auderetis. Interrogo ergo vos: diffiditis, an creditis, quod inde sint? Photii Episcopi dixerunt: Non diffidimus. Basilius . . . . Imperator dixit: Ergo si creditis, suscipite prolatum ab eis judicium.*

Secundo in celebri illa S. Nicolai Papae ad universos  
Mc-

Metropolitanos, Episcopos & reliquum Clerum Constantinopolitanae Sedi subiectos Epistola, quae in hac ipsa septima Actione lecta est; notanda est formula, qua in omnibus fere Capitulis eidem Epistolae insertis, ac potissimum in Photii damnatione, & Ignatii restitutione, Sanctus Pontifex utitur: quae sane plurimum valet ad evitendas plures Meldensis Episcopi observationes: *Haec*, inquit Cap. I. sententiam in Photium damnationis ferens, *& bis similia contra Evangelica, Apostolica, Prophetica, atque Canonica instituta se efferens, sit Dei omnipotentis, & beatorum Apostolorum Principum Petri & Pauli, ac omnium simul Sanctorum, atque venerandorum sex universalium Conciliorum auctoritate, nec non & Spiritus Sancti per nos iudicio, omni Sacerdotali honore & nomine alienus, & omni Clericatus officio prorsus exutus.* In quibus verbis Conciliorum generalium auctoritati iudicii sui auctoritatem adjungit, quod per Spiritum Sanctum praedicat esse prolatum. Et infra Cap. IV. Ignatium in suam Sedem restituens: *Et ideo, inquit, illum . . . per potestatem divina voce beatissimo Petro collatam, & per auctoritatem Sanctorum Canonum, & Decretalium Constitutionum, more Sanctorum Patrum prolatarum, pristino honori &c. restituimus, statuimus, ac confirmamus.* Id vero quid aliud est, quam utramque sententiam veterum Patrum & Synodorum & Pontificum Decretis & Canonibus consonam declarare, eorumque proinde auctoritate firmare? Nec ideo tamen vi sua Sedis Apostolicae iudicium immobiliter stare ac valere negat & irretractabili firmitate consistere; quam videlicet Sanctus ipse Pontifex ex Spiritus Sancti inspiratione derivat, & ex potestate Apostolorum Principi divina voce collata:

Quam

Quam proinde Apostolicis Constitutionibus adimere nequaquam censendi sunt Conciliorum Patres, quum eis se se consensum adjungere profitentur, quod eas Veterum Patrum & Conciliorum testimoniis & sanctionibus consonas reppererunt.

Tertio in eadem Epistola Cap. VI. anathema rursus in Iconomachos intorquetur, statimque subjungitur: *Haec sunt, quae Sedes Apostolica statuit; haec sunt, quae synodice regulariterque decrevit; haec sunt, quae vos tanto studiosius oportet amplecti, tanto sollicitius observare, quanto satius nostis, quae ab ea statuta fuerint, haec universalem semper Ecclesiam tenuisse; ita ut contra singulos errores in Ecclesia exortos, prior haec secundum primatus sui auctoritatem SENTENTIAE TERMINUM DEDERIT. Et ita demum universalis Ecclesia, licet aliquando per aliquantulum temporis in quibusdam reluctata sit; quae illa tamen probavit, quandoque probaverit; & quae illa refutavit, quandoque refutaverit.* Refert haec verba Cl. Thomassinus Dissert. XII. in Conc. Chalced. num. X. ad eaque sapienter observat, quod eis „ nihil verius, nihil „ sapientius dici potuit. Etenim, *inquit*, Nicaenae Synodo in condemnationem Quartadecimanorum centum amplius annis praecivit Ecclesia Romana. Universalis quoque illi, de qua Augustinus, Synodo, quae iterum baptizari ab haereticis semel tinctos vetuit, longo temporis intervallo Sedes Apostolica faciem praetulit. Reluctati sunt aliquamulti aliquandiu, sed tandem Capiti suo universa acquievit Ecclesia. Apollinarem certe Damasus, Macedonium ante secundam Oecumenicam Synodum ita Romana Ecclesia Occidentisque praedamnaverant, ut nulla sibi opus Synodo duxerint,

„ & Constantinopolitano Concilio praeluxerint potius,  
 „ quam obsecuti sint. Profecto Sanctus Pontifex Nicolaus non modo docet, Sedem Apostolicam ceteris Ecclesiis in damnandis erroribus praeivisse; verum & quod ipsa insurgentibus controversiis *sententiae terminum dederit*; id est, sententiam protulerit, qua ipsis controversiis finis seu terminus imponeretur. Ubi perspicuum est, quod ex Ecclesiae consensu nequaquam pendere existimabat Apostolicorum decretorum ineluctabilem auctoritatem; quum disertis verbis agnoscat & fateatur, Apostolicis decretis, quibus exortis haeresibus terminus datus est, non defuisse, qui aliquamdiu refragarentur: qui tamen vel ferro coacti sunt Apostolici iudicii aequitatem & veritatem agnoscere. Quod profecto inerrantiae Sedis Apostolicae ineluctabile argumentum est: Ut enim se habent humanae res, nisi ipsa in dirimendis fidei controversiis, indefinenter divino spiritu regeretur, aliquando cadere ac labi debuisset, & ab errore per ceteras Ecclesias toto diffusas orbe revocari. At contra res accidit. Nam Ecclesia Romana tot jam exercita conflictationibus probari non potest, quod a veritatis tramite aliquando deflexerit: reliquae vero per orbem Ecclesiae, quae ipsi aliquando restiterunt, tandem errores suos agnoscere ac fateri coactae sunt.

Actiōe octava notanda haec sunt & alta mente reponenda ad Theodorum cognomine Crithinum ex Iconomachorum faece, Bahanis Patricii verba: *Imperator noster sanctus non adduxit vos ad hanc sanctam & universalem Synodum ad disputandum, sed ad commonendum: Nam utique nostis, quia Paulus Christi os liquido monet; omnem haereticum ab una & secunda admonitione devitare: Tu autem senescens in malitia tua, & sciens cum omni*



omni certitudine tenebras in quibus es, in lumine ignis tui ambulabis, audiens ex quadrifido terrarum orbe, iusto decreto Sacrorum Canonum, anathematis damnationem. Quo enim fugies? vel, quo ibis? Posuit Deus Ecclesiam suam in quinque Patriarchiis, & definivit in Evangeliiis suis, ut nunquam aliquando penitus deciderint; eo quod capita Ecclesiae sint: Etenim illud quod dicitur: Et portae inferi non praevallebunt adversus eam; hoc denuntiat: Quando duo ceciderint, currunt ad tria; cum tria ceciderint, currunt ad duo; cum vero quatuor forte ceciderint, unum quod permanet in omnium capite Christo Deo nostro, revocat iterum reliquum corpus Ecclesiae: Nunc autem toto terrarum orbe concordante, non habes excusationis modum, quemadmodum olim factum est. Jam casus evenit, quem Bahanes postremum exposuit; jam quatuor Patriarchia, seu Sedes Patriarchales, ceciderunt, & unum solum, hoc est, Romanum permanet in omnium capite Christo Deo nostro; quare ad hoc solum pertinet, quum unicum jam sit totius Ecclesiae caput, hoc est, non modo Summus Pontifex, verum & juxta veterem notionem Catholicus Patriarcha; ad hoc, inquam, solum pertinet, etiam Patriarchali jure reliquum Ecclesiae corpus in fide continere, & si alicubi deciderat, a casu, sive ab erroribus revocare: & cuicumque illius decretis resistit, illud objici potest: Quo fugies? vel, quo ibis? Univerſa Ecclesia hoc uno capite regitur & continetur; ac propterea quod istud in fide immobile perseverat, portae inferi adversus Ecclesiam praevalere non possunt.

Ad hunc locum respicit, eumque egregie ac praeclare exponit S. Anselmus Lucensis Episcopus in Opere adversus Guibertum Pseudo-Pontificem, ubi observat, Deum

ita in tribus praecipuis Patriarchis per Beatum Petrum firmamentum fidei constituisse, ut uno cadente, ab aliis duobus fides sustineatur; duobus labentibus, fides nihilominus non deficiat propter Romanum Patriarcham, qui iussus est in Apostolorum Principe ceteros confirmare, atque in eodem Petro constitutus est immobile Ecclesiae fundamentum; qui proinde tam deficere non potest, & a fide aberrare, quam nec ipsa Ecclesia, quae juxta Domini promissionem nullis unquam inferorum incurfionibus dejicietur: *Firmamentum enim fidei Christianae in eorum sedibus per Beatum Petrum sessorem earumdem ita Deus locavit, ut si unus ex tribus principalibus Patriarchis ceciderit, duo stent; quod si duo ceciderint, quum pro fide Petri ne deficiat, a Christo oratum sit, unius scilicet Romani Patriarchae fides, in qua fratres suos confirmet; nunquam deficiat.* Quod utique Christus Deus noster jam ostendere dignatus est in universalibus Synodis jam oëties celebratis. Nam uno vel duobus a fide corruentibus, Romanus in ejusdem fidei fundamento, licet pulsatus; licet concussus, tamen stetit immobilis: Caelum enim & terra transibunt; verba autem ejus non transibunt, qui dixit: Tu es Petrus, & super hanc petram aedificabo Ecclesiam meam, & portae inferi non praevallebunt adversus eam.



## CAPUT XXXIII.

- „ Concluditur argumentum ab octo primorum  
 „ Conciliorum auctoritate repetitum : Eorum  
 „ acta Adversarii nec considerasse videntur.  
 „ Sancti Gelasii, & Sancti Gregorii locus de  
 „ irretractabili Ecclesiasticorum judiciorum  
 „ auctoritate.

**Q**Uae hoc Capite paucis ac summarie Meldenſis Episcopus refricat, omnia nostris ad superiora Capita observationibus funditus, ut nobis videtur, disjecimus, ac penitus profligavimus. Quare non est, quod hîc rursus in iisdem refellendis immoremur. Quum enim ab ipsomet Illustrissimo Adversario tota haec disceptatio ad haec duo Capita revocetur; nimirum retractatas in Synodis fuisse Romanorum Pontificum de fide definitiones: Et retractationi nullum fuisse locum post fidei quaestiones Conciliorum generalium auctoritate sancitas; indeque colligat, *ingens intercedere discrimen inter Conciliare & Pontificium judicium*; quod ad primum pertinet caput, jam plurimis demonstravimus; quod etiam Cl. Thomassino Dissert. XII. in Conc. Chalced. num. III. observatum est; Julium, Caelestinum, Leonem, Agathonem omnino vetuisse, ut quae ipsi jam praefinierant, ea in Synodis generalibus velut nutantia in disceptationem traherentur. Unde illud consequens est, quod pariter laudatus Auctor observat, nullum de iis in eisdem Synodis ambi- gendi locum aut disputandi fuisse, nisi forte ex redundan- tia juris, & ad majorem dumtaxat rerum antea definita-

rum illustrationem. Porro illud etiam ostendimus, omnibus fere Orientalibus Synodis Apostolicae Sedis Decreta in Occidentali edita Synodo, & omnium fere Ecclesiarum roborata consensu praeluxisse: cujus observationis, juxta communem nobis cum Adversariis doctrinam, confectarium est, nullis absolute opus fuisse Synodis, ut ea decreta omnium fere Ecclesiarum probata consensu, irretractabilem obtinerent auctoritatem.

Quod vero ad alterum Caput attinet; ostendimus cum eodem Cl. Thomassino, *extraordinariam quoque post Synodum effusiore quadam dispensandi licentia, aut potius caritate, cognitionem fuisse aliquando concessam. Ac praeterea, nec Synodi decreta irretractabilem vim assequi, nisi postquam ea Pontifex primae Sedis approbavit, & quatenus sui examinis trutina confirmavit.* Quod etiam uberius libro sequente demonstrabimus, quum de Conciliarium decretorum per Sedem Apostolicam confirmatione cum Meldenfi Episcopo disseremus. Quare quae ex Gelasio egregio Pontifice in praesenti Capite adfert: *Bona Synodus vereque Christiana semel acta, nulla nec potest, nec debet novae Synodi iteratione convelli.* Atque iterum: *Bona Synodus, nulla causa est, cur alia debeat Synodo retractari, ne ipsa retractatio ejus constitutis detrabat firmitatem.* Haec, inquam, Gelasii, iisque adfines Magni Gregorii decretum, cum Ferrando Diacono de iis Synodis intelligimus, quibus Ecclesiae Romanae irrevocabilis ac penitus irretractabilis consensus accessit: *Quae enim, inquit ille, finiuntur judicantibus Episcopis sanctis, & ad Beati Petri memoriam perducta, DILIGENTIUS EXAMINANTUR, ATQUE FIRMANTUR, sequenda sunt, tenenda sunt, amplectenda sunt, IN RETRACTATIONE,*  
*sub*

*sub qualibet pietatis occasione teneri non debent. Ergo tale est iudicium a Conciliis prolatum, ut a Romano Pontifice diligentius examinetur, ac novo iudicio retractetur: Non est ergo illud ultimum & omnino certum Ecclesiae iudicium: Sed ultimum & omnino certum erit illud, quo diligentius examinatur atque firmatur, & quo fit, ut retractioni obnoxium amplius non sit: cujuscumque esse Romani Pontificis iudicium, quo Synodorum decreta sollemniter confirmantur, cum Ferrando Diacono propugnemus. Sed haec suo loco accuratius explanabuntur.*

# C A P U T X X X I V.

„ Alia Concilia generalia memorantur: in iis  
 „ perstitit antiqua traditio, ut summae quaes-  
 „ tiones ad Concilia generalia referrentur,  
 „ nec Pontifex non decerneret, nisi sacro ap-  
 „ probante Concilio: Referuntur quatuor La-  
 „ teranensia oecumenica Concilia, sub Cal-  
 „ lixto II. sub Innocentio II. Alexandro III.  
 „ Innocentio III. & Lugdunense primum sub  
 „ Innocentio IV.

„ **P** Ost primas octo Synodos generales summa dili-  
 „ gentia pervolutas, in promptu est iudicare de aliis  
 „ ex earum sententia, quas & actis luculentioribus notas  
 „ esse, & Apostolorum aevo propiores, faciem ceteris  
 „ praetulisse constat. Verba sunt quibus praefens Caput  
 „ Illustrissimus Meldensis Episcopus auspicatur. Quae ta-  
 „ men an aequo, vel etiam potiori jure & ipse usurpare va-  
 „ leam,

leam, ex jam dictis, satis constare arbitror, & ex iis quae dicenda & disputanda supersunt, adhuc magis constabit : „ Et tamen, *subjungit Illustrissimus Auctor*, ex ipsis posterioris aevi saeculis Conciliis demonstramus, perstitisse „ in Ecclesia Catholica antiquam traditionem, ut summae quaeestiones, summisque animorum dissensionibus „ agitatae, ad Concilia generalia deferrentur. Nemo id ignorat, nemo inficiatur, de hac re nulla nobis vobiscum controversia est. Verum id unum in disceptationem venit, an jure inde conficiatur, retractationi obnoxias fuisse, nec vim habuisse ineluctabilem Romanorum Pontificum, vel ad schismata aut haereses abolendas, vel ad fidem aut disciplinam sanciendam, Apostolicas Constitutiones, donec generalium Synodorum auctoritate confirmarentur. Id nos constanter negamus, neque inde consequens esse, decursis prioribus octo oecumenicis Synodis, demonstravimus. Quamquam autem eorum Conciliorum, quorum hic meminit Bossuetius, Acta non exstant, sed solum habemus Canones; attamen ex monumentis illorum temporum, quae supersunt, & ad controversias spectant in iis Synodis agitatae, manifeste patebit, decreta Romanorum Pontificum, quae vel ad fidem, vel ad generalem Ecclesiae disciplinam referebantur, semel ex Cathedra pronunciata, firmae & immobilis auctoritatis habita ab iis omnibus fuisse, qui fidem & unitatem Catholicam diligebant, nec eis nisi ab haereticis, & schismaticis, aut saltem non sine schismatis periculo contradictum : Neque proinde habita fuisse Concilia, ut de eorum aequitate, tanquam de re nondum satis comperta, disceptaretur.

Præterea nec aliquid Adversarios juvat, aut ad pro-

positam controversiam alicujus momenti est, quod statim Bossuetius adjungit; „nempe quod singulare id habent „ pleraeque ex his posterioribus Synodis ut eas Romanus „ Pontifex praefens habuerit, ejusque nomine dicta sententia sit, non aliter tamen, quam *sacro approbante Concilio*. Qua formula declaratur, definitiones editas, & Canones conditos, nonnisi consentiente & approbante Concilio pro pleno Ecclesiae Catholicae judicio, valituras. Nos enim dicimus, hac formula nihil aliud significari, quam quod sponte ac libenter admittimus, Episcopos, quum Synodis adsunt, sedere ut judices, quemadmodum in Hierosolymitano Concilio, etiam praesente Apostolorum Principe, suum Jacobus de Legalibus judicium protulit: *Propter quod & ego judico &c.* quam eis praerogativam nunquam Romani Pontifices inviduerunt: sed inde consequens esse negamus, plenum non esse, aut minus valere judicium, quod a Romano Pontifice ex plenitudine potestatis, & ex Cathedra Principis Apostolorum profertur, nisi aliorum Episcoporum vel Synodi generalis judicio comprobetur:



## ARTICULUS PRIMUS:

*Decreti S. Gregorii VII. adversus Investituras ante primam Lateranensem Oecumenicam Synodum firma & irretractabilis auctoritas: De illius Sanctitate & acuitate nunquam in legitimis Synodis disceptatum: De his tantum in Ecclesia Catholica disputatum; 1. An haeresis esset, investituras a Gregorio damnatas tanquam licitas usurpare. 2. An, & quibus temperamentis tolerari posset earum usus ad graviora mala, & schismatis periculum averendum.*

**D**E prima Lateranensi Synodo haec tantum Meldensis Episcopus habet: „Quaestio de investituris ingens  
 „ toto orbe incendium concitaverat, multisque ad fidem  
 „ pertinere videbatur, quod aliquatenus verum est. De  
 „ pace saepe actum inter Callixtum II. & Henricum V.  
 „ Imperatorem, eamque Summus Pontifex in Concilio  
 „ Rhemenſi, plus trecentis Episcopis congregatis, co-  
 „ rum *judicio atque sententia confirmare voluerat*, ut  
 „ ipse in eadem Synodo profitetur. Verba notanda sunt,  
 „ *ex eorum sententia atque judicio*, prorsus ex antiquae  
 „ disciplinae ratione: sed quod Rhemis inchoatum, in  
 „ Lateranensi primo generali Concilio consummavit an-  
 „ no MCXXII.

Quid haec faciant ad Romanorum Pontificum eorumque decretorum, quam adstruimus indeclinabilem aucto-



toritatem labefactandam, equidem non intelligo. Quod enim pacem inter Sacerdotium & Imperium ex Episcoporum *sententia atque iudicio* confirmari voluit Callixtus, profecto non probat, esse retractationi obnoxia Sedis Apostolicae decreta, quibus aut fides Catholica, aut generalis Ecclesiae disciplina sancitur. Coepit dissidium de Investituris Gregorio VII. Romano Pontifice, anno circiter MLXXV. quo primum earum usum in Romana Synodo laudatus Gregorius proscripsit: compositum est autem a Callixto II. in generali Synodo Lateranensi, anno, ut ait Bossuetius, MCXXII., vel sequente, ut alii Viri eruditi contendunt. Hoc autem temporis intervallo, cum ab ipso Gregorio ejusque Successoribus, tum ab Apostolicae Sedis Legatis aliisque Catholicis Episcopis plurimae Romae & in reliqua Italia, Gallia, & Germania celebratae sunt Synodi, in quibus repetita earum damnatio est, & in ipsos quoque Henricos IV. & V. Germaniae Reges & Imperatores, quod eas praeferre retinere vellent, & Sedis Apostolicae decreta impudentissime violarent, anathematis pronunciata sententia est. Quumque adhuc contumaces & rebelles, Ecclesiae libertatem tyrannicae opprimere non desisterent, exauctorati sunt, & ab Imperio depositi, subditis eorum a juramento fidelitatis absolutis: in his autem omnibus Synodis Gregorianum decretum confirmatum est, nusquam vero de illius sanctitate & aequitate disceptatum. Nimirum omnium tunc infidebat animis, & in ore omnium versabatur vetus illud effatum: juris esse Apostolicae Sedis de omnibus judicare, de illius autem judiciis nemini judicare permissum. Quare quum anno 1085. in Berbacensi Conventu partium Henricianarum Episcopi sententias a Gregorio VII. contra Henri-

cum Regem latas retractari vellent ; Otto Sedis Apostolicae Legatus Synodum Quintilineburgi cum Episcopis & Abbatibus Germaniae celebravit : De qua haec inter cetera ex Bertoldo proferunt Conciliorum Collectores : *Quum ergo omnes juxta ordinem suum confedisent , prolata sunt in medium decreta Sanctorum Patrum de primatu Sedis Apostolicae : quod nulli unquam liceat ejus judicium retractare , & de ejus judicio judicare . Quod de totius Synodi publica professione laudatum , & confirmatum est . Et hoc utique contra Henricianos , qui Fideles Sancti Petri constringere voluerunt , ut excommunicationem Divi Papae Gregorii super Henricum cum illis retractare praesumerent . Quidam autem Bambergensis Clericus nomine Gunibertus , Romani Pontificis primatui derogare volens , in mediam Synodum se contulit , asserens , Romanos Pontifices hunc sibi primatum adscripsisse , non aliunde concessum hereditasse , videlicet ut nullus de eorum judicio judicare debeat , nec illi alicujus judicio subiaceant . Qui quum aperte a tota Synodo confutaretur , praecipue tamen a quodam Laico convictus est per illud Evangelicum : Non est discipulus supra Magistrum : Quum enim hoc generaliter in omnibus Ecclesiasticis ordinibus observandum deputetur , ne major a minore judicetur , quis hoc Vicario Sancti Petri denegare potuit , quem omnes Catholici pro Domino & Magistro venerantur ?*

Quot Romani Pontifices Gregorii VII. Successores Victor III. Urbanus II. & Paschalis II. labores exantlarint , ut sanctissimi Decessoris decreta ubique obtinerent , & investituras e Laicorum Principum manibus extorquerent , & Ecclesiam in libertatem adsererent , pluribus narrat , ac  
fu-

fuse describit Nat. Alex. Dissert. IV. in Hist. Ecclesiast. Saec. XI. & XII. Artic. IV. & sequentibus, ad quem Lectorem remitto, qui inde petere poterit, quae hinc minus necessaria videntur. Attamen omittere non possum, quae in Ecclesia Catholica dicta gesta que sunt, postquam Paschalis II. Henrico V. a quo captivus detinebatur, & extrema Ecclesiae Romanae mala metuebat, investiturarum privilegium concessit. Inde enim patebit, quam irretractabilis, etiam ante Synodum oecumenicam, haberetur Gregoriani decreti adversus investituras auctoritas. Ac primum considerandum occurrit, quod privilegium Paschali II. ab Henrico Imperatore adversus Praedecessorum decreta, & Apostolicas Constitutiones per sumum nefas extortum constantissime improbarunt Johannes Tusculanus alique Cardinales, qui in Imperatoris manus non inciderant, neque illius vim ac tyrannidem experti fuerant: parumque abfuit, quin inter eos, & qui Paschali adhaeserant, ut Em. Annalium Parens testatur, schisma conflaretur. At imminentem tempestatem Pontifex prudenter avertit. Ipso enim ab Urbe digresso, Cardinales, qui foedus cum Imperatore initum improbabant, convenientes in unum, praeside Johanne Cardinali Episcopo Tusculano, confirmarunt decreta Gregorii VII. & Urbani II. contra Laicorum investituras, nihilque roboris obtinere decreverunt, quidquid adversus ea ab ipso Paschali, & ipsi adhaerentibus Cardinalibus, quovis praetextu actum fuisset. Id ubi Paschalis accepit, litteris Tarracina datis, primum quidem eorum facinus, utpote minus Canonicum, eorumque praeservidum zelum reprehendit, qui magis ex aemulatione, quam ex caritate proficisci videbatur: *Id*, inquit, *quod in personam nostram,*

imo in Patrem vestrum, praeter ipsius Ecclesiae iudicium atque praesentiam vos egistis; etsi vobis ex zelo Dei visum sit; non tamen ut mihi videtur, Canonico tramite incessistis. Non enim caritas, sed aemulatio id dictasse perspicitur. Attamen ut eorum leniret animos, neque majus ex eorum dissensione incendium excitaretur, vulnus Ecclesiasticae disciplinae illatum se se reparaturum promissit, notasque & maculas abstersurum, quas Sedi Apostolicae suoque nomini inusserat: *Nos tamen confisi de misericordia divina pro animae nostrae salute cogitamus; & commissum, quod pro fratribus atque filiis, pro excidio Urbis, & universae provinciae fecimus, emendare curabimus &c.* Haec Paschalis, scite quidem, ut observat Baronius, atque prudenter admodum occurrens schismati, quod eo modo inchoari jam videbatur. Sed non sedatur tumultus mirum in modum concitatus.

Bruno Signinus Episcopus & Cassinensis Abbas, vir insignis sanctimoniae, Guala Rhegino Episcopo, Roberto Pasiensi, aliisque Cardinalibus & Episcopis sibi adjunctis, Paschali II. imminabat, ut privilegium Imperatori concessum rescinderet, eumque anathemate configeret: alii privilegium illud tuebantur. Magna animorum dissensione ac pertinacia de illo disputari coeptum. Paschalis Brunoni quasi hujus dissidii & scandali incentori graviter succensuit. Ille vel praesens, quemadmodum Petrus Diaconus in Chronico Cassinensi significare videtur, vel per literas, vel utroque modo Pontificem convenit, suam agendi rationem excusaturus. Se ejus Sanctitatem colere & ex animo diligere contestatus est, nec ullum alium ipso vivente, suscepturum Pontificem: sed prae illo diligere Deum, cujus amoris omnis humana necessitudo, ipseque Paren-

tum

tum amor postponendus est. Ideoque se improbare privilegium de retinendis investituris Henrico Imperatori concessum, ut contrarium pietati, religioni, fidei. Illud repugnare Apostolorum decretis, & Apostolicae Sedis Constitutionibus, quibus qui contradicit, haereticus est. Brunonis, seu Bruni litteras tum ad Paschalem Pontificem, tum ad Episcopum Portuensem ex Codice Cassinensi depromptas Annalibus Baronius inseruit ad annum MCXL. num. XXX. & sequenti, ex quibus aliqua describemus; ex quibus constabit, quam Vir sanctus inviolabilem ac penitus irretractabilem judicaret Sedis Apostolicae adversus Investituras constitutiones: *Foedus autem illud*, inquit in litteris ad Pontificem, *tam foedum, tam violentum, cum tanta proditione factum, tam omni pietati & religioni contrarium, ego non laudo. At vero neque tu, sicut pluribus referentibus audio. Quis enim illud laudare potest, quo fides violatur, Ecclesia libertatem amittit &c.?* Habemus Canones, habemus sanctorum Patrum Constitutiones a temporibus Apostolorum usque ad te. *Via regia incedendum est, neque ab ea in aliquam partem declinandum. Constitutio tua, & constitutio Apostolorum una est, & ipsa quidem multum laudabilis.....* Haec namque constitutio Apostolorum & tua sancta est; Catholica est; cui quicumque contradicit, Catholicus non est..... Hanc igitur tuam & Apostolorum Constitutionem, Pater venerabilis, iterum confirma: Hanc in tua Ecclesia, quae omnium Ecclesiarum Caput est, palam & cunctis audientibus praedica: Hanc haeresim, quam tu ipse haeresim esse, saepe dixisti, Apostolica auctoritate damna, & mox videbis totam Ecclesiam tibi esse placatam &c. Et in Epistola ad Episcopum Portuensem: Audi-

vimus, inquit, quod quidam de fratribus nostris non solum non damnant ea, quae modo contra sanctam Ecclesiam facta sunt, verum etiam satis impudenter defendere conantur: omnis autem, qui haeresim defendit, haereticus est. Nemo autem, hanc non esse haeresim dicere potest, quam sancta & Apostolica Ecclesia in multis Conciliis haeresim nominavit. Et illae quidem specialiter dicuntur esse haereses, quae in Conciliis judicatae & damnatae sunt. Unde & Guibertus non immerito haeresiarum dictus est, simulque cum suis sequacibus damnatus & excommunicatus. Quicumque igitur Catholicam Ecclesiam relinquentes, ad partem Guiberti transferunt, & ejus impiam haeresim defendunt ac tenent; eos haereticos excommunicatos, & Apostolicis vinculis ligatos esse, non dubium est. An proprie damnatarum a Sancto Gregorio VII. investiturarum usurpatio haeresis esset, non una erat illo aevo Catholicorum opinio; etsi illas unanimi sententia reprobarent, & ampla quadam ac minus propria significatione haeresim appellari, nemo repugnaret. Brunus ejusmodi usurpationem inter haereses recensere, hac ratione, quod a Sede Apostolica, & in multis Conciliis proscripta fuerat; quorum tamen nullum inter oecumenica numerabatur: & adhuc ingens turbatio in Italia & Germania omnia fusdeque miscebat, & Imperatori praefraete Investituras retinere volenti, quamplures Germaniae Proceres & Episcopi adhaerebant; qui jam Paschalis privilegio nitebantur, quod quidam ex ipso Romano Clero palam improbare non audebant, quidam & palam defendere minime verebantur. Nec tamen in tanta rerum perturbatione Signinus Episcopus opus esse oecumenica Synodo judicabat, qua res tan-

ta retractaretur , & controversiae , quae tot offensiones pepererat , & Sacerdotium & Imperium scindebat , *communi sententia atque iudicio* finis imponeretur . Sed Vir sanctus Apostolicis Rescriptis finitam esse causam intelligebat , & citra Concilii generalis auctoritatem , palam haereticos appellare non dubitabat , qui Sedis Apostolicae decretis refragabantur .

Ceterum quod ad Paschalem Pontificem spectat , is ubi Capuam pervenit , coacta Synodo , cujus est mentio in Epistola Friderici Leodiensis Episcopi ad Ecclesiam Mechliniensem , apud Martene in amplif. Veter. Monument. Collect. Tom. I. coacta , inquam , Capuae sollenni Synodo , quidquid Imperatori vi coactus concesserat , totum id irritum & quasi infectum esse sancivit , privilegiumque , non jam privilegium , sed pravilegium vocari decrevit . Scripsit deinde varias ad diversos Episcopos litteras , quibus ea se retexuisse significat , quae schismatis metu commotus Imperatori Henrico promiserat , hortaturque omnes , ut adversus investituras Episcoporum magno animo insurgant . Dedit ejusmodi litteras ad Gerardum Episcopum Engolismensem Apostolicae Sedis in Gallia legatum , qui anno sequenti Lateranensi Synodo adfuit , nec non & ad Guidonem Episcopum Viennensem , qui utrarumque meminit in Epistola Synodica Concilii Viennensis ad ipsum Paschalem . Similes & ad Praesules aliquos provinciae Senonensis misit , quarum ipsi in Synodica ejusdem Provinciae ad Johannem Archiepiscopum Lugdunensem mentionem faciunt . Sed & Ivo Carnotensis Episcopus ad Henricum Angeriensem Abbatem scribens testatur , sibi scripsisse Paschalem , *se coactum fecisse quod fecit* , & *ad huc se prohibere quod prohibuit* , quamvis quae-

*quaedam nefanda quibusdam nefandis permiserit :*

Neque his contentus Paschalis, aliam anno sequenti 1112. longe frequentiore ac celebriore in Lateranensi Basilica Synodum celebravit, cujus acta ex variis Auctoribus collecta Conciliorum Editores exhibent. Sub ipsum Synodi initium hunc Pontifex ad Patres sermonem habuit: *Scriptum illud, quod magnis necessitatibus coactus, non pro vita mea, non pro salute aut gloria, sed pro solis Ecclesiae necessitatibus, sine fratrum consilio aut subscriptionibus feci, super quo nulla conditione, nulla promissione constringimur, sicut prave factum cognosco, ita prave factum confiteor, & omnino corrigi, Deo praestante, desidero: cujus correctionis modum fratrum, qui convenerunt, consilio iudicioque constituo, ne forte per hoc in posterum detrimentum aliquod Ecclesiae, aut Animae meae praejudicium relinquatur.* Postrema vero Concilii die ut omnes a se suspiciones amoveret, fidei professionem emisit, in qua inter cetera haec ait: *Amplector... decreta sanctorum Patrum Romanorum Pontificum, & praecipue decreta Domini mei Papae Gregorii, & beatae memoriae Papae Urbani: Quae ipsi laudaverunt, laudo; quae ipsi tenuerunt, teneo; quae confirmaverunt, confirmo; quae damnaverunt, damno; quae repulerunt, repello; quae interdixerunt, interdicto; quae prohibuerunt, prohibeo in omnibus & per omnia, & in his semper perseverabo.* Tum Gerardus Engolismensis Episcopus Sedis Apostolicae per Aquitaniam Legatus, Summi Pontificis totiusque Synodi assensu, hanc sententiam promulgavit: *Privilegium illud, quod non est privilegium, neque vero debet dici privilegium, pro liberatione captivorum & Ecclesiae, a Domino Paschali Papa per violentiam Regis*  
Hen-



Henrici extortum, nos omnes in hoc sancto Concilio cum Domino Papa congregati, canonica censura, & ecclesiastica auctoritate, iudicio Sancti Spiritus damnamus & irritum esse judicamus, atque omnino cassamus, & ne quid auctoritatis & efficacitatis habeat, penitus excommunicamus. Et hoc ideo damnatum est, quod in eo privilegio continetur, quod electus canonice a Clero & populo, a nemine consecratur, nisi prius a Rege investitur. Quod est contra Spiritum Sanctum & canonicam institutionem. Qua perlecta sententia, ab universo Concilio acclamatum est, Amen, Amen, Fiat, Fiat.

Habita est hoc eadem anno XVII. Kal. Octob. Synodus Viennensis in Gallia a Guidone illius Urbis Metropoli-  
lita, & Sedis Apostolicae Legato, qui postea Callixti II. nomine adscito Sedem Apostolicam tenuit, & primam Lateranensem oecumenicam Synodum celebravit. Viennensi Concilio adfuerunt inter alios S. Godefridus Ambianensis, & S. Hugo Gratianopolitanus, Antistites; conditque in eo tres Canones, quibus investiturarum usurpationem, privilegium ab Henrico Imperatore, & ipsum Henricum anathemate perculerunt: Notandus imprimis, & animadversione dignus est primus Canon: *Investituram Episcopatum, & Abbatiarum, & omnium Ecclesiasticarum rerum de manu laica, Sanctae Romanae Ecclesiae auctoritatem sequentes, haeresim esse judicamus.* Falluntur quidem, quum investiturarum usum velut haeresim damnant, eaque in re Sedis Apostolicae auctoritatem obtinent: Neque enim Romani Pontifices Gregorius VII. Victor III. Urbanus II. & Paschalis II. qui toties illas damnaverant, nusquam earum defensoribus haereseos notam inusserant: eundem tamen errorem & Gos-

fridus Vindocinensis Abbas erravit Epist. XI. libri III. ad Rainaldum Andegavensem Episcopum, ubi investiturarum propugnatores, Gregorii VII. in Concilio Romano Canone fretus, tamquam haereticos insectatur: *Qui autem, inquit, cognoscere voluerit, quid Catholica & Apostolica Ecclesia de investitura senserit, quid docuerit, quid judicaverit, quid constituerit, legat in primo Capitulo illius Concilii, quod tempore Gregorii VII. Papae factum est: & ibi omnes Clericos, qui de manu Laici investituram accipiunt, haereticos vocatos, & ideo damnatos & excommunicatos inveniet.* Memoria, inquit Nat. Alex., fefellit Goffridum Vindocinensem. In Synodorum enim a Gregorio VII. celebratarum decretis eos, qui investituras de manu laica susciperent, excommunicatos legimus; Haereticos vero appellatos non legimus. In eadem opinione & Bruno Signinus Episcopus, de quo supra, & Johannes Lugdunensis in Epistola ad Daimbertum Senonensem Archiepiscopum, versabantur: quorum opinio hac tantum ratione defendi potest, quam Ivo Carnotensis in Epistola ad laudatum Johannem Lugdunensem proponit; ut nimirum haeresis esse dicatur, *si quis Laicus ad hanc prorumpit insaniam, ut in datione & acceptione virgae putet se tribuere posse sacramentum, vel rem sacramenti Ecclesiastici.* Illum, inquit Ivo, prorsus judicamus haereticum. Vel, ut eandem opinionem loco citato idem Johannes Lugdunensis exponit; ut scilicet exterior investitura tunc in haeresim desinat, quum quis pertinaciter contendit, eam licite fieri posse: *Et licet, inquit, exteriores investituras per Laicos factas non satis proprie haeresis nomine censemus; sentire tamen ac defendere fieri debere, indubitata haeresis est.* Quo forte vel altero sensu

Paschalis Papa descriptum superius Viennensis Concilii Canonem intellexit, quum illius Synodi acta data ad Guidonem Archiepiscopum ceterosque Patres Epistola confirmavit. Utcumque tamen eorum se habuerit opinio, mihi perinde est, qui id unum contendo, solius Apostolicae Sedis auctoritate illatam fuisse investiturarum usui irretractabilem damnationem. Quod profecto efficacius & evidentius eorum testimonia demonstrant, qui sequentes, ut eis videbatur, ejusdem Sedis Apostolicae auctoritatem, eandem usurpationem haeresim esse judicabant.

Mitiolem, & Ecclesiae Romanae sensui magis consonam cum de Investituris, tum de Pontificis lapsu, opinionem Ivo Carnotensis habebat in Epistola, quam Daimberti aliorumque Provinciae Senonensis Episcoporum & suo nomine scripsit ad Johannem Lugdunensem, qui ipsos ad Concilium apud Ansam celebrandum invitaverat, in quo, inquit, *tractare disposuistis de fide, & investituris Laicorum . . . . quas quidam inter haereses computant*. Ipsi autem minime probant, ob ejusmodi causam Synodum celebrari; quod videlicet excusandum potius quam propalandum existimarent Romani Pontificis facinus, qui investituras Imperatori coactus concesserat, & priora decreta sua revocare paratus erat: *Quod enim propter vitandam populi stragem paterne in se admisit Summus Pontifex, coëgit necessitas, non approbavit voluntas . . . . Quod si adhuc in Teutonicum Regem debitam severitatem non exercet, credimus, quia consulte differt secundum quorundam Doctorum judicia, qui consulunt, quaedam admittenda pericula, ut possint vitari majora*. Quod S. Augustini ex libro tertio contra Parmenianum testimonio & auctoritate confirmant.

Non modo autem Synodi in hac caussa consilium improbant, quod tegi potius vellent, quam vulgari Paschalis lapsum; verum etiam quia de persona Pontificis agebatur, quae solius Dei, nullius autem hominis, proindeque nec ullius Synodi iudicio subiacet: *Non videtur nobis utile consilium ad illa Concilia convenire, in quibus non possumus eas Personas, contra quas agitur, condemnare vel iudicare: quia nec nostro, nec ullius hominum probantur subiacere iudicio. Unde nos constat esse immunes, si facta eorum oris gladio ferire formidamus: quum ipse Mediator obedire eis praecipiat, si ea quae ad Cathedralam pertinent, recta praecipiant, ea vero minime faciant.*

Pergunt deinde idem Paschalis erratum pluribus rationibus extenuare, ac potissimum ostendunt, illum concedendo Investituras Imperatori, decreta suorum decessorum proprie non fuisse praevaticatum, quia id studiose non fecerat, sed subreptione fallente vel necessitate cogente: *His verbis excusatos nos credimus, quod a laceratione Domini Papae linguas nostras reprimimus: & si quid contra sententiam suam, suorumque Praedecessorum, de remissis Germanico Regi investituris fecisse videtur, filiali caritate excusamus. Non enim praevaticator est legis, qui delinquit in lege, aliqua fallente subreptione, vel impellente necessitate; sed qui legem impugnat studiose, & delictum suum non curat agnoscere.*

Denique investituram haeresim dici non posse propugnant, quum ad fidei materiam nullatenus pertineat, & in sola manuali actione dantis & accipientis versetur: Si tamen aliquis Laicus reperiretur adeo stolidus & vecors, ut persuasum haberet, se conferre aliquod Sacra-

men-

mentum, aut Sacramenti effectum, cum baculum & anulum tradit, illum haereticum esse censendum; non quidem ratione investiturae manualis, sed ob diabolicam illam praesumptionem: Investituram tamen illam manua-lem invasionem esse juris alieni, & sacrilegam usurpationem, quam rescindere penitus oporteat, si id fieri possit absque periculo schismatis: *Si vero congrua volumus rebus nomina dare, possumus dicere, quod manualis illa investitura per Laicos facta, alieni juris est pervasio, & sacrilega praesumptio; quae pro libertate Ecclesiae & honestate, salvo pacis vinculo, si fieri potest, funditus abscindenda est. Ubi ergo sine schismate auferri potest, auferatur; ubi sine schismate auferri non potest, cum discreta reclamatione differatur.* Ex quibus constat, & ipsos, quamvis de investituris mitiorem foverent opinionem, non dubitasse tamen, quin aequum esset & sanctum Gregorii VII. aliorumque Romanorum Pontificum illas damnantium decretum, & hoc tantum ab aliis dissensisse, quod non omnino damnandum Paschalis facinus judicabant, ac prudenti oeconomia differri potuisse censebant istiusmodi decreti executionem ad vitanda graviora mala, & schismatis periculum avertendum.

Haec opinionum dissonantia non modo in Galliis, verum & in Italia fervebat, ut ex ultimo Concilio Lateranensi colligitur, quod pro damnandis investituris Paschalis II. anno MCXVI. celebravit; ubi Signinus Episcopus privilegium Henrico Imperatori concessum tamquam haereticum damnat; alius pravam quidem fuisse, non abnuit, sed haereticum fuisse negat; alius ad liberandum populum Dei bonum fuisse contendit. Pontifex autem suam demisse culpam agnoscit; primus in illud anathema intorquet,

quet, & ad ejus damnationem universam Synodum excitat; S. Gregorii VII. decretum iterum promulgat: Denique Cononis Episcopi Praenestini, & aliorum Sedis Apostolicae Legatorum habitas ubique terrarum adversus investituras & Henricum Imperatorem plurimas Synodos Apostolica auctoritate confirmat: Sedique Apostolicae in retinenda Catholica fide, ac damnandis haeresibus immobilem & ineluctabilem vindicat firmitatem. Haec constant ex actis hujus Concilii, quae fusissime Urspergensis Abbas descripsit; unde pauca subjungere operae pretium existimo: *Tunc Apostolicus causam Concilii, & animi sui intentionem his verbis exposuit*: „ Postquam Dominus de Servo suo fecit quod voluit, & me Populumque „ Romanum tradidit in manus Regis: videbam quotidie „ passim fieri rapinas & incendia, caedes & adulteria. „ Haec & hujusmodi mala cupiebam avertere ab Ecclesia & populo Dei: & quod feci, pro liberatione populi Dei feci: feci autem ut homo, quia pulvis sum „ & cinis. Fateor, me male egisse, sed rogo vos omnes, orate pro me ad Deum ut indulgeat mihi. Illud autem malum scriptum, quod in tentoriis factum „ est, quod pro pravitate sui Privilegium dicitur, condemnno sub perpetuo anathemate, ut nullius unquam sit „ bonae memoriae, & rogo vos omnes ut idem faciatis. *Tunc ab universis conclamatum est*, Fiat, Fiat. *Bruno autem Signinus Episcopus altius exorsus est*: „ Gratias „ agamus omnipotenti Deo, qui Dominum Papam Paschalem, qui praesenti Concilio praesidet, audivimus „ proprio ore damnantem illud Privilegium, quod pravitatem & haeresim continebat. *Ad haec quidam cavillatorie subjunxit*: „ Si Privilegium illud haeresim „ con-

„ continebat, qui illud fecit, haereticus fuit. *Johannes autem Cajetanus Episcopus ad haec commotus Signino respondit:* „ Tu ne hîc & in Concilio, nobis audientibus, Romanum Pontificem appellas haereticum? Scriptum quod fecit Dominus Papa, malum quidem fuit; sed haeresis non fuit. *Et alter quidam adjecit:* „ Imo nec malum dici debet: quia si liberare populum Dei bonum est, quod Dominus Papa fecit, bonum fuit: sed liberare populum Dei, bonum est auctoritate Evangelii, qua praecipimur animas quoque pro fratribus ponere. *Ad haec patientia Domini Papae, horrendo haeresis nomine pulsata, expergescens est, & manu silentium indicens, dissidentium clamores & murmur tali oratione compefcuit:* „ Fratres & Domini mei audite: „ Ecclesia ista nunquam habuit haeresim, imo hîc omnes haereses conquassatae sunt. . . . Pro hac Ecclesia Filius Dei in passione sua oravit, cum dixit: *Ego pro te rogaui, Petre, ut non deficiat fides tua.* Ex quibus omnibus aperte colligitur, ante primam Lateranensem oecumenicam Synodum nequaquam inter Catholicos disceptatum fuisse de sanctitate & aequitate decretorum S. Gregorii VII. aliorumque Romanorum Pontificum adversus investituras: An autem haeresis esset investituras tueri; quod nullo decreto id Sedes Apostolica declarasset, non unam fuisse Catholicorum Episcoporum opinionem; quibusdam pro haereticis habentibus, qui investituras defenderent, quibusdam vero hanc non esse adfirmantibus nisi sacrilegam usurpationem.

Id etiam ut vidimus ante Lateranensem oecumenicam Synodum disceptatum: an ad graviora mala vitanda, & schismatis periculum avertendum, licitum esset, investi-

sti-

stitutarum usum & privilegium concedere; quaesitumque, an aliquod temperamentum reperiri posset ad pacem Sacerdotium inter & Imperium redintegrandam. Ivo Carnotensis aliique Provinciae Senonensis Episcopi Paschalem II. non modo excusabant, verum & laude dignum existimabant, quod oeconomia quadam Investiturarum privilegium Imperatori concesserat, ut hoc Ecclesiasticae disciplinae vulnere gravioribus malis occurreret: Unde, inquit Epistola superius laudata ad Johannem Episcopum Lugdunensem, *bunc excessum ejus non tantum non accusamus, sed dictante ratione approbamus, si imminente strage populi paterna caritate cum nonnullo vulnere suo se tantis periculis voluit objicere, ut majoribus morbis posset sincera caritate subvenire.* Quibus concinit ille, cujus verba paulo ante descripsi, qui in Concilio Lateranensi Paschalis II. consilium pro populi Dei liberatione susceptum, nec malum dici debere, sed bonum fuisse contendit: a qua tamen sententia, quam longissime ipse Paschalis aberat: qui rationes illas, quibus ad concedendas furenti Principi investituras impulsus fuerat, valere quidem ad elevandam, non autem ad abstergendam penitus culpam existimabat. Urbanus II. in Concilio Romano anni MCXCIX. non modo excommunicationem in dantes & accipientes investituras decrevit, verum etiam in eos, qui pro Ecclesiasticis honoribus hominum facerent, vel homagium praestarent: cujus decreti testes habemus Paschalem II. in Epistola ad S. Anselmum; Eadmerum lib. II. Hist. Novorum, qui cum laudato Anselmo Synodo interfuit, & Rogerium de Hoveden Par. I. Annalium. Verum quum Henricus Angliae Rex Willemi Praedecessoris sui vestigiis insistens nec investituras

nec



nec hominia dimittere vellet, Paschalis II. post plurimas cum eo Rege Regnique Ministris habitas concertationes, ejusmodi negotium, quod Anglicanam diu turbarat Ecclesiam, tandem Urbani II. sententiam temperando composuit; permittitque Regi, ut ipsi hominia juxta Regni consuetudinem ab Episcopis & Abbatibus fierent, modo solennes ipse per anulum & baculum investituras dimitteret; ut constat ex litteris ejusdem Paschalis II. ad S. Anselmum: *Si qui vero deinceps, praeter investituras; hoc est, ommissis investituris; Ecclesiarum praelationes assumerint, etiam si Regi hominia fecerint, nequaquam ob hoc a benedictionis munere arceantur, donec per omnipotentis Domini gratiam, ad hoc omittendum, cor regium tuae praedicationis imbribus molliatur.*

Callixtus II. indicto Remis Concilio, cujus historiam fufius Baronius, Nat. Alex. & Conciliorum Collectores alique describunt, nihil omisit, ut difficilem controversiam, & quae tamdiu Sacerdotium & Imperium commiserat, tandem aliquando componeret. Verum ubi se nihil ob Imperatoris perfidiam proficere animadvertit, Decessorum fuorum decreta sequenti confirmare Canone disposuerat: *Investituram omnium Ecclesiarum, & Ecclesiasticarum possessionum per manum laicam fieri modis omnibus prohibemus.* Sed hujus Canonis occasione quum ingens quorundam Clericorum, & Laicorum murmur insonuisset; ejus rigorem Pontifex temperavit, & in hanc formam Canonem redegit: *Episcopatum & Abbatiarum investituram per manum Laicam fieri; penitus prohibemus. Quicumque igitur Laicorum deinceps investire praesumserit, anathematis ultioni subja-*

tipapam & Henricum Imperatorem animadvertit, solutis etiam juramento fidelitatis, qui perfido Principi obstricti erant, nisi forte resipisceret, & Ecclesiae Dei satisfaceret. Porro Canon in eam formam redactus ad investituras Ecclesiasticarum dignitatum coarctabatur; nec eo proinde investiturae pro Ecclesiasticis bonis & possessionibus dam-  
nabantur: quas hoc aevo Galliarum Reges, qui pacem cum Ecclesia Romana fovebant, absque traditione baculi & anuli retinuisse, pluribus Nat. Alex. Dissert. superius laudata Artic. XVI. demonstrat.

Quod in Concilio Remiensi anno 1119. Callixtus obtinere non potuit, obtinuit tandem ac pervicit in Wormatiensi Conventu anno 1122. quo demum ad Investituras Episcopatum & Abbatiarum, ut & bonorum Ecclesiasticorum per anulum & baculum dimittendas Imperatorem coëgit: ipsi vero Callixtus indulxit, ut Episcopi vel Abbates libere electi Regalia ab ejus Majestate per scriptum reciperent. Pacta scripto tradita, & mutuis firmata subscriptionibus apud laudatos Scriptores legere est. Imperatorem ab excommunicatione Pontifex per suos Legatos absolvit, datisque ad eum litteris, *in Beati Petri filium paternae affectionis brachiis* suscepit: eaque omnia ante Lateranensem oecumenicam Synodum anno quem diximus 1122. labente peracta sunt. Anno autem sequente, uti Cossartius & Nat. Alex. ostendunt, ea Synodus habita est, non quidem ad ea retractanda, quae Pontifex cum Imperatore transegerat; quod unum Adversariorum causam juvaret; sed ut pax inita sollennius in Synodo confirmaretur, ac religiosius servarentur quae in publico totius Ecclesiae conventu pacta & promissa utrimque fuissent.

## ARTICULUS II.

*De secundo Lateranensi Generali Concilio : Ex S. Bernardo probatur, opus non fuisse Synodo oecumenica ad retractandam Innocentii II. electionem, quod in eam Christiani orbis pars maxima consentiret : unde conficitur, irretractabiles jure suo fuisse plerasque illarum causarum pro quibus generales Synodi celebratae sunt.*

**E**tiā quae ad hanc Synodum pertinent breviter Bosluetius perstringit : „ sub Innocentio II. non solum „ infando Petri Leonis schismate Ecclesia laborabat, sed „ etiam auctore Petro de Brueis haereses ubique pullula- „ bant eae, quae postea per Albigeneses in majus incen- „ dium eruperunt, Arnaldus Brixienſis in ipsa Urbe non „ solum seditiones agitabat, sed etiam haereses semina- „ bat. Igitur ad schismatis reliquias extinguendas, tot- „ que haeresum nascentium dira initia comprimenda, at- „ que instaurandam tot turbis collapsam disciplinam ; „ Summus Pontifex Concilium generale Lateranense II. „ habuit anno 1135. Haec Bosluetius: quid vero inde conficere valeat, aut velit, non exponit. An ergo, quoniam ad Schismatis reliquias extinguendas, ad haeresum nascentium dira semina praefocanda, ad instaurandam tot turbis labefactatam Ecclesiae disciplinam, Concilium generale Innocentius coëgit ; inde consequens est, ineluctabilem non esse Romani Pontificis in fidei controversiis auctoritatem ? An putas, nullam esse generalem Synodum celebratam, quae necessaria non esset, ad eas causas re-

tractandas ac terminandas, propter quas quaecumque Synodus generalis habita est? Falsum id esse, saepius ostendimus; atque ipsimet contrariae opinionis adsertores agnoscere ac fateri debent, nisi eas etiam Romanorum Pontificum sanctiones ac dogmaticas Constitutiones retractationi obnoxias esse contendunt, quas Catholicorum Episcoporum pars maxima, paucis ex adverso reclamantibus, amplexa est; quod paucorum hodie commentum est, qui ab ipsis Gallis Scriptoribus, quos novarum opinionum amor non in transversum abripuit, invictis argumentis, & constanti Ecclesiae Catholicae traditione refelluntur; ex qua apertissime constat, semper eas causas esse irretractabiles judicatas, quas; Romano Pontifice praecunte, Orbis Catholicus, paucis exceptis Refractariis, probasset, aut improbasset.

Valent etiam plurimum ad eos novarum opinionum vindices refellendos, quae S. Bernardus de hoc ipso Petri Leonis schismate disserit Epist. 126. ad Episcopos Aquitaniae contra Gerardum Engolismensem, qui contra Innocentium II. partes Pseudo-Pontificis Anacleti tuebatur. Quibus enim argumentis Sanctissimus Abbas Schismaticeos exagitat, qui vehementer urgebant, ut causa utriusque Pontificis retractaretur; iisdem & eorum pervicacia revincitur, qui hodie ad generalem Synodum provocant, in qua Constitutio *Unigenitus* retractetur: *Ceterum, inquit, nunc iudicium expetunt . . . . ut videlicet si recusetur, iusti vos videamini: Si recipiatur, litigantibus inter se partibus, dilatio redimat tempus, & interim fiat aliquid. An de vestra iustitia desperatis, & damnum iam crescere non timetis, quemcumque causa exitum sortiatur? Quidquid, inquit, hactenus factum sit, inodo*  
*quae-*

quaerimus audientiam: iudicium sumus subire parati. Tergiversatio est. Quid in omni impio conatu vestro vobis relinquitur aliud, quod afferre queatis ad seducendum simplices, ad armandum malevolos, ad vestram ipsorum palliandam malitiam? Si hoc non diceretis; quid diceretis? Optime ac merito Sanctus Doctor animadvertit, unicum ac miserabile omnium Schismaticorum ac Sectariorum esse perfugium, ut quum se a Romano Pontifice ac dispersis per universum orbem Episcopis confixos atque damnatos intelligunt, aliud iudicium exquirant, & ad futuram Synodum provocent. Quid enim dicerent, quid auderent ad seducendum simplices, & ad armandum malevolos, impii ac temerarii homines, si hoc non dicerent, non auderent? Nempe quemcumque temeraria illorum petitio fortiatur exitum, non habent maiora damna quae timeant. Si non indicitur Synodus, hunc semper obtendent suae pervicaciae praetextum: *Dilatio redimet tempus, & interim fiet aliquid*. Si habebitur Synodus, parum aut nihil eorum intererit, ut postquam eos dispersi per orbem Episcopi damnaverunt, eandem in eos damnationem in unum coacti locum confirment. Innumeri praetextus non deerunt, quibus damnationem eludant. Defuit Concilio libertas, defuit diligens ac sufficiens controversiarum examen, Episcopi ac Theologi praejudicatas ad Synodum opiniones adtulerunt &c. *Damnū jam crescere non timetis; quemcumque causa exitum fortiatur*. Rari fuerunt qui generalis Synodi auctoritati cederent, postquam Romani Pontificis & multitudinis Episcoporum auctoritate despecta, generalem Synodum postularunt. Ceterum multitudinis Episcoporum, ac ferme totius Ecclesiae quamvis per orbem disper-

sperfac auctoritatem despiciere, ac velle retractare judi-  
 cium, cum quanta sit impudentia atque temeritate con-  
 junctum, sequentibus verbis luculentissime S. Bernardus  
 exponit: *Jam Deus judicavit, quod sero repetit homo:*  
*judicavit autem operis evidentia, non decreti sententia:*  
*Numquid Dei judicium audeat humana temeritas retra-*  
*ctare?.... Non est consilium contra consilium Domini:*  
*Velociter currit sermo ejus in conveniendo populos in*  
*unum & Reges, ut Domino Papae Innocentio seruiant;*  
*& obediant. Quis revocabis? Dei esse judicium sene-*  
*runt & consenserunt Galterius Ravennas, Hildegarius*  
*Tarraconensis, Norbertus Magdeburgensis &c. recen-*  
*sisque pluribus Archiepiscopis & Episcopis, quorum, in-*  
*quit, gloria specialis, & praecipua sanctitas & auctori-*  
*tas etiam hostibus reverenda, facile nobis, qui minorem*  
*& meriti & officii tenemus locum, aut errare secum, aut*  
*sapere persuasit; subjungit: Taceo multitudinem cetero-*  
*rum, Tusciae, Campaniae, Longobardiae, Germaniae;*  
*& Aquitaniae, Galliarum denique & Hispaniarum om-*  
*nium, necnon & universae Orientalis Ecclesiae, tam Ar-*  
*chiepiscoporum, quam Episcoporum, quorum nomina*  
*sunt in libro vitae, sed Epistolae brevis non admittit.*  
 His adjungit varios Religiosorum hominum Coetus;  
 quorum, inquit, *vita abscondita est cum Christo in glo-*  
*ria, ubi certe solliciti inquirunt, & non dubie inveniunt*  
*beneplacitum Dei, qui solliciti sunt quomodo placeant*  
*ei. Hos porro laudat, quoniam sequentes Episcopos, tam-*  
*quam greges pastores suos, Innocentio firmiter adhaerent,*  
*sincere favent, humiliter parent, verum Apostolorum suc-*  
*cessorem fideliter recognoscunt. Quid Reges & Principes*  
*terrae? Nonne in eodem Spiritu, una cum subiectis sibi*  
 ple-

plebibus, Innocentium pariter amplectantur, consensientes & ipsi Papam & Episcopum animarum suarum? Quis postremo in quocumque ordine vitae illustris & boni nominis homo idipsum non sapit? Et tamen adhuc isti, nescio qua contentiosa importunitate, & importuna contentione reclamant. VOCANT IN CAUSSAM ORBEM, ET CUM SUA PAUCITATE UNIVERSITATEM FLAGITANT JUDICARI. Annon haec belle & aequo jure conveniunt in paucos illos, non jam Episcopos, verum secundi aut inferioris Ordinis Clericos, Monachos, Jurisconsultos, garrulas anus, deliros senes, verbosos sophistas, qui, ut verbis utar Hieronymi, scripturarum artem, & sacrorum dogmatum scientiam sibi passim vindicant, praesumunt, lacerant, docent antequam discant, & quadam facilitate verborum, imo audacia, edisserunt aliis quod ipsi non intelligunt? An non, inquam, in ejusmodi homines: qui pauci quum sint, & nullius ferme in Ecclesia auctoritatis, cum Romano Pontifice, & omnium Episcoporum, Theologorum, Principum, & Catholicae plebis universitate contendunt, & ad generalem Synodum provocant, in eaque petunt damnatarum opinionum commenta retractari: ea S. Bernardi verba jure meritoque ingeruntur? Vocatis in causam orbem, & cum vestra paucitate universitatem petitis judicari. Profecto non melior, imo hodie longe deterior eorum, qui Constitutioni *Unigenitus*, quam qui olim Innocentii II. electioni refragabantur. Non enim deerant Episcopi, qui Pseudo-Pontificis partes tuebantur, nempe Petrus Episcopus Portuensis schismaticae factionis Antesignanus, Otto Episcopus Tudertinus, Gerardus Engolismensis, & alii, Monachi Cassinenses, Rogerius Siciliae & Calabriae Dux cum Episcopis in ejus ditione de-

degentibus, & in Gallis Comes Pictaviensis: quum tamen hodie non nisi aliquot secundi & inferiorum ordinum Clerici, Monachi, ac privatae fortis Laici in Romanum Pontificem, ac totius orbis Episcopos insurgant, eisque litem intentent, in generali, ut ipsi contendunt, Synodo judicandam. Verum ab eis cum eodem S. Bernardo quaerimus, *quos dabunt in Synodo generali iudices sibi*; imo quos dabunt Iudices mundo? Numquid Romanum Pontificem? sed ab eo constanter damnantur. Numquid Episcopos? sed ii in ipsorum infectandis erroribus Capiti suo constanter adhaerent. Numquid inferiorum ordinum Clericos, Monachos, Laicos? Sed nos Ecclesiasticum volumus iudicium. Porro Ecclesiae nomine cum S. Cypriano (a) non intelligimus nisi Gregem Pastori suo adhaerentem, nec legitimos Episcopos agnoscimus nisi in Ecclesia, neque Ecclesiam nisi in Episcopis constitutam: *Illi sunt Ecclesia, plebs Sacerdoti adunata & pastori suo grex adhaerens*. Sacerdotis autem & Pastoris nomine non nisi Episcopos Sanctus Martyr intelligit. Nam statim subiungit: *Unde scire debes, Episcopum in Ecclesia esse & Ecclesiam in Episcopo; & si quis cum Episcopo non sit, in Ecclesia non esse &c.* Numquid ab Ecclesiae dispersae iudicio ad Ecclesiam provocant in Synodo congregatam? Sed Ecclesiam toto orbe dispersam & in unum locum coactam idem Spiritus regit, eam juxta Domini promissum in omnem veritatem deducens. *Quos ergo dabunt iudices sibi*? Qui enim Ecclesiam non audiunt variis quidem locis dispersam, sed fide & caritate conjunctam, & eodem ubique veritatis Spiritu vegetatam, ii ut plurimum neque Ecclesiam audiunt in Oecumenicis Synodis adunatam.

---

(a) Epist. LXIX. ad Florent. Pupian.



tam. Quod ipso experimento compertum est. Nam generalia Concilia ad sistendum potius erroris progressum valere, quam ad eorum duritiem edomandam, quos flectere non potuerat Romanorum Pontificum eisque indivulse adhaerentium Episcoporum auctoritas.

Quod pertinet ad errores Petri de Bruis &c. damnati ii sunt in hac Synodo Oecumenica Lateranensi Can. 23. his verbis: *Eos autem, qui religiositatis speciem simulant, Domini Corporis & Sanguinis Sacramentum, baptisma puerorum, Sacerdotium, & ceteros Ecclesiasticos Ordines, & legitimarum damnant foedera nuptiarum, tanquam haereticos ab Ecclesia Dei pellimus & damnamus, & per potestates externas coerceri praecipimus. Defensores quoque ipsorum ejusdem damnationis vinculo innodamus.* Qui Canon idem quum sit cum tertio Concilii Tolosani anno MCXIX. Callixto II. praeside celebrati; hinc constat, haereses jam ante viginti annos a Romano Pontifice & ab Ecclesia proscriptas, hinc rursus fuisse damnatas. An ergo non pudebit Adversarios dicere & Petrobrusianorum causam & damnationem fuisse in Lateranensi Synodo retractatam; nec proinde irretractabilem fuisse, prolatam in eos a Callixto II. & Concilio Tolosano sententiam, antequam Synodi Oecumenicae auctoritate confirmaretur? Id quidem ex eorum doctrina consequi debet, si quidquam conficere volunt adversus ineluctabilem Romani Pontificis auctoritatem ex confirmata per Synodum Lateranensem Petrobrusianorum dogmatum damnatione. Sed vereor, an id aperte proferre audeant; ne videlicet fateri cogantur, ullam unquam fuisse haeresim, cujus fuerit irretractabilis damnatio, antequam ad ejus causam examinandam generalis Synodus haberetur.

## ARTICULUS III.

*De Conciliis Lateranensibus III. & IV. & de  
prima Synodo Lugdunensi.*

„ **A**lexander III., inquit *Illustriſſimus Adverſarius*,  
 „ cum haereſes & ſchiſmata ſuccreſcere cerneret,  
 „ ipſe Octaviani Apoſtatici Pontificis ſchiſmate diu agi-  
 „ tatus, eam, quae ſchiſmatibus occurreret, deinceps  
 „ Romani Pontificis eligendi formam, Concilii generalis  
 „ approbatione fancivit. Verum id quidem, ſed ob eam  
 „ rationem id ſtatuit, quae parum Adverſariorum rationi-  
 „ bus congruit. Decernit enim, ut is tantum pro Romano  
 „ Pontifice habeatur, qui a duabus fuerit partibus electus;  
 „ *Ex hoc tamen*, ſubjungit, *nullum Canonicis Conſtitu-*  
 „ *tionibus, & aliis Eccleſiaſticis praejudicium generetur,*  
 „ *in quibus majoris & ſanioris partis debet ſententia prae-*  
 „ *valere: quia quod eis in dubium venerit, ſuperioris po-*  
 „ *terit iudicio diffiniri. In Romana vero Eccleſia aliquid*  
 „ *ſpeciale conſtituitur, quia non poteſt recursus ad ſuperio-*  
 „ *rem haberi. Quum de ſimplicis Episcopii electione diffi-*  
 „ *dium erat, ad Synodum Provincialem; quum de Metro-*  
 „ *politani, ad Synodum Primatis ſeu Patriarchae; quum*  
 „ *de Primatis, ſeu Patriarchae, ad Romanum Pontificem*  
 „ *conſugiebatur, qui utriusque Electi rationibus expenſis,*  
 „ *ſententiam ferebant, & eorum alteri Sedem adjudicabant.*  
 „ At ſi Romani Pontificis electionem aliqui turbent, negat  
 „ Alexander, negat Oecumenica Synodus, eſſe aliquem  
 „ Superiorem, qui legitimum Pontificem ad cauſam dicen-  
 „ dam vocare poſſit, eumque ſuo iudicio ſubjicere. Id quod  
 „ etiam

etiam laudatus Alexander Legatis Friderici Imperatoris respondit, quum ad Papiense Concilium invitabatur, in quo ipsius & Pseudo-Pontificis Octaviani caussa disceptaretur. Negavit enim se se ad eam Synodum accessurum; tum quod praeter veterem morem, & Ecclesiae Catholicae traditionem, ab Imperatore, absque consensu Romani Pontificis, indicta esset; tum etiam quia nulli fas erat de Romano Pontifice judicare. *Miramur*, inquit. . . . . *ab eo nobis, imo Beato Petro, & Sanctae Romanae Ecclesiae honorem debitum denegari. In literis enim, quas ex parte ipsius nobis nostrisque Fratribus detulistis, hoc inter cetera tenebatur expressum, quod ipse „audita dis-*  
*„sensione, quae in Romana Ecclesia emerferat, de quin-*  
*„que Regnis Personas Ecclesiasticas convocaverat; ideo-*  
*„que praecipiebat eis ex parte generalis Ecclesiae, ut in*  
*„Octava Epiphaniae apud Papiam convenirent ad ejus*  
*„praesentiam &c. Nimirum longe a consuetudine Prae-*  
*decessorum suorum recessisse videtur, & dignitatis suae*  
*terminum excessisse, dum sine conscientia Romani Ponti-*  
*ficis Concilium convocavit, & nos ad praesentiam suam,*  
*sicut homo super nos potestatem habens, praecepit conve-*  
*nire.* Sequentibus autem verbis contendit, non modo Imperatorem, non modo Curiam, verum neque ullam Synodum habere aliquam supra Romanum Pontificem potestatem: *Sane Beato Petro, & per eum Sacrosanctae Romanae Ecclesiae, cujus ipse per Deum Magister existit & fundator, hoc privilegium a Domino Jesu Christo, Sanctisque Patribus traditum est, & per prospera & adversa, etiam cum sanguinis effusione quum oportuit, usque ad haec tempora conservatum, ut universarum Ec-*  
*clesiarum causas ipsius auctoritate discuteret ac finiret,*

*ipsa vero nullius unquam iudicio subjaceret*. Ex quibus verbis aperte colligitur, penitus irretractabiles & irreformabiles esse Romanae Ecclesiae sanctiones. Si enim omnium Ecclesiarum causae ipsius iudicio & auctoritate finiuntur; ipsa vero nullius iudicio subjacet; palam est, ejus iudicia retractationi ac reformationi obnoxia non esse: alioquin nec univrsarum Ecclesiarum causas sua ipsa auctoritate terminaret, & generalium Conciliorum iudicio subiecta saepe fuisset. Est autem illud animadversione dignum, quod Imperator Alexandrum ad Papiense Concilium invitabat nomine, sive, ut ait, *ex parte generalis Ecclesiae*: ipse autem Alexander non id obtendit, quod quinque Regnorum Episcopi satis non erant ad universam Ecclesiam repraesentandam, & generalem Synodum constituendam, cujus dumtaxat iudicio Romanus Pontifex subiectus esset; sed plane & aperte negat, Romanum Pontificem ullius subiacere iudicio.

Pergit Bossuetius: „damnavit haereses, quae ab Albigenfi tractu inauditis fraudibus diffundere se coeperant. Easdem haereses jam ante sexdecim annos idem Alexander in Synodo Turonensi damnaverat, cui ipse praesederat, & cum septemdecim Cardinalibus & centum vigintiquatuor Episcopis interfuerat: Canone autem IV. statutum est, *ut cuncti Albigensum haereticorum consortium fugiant*. An ergo & horumce Haereticorum causam & latam jam pridem in eos sententiam in Lateranensi Synodo retractatas fuisse adfirmabimus, ut Romanorum Pontificum de fide & adversus Haereticos Constitutiones retractabiles esse, ex generalium Conciliorum decretis & celebratione probemus?

„ In convocationis litteris, *subjungit Bossuetius*, haec  
 „ ha-

„ habentur : In Ecclesia pullulare germina vitiorum , zi-  
 „ zania crescere , quae germen bonum suffocare nitun-  
 „ tur , horum evellendorum curam Episcopis quidem  
 „ omnibus , multo tamen fortius imminere Romanae Ur-  
 „ bis Antistiti , qui a Domino Jesu Christo , ut Caput es-  
 „ set Ecclesiae in B. Petro accepit , & de pascendis Do-  
 „ minicis ovibus , & fratribus confirmandis , expressum  
 „ & speciale noscitur habuisse mandatum . Unde ipse  
 „ de diversis partibus personas Ecclesiasticas evocavit ,  
 „ quarum praesentia & consilio , quae fuerint salubria ;  
 „ statuuntur ; & quod bonum , secundum consuetudi-  
 „ nem antiquorum Patrum , provideatur , & firmetur  
 „ a multis : quod si particulariter fieret , non facile posset  
 „ plenum robur habere . Sic ad officium confirmandi fra-  
 „ tres id pertinere intelligit , ut Concilio generali habito  
 „ decreta firmentur a multis , ac facile plenum robur ha-  
 „ beant , quum statim elucescat illa consensus , in qua fir-  
 „ mitudinem Christus collocavit . Quis dubitat ad offi-  
 „ cium confirmandi fratres id pertinere , ut quum ipsi visum  
 „ fuerit , Synodos oecumenicas Romanus Pontifex cogat ?  
 „ Deinde nemo inficiatur , quod ea , quae pro evellendis  
 „ vitiis , moribus reformandis , & instauranda Ecclesiastica  
 „ disciplina , vel a singulis Episcopis particulariter sunt ,  
 „ vel etiam speciatim a Romanis Pontificibus decernuntur ,  
 „ non facile plenum obtinent robur ; quod nimirum in iis  
 „ executioni mandandis segnes ut plurimum ac desides sunt  
 „ Episcopi : quos proinde utile & aliquando necessarium est  
 „ in Synodos congregari , quibus ipsimet Romani Pontifices  
 „ praesint , ut Capituli praesentia novum languidis membris  
 „ spiritum ac robur inspiret ; ipsique Episcopi ad evellenda  
 „ vitiorum germina & virtutes excolendas mutuo confi-  
 „ lio ,

lio, & communi conspiratione inflammantur. Ceterum; quod ad fidem pertinet morumque disciplinam; quam Ecclesia Romana Romanusque Pontifex in Apostolorum Principe a Christo Domino acceperint potestatem, plenius ipse Alexander exponit in Epistola ad Indorum Regem, quem vulgo *Preto-Johannem* vocant: *Apostolica Sedes, cui licet immeriti praesidemus, omnium in Christo credentium caput est & magistra, Domino attestante, qui ait Beato Petro, cui licet indigni successimus: Tu es Petrus, & super hanc petram aedificabo Ecclesiam meam. Hanc siquidem petram Christus esse voluit in Ecclesiae fundamentum, quam praeconat nullis ventorum turbinibus, nullisque tempestatibus quatiendam. Et ideo non immerito Beatus Petrus, super quem fundavit Ecclesiam, ligandi atque solvendi specialiter & praecipue inter Apostolos alios meruit accipere potestatem: Cui dictum est a Domino: Tibi dabo claves regni caelorum: & portae inferi non praevalerunt adversus eam &c. Audieramus utique jampridem, referentibus multis & in fama communi, quomodo quum sis Christianum nomen professus . . . tuae voluntatis sit & propositi, erudiri Catholica & Apostolica disciplina; & ad hoc semper intendas, ut tu, & terra tuae sublimitati commissa, nihil unquam videamini in fide vestra tenere, quod a doctrina Sedis Apostolicae dissentiat modo quolibet vel discordet. Quamobrem ipsum Pontifex laudat, & ad ejus propositum adjuvandum promptum ac paratum se exhibet; quum ejus muneris sit omnes confirmare fratres, quemadmodum Petro Christus injunxit, quem, inquit, omnium Apostolorum Principem fecit. Itaque Sedes Apostolica in Apostolorum Principe accepit, ut omnium credentium*

caput esset & magistra ; ut petra esset & fundamentum , super quod Christus aedificavit Ecclesiam ; fundamentum , inquam , firmissimum & immobile , nullis quatiendum turbinibus , nullis tempestatibus concutiendum ; ne immortale aedificium , ne columna & firmamentum veritatis , super fundamentum exsurgat , quod possit aliquando pravis doctrinis corrumpi aut erroribus labefactari . Hinc merito ii commendantur , qui nihil unquam videri volunt in sua fide tenere , quod a doctrina Sedis Apostolicae dissentiat modo quolibet vel discordet .

Quantum generale Lateranense Concilium Innocentius III. indixit , & quae in eo gesta decretaque sunt ad haec capita revocat Bossuetius : „ Primum , *inquit* , explicatur fides Catholica de unitate Sanctissimae Trinitatis adversus Joachimum Abbatem : Almarici etiam „ doctrina condemnatur , non tam haeretica , quam infana . Eucharistiae Mysterium , ac mira illa ab omni „ aevo credita panis vinique conversio significantissimo „ Transubstantiationis vocabulo explicatur . Conducuntur „ Canones , quibus Ecclesiastica disciplina reformetur . „ Christiani denique omnes ad sacrum bellum , & ad Hierosolymam recuperandam incenduntur : quas duas potest „ stremas Concilii convocandi causas Innocentius commemorat ; nullique Canones labentibus saeculis magis „ invalere , quam ii , quos tanta Synodus constituit anno 1215 . Haec ea tantum ratione ad praesentem pertinent disputationem , quatenus inde constat , ac demonstratur , Romanos Pontifices aliquando graviora Ecclesiae negotia , & quae ad morum disciplinam & fidei Catholicae doctrinam pertinent , in generalibus Conciliis unicum aliis Episcopis pertractasse . Inde vero colligi nulla

ratione potest, non esse penes Romanos Pontifices sine aliorum Episcoporum consensu ad fidei morumque regulas statuendas, irrettractabilem auctoritatem. Non id profecto Innocentius III. qui hanc Lateranensem congregavit Synodum, cogitabat; ut aperte constat ex ejus ad Patriarcham Constantinopolitanum Epistola, ubi disertis verbis docet, Apostolis non sine Petro, sed Petro sine Apostolis datam esse & competere quidlibet ligandi atque solvendi potestatem: (a) *Huic praeterea dictum in Evangelio & audisti saepius & legisti: Quodcumque ligaveris super terram, erit ligatum & in Caelis &c. Quod si omnibus etiam Apostolis simul dictum esse reperias, non tamen aliis sine ipso, sed ipsi sine aliis attributam esse cognoscas ligandi atque solvendi a Domino facultatem; ut quod non alii sine ipso, ipse sine aliis posset ex privilegio sibi collato a Domino & concessa plenitudine potestatis. Porro, quemadmodum idem Sanctissimus Pontifex in suis ad Leonem Armenorum Regem litteris animadvertit (b): In Petro & cum Petro singulare illud privilegium non expiravit, quod Successoribus ejus futuris usque in finem mundi Dominus in ipso concessit; sed praeter vitae sanctitatem & miraculorum virtutes, par est in omnibus jurisdictio Successorum: quos etsi diversis temporibus, eadem tamen Sedi, & eadem auctoritate Dominus voluit praesidere. Itaque quemadmodum Apostolis non sine Petro, ita nec Episcopis sine Romano Pontifice; & quomodo Petro sine aliis Apostolis, ita Romano Pontifici sine aliis Episcopis quidlibet ligandi atque solvendi tributa est a Domino potestas. Quare quod aliquando Romanus*

Pon-

(a) Lib. II. Epist. 209. edit. Baluz.

(b) Ibid. Epist. 220.



Pontifex in Synodis generalibus una cum aliis Episcopis ligare velit aut solvere ; inde profecto non sequitur , quod solus ipse sine aliis non habeat ad quidlibet ligandum atque solvendum plenitudinem potestatis . Hanc autem nullis esse obnoxiam erroribus , ac proinde penitus irreformabilem in iisdem ad Patriarcham Constantinopolitanum litteris laudatus Pontifex docet , atque ex iis verbis colligit , quibus Dominus , imminente passionis articulo , Apostolorum Principem adlocutus est : *Ego pro te rogavi Patre &c. Ex hoc innuens manifeste* , ait Pontifex , *quod Successores ipsius a fide Catholica nullo unquam tempore deviant , sed revocarent magis alios , & confirmarent etiam haereticos ; per hoc sic ei confirmandi alios potestatem indulgens , ut aliis necessitatem imponeret obsequendi .*

Denique de priore Lugdunensi Concilio pauca haec Meldensis Episcopus observat : „ Innocentius IV. ad Fridericum Imperatorem deponendum , Concilium generale Lugdunense I. convocavit , quo in negotio quam nullam personam Episcopi egerint , suo loco referimus . Cetera vero , quae vere & liquido Ecclesiastica , asserit Synodo approbante facta , anno 1245 . Nimirum Innocentius IV. , perinde ac tertius , voluit una cum aliis Episcopis , quod poterat solus decernere : quemadmodum & Petrus quam poterat solus solvere , voluit una cum aliis Apostolis quaestionem de Legalium observatione dirimere .

## CAPUT XXXV.

- „ Concilium Lugdunense II. sub Gregorio X.  
 „ de reconciliandis Graecis : Hujus Acta  
 „ praecipua referuntur .

**G**regorio X. hujusce Synodi convocandae plures  
 fuere causae . Prima ac potissima , & quae pro-  
 prie ad nostrum pertinet institutum , fuit Ecclesiae Grae-  
 cae cum Latina unionis redintegratio , & Catholicorum  
 dogmatum adversus Graecorum Schismaticorum errores  
 confirmatio . De Processione Spiritus Sancti a Patre & Fi-  
 lio , ac de Romani Pontificis primatu frequentiores erant  
 ac fervidiores Graecorum cum Latinis disceptationes :  
 quamquam & in aliis articulis suspecta fuisse videtur La-  
 tinis Graecorum fides . De Processione Spiritus Sancti  
 disserit in praesenti Capite Bossuetius , de Primatu vero  
 Pontificis in sequenti : ejusque nos vestigiis insitemus .  
 Nam primo ex Synodi actis quae ad Processionem Spiri-  
 tus Sancti & alia dogmata pertinent , expediemus : dein-  
 de vero latius de Primatu Pontificis ex eisdem actis dispu-  
 tabimus .



## ARTICULUS UNICUS.

*Ex Gregorii X. ad Graecorum Imperatorem litteris, & ex formula fidei Graecis proposita, nec non ex primo Canone Concilii Lugdunensis probatur, irretractabilem esse Ecclesiae Romanae in proponendis fidei dogmatibus auctoritatem.*

**C**oeptum jam (a) Photii temporibus schisma, sub imperio Constantini Monomachi latius fuerat propagatum, Michaële Cerulario Constantinopolitano Patriarcha, & Leone Acridano Archiepiscopo auctoribus; qui Praesules plerisque omnes, Clericos, Monachos, populumque in partes traxerant; Latinorum ritum Missae sacrificium in azymo celebrandi, Sabbathi jejunium, plurimasque alias Romanae Ecclesiae consuetudines damnare ausi erant. Negabant praeterea, Spiritum Sanctum a Filio procedere: Latinos anathematis vinculo devinctos effutiebant ob additionem vocis, *Filioque*, Symbolo Constantinopolitano factam: Romani Pontificis institutum jure Divino Primatum impugnabant. Nihil tunc temporis neglexerat Leo IX. Pontifex Optimus Maximus, ut nascentis Schismatis incendium exstingeret. Nihil ejus Successores omiserant. Schismatis vires Latinorum Imperium Constantinopoli fregerat: sed eo cadente schisma invaluerat pertinacius. De Ecclesiarum unione cum Michaële Paleologo Graecorum Imperatore agere coeperant Urbanus IV. & Clemens IV. In quam se propensissimum

Q 2

Pa-

---

(a) Nat. Alex. Dissert. VII. in Hist. Sacc. XIII. & XIV.

Palaeologus demonstrabat . Unde & ad Gregorium X. qui Clementi proxime successit , Nuntium misit Johannem Ordinis Minorum Professore , Literasque scripsit affectus sui & zeli ad pacem & unionem Populi Christiani , & reverentiae erga Sedem Apostolicam testes . Urbano IV. & Clementi IV. placuerat , ut prius de fidei verae dogmatibus , quam de concordia Graecos inter ac Latinos ageretur . Quamobrem Clemens IV. datis ad Imperatorem litteris Fidei professionem ab ejus Majestate , Clero , & Populo emittendam inseruerat ; ea quae circa Romanae Ecclesiae Primatum ab iis recipi volebat , sacris apicibus plenius explicans . Ipsaque fidei Professione Imperatoris Oratoribus tradita , se ipsis satisfacturum sponderat , si aliquis circa illam scrupulus in ipsorum mentibus oriretur . Ubi vero Graeci Professionem illam fidei recepissent , & ad Ecclesiae Romanae obedientiam rediissent , si Concilium generale ad sacrum Foedus inter utramque Ecclesiam confirmandum celebrari Palaeologus postularet , Romana Ecclesia ejus votis annueret . *Non ad praedictae ( Professionis fidei ) discussionem , vel novam definitionem fidei ; quam tanquam innumeris sacrae paginae auctoritatibus ; numerosis sanctorum Patrum sententiis , & Romanorum Pontificum stabili diffinitione firmatam , nec ipse voluit ; nec nos intendimus , sicut nec decet , nec foret expediens , in dubium novo ipsam exponendo examini , revocare :* inquit Gregorius X. in Litteris ad Michaëlem Palaeologum Graecorum Imperatorem . Itaque fidei Professionem Romanorum Pontificum stabili diffinitione firmatam in generali Synodo retractari Clemens IV. & Gregorius X. renuebant .

Verum ut in his melius perspiciamus Romanorum

Pon-

Pontificum indeclinabilem in proponendis fidei dogmatibus auctoritatem, ipsam prae oculis habere oportet fidei Professionem, quam Imperatori, & Graecis Episcopis, reliquoque Clero, Monachis & Populo profitendam, Constantinopolim laudati Pontifices transmiserunt. Eam Palaeologus suis ad Gregorium X. litteris inseruit, ejusque nomine in Concilio Lugdunensi a Georgio Acropolita & magno Logotheta subscripta est. In ea porro se credere profitebatur, *quod vere tenet, & fideliter docet, & praedicat Sancta Romana Ecclesia*: atque inter cetera *Spiritum Sanctum ex Patre Filioque procedentem*: Animas non plene purgatas *purgatorii poenis* expiari: quae vero *nullam omnino peccati maculam incurrerunt*, aut contractam vel in praesenti vel in futuro saeculo expiarunt, *mox in caelum recipi*: *Illorum autem Animas, qui in mortali peccato, vel cum solo originali decedunt, mox in Infernum descendere, poenis tamen disparibus puniendas*. Septem esse *Ecclesiastica Sacramenta*: & in Eucharistia panem & vinum in Christi Corpus & Sanguinem *transubstantiari*. Spiritum Sanctum a Patre & Filio procedere, negabant fere omnes Orientales Ecclesiae. Animas autem plene purgatas statim in caelum recipi, & cum mortali peccato decedentes mox in Infernum descendere; septemque esse Ecclesiae Sacramenta; tanquam fidei dogmata ab omnibus tenenda esse, nulla hactenus Oecumenica Synodus conceptis verbis decreverat. Haec tamen in generali Concilio Romani Pontifices retractari vetabant, quod hanc fidem Romana Ecclesia teneret, quod eam Romani Pontifices stabili diffinitione firmassent.

Postquam a Graecis fidei Catholicae formula subscrip-  
pta

pta est, qualem Romani Pontifices sua ipsis auctoritate praescripserant, & in Ecclesiae Romanae communionem cum hac fidei Professione suscepti sunt; Gregorius X. sequentem in ipso Concilio Canonem promulgavit: *Fideli ac devota professione fatemur, quod Spiritus Sanctus aeternaliter ex Patre & Filio, non tanquam ex duobus principiis, sed tanquam ex uno principio, non duabus spirationibus, sed unica spiratione procedit. Hoc professus est haecenus, praedicavit, & docuit, hoc firmiter tenet, praedicat, profitetur, & docet Sacrosancta Romana Ecclesia, mater omnium fidelium & magistra: Hoc habet Orthodoxorum Patrum atque Doctorum Latinorum pariter & Graecorum incommutabilis & vera sententia. Sed quia nonnulli propter irrefragabilis praemissae ignorantiae veritatis in errores varios sunt prolapsi: nos huiusmodi erroribus viam praeccludere volentes; sacro approbante Concilio, damnamus & reprobamus omnes, qui negare praesumerint, aeternaliter Spiritum Sanctum ex Patre & Filio procedere; siue etiam temerario ausu asserere, quod Spiritus Sanctus ex Patre & Filio, tanquam ex duobus Principiis, & non tanquam ex uno, procedat. Ex hoc Canone Bossuetius colligit, opus fuisse Concilii generalis auctoritate, quo fides nondum haecenus ab Ecclesia declarata de Spiritu Sancto, qui a Patre Filioque procederet tanquam ab uno principio, Synodice exponeretur. At Ecclesia Romana, quae tanquam omnium fidelium Mater & Magistra, cogere potuit Graecos ad profitendam Spiritus Sancti a Patre & Filio processionem; cur eis exponere ac declarare non potuit, Spiritum Sanctum ex eis, non tanquam ex duobus principiis, sed tanquam ex uno principio, & non duabus sed unica spi-*

spiratione procedere? Non enim agebatur de veritate, quae vel ex se difficilis & obscura esset, aut propter dissidentium auctoritatem ac numerum Oecumenicam Synodum posceret: sed ea consecrarium erat alterius dogmatis de processione Spiritus Sancti a Patre & Filio: eam Ecclesia Romana profitebatur: ex Theologis Latinis pauci vel nulli refragabantur: Ex Graecis duntaxat aliqui verebantur, ne dum Spiritum Sanctum a Patre & Filio procedere faterentur, duo Spiritus Sancti principia admittere viderentur. Quare id eis erat explanandum. Et ad hanc rem opus fuisse, ut universus Orbis commoveretur, prorsus absurdum ac ridiculum est.

Jam ergo Lugduni, sacro approbante Concilio, a Gregorio X. definitum est; Spiritum Sanctum a Patre & Filio, tanquam ab uno Principio & unica spiratione procedere. Itaque nulli deinceps fas erit de hoc fidei dogmate disputare, illudque novo examini subijcere, & ad scripturarum traditionisque normam expendere. Ut enim Adversarii confidenter adfirmant, hoc interest inter ea, quae a Romano Pontifice, & a Synodis Oecumenicis definiuntur; quod priora retractare licet, ac reipsa in Conciliis generalibus retractata sunt: at fidem in Synodis Oecumenicis definitam nunquam ad examen revocare licuit, nec eam aliquando legimus novo examine retractatam. Id perpetuo docet, ut vidimus, & inculcat Bossuetius; eique concinens Turnelius: „Nullum, *inquit* (a), re-  
 „ ipsa in monumentis Ecclesiasticis occurrit exemplum  
 „ retractati judicii tetius Ecclesiae circa fidem vel mores.  
 „ Legimus quidem saepius in posterioribus Conciliis le-  
 „ ctam, repetitam, confirmatam fidem in Symbolis Ni-

„ caeno

---

(a) • De Ecclesia Quaest. V. Art. III.

„ caeno & Contantinopolitano expressam: Legimus  
 „ eam hæreticis subinde natis oppositam: Legimus, præ-  
 „ fertim in Tridentina Synodo, non raro discordes Pa-  
 „ trum sententias de modo seu forma, qua decreta fidei  
 „ concipi deberent; idque propter Scholæ Doctores, qui  
 „ sibi præjudicium inferri timebant, & aliquando con-  
 „ querebantur: at fidem ipsam præcedentibus Oecume-  
 „ nicis Conciliis clare expressam ac definitam, rursus in  
 „ controversiam adductam fuisse, & ad novum examen  
 „ novumque judicium revocatam, data cuilibet contra-  
 „ dicendi vel redarguendi licentia, id nusquam legimus.  
 „ Atqui Judicia Summorum Pontificum de gravissimis  
 „ fidei quaestionibus rursus in Conciliis generalibus re-  
 „ tractata sunt, non tantum ut acceptarentur ac proba-  
 „ rentur, sed ut expenderentur ad legem Scripturae &  
 „ Traditionis, data cuilibet Episcopo licentia, quod sibi  
 „ videretur arguendi. Haec post Bossuetium Turnelius,  
 „ quae oppido falsa sunt. Nam primo falsum est, fidem in  
 „ Conciliis generalibus definitam nunquam fuisse ad exa-  
 „ men revocatam, & ad legem Scripturae ac Traditionis  
 „ expensam. Nam primo, ut ex Ferrando haud semel do-  
 „ cuimus, universalium Conciliorum gesta *ad Beati Petri*  
 „ *memoriam perducta, diligentius examinantur.* Deinde  
 „ Leo II. sextam Synodum non ante probavit, quam gesto-  
 „ rum Synodaliū seriem recensuit, curiosaque diligentia  
 „ singula ad eorum normam exegit, quae fuerant in Roma-  
 „ nis Synodis definita. Theodosius M. Semiarianis, & Leo  
 „ Augustus Eutychianis, etsi piissimi essent Imperatores, ut  
 „ de fide differerent, quam Nicaena & Chalcedonenſis Sy-  
 „ nodi definierant, indulserunt; ac potissimum Leo voluit,  
 „ ut Chalcædons Concilii dogmata ad præcedentium

Con-



Conciliorum fidei regulas in particularibus Synodis etiam a Catholicis Episcopis exigenter. Verum si alia exempla deessent, Lugdunensis Canon de Processione Spiritus Sancti a Patre & Filio tanquam ab uno principio ad refellendam Bossuetii ac Turnelii observationem satis superque esset. De hoc enim Christianae fidei dogmate deinceps in Florentina Synodo solennes disputationes habitae sunt, Eugenio IV. Graecis Episcopis indulgente, ut Catholicae doctrinae libere contradicerent, eamque ad legem Scripturae ac Traditionis expenderent, nec antea signarent, quam novo & accuratissimo examine retractassent. Deinde & illud falsum est, quod tanta fiducia & adeo generalibus verbis, post Meldensem Episcopum, Turnelius animadvertit, Judicia Summorum Pontificum de gravissimis fidei quaestionibus rursus in Conciliis generalibus retractata fuisse, data cuilibet Episcopo licentia, quod sibi videretur, arguendi. Nam Caelestinus I. Leo I. & Agatho, quorum potissimum exemplis Turnelius nititur, expressis disertisque verbis vetarunt, ne fides Ecclesiae Romanae in quaestionem adduceretur, neve ipsorum Legati certamen subirent, & in arenam descenderent; sed Apostolicae Sedis dogmata Synodis generalibus suscipienda ac subscribenda proponerent. Quorum vestigiis Clemens IV. & Gregorius X. inhaerentes, expresse & ipsi vetarunt, haberi Synodum generalem, in qua Ecclesiae Romanae doctrina Graecis proposita retractaretur. Sed etsi aliquando novum examen ex indulgentia permissum est, inde colligi non potest, jure suo retractationi obnoxias esse Romanorum Pontificum de fide definitiones. Alioquin nec Processio Spiritus Sancti a Patre & Filio generalis Concilii Canone definita, irretra-

stabilis statim fuisset, quum & eam deinceps, ad perfringendam Graecorum obstinationem, ad novum examen Florentina Synodus revocaverit.

## C A P U T   X X X V I.

„ Decretum Concilii Lugdunensis II. de Papae  
 „ auctoritate producitur: Ostenditur,  
 „ nihil favere Adversariis.

„ **P**aullo diutius, *inquit Bossuetius*, immorandum  
 „ in eo loco, quo Graeci Romani Pontificis pri-  
 „ matum confitentur: quo loco Adversarii nostram sen-  
 „ tentiam confutari, vehementissime asserunt. Quare  
 „ locum integrum producimus.

„ De hoc ergo primatu haec Imperator, haec Episco-  
 „ pi Graeci per speciales Nuntios profitentur: *Ipsa quo-  
 „ que Sancta Romana Ecclesia summum & plenum prima-  
 „ tum & principatum super universam Ecclesiam Catholi-  
 „ cam obtinet, quem se ab ipso Domino in B. Petro Aposto-  
 „ lorum Principe sive vertice, cujus Romanus Pontifex est  
 „ successor, cum potestatis plenitudine recepisse, veraciter  
 „ & humiliter recognoscit: & sicut prae ceteris tenetur fi-  
 „ dei veritatem defendere; sic & de fide si quae subortae  
 „ fuerint quaestiones, suo debent iudicio definiri.* „ Ad-  
 „ dunt de appellationibus in quibuscumque causis atque  
 „ negotiis. Subdunt: *Ad hanc autem, Romanam scilicet  
 „ Ecclesiam, sic potestatis plenitudo consistit, quod Ec-  
 „ clesias ceteras ad sollicitudinis partem admittit, quarum  
 „ multas, & Patriarchales praecipue, diversis privilegiis  
 „ honoravit: sua tamen observata praerogativa tum in ge-  
 „ nera-*

*neralibus Conciliis, tum in aliquibus aliis, semper salva.*

„ His Praelati Graeci, data speciali Epistola, consen-  
„ tiunt.

„ Haec fufe retulimus, quibus Adversarii maxime glo-  
„ riantur, quam immerito, vidimus, quum de Florenti-  
„ no Concilio ageremus, in quo eadem, quod ad rerum  
„ summam attinet, repetuntur. Et nos ergo ad eum Il-  
„ lustrissimi Auctoris locum copiosius hac de re & uberius  
„ differemus.

„ Sanè docebimus, a nostris in Summo Pontifice  
„ agnosci plenitudinem potestatis, neque id prohibere,  
„ quominus ea potestas ab universali Concilio dirigatur,  
„ & secundum Canones exerceatur; quod etiam ex Con-  
„ cilio Florentino saepe probavimus. Nos contra saepius  
„ ostendimus, Romanos Pontifices Conciliis Oecumenicis  
„ leges & regulas praefixisse, quibus dirigerentur, & quas  
„ ullo modo transgredi non liceret: unde aperte luculenter-  
„ que conficitur subesse Romanis Pontificibus Synodos ge-  
„ nerales; quum tamen nullo satis firmo argumento probari  
„ possit, Conciliis generalibus Romanos Pontifices esse sub-  
„ jectos. Quod enim hîc Adversarius indicat de Romani  
„ Pontificis potestate secundum Canones exercenda, suo  
„ loco, cujus momenti sit, expendemus.

„ Quam vero aptoque sensu Romanus Pontifex super  
„ universam Ecclesiam primatum ac principatum obti-  
„ neat, ex Concilii Constantiensis certo, atque a Marti-  
„ no V. expresse approbato dogmate, & ex Concilii Flo-  
„ rentini doctrina, & ex Adversariorum consensu osten-  
„ dimus. Quatenam istorum verborum; *summum & ple-  
„ num primatum & principatum super universam Eccle-  
„ siam Catholicam, & potestatis plenitudinem obtinet;*

vis ac potestas sit ; & quam ejusmodi verborum formulae , perpetuo & constanti Ecclesiae Catholicae usu consecratae , molestae sint Adversariis , quam eorum rationibus incommodae , & quam ab eis libenter abstinerent , suo pariter loco data opera demonstrabimus . Quum enim haec Adversarius ad alia loca remittat , ubi fusius ab eo disputantur ; & nos eorum vim , ubi ad ea loca perventum fuerit , expendemus .

## ARTICULUS UNICUS.

*Probatur Graecos in Concilio Lugdunensi II.  
agnovisse in Ecclesia Romana, & Ro-  
manis Episcopis ad fidei dogmata  
definienda summam & inde-  
clinabilem potestatem.*

” Q Uod autem , inquit Illustrissimus Adversarius ,  
” ad Pontificiam infallibilitatem trahant illud :  
” Subortae quaestiones suo debent judicio defi-  
” niri ; nec id quidem advertunt quod antecesserit , nem-  
” pe id : Sicut prae ceteris tenetur fidei veritatem defen-  
” dere , sic & si quae de fide subortae fuerint quaestiones ,  
” suo debent judicio definiri . Ergo , ut non solus , sed  
” prae ceteris , tenetur defendere fidei veritates : sic pro-  
” fecto non solus , sed prae ceteris quaestiones definire de-  
” bet : sic scilicet ut praecipua illius autoritas sit , ut ha-  
” bita Synodo ipse praeceat , communemque sententiam  
” suo quoque nomine edat , pronuntiet , exequatur :  
” quod Clerus Gallicanus cum omnibus Catholicis con-  
” fitetur .

” Sed

„ Sed forte vim facient in illo verbo *definire*, quod  
„ est in Concilio Lugdunensi positum : cum profecto de-  
„ finire nihil aliud sit, quam definitivam, ut ajunt, fer-  
„ re sententiam : quod non modo supremo atque ultimo  
„ judici, sed etiam aliis competit, superioris auctoritate  
„ salva. Certe definire ac determinare pro eodem habentur.  
„ Quis autem Theologus non audit determinationes sacrae  
„ Facultatis, aut quis eas propterea infallibiles cogitavit ?  
„ Definit, determinat, qui tota sua, qualiscumque est,  
„ auctoritate judicat. Quantum ea definitio ac determinatio  
„ valeat, non ex iis praecise verbis, sed ex aliis rebus,  
„ quas saepe memoravimus, repetendum.

Faciamus ergo quod faciendum monet, & ex aliis rebus, hoc est, ex ipsis sacrae Synodi actis repetamus, quantum ea definitio valere debeat, cujus edendae potestatem in Ecclesia Romana Graecorum Imperator & Graeci Episcopi agnoscunt. Id vero ex dictis in superiore Articulo facile demonstratur. Nisi enim in solo Pontifice, sed solum in ipso una cum Synodo generali, Graeci agnovissent plenam, summam, & irretractabilem ad res fidei definiendas ac determinandas auctoritatem; palam est, quod fidei formulam ipsis a Clemente IV. & Gregorio X. oblatam prius voluissent in generali Synodo examinari, quam ab eis velut inconcussa & immobilis fidei regula reciperetur : neque laudatis Pontificibus parvisset, qui eam in Synodo retractari abnuebant, utpote *Romanorum Pontificum stabili diffinitione firmatam*. At vero Graecorum Imperator & Graeci Episcopi laudatam fidei regulam pure ac simpliciter amplexi sunt, haud alia ad eam profitendam, quam Romanae Ecclesiae auctoritate permoti : *Obtulerunt*, inquit Imperator Gregorio X. scribens, *litteras magnae*

San-

*Sanctitatis vestrae Imperio meo, in quibus inter alia de confessione fidei, quam docet, & praedicat, & confitetur sancta Romana Ecclesia, continebatur; & oportebat in his magis responsionem convenientem nos facere. Ecce hoc facit Imperium meum: Habet autem professio fidei in dictionibus taliter: Credimus &c. Et infra: Haec est vera fides Catholica: & hanc in supradictis articulis tenet & praedicat sacrosancta Romana Ecclesia. Et rursus: Eadem sacrosancta Romana Ecclesia firmiter credit, & firmiter asseverat &c. Tenet etiam & docet eadem sancta Romana Ecclesia &c. Tandem, superscriptam fidei veritatem, prout plene lecta est & fideliter exposita, veram, sanctam, Catholicam & orthodoxam fidem cognoscimus, & acceptamus, & ore ac corde confitemur quod vere tenet & fideliter docet, & praedicat sancta Romana Ecclesia: inviolabiliter observare eandem professionem, & in ea omni tempore perseverare, nec ullo unquam tempore ab ipsa discedere quoquo modo, aut deviare, vel discordare promittimus. Itaque facto ipso Graeci professi sunt, ad Ecclesiam Romanam non modo prae ceteris, verum & ad eam solam, hoc est nulla, ex necessitate, praemissa Synodi generalis approbatione, pertinere subortas de fide quaestiones iudicio irretractabili definire: Quem ergo his Concilii Lugdunensis verbis sensum adfinimus, ut Pontifex solus, ut infallibili iudicio definiat; id de nostro, quemadmodum Bossuetius objicit, minime addimus, sed ex Gregorii litteris, & Graecorum confessione apertissime derivamus. Secus autem laudatus Auctor opinatur, contenditque, nostram eorum verborum interpretationem ab ipso Gregorio, Lugdunensi Concilio, ipsaque Graecorum sententia refelli. Quibus id*

ar-

argumentis conficiat, expendamus.

„ Et Gregorius quidem, *inquit*, non id sibi tribuit,  
 „ ut solus definiat fidei quaestiones, qui ad eas definien-  
 „ das Concilium generale congregavit, fidemque non ni-  
 „ si *sacro approbante Concilio*, exposuit, statimque pro-  
 „ fessus est, in ipsa convocatione Concilii, quae essent  
 „ decernenda, etiam circa fidem & schisma Graecorum,  
 „ ejusmodi fore, ut approbatione Concilii roborentur.  
 „ Cur vero tantus in ciendis Patribus toto orbe labor, si  
 „ unius Pontificis auctoritate haec robur obtineant? Id  
 „ ergo voluit, a se quidem *prae ceteris*, sed etiam *appro-*  
 „ *bante Concilio* quaestiones definiri.

Quid adversus factorum evidentiam valeant ejusmo-  
 di conjecturae, judicet sapiens & prudens Lector: *Grego-*  
*rius, inquit, non id sibi tribuit, ut solus definiat fidei*  
*quaestiones, qui ad eas definiendas Concilium generale*  
*congregavit, fidemque, non nisi sacro approbante Conci-*  
*lio, exposuit.* Formulam fidei, qua dogmata contine-  
 bantur, de quibus aut reipsa erat, aut quidam suspicaban-  
 tur, ne aliqua esset Latinos inter & Graecos dissensio, so-  
 lus Gregorius Graecis Imperatori & Episcopis subscri-  
 bendam proposuit. Porro tantum abest, ut ad eas fidei  
 quaestiones definiendas Concilium generale congregarit,  
 ut Imperatori disertis verbis Gregorius ipse significarit,  
 primum ab ipso Imperatore ipsiusque Clero & populo sus-  
 cipiendam eam fidem, cujus formulam Constantinopo-  
 lim trans mittebat; postmodum vero, si Imperatori libe-  
 ret, Synodum celebrandam, non ut fidei quaestiones ven-  
 tilarentur, aut novo examini subjicerentur; sed ad carita-  
 tis vinculum Latinos inter & Graecos solido foedere con-  
 firmandum. Quid enim quaeso his verbis disertius? *Ad*

quo-

rum prosecutionem, & specialiter ad caritatis vinculum inter eosdem Latinos & Graecos solido foedere confirmandum, si post receptionem & professionem ejusdem fidei, & postquam ad obedientiam ipsius Romanae Ecclesiae Tu, ac iidem tui Clerus & Populus rediissetis, ad locum, de quo eadem Romana expedire videret Ecclesia; generale Concilium peteres convocari; satis aperte spem tribuit (Clemens IV.) quod tuum in hoc desiderium adimpleret. Non ad praedictae discussionem, vel novam diffinitionem fidei &c. Quenam ergo, amabo, sunt illae fidei quaestiones, quas solus definire Pontifex noluit & ad quas definiendas Concilium generale congregavit? Quenam, rogo, est illa fides, quam, nonnisi sacro approbante Concilio exposuit? Quae sunt illa circa fidem & schisma Graecorum decernenda, quae professus est ejusmodi fore, ut approbatione Concilii roborentur? Nam, ut Articulo praecedenti observavimus, in Capite de summa Trinitate & Fide Catholica hic unus Articulus continetur, quod Spiritus Sanctus a Patre & Filio tanquam ab uno principio, & unica spiratione procedit. Hanc vero Pontifex esse declarat fidem, quam, inquit, *professa est haecenus, praedicavit, & docuit, quam firmiter tenet; praedicat, profitetur, & docet sacrosancta Romana Ecclesia, mater omnium fidelium & Magistra*: quam proinde Synodi retractationi & examini subjectam esse noluerat in suis ad Imperatorem litteris; & quam Graeci ante Synodum coacti fuerant velut inconcussam & immobilem veritatem profiteri. Quod ergo eos, qui contra sentirent, sacro approbante Concilio, damnavit ac reprobavit, profecto argumento non est, quod ejusmodi fidei Catholicae articulum Synodi examini ac retractationi subjecerit, aut quod



quod propter eum definiendum tantum subire voluerit in ciendis Patribus toto orbe laborem .

Subjungit Illustrissimus Adversarius : „ Tum nec  
 „ Graeci tulissent, ut pro certo fidei articulo figeretur,  
 „ Papam vel solum esse infallibilem, quod hactenus nul-  
 „ lo in Symbolo, nulla in definitione fidei scriptum ha-  
 „ beretur. Et quidem mens Graecorum fuit, ut ea om-  
 „ nia Papae tribuerent, quae ante schisma tribuissent;  
 „ diserte enim scriptum legimus in Epistola Episcopo-  
 „ rum ad Gregorium X. *Nihil denegamus eorum, quae*  
 „ *ante schisma praestabant Patres nostri.* Neque quidem  
 „ aliud Latini, aut ipse Pontifex postulabat; neque pro-  
 „ fecto promoverent, sed disturbarent concordiam, si  
 „ Graecis concordiae maxime obluctantibus eum articu-  
 „ lum proponerent, qui & ante schisma inauditus fuisset,  
 „ & gravissimus omnium videretur.

Ecclesiae Romanae fidem, firmam prorsus & incon-  
 cussam nullique obnoxiam errori, ac proinde certam om-  
 nino esse & irreformabilem Catholicae doctrinae regulam;  
 passim in suis fidei Confessionibus longe ante schisma  
 Graeci orthodoxi profitebantur. Nam ab ineunte saeculo  
 sexto hoc fidei suae libellis exordium, ut plurimum prae-  
 mittebant: *Prima salus est rectae fidei regulam custodire;*  
 & *a constitutis Patrum nullatenus deviare.* Et quia non  
 potest Domini nostri Jesu Christi praetermitti sententia  
 dicentis: Tu es Petrus, & super hanc petram aedificabo  
 Ecclesiam meam &c. Haec quae dicta sunt rerum proban-  
 tur effectibus: quia in Sede Apostolica extra maculam  
 semper est Catholica servata religio. De qua spe & fide  
 minime separari cupientes, & Patrum sequentes institu-  
 ta, anathematizamus omnes haereses &c. Ita incipit fidei

Professio, quam suis ad Hormisdam litteris Johannes Constantinopolitanus inferuit: Ita & libellus, quem laudat us Hormisda ad Johannem Nicopolitanum per Pulionem transmisit: Ita & fidei Confessio, quam Justinianus Imperator Agapito Pontifici obtulit. Idem quoque est initium libelli, quem ad octavam Synodum ( quae proxime Photionum schisma praecessit ) Hadrianus II. misit, ab iis subscribendum, qui ad Synodum & Ecclesiae Catholicae communionem admitti vellent. Quis autem in his verbis non vider Sedis Apostolicae fidem atque doctrinam velut inerrantem & indeficientem fidei ac doctrinae Catholicae regulam praedicari? dicitur enim, quod in Sede Apostolica semper sine macula & inviolabilis Catholica est conservata religio; idque propter Christi Domini verba & promissionem Apostolorum Principi factam: *Tu es Petrus &c.* Hoc autem posito velut inconcusso & immobili fundamento, damnantur ac reprobantur in iis libellis omnes haeresees & omnes haeretici, quos eadem Sedes Apostolica damnabat ac reprobabat: ac praeterea haec adjiciuntur, quae cum superioribus conjuncta maximi ad rem nostram momenti sunt: *Unde, sicut praediximus, sequentes in omnibus Apostolicam Sedem, & praedicantes ejus omnia constituta, spero, ut in una communione vobiscum, quam Sedes Apostolica praedicat, esse merear, in qua est integra & verax Christianae religionis & perfecta soliditas. Promittens etiam, sequestratos a communione Ecclesiae Catholicae, id est, non consentientes Sedi Apostolicae, eorum nomina inter sacra non esse recitanda mysteria.* Igitur, quoniam juxta Christi Domini promissionem, in Ecclesia Romana sine macula semper exstitit; proinde & semper erit (nam Christi Domini promissio

de-

deficere nunquam potest) inviolata religio; doctrinam ejus & communionem in omnibus amplectuntur, in iis-que integram, & veram, atque perfectam Christianae religionis soliditatem agnoscunt. Quibus rogo disertioribus ac luculentioribus verbis profiteri poterant Sedis Apostolicae in fanciendis & constituendis fidei Catholicae dogmatis immobilem & irrefragabilem, & *infallibilem* auctoritatem? Quum ergo Formulam fidei *Romanorum Pontificum stabili diffinitione firmatam*, Gregorius X. irretractabilem esse voluit, & a Graecis absque Synodi generalis examine ac retractatione signari; quum Ecclesiae Romanae ac Sedi Apostolicae tribuit, ut subortas de fide quaestiones suo tantum & irreformabili, quemadmodum ejus nos verba intelligimus, judicio finiret, idque Graecos ad ejusdem Sedis Apostolicae communionem adspirantes agnoscere ac fateri voluit; nihil ab eis exegit, quod non Patres eorum disertis verbis ante schisma profiterentur.

„ Denique, habemus, inquit *Bossuetius*, apud Pa-  
 „ chymerum (a) graves sub Michaële Palaeologo Pa-  
 „ triarchae & Antistitum Graecorum contentiones de  
 „ pacis conditionibus; habemus sub Andronico gravio-  
 „ res pacis jam factae criminationes: Patriarchae, qui  
 „ paci obsisterent, sub Michaële depositi: depositus sub  
 „ Andronico Patriarcha Johannes Veccus, qui pacem  
 „ approbasset: sub Michaële non ferebant Papae nomen  
 „ inter sacra recitandum: gravissimi flagitii loco ob-  
 „ jectabant fuisse recitatum; quod haeresis auctor Pa-  
 „ pa videretur; quanto gravius vociferarentur in pacis  
 „ conciliatores, & Michaëlis asseclas, si quod inaudi-

S 2

„ tum

---

(a) In Vit. Palaeol. lib. V. cap. XI. & seq.

„ tum erat, Papam infallibilem praedicassent? Non id  
 „ autem queruntur, non id in Pálacologo, non id in An-  
 „ dronico Pachymerus harum rerum scriptor diligentissi-  
 „ mus attigit: non id habent tam multa per eam acta-  
 „ tem pro pace & contra pacem divulgata scripta, ab eo-  
 „ dem Pachymiero aliisque recitata: non ergo id quif-  
 „ quam in animum induxerat.

Ejusmodi conjecturae tum ex se levissimae sunt, tum  
 omnem penitus vim amittunt, quum disertis luculentif-  
 que testimoniis ostenditur, persuasum fuisse Graecis, hanc  
 a Latinis Romano Pontifici auctoritatem vindicari, ut  
 ipse solus subortas de fide quaestiones supremo & irretra-  
 ctabili judicio definiat. Neque hoc tantum, imo & eos-  
 dem Graecos hunc nefario schismati obtentum praetexuis-  
 se, quod quaestio de processione Spiritus Sancti a Patre  
 & Filio sola fuisset Romanorum Pontificum auctoritate  
 definita, nec eam aliquando in Oecumenica Synodo re-  
 tractari, iidem Romani Pontifices permisissent. Patet id  
 ex Nili Thessalonicensis, qui post Concilium Lugdunense  
 scripsit, lib. I. de Primatu Papae, ubi diserte hanc negat  
 fuisse causam defectionis Graecorum ab Ecclesia Roma-  
 na, quod Latini utcumque Primatum Romano Pontifici  
 vindicarent; sed quod ipsi potestatem & auctoritatem tri-  
 buerent fidei controversias, suo tantum judicio, coque  
 irretractabili, terminandi: *Neque vero, inquit, illud in  
 causa est, quod Latini affirmant, nos nobis Primatum  
 arrogare velle, & in secundis post Romanorum Princi-  
 patum nolle consistere, simulque idcirco pacem detrectare.  
 Neque enim unquam cum Romana Ecclesia de Primatu  
 contendimus, neque de secundo loco nunc agitur. Sed  
 neque vetus consuetudo, neque Patrum decreta nos latent,*  
 qui-

quibus Romana Ecclesia antiquissima omnium Ecclesiarum ἀριστοτάτη πᾶσων ἐκκλησιῶν, declaratur: aliqui neque æquum fuerit, ut id quod inficiamur, nobis objiciatur, certaue hujus rei demonstratio hoc praetextu occultetur. Itaque Primatum Papae exciti Graecos inter & Latinos diffidii causam fuisse negat. Videamus, ergo, quamnam ille tandem funestissimi schismatis rationem adferat. Hanc ille sequentibus verbis exponendam aggreditur: *Quaenam igitur tandem est hujus diffidii causa?* Respondet, *quod quaestio controversa* (de processione Spiritus Sancti a Patre & Filio) *communi Oecumenicae Synodi decreto non sit confirmata; quod ejus solutio explicatioque non fiat ex veteri Patrum in ejuscemodi negotiis consuetudine: Sed quod Romani quidem Magistorum in hac quaestione partes sibi sumunt, alios vero instar discipulorum dicto audientes habere velint. Ceterum non hoc volunt veterum Patrum decreta . . . . in quibus, in communis fidei causa, communis quoque omnium sententia quaeritur. Id imprimis hodieque nobis ab Adversariis objicitur, ut vel ex hoc ipso Meldensis Episcopi Opere apparet, in quo passim inculcat, juxta veterem consuetudinem & traditionem communes causas esse communi Ecclesiarum judicio terminandas. At Latini apud Nilum id omnino conceptisque verbis Graecis reponunt, de quo tota nobis hodie cum Parisiensibus concertatio est: quod nimirum Papae, quum Summus Sacerdotum princeps, & pastor, & pater sit; eodem jure, quo ad ipsum pertinet universalem Synodum convocare; & privatim, absque aliis, de Ecclesiasticis negotiis statuere licet. Respondet Nilus, quod & Julius Papa erat, & Damasus, & Caelestinus, & Leo, & Agatbo, quo-*

*rum*

rum insigni pietati Patres testimonium perhibuerunt : neque tamen unquam haec dixerunt : sed una cum aliis fratribus convenientes , adjuvante bono spiritu , & dogmata stabiliebant , & pacem Ecclesiis conciliabant . Quod si unica hac ratione dogmata stabiliebantur , id vero hodie minime fiat ; quis dubitet , omnem dissidii causam hac in re esse positam ? In nobis certe hujus rei culpa non haeret . Deinde contendit , inutilem prorsus ac minime necessariam fore Conciliorum generalium convocationem , si penes Romanum Pontificem potestas & auctoritas sit , privatim & absque aliis , supremo & irreformabili judicio fidei controversias dirimendi : Si Papae tribunal his decernendis sufficit , superfluum ac supervacaneum omnino fuerit Sanctorum Patrum conventus . Verum non ita se res habet , nequaquam , quamdiu Spiritus Sanctus per beatos illos loquatur . Nam & Papam Agathonem , & divinum illum Caelestinum , & Leonem privatim quidem de rebus controversis Synodum convocasse videmus ; ita tamen ut quae illic particulariter disceptata fuissent ; ad universalem Synodum referrentur , & communi sententia veritatem stabiliri postularent . Alioqui , si Papa privatim Synodum cogente , reliquos ejus decretis assentiri necesse est , nemine contradicente , supervacaneum plane foret Oecumenicum tribunal . Huic argumento , quod Adversariis nostris achilleum est , & in quo stabiliendo toto hoc libro Meldensis Episcopus versatur , summam apud eundem Nilum Latini reponunt , quod nos uberius & invictis , ut nobis videtur , argumentis probavimus ; nempe universalibus Conciliis nequaquam propositam fuisse veritatis inquisitionem , sed convenisse , ut eam confirmarent : ideoque etiam nunc , non in dubium vocari hoc dogma

*dogma justum esse, sed stabiliri.* Si pauci refragentur, si insignes Ecclesiae minime reluctantur, opus non esse Synodo generali, etiam Nilus agnoscebat: sed quum ex quinque Patriarchalibus Sedibus, quatuor ab Ecclesia Romana de processione Spiritus Sancti a Patre & Filio dissentirent, non debuisset ejusmodi controversiam sola Romani Pontificis auctoritate, & absque Synodo Oecumenica definiri: *Si quidem nulla universalium Ecclesiarum contradicat, aut alioquin una sola, aut pauci aliquot, assentior & ego.* Si vero quum quinque sint Ecclesiae universales, una reliquis contradicit; annon justum sit, omnes convenire, & infinitis votis, summaque disputatione habita, *dogma stabiliri?* Superius autem dixerat: Si e vulgo tantum hominum aliqui dissiderent, praetextum aliquem haberet eorum oratio, atque adeo iniquum censeretur, tanti quosdam facere, ut ipsorum caussa totum orbem concutere velimus. Nunc vero quum capita orbis terrarum propemodum inter se dissentirent: an non valde absurdum fuerit de universali fide aliter quam cum universo orbe simul statuere atque decernere; quum Patres ipsi hoc tum dictis, tum factis proclament? Ad quae verba merito Thomassinus observat (a) „ Nilum ipsum „ plura fere largiri, quam e nostratibus (*hoc est, Parisensibus*) aliquos, quorum adeo error perspicuus est. „ Nam si modo nulla Patriarchalium Ecclesiarum contradicat, aut una tantum, vel pauci aliquot, annuit & „ ipse, standum definitioni Cathedrae Petri, nec Oecumenica Synodo opus esse. Quos Thomassinus indicat, videmus hodie, quod quum pauci sint & ex hominum vulgo; eos tamen ab Apostolicae Sedis Constitutionibus toto orbe

---

(a) Dissert. XII in Conc. Chalc. num. III.

orbe susceptis ad universalem Synodum provocare, ac totum sua ipsorum causa concutere velle orbem terrarum, minime pudet: quod Nilus iniquum esse fatetur. Verum non aliquot dumtaxat, sed omnium fere Parisiensium doctrinam hoc loco, si bene perpendatur, Nilus evertit. Non enim tantum si pauci ac privati homines contradicant, Synodo Oecumenica opus non esse, ac frustra orbem terrarum concuti agnoscit; verum & si aliqua universalis, hoc est, Patriarchalis Ecclesia, ceteris sibi invicem consentientibus, refragetur, abstinere posse docet ab universali Concilio: quod certe Parisienses, & cum eis Meldensis Episcopus, non admittunt; qui sufficere existimant, ut insignis aliqua Ecclesia, veluti Gallicana, vel Hispanica; ceteris relucetur, ut res ultimo & irretractabili iudicio terminanda ad generalem Synodum omnino deferri debeat. Qua in re minus Romano Pontifici tribuunt, quam olim Graeci schismatici tribuebant: qui, ut ex his quae haecenus ex Nilo in medium adduximus, manifestissime patet, non de Primatu Romani Pontificis cum Latinis digladiabantur, sed hoc unum querebantur, quod huiusce Primatus ratione Papae tribuerent, ut privatim & sine ipsis in generale coactis Concilium, fidei controversias suo ipse iudicio irretractabiliter definiret.

Nec solum post Lugdunensem Synodum Nilus, verum & longe antequam illa celebraretur, non ad primatum Romano Pontifici adsertum, Graeci causam schismatis revocabant; sed eam nefariae divisioni rationem praetexebant, quod Papa tanquam Summus Pontifex & Sacerdos sine ipsis in Concilio Oecumenico congregatis ad fidei dogmata definienda fuisset aggressus, quorum postea ab ipsis professionem exigeret. Ita enim apud Anselmum

mum



mum Havelburgensem Nechites Nicomediensis Episcopus dislerit (a): *Primatum Romanae Ecclesiae, quem tam excellentem mihi proponis, ego non nego, neque abnuo: Siquidem in antiquis nostris historiis hoc legitur, quod tres Patriarchales Sedes sorores fuerant, videlicet Romana, Alexandrina, Antiochena, inter quas Roma eminentissima Sedes Imperii primatum obtinuit, ita ut prima Sedes appellaretur, & ad eam de dubiis causis Ecclesiasticis a ceteris omnibus appellatio fieret, & ejus judicio ea, quae sub certis regulis non comprehenduntur, dijudicanda subjacerent. Quid rogo amplius hac in re Adversarii nostri Romano Pontifici tribuunt? Addit Capite sequenti Nechites, hujusce primatus ratione Romano Pontifici convenire, ut Oecumenicis Conciliis praesit, primumque in eis locum obtineat. At ferendum non esse, quod Monarchico quodam jure omnibus Ecclesiis dominari velit; & quum ipse cum suis tantum Latinis Synodos habeat, velit earundem Synodorum legibus ac decretis Graecas Ecclesias teneri, quae illis minime interfuerunt: Verum Romana Ecclesia, cui nos quidem inter has Sorores primatum non negamus, & cui in Concilio generali praesidenti primum honoris locum recognoscimus, ipsa se propter sui sublimitatem a nobis sequestravit, quando Monarchiam, quod sui officii non erat, invasit, & Episcopos & Ecclesias Occidentis & Orientis, diviso Imperio, divisit. Et ob hoc si aliquando cum Occidentalibus Episcopis Concilium sine nobis celebrat, illi decreta ejus suscipiant, & debita veneratione observent, quorum consilio dicat ea, quae dicenda judicaverit, & quorum conniventia statuuntur, quae statuenda decreve-*

To. I. Par. II.

T

rit.

(a) Lib. III. Dialog. cap. VII.

rit . Nos quoque quamvis in eadem Catholica fide a Romana Ecclesia non discordemus ; tamen quia Concilia his temporibus cum illa non celebramus ; quomodo decreta illius suscipiemus , quae utique sine consilio nostro , imo nobis ignorantibus scribuntur ? Si enim Romanus Pontifex in excelso throno gloriae suae residens nobis tonare , & quasi projicere mandata sua de sublimi voluerit , & non nostro consilio , sed proprio arbitrio , pro beneplacito suo de nobis , & de Ecclesiis nostris judicare , imo imperare voluerit ; quae fraternitas , seu etiam quae paternitas haec esse poterit ? Quis unquam aequo animo sustinere queat ? Tunc nempe veri servi , & non filii Ecclesiae recte dici possemus & esse &c. Et infra : Quid igitur nobis scripturarum scientia ? Quid nobis literarum studia ? Quid magistrorum doctrinalis disciplina ? Quid sapientum Graecorum nobilissima ingenia ? Sola Romani Pontificis auctoritas , quae , sicut tu dicis , super omnes est , universa haec evacuat . Solus ipse sit Episcopus , solus magister , solus praeceptor , solus de omnibus sibi soli commissis , soli Deo sicut bonus Pastor respondeat . Quod si in vinea Dei voluerit habere cooperatores , ipse quidem conservato primatu suo , exaltatus gloriatur in humilitate sua , & non contemnat Fratres suos , quos veritas Christi non in servitutem , sed in libertatem in utero matris Ecclesiae generavit . Quibus quaeſo aliis argumentis suas hodie Adversarii quas vocant libertates tuentur ? Quas proinde tueri non possunt , nisi simul Graecorum adversus Latinos causam agant : atque omnino necesse est , ut causa Graecis adjudicetur , si firma sunt earundem libertatum fundamenta . Quid enim Nechitae Parisiensis Theologus respondebit cum Latinis expostulanti , quod Graecos adigere vel-

vellent ad ea dogmata profitenda, & Canones observandos in Conciliis editos, quae sine ipsis Romani Pontifices celebrabant? Ne mustitare quidem adversus haec audebit, quum eadem quotidie tela adversus Romanos Theologos intorqueat: ut merito Cl. Thomassino observatum sit, quod (a) „ qui contra nobis hac in parte dicent, non „ aliis poterunt nos, quam a Nilo, seu a schismatis officina depromptis laceffere telis: non poterunt non totam „ Latinae Ecclesiae causam adversus Graecos in dogmate de processione Spiritus Sancti labefactare. Ibi enim „ Latini decretis Apostolicae Sedis ita inhaesere, ut ea „ veluti dubia deinceps in controversiam vocari, ne in „ Oecumenicis quidem Conciliis passi sint. Ex quibus omnibus compertum est, neque ante, neque post Synodum Lugdunensem ob primatum Romano Pontifici adsertum Graecos a Latinis Theologis discordasse, aut ab Ecclesiae Romanae communione averfos fuisse: sed hanc nefario schismati causam praetexuisse, quod ratione primatus eam Romano Pontifici potestatem & auctoritatem adsererent, qua subortas de fide controversias absque Synodis Oecumenicis, aut saltem absque praecipuarum & insigniorum Ecclesiarum adsensu, judicio irretractabili definirent.



## CAPUT XXXVII.

„ Idem ex Graecorum in Basileenſi & Florentina  
 „ Synodis doctrina, Eugeniiſque Papae  
 „ ac Latinorum conſenſu  
 „ oſtenditur.

**C**oncilii Florentini decretum, quo de Romano Pontifice ſancitum eſt, eum *in univerſum orbem tenere primatum: totius Eccleſiae caput, & omnium Chriſtianorum Patrem ac Doctorem exſiſtere: & ipſi in Beato Petro paſcendi, regendi, ac gubernandi univerſalem Eccleſiam a Domino noſtro Jeſu Chriſto plenam poteſtatem traditam eſſe*; Hoc, inquam, Florentinae Synodi decretum alibi expendemus; & jure ex eo confici demonſtrabimus, majorem eſſe Romani Pontificis, quam Concilii Oecumenici auctoritatem. Decrevimus enim Adverſarium conſequi & *prode*, ejusque omnino veſtigiiſ inſiſtere. Quare hîc ea duntaxat ex Florentina Synodo ad trutinam revocabimus, quae ad ſuam, ut ipſi viſum eſt, illuſtrandam opinionem, Boſſuetius excerptit.



## ARTICULUS PRIMUS.

*Quae Bossuetius ex Florentina Synodo in medium adfert, aut nihil probant adversus Romani Pontificis ineluctabilem auctoritatem; aut probant, vel secundam Synodum Lugdunensem non fuisse oecumenicam, vel retractationi ac novo examini subjectas esse ipsas quoque Conciliorum generalium dogmaticas definitiones.*

„ **L**ibet, inquit Illustrissimus Adversarius, hic remi-  
 „ nisci ea, quae de Graecorum sententia ex actis  
 „ Baluensis & Florentinis ostendimus: Non posse  
 „ unionem fieri nisi in Synodo universali; in qua Occi-  
 „ dentalis Orientalisque Ecclesia conveniant: Ecclesiam  
 „ in unum congregatam de rebus dubiis judicare: com-  
 „ muni consensu sententiam ferre: communiter haec agi,  
 „ & quae communia sunt communi consensu terminari  
 „ oportere: plurimorum sententiam praevalere: sanctam  
 „ Ecclesiam in sacris dogmatibus nullo modo posse errare,  
 „ communi quidem ac Synodica consideratione uten-  
 „ tem. Haec Graeci profitentur, quae usqueadeo ipsi Eugenio IV. probata erant, ut haec ad Graecos loqueretur: Proferatur libere veritas per sacramentum; & quod pluribus videbitur, hoc amplectemur & nos & vos. Quod neque Graeci, neque Eugenius dicerent, si Papam vel solum infallibili judicio quaestiones definire, jam inde a Lugdunensis Concilii tempore constitisset.

Aut Illustrissimus Adversarius vim argumenti constituit

tuit in verbis & auctoritate Graecorum, aut in verbis Eugenii Graecorum verba & orationem, ut ipse contendit; adprobantis. Si primum dixerit; consequens est, ut cum eisdem Graecis pariter neget, secundam Synodum Lugdunensem pro oecumenica esse habendam. Nam quum Graeci petebant, generalem Synodum celebrari, contendebantque, unionem non posse fieri nisi in Synodo universalis; pro certo manifestissime habebant, nondum pro negotio unionis & pacis, ac discutiendo dogmate de Processione Spiritus Sancti, de quo maxime cum Latinis digladiabantur, ullam ejusmodi Synodum, hoc est, Oecumenicam habitam esse. Id passim ex eorum verbis & orationibus patet. Speciminis loco sint haec Bessarionis verba in Oratione dogmatica ad Synodum Orientalem (a) sessione XXV. Concilii Florentini, unde sua quoque Meldensis Episcopus descripsit: *Verum demus, non recte illos (Latinos) fecisse, quod sine totius Ecclesiae congregatione de rebus gravibus ad fidem Christianam pertinentibus tractarint .... nunc autem quum ejusmodi culpa vacent, sponteque in generalem Synodum convenerint, ac omnia se facturos affirmarint quae ratio persuaserit; & ipsi se omni accusatione prorsus immunes reddiderint: & nos oportet, non mediocre studium cogitationemque adhibere, ut quae agenda a nobis sint, caute prudenterque agamus: ne quod ANTE HUNC DIEM objicere Latinis consuevimus, in nos recidat: denique ne ea accusatione judicemur, cujus illos olim reos agebamus. Nam si, ut dicere ipsi consuevimus, nondum advocata Synodo generali, accusandi erant Latini, quod suo dumtaxat judicio de re adeo gravi credidissent; quidni nos quoque, quum*  
*id*

---

(a) Capite primo.

*id quod quaerebamus factum sit, omnesque in unum convenerimus, magnum ingredi certamen, ingensque subire periculum necesse est, ut absque culpa hinc abire possimus?* Quibus verbis tanquam certum & exploratum sibi Bessarion sumit, nondum in aliquo Oecumenico Concilio de pacis & unionis negotio actum fuisse, nec dogma de Processione Spiritus Sancti a Patre & Filio Synodi generalis auctoritate sancitum. Eaque de re neque Gregorius Protopro-Syncellus in Apologia adversus Marcum Ephesium, neque Georgius Scholarius in suis de Pace Orationibus dubitant. Quare si Graecorum admittenda auctoritas est, secunda Synodus Lugdunensis erit nobis e Conciliorum generalium numero expungenda.

Si autem Adversarius non quidem Graecorum verbis & auctoritate nititur, sed Eugenii, ea quae a Graecis prolata sunt, ut ipsi videtur, probantis; hinc plane & aperte sequitur, non modo Romanorum Pontificum, verum & generalium Conciliorum de fide sanctiones retractationi & examini subjectas esse, neque omnino irreformabiles esse & indeclinabiles auctoritatis. Quod ut efficacius probetur, integrum Eugenii textum in medium adferamus: *Itaque denuncio serenissimo Imperatori, Fratrique Patriarchae, & universae Orientali Ecclesiae, & dico haec: Quatuor sunt quae vobis proponuntur. Primum, si satisfactum vobis est per clarissimam & evidentem demonstrationem, qua demonstravimus ex scripturis, Spiritum Sanctum procedere ex Patre & Filio, bene. Sin minus, dicite, de quo ambigatis, & qua ex parte illud non recipitis, ut remedium adhibeamus; & evidenter perspicueque probemus, Processionem hanc vere etiam esse ex Filio. Secundum, si habetis ex scripturis auctoritates contra-*

trarium asserentes iis, quae dicuntur a nobis, ut eas proferatis. Tertium, si habetis valida scripturae loca, quibus probetur, melius esse magisque pium, quod vos teneatis, quam nostrum dogma. Quartum, si haec non vultis, conveniamus simul, fiatque Synodus: Conficiat sacrum Sacerdos; jusjurandum demus Latini pariter & Graeci; proferatur libere veritas per juramentum; & quod pluribus videbitur, hoc amplectemur & nos & vos. Quum haec Eugenius Graecos adloquebatur, non utique oblitus erat, fuisse in secunda Lugdunensi Synodo definitum, Spiritum Sanctum ex Patre & Filio, tanquam ex uno principio & unica spiratione procedere: nec pariter ignorabat, eam Synodum ab Ecclesia Romana inter Oecumenicas recenseri. Quare si quid valet, quod ex Graecorum & Eugenii verbis Bossuetius conficit argumentum, dicendum omnino est, quod ea „neque Graeci, neque Eugenius dicerent, non modo si Papam vel solum, sed etsi „ipsum cum Oecumenica Synodo; infallibili judicio „quaestiones definire, jam inde a Lugdunensis Concilii „tempore constitisset. Aut dicendum est non modo Graecos, sed neque ipsum Eugenium, Concilium secundum Lugdunense inter Oecumenicas Synodos numerasse. Aut certe agnoscere tandem ac fateri Adversarii debent; non recte inde probari, Romani Pontificis non esse irreformabiles alicujus dogmatis definitiones, quod eae oeconomia quadam & indulgentia fuerunt aliquando ad novum examen in generalibus Synodis revocatae. Si enim id tueri pergitis, fateri omnino debetis, non modo Graecis, verum & Eugenio Latinisque Patribus visum esse, Canonem Concilii Lugdunensis de Processione Spiritus Sancti a Patre & Filio non fuisse ante Synodum Florenti-



tinam irreformabilis & irretractabilis auctoritatis .

Quod si de Concilii generalis Canone judicare absurdum est; quum ipsi pariter Latini & Graeci in eadem Synodo Florentina conceptis disertisque verbis profiteantur, summam esse & ineluctabilem Conciliorum generalium auctoritatem; quidni id ipsum de Romanorum Pontificum definitionibus adfirmemus; quum non minus diserte & Eugenius ac Latini Patres, nec non quidam ex Graecis, eandem Romano Pontifici in definiendis fidei dogmatibus auctoritatem adsererent? Id alibi fusius ostendimus: quare hinc ea dumtaxat Patrum Florentinorum loca ad examen revocabimus, quae nobis frustra Adversarius conatur eripere .

## ARTICULUS II.

*Aliquot Florentinorum Patrum loca, quibus diserte Romano Pontifici in definiendis fidei dogmatibus inerrantia tribuitur, ab Episcopi Meldensis exceptionibus vindicantur.*

„ **A** Tenim, inquit Illustrissimus Adversarius, ob-  
 „ jiciunt duos Viros praestantissimos in eadem  
 „ Synodo differentes, Rhodium Archiepiscopum & Ju-  
 „ lianum Cardinalem. Et Rhodius quidem pro addita-  
 „ mento, *Filioque*, certans ait: (a) Latinorum Patres  
 „ id multa cum reverentia suscepisse, quod explanavit  
 „ Romana Ecclesia: sedem Petri solam esse, in qua pote-  
 „ stas sit explicandi fidem: ab hac ipsa Ecclesia, cujus  
 „ est explicare omnes fidei veritates, susceptam esse banc  
 „ To. I. Par. II. V de

---

(a) Conc. Flor. Sess. VII.

» *de Spiritus Sancti Processione veritatem .*

Quid enim vero disertius ? Conatur tamen adeo praeclarum pro nobis testimonium sequentibus verbis eludere:

» Quae omnia, *inquit*, eo pertinent, ut Sedi Apostolicae id incumbat officii, neque sine ejus auctoritate fidei  
» veritates definiri possint. Quod tamen officium si sola  
» praestare posset, seclusa Ecclesiae Catholicae consen-  
» sione & auctoritate, non erat cur Eugenius Florenti-  
» nam Synodum convocaret, in eaque testaretur, valitu-  
» ram eam fidem, ipso etiam praesente, quae frequentis  
» Synodi sententia ac testimonio vinceret .

Si hoc pacto licet testimonia Patrum eludere, nullum erit adeo perspicuum & evidens, quod non proclive sit in alium sensum & quo volumus detorquere, & ex semel conceptis ac praejudicatis opinionibus colorem detortis expositionibus allinere. *Sedem*, inquit Archiepiscopus Rhodius, *Petri solam esse, in qua potestas sit explicandi fidem*; nimirum, certo & indeficienter, ac sine ullo errandi periculo: quare statim subjungit: *Propter quod nunquam portae infcri, hoc est, haereses praevalere adversus eam, imo ne attigerunt quidem.* Quae a doctissimo Praefule eo referuntur, ut probet, solam Petri Sedem, sine Concilii generalis auctoritate, potuisse particulam *Filioque*, Symbolo addere, & ad ejus professionem omnes compellere, qui aeternae salutis compotes esse velint: nec opus esse post Sedis Apostolicae oraculum, de eodem dogmate inquirere, aut alios libros auctoresque consulere: *Sed haec*, inquit, *in praesenti dicta sufficiant, si hoc unum dicamus: ab hac ipsa Ecclesia, cujus est explicare omnes fidei veritates, susceptam esse hanc veritatem, utpote necessariam ad hominum salutem: nisi enim illa implicate*  
vel

vel explicitè credatur, fieri non potest, ut salus hominum consistat. Propterea Romana Ecclesia poterat, & debebat facere, quod fecit: hoc est, sola sua & absque Concilii generalis auctoritate, addere fidei Symbolo tanquam certam, inconcussam & immobilem veritatem, & ab omnibus certa fide sollenniter profitendam, quod Spiritus Sanctus ex Patre Filioque procedit. Si vultis ergo, Patres, una nobiscum fateri, quod nos hodie protulimus, non opus erit aliis negotiis: sed libris clausis amplectamur hanc veritatem, simusque in Ecclesia Dei conjuncti? Quid ergo juvat adeo perspicuum testimonium inanibus conjecturis eludere, quae, ut superiori articulo ostensum est, si quid probant, illud etiam suadent, nec secundam oecumenicam Synodum Lugdunensem auctoritatem habuisse ad hanc veritatem irretractabiliter definiendam. Consultius proinde duxit Nat. Alex. fateri (a), Rhodio Archiepiscopi in disputationis aestu aliqua non satis accurate dicta excidisse, & quae benigna interpretatione molliri opus habeant. Sic illi benignas interpretationes appellant, quae manifestae sunt nativi ac legitimi sensus depravationes.

Verum haec doctissimo Archiepiscopi in disputationis aestu minime excidisse, nec quidquam protulisse, quod benigna interpretatione opus habeat, sed ex communi Patrum Latinorum sententia disseruisse, inde facile suadet, quod Julianus Cardinalis in Concilio sedens, ejus orationem non modo non improbavit, verum & laudavit, & Agathonis auctoritate ex ejus ad sextam Synodum Synodica Epistola confirmavit: Quoniam vos, Domini, recitastis superiori sessione epistolam Agathonis Papae, illam-

V 2

que

---

(a) Dissert. XII. in Hist. Saec. XIII. & XIV.

que valde authenticam existimatis, duo volo addere verba ad quod dixit Dominus Rhodi Praeful. Primum dixit: „ Quotiescumque error aliquis emerferit, Papae incumbere necessitatem docendi populos Catholicam veritatem: *Postea dicit*: „ Totam Christi Catholicam Ecclesiam, & Patres omnes suscepisse auctoritatem Romanae Ecclesiae, & secutos esse per omnia ejus doctrinam. *Recitabo epistolam Agathonis Papae*: Si silentio texero veritatem, quam erogare numulariis jussus sum per illa verba: *Pasce oves meas*: Et: *Tu aliquando conversus confirma fratres tuos*: quandoquidem nobis incumbit necessitas docendi Christianos quae pertinent ad veritatem: *Et paulo ante*: Tota Christianorum Ecclesia Catholica & omnes universales Synodi fideliter amplectentes ejus doctrinam, & omnes Sancti Doctores & Ecclesiae Luminaria in omnibus ejus doctrinam secuti sunt. *Et reliqua*. Hinc patet, quoties de fide aliqua oritur dubitatio, Romanum Pontificem debere ac teneri illam declarare: atque illo docente, omnes Synodos; & Ecclesiam universam debere hujusmodi veritatem sequi. *Et hoc dicit Epistola recitata, & approbata in sexta Synodo*. His doctissimus Cardinalis Rhodii Archipraefulis orationem confirmavit, qua Romano Pontifici auctoritatem vindicabat, ut solus & absque Synodi generalis consensu fidei dogmata irretractabiliter definiret.

Horumce verborum lacinias adfert & Bosluetius, summamque doctrinae, quam Julianus tradidit, hanc esse animadvertit: „ Officium esse Romani Pontificis docere veritatem: Conciliorum officium, eo maxime praeunte, veritatem sequi; eumque in Ecclesia consuetum esse ordinem docendae veritatis. Quod & Parisienses ubi-

„que

„ que, & Ecclesia Gallicana maxime praedicant. At nemo non videt, quam haec doctrina Rhodii Archiepiscopi & Juliani Cardinalis disputationi & scopo parum accommodata sit: quorum nimirum mens & propositum erat ostendere, potuisse Romanum Pontificem solum & absque Synodi generalis auctoritate, processionem Spiritus Sancti a Patre & Filio addere Symbolo tanquam veritatem ab omnibus Catholicis irretractabiliter profitendam.

Id illi esse obijciendum Bosluetius vidit; quis enim non videret? Quare objectionem occupans haec subiungit: „ Nihil agit, inquires, si id tantum velit: *Respondet*: „ Imo vero id agit, ut constet, Latinos nihil novi molitos, qui Romanum Pontificem rite officio functum, ac „ de Spiritus Sancti processione vera & antiquitus tradita „ praedicantem, pro Ecclesiastico more, autorem sequuti „ sint. Quid si officio non fungatur, nec veritatem doceat? etiamne aberrantem sequi tenerentur? Id fieri nequit, inquires; Jam id tu quidem dicis, non ipse Julianus. Imo id Julianus expresse docet, quum Rhodii Archiepiscopi orationem probat, qui non errandi privilegium Sedi Apostolicae vindicat, Christi Domini promissione fretus, quod adversus eam nunquam portae inferi, id est, haereses praevallebunt, imo illam ne attingent quidem. Docet etiam, quum S. Agathonis verba refert adfirmantis, *omnes Synodos Romanorum Pontificum doctrinam secutas*; indeque probat, & sequi *per omnia* debuisse. Quid enim fingi potest ineptius, quam Synodos generales, quae falli nequeant, secutas esse & sequi *per omnia* debuisse regulam errandi periculo obnoxiam? Porro absurde quaeritur „ indiscussamne secutae sint, an exa- „ minatam, & facta demum discussione firmatam? &  
ab-

absurdus respondetur : *Examinatam certe*. Quum enim id quaeris, idque respondes; cum Graecis causam adju-  
 dicas contententibus, nec processionem Spiritus Sancti a  
 Patre & Filio debuisse inter inconcussas fidei Catholicae  
 veritates in Symbolo recenferi, antequam Synodi gene-  
 ralis discussione firmaretur; tum Romanos Pontifices Cle-  
 mentem IV. & Gregorium X. tyrannidis arguis, qui, ut  
 superius vidimus, ad eam veritatem amplectendam ac  
 profitendam, tanquam *Romanorum Pontificum stabili  
 diffinitione firmatam*, Graecos adegerunt, nondum licet  
 Synodi generalis examinatione discussam.

Pergit Adversarius: „meminerimus sane, Julianum  
 „Cardinalem eum esse, quo Praefide Constantienfes Ca-  
 „nones, Basileae toties innovantur. Qui eorum autori-  
 „tate Eugenium perpulerit ad revocandam Basileensis  
 „Synodi dissolutionem; qui proinde crederet, ac vehe-  
 „mentissime assereret, Papam etiam in fidei causis  
 „subesse Concilio: non ergo per se infallibilem. Haec  
 probant, eo pluris esse faciendam doctissimi Cardinalis  
 auctoritatem, qui profecto nisi gravibus permotus ratio-  
 nibus sententiam deseruisset, qua antea in praeceptis cum  
 aliis Basileensibus agebatur. Ipsum namque a priore opi-  
 nione recessisse, frustra Bossuetius quaerit testes, quibus  
 probemus: Id enim satis cum ex adlatis ejus verbis per-  
 spicuum est, tum ex disputatione Johannis Provincialis  
 de Primatu Papae par. II. Conc. Flor. Collat. XXII. quam  
 laudatus Cardinalis, ut illam Archipraefulis Rhodii, non  
 modo probavit, verum & quaedam identidem suggestit,  
 quibus confirmaretur, quae profecto, ut alibi demonstra-  
 bimus, cum Basileensium & Parisiensium opinionibus  
 conciliari nullatenus potest.

„ At-

„ Atque ut jam mittamus, *inquit*, doctissimum qui-  
 „ dem, sed tamen unum hominem Julianum; non aliter  
 „ sensit Graecorum ac Latinorum Patrum multitudo, a  
 „ quibus quippe vidimus, definiendae Catholicae verita-  
 „ tis auctoritatem & vim in communi deliberatione &  
 „ consensione collocatam. Ita Illustrissimus Adversarius  
 ad hunc communem confugit locum, quotiescumque ni-  
 hil ipsi solidi occurrit, quod claris luculentisque testimo-  
 niis reponat, quibus Ecclesiae Romanae doctrinam & au-  
 ctoritatem tuemur.

Adjungit: „ & Marcus quidem Ephesius, aliique in  
 „ Synodo Florentina ineundae initaque pacis inimici,  
 „ de Papa quidem multa, illud vero nunquam objece-  
 „ runt; quod eum infallibilem Conciliisque omnibus su-  
 „ periores fecissent; aut in ipso solo vim omnem repo-  
 „ nerent: adeo haec nemo cogitabat. Prorsus inane &  
 nullius momenti sunt ejusmodi conjecturae, & negantia,  
 ut vocant, argumenta, quum disertis, & positivis, & ad-  
 firmantibus testibus refelluntur. Quid generatim Roma-  
 no Pontifici tribuerent, & quibus in rebus ejus primatum  
 reponerent Latini Patres, qui per haec tempora Eugenio  
 Quarto, hoc est, unico & legitimo totius Ecclesiae Capiti  
 & Pastori adhaerebant, patet ex eorum placitis in Diaeta  
 Moguntina expositis, quae Augustinus Patricius sub hoc  
 titulo refert (a): *Affertiones Eugenianorum pro auctori-  
 tate Pontificis*. Sunt autem ejusmodi: *Claves Ecclesiae  
 soli Petro, & successoribus datae; cui dictum est: Tibi  
 dabo claves regni caelorum . . . . . Papam omnibus Chri-  
 stianis praeesse; & ita Concilio generali, ut illi potesta-  
 tem tribuat. Generale Concilium non habere potestatem*  
 imme-

---

(a) Hist. Concil. Basil. Florent. &c. Cap. CXVIII.

immediate a Christo, sed a Beato Petro, & ejus successoribus . . . . Summum Ecclesiae tribunal, & in terris supremum judicium apud Papam solum esse . . . . Exercitium Clavium in plenitudine potestatis in terris Papae tantum competere, qui omnia potest in terris. Generale Concilium veluti arenam sterilem esse, nisi a Papa fecundetur. Videat ergo Adversarius, quo pacto tueri possit suam illam generalem propositionem: Adeo haec nemo cogitabat! nimirum Papam infallibilem Conciliisque omnibus superiorem esse, aut in ipso solo vim omnem esse repositam.

Neque a Latinorum Patrum ac Theologorum sensibus dissidebant Graeci, qui Florentinae Synodi acta decretaque a Marci Ephesii & aliorum schismaticorum objectis vindicarunt. Ita Josephus Episcopus Methonensis Romanae Ecclesiae potestatem tribuit ad ceteras omnes Ecclesias gubernandas, & in fide confirmandas; sed negat, cum ipsam opus habere, ut ab aliis regatur, & in fide confirmetur; tum etiam esse in aliis ad haec praestanda istiusmodi auctoritatem (a): A te porro, inquit ille Marcum Ephesium adloquens, emendari Romanam Ecclesiam, nil opus erat: Nam illa cunctarum est gubernatrix Ecclesiarum, & aegrotantibus Ecclesiis peritissime medetur; quum potestatem a Christo acceperit regendi alias & gubernandi, confirmandi & corrigendi; non ut ipsa confirmetur ab aliis: Et tu, inquit Salvator ad Petrum, aliquando conversus confirma Fratres tuos; non dixit: Confirmare a fratribus tuis, sed, Confirma. Coportebat igitur, te etiam ab illa confirmari, quemadmodum sapientiores & doctiores te confirmati sunt.

Ita

---

(a) Resp. ad Libel. Marci Ephes. in Append. ad Acta Conc. Flor.



Ita & Gregorius Proto Syncellus & Patriarcha, qui adversus eundem Ephesium verbis Theodori Studitae Romano Pontifici vindicat dignitatem Patris ac Doctoris omnium Christianorum, eidem in definitione Florentinae Synodi adsertam; & cum ea dignitate conjunctum non errandi concessum illi divinitus privilegium (a): *Quod de Papa dicimus*, ait ille, *non ex nobis dicimus. Nam Theodorus Studita scribens ad Michaelem Imperatorem nomine omnium Hegumenorum in Epistola, quae sic incipit*: Nos omnes in unum congregati &c. „Si quid vero, „*inquit*, dubitat, . . . . jubeat . . . . a Seniore Roma mitti „sibi hujus rei declarationem, ut per antiquam traditio- „nem ab initio servatum est. Haec est, imitator Christi, „Imperator, supremus apex Dei Ecclesiarum, cui pri- „mus praesedit Petrus, ad quem Dominus: *Tu es Petrus &c. Idem Theodorus in alia Epistola ad Naucrati- um, cujus initium est*: Non complebuntur aures meae &c. „Deum, *inquit*, hominesque contestor; sejunxerunt se „a corpore Christi, & coriphaea sede, in qua Christus „posuit fidei claves; adversus quam non praevaluerunt „per omne saeculum, nec praevalerunt usque ad finem „saeculi inferi portae, ora videlicet haereticorum, sicut „promisit ille, qui non mentitur. Praevalerent autem, aut saltem adversus Ecclesiam Romanam praevalere aliquando possent inferi portae, hoc est, haereticorum ora; si Ecclesia Romana errandi periculo subjaceret: a quo tamen tam remota est, quam deficere non possunt promissiones illius, qui non mentitur. Hinc autem, atque ex aliis, quas adfert, auctoritatibus laudatus Auctor colligit, quod *jure Romanus Pontifex Christianorum om-*

To.I. Par.II. X nium

---

(a) Apolog. advers. Marc. Ephes. ibid.

nium Doctor in definitione Florentinae Synodi inscribitur.

Sed nemo preffius Latinorum Patrum, quae supra retulimus, placitis ac decretis insistit, quam Gennadius Patriarcha Constantinopolitanus in Expositione pro Concilio Flor. Cap. V. Nam primo cum eisdem Patribus docet (a), eum solum, hoc est, Romanum Pontificem obtinere potestatem omnem Ecclesiam absolute dirigendi & gubernandi, ligandi & solvendi &c. solumque illum habere facultatem de fide & sacerdotio exquirendi. Quod probat S. Theodori Studitae auctoritate in Epistola quadam ad Paschalem Papam. Quaerit autem, undenam, & qua de causa tam insignis praerogativa Romanae Ecclesiae tributa sit? respondetque, propterea quod omnibus haeresibus superior sit, quod ad eam haereses attingere non possint; quod mergi procellis nequeat, tanquam tutissimus portus; & civitas refugii, in qua Christus caeli claves deposuit: quod rursus ejusdem Theodori Studitae in eadem Epistola testimonio probat. Undenam hoc? non ob aliquid aliud, nisi quia is habebat potestatem ceteras Ecclesias confirmandi, tanquam qui omnibus haeresibus superior esset, longeque positus esset ab omni procella haereticorum. Hujus rei ipsemet (Theodorus) testis est in Epistola ad Paschalem dicens: „Vos igitur vere illimis „fons ac sincerus jam inde a principio, verae fidei; „vos ab omni haereticorum procella longe positi; securus totius Ecclesiae portus; vos a Deo electa Civitas ad „salutis refugium: Intelligis, quo pacto securum portum appellat totius Ecclesiae Romanum Pontificem? Ad quem, ut navigia ab undis in medio maris agitata in portum pro-

---

(a) Sect. XVI. vid. & Sect. VII. & Sect. IX.

profugiunt, ne foris relicta a fluctibus atque aestu mergantur: Sic & omnes Ecclesiae ab haereticis tanquam a fluctibus vexatae ad Romanum Pontificem velut ad portum salutis confugiunt, ubi tranquillitatem & quietem omnem nanciscuntur: nam eo loci fidei claves Christus apud Petrum Apostolum deposuit, ut Ecclesiam totam pasceret atque gubernaret; nec apud illum tantum, sed etiam apud ejus successores, ipsi dicens: Et tu aliquando conversus confirma fratres tuos: quae quidem non soli Petro contigerunt, sed & ejus successoribus. Quod statim aliquot Romanorum Pontificum exemplis demonstrat, qui alias, ac praecipue Graecorum Ecclesias, adversus insurgentes haereses confirmarunt. Secundo ex ea Ecclesiae Romanae Romanique Pontificis praerogativa aliam cum eisdem Latinis Patribus colligit; nimirum (a), quod sine illius assensu non potest Oecumenica Synodus, vel omnino vocari Synodus, vel auctoritatem habere. Denique eidem Ecclesiae Romanae disertis verbis inerrantiae privilegium & praerogativam vindicat, haud secus atque ipsimet Catholicae Ecclesiae. Occurrens enim schismaticorum objecto, quo Romanam Ecclesiam non recte sentire adfirmabant, propterea quod contra communes Patrum & Doctorum sententias quaedam praescribebat: Si ergo, inquit (b), illa divina Sedes non recte sentit; mentitur Christus.... Is enim Ecclesiae pollicitus est, se cum ea fore, & portas inferi non praevalituras adversus eam. Ideo ne Christum mendacem efficiamus?... Inerrantem Dei Ecclesiam esse dicimus: quam rem testificabitur rursus ipse Theodorus Studites ad Michaelem Imperatorem scribens ex persona omnium Praepositorum hoc pa-

X 2

Flo

(a) Sect. X.

(b) Sect. XVII.

*Ho:..... Et iterum idem in alia Epistola ad Naucratium &c. Verba refert ex his duabus Epistolis, quae supra cum Gregorio Proto-Syncello descripsimus; ac deinde subjungit: Audis, quo pacto ea est caput Ecclesiae Christi, cujus Petrus est primus Praeses: & quod nunquam praevaluerunt, neque praevallebunt usque ad consummationem saeculi effraenata ora, secundum promissionem veracis Salvatoris? Si ergo nunquam praevaluerunt haeretici adversus Christi Ecclesiam; quomodo audetis dicere, eam errare, quae inerrans a Doctoribus praedicatur? Ex eo quod Ecclesia Catholica errare non potest, Sedi Apostolicae eandem praerogativam vindicat; perinde ac stare non possit & consistere immobile ac firmum aedificium, si fundamentum labefactetur. Quare si Ecclesia errare non potest; consequens est, quod neque Sedes Apostolica: quae petra est & fundamentum, super quod universae Ecclesiae aedificium consurgit, & immobile perseverat.*

## CAPUT XXXVIII.

- „ Viennense Concilium sub Clemente V. Ejus
- „ aevi Scriptor nobilis Guillelmus Mimaten-
- „ sis Episcopus, Speculator dictus,
- „ a Papis jussus de habendo Con-
- „ cilio scribere, quid senserit.

**D**E Mimatenfis Episcopi sententia alibi cum Illustrissimo Adversario disserimus. Quare in ea hoc loco expendenda immorari non libet: sed majoris momenti disputationem aggrediar de sensu Clementinae unicae in  
hoc

hoc Concilio Viennensi editae *de summa Trinitate ac fide Catholica* : quae ut lucem mutuabitur ex his , quae superiori Articulo ex Latinis Graecisque saeculi sequentis Auctoribus disputavimus ; ita iis pondus adjiciet .

## ARTICULUS UNICUS.

*De sensu hujusce propositionis : Ad solum Romanum Pontificem pertinet eorum quae sunt fidei , declaratio , sive judicium &c.*

**O** Stendimus in articulo superiori , communem fuisse Florentini Concilii tempore Latinorum Graecorumque Patrum sententiam atque decretum , ad solum Romanum Pontificem Sedemque Apostolicam pertinere , Ecclesiam universam dirigere & gubernare , fidei causas examinare , deque illis judicium ferre . Huic autem sententiae maximum pondus accedit ex Clementina unica in Concilio Viennensi edita *de summa Trinitate & fide Catholica* , ubi Pontifex de Christi latere post mortem percussio quaestionem tractans , sic ait : *Nos igitur ad tam praeclarum testimonium , ac Sanctorum Patrum & Doctorum communem sententiam Apostolicae considerationis , AD QUAM DUMTAXAT HAEC DECLARARE PERTINET , aciem convertentes , sacro approbante Concilio , declaramus &c.*

Refert haec verba Illustrissimus Adversarius , aitque :  
 „ Clarum esse , illud *dumtaxat* , intelligi , haec sine Sede  
 „ Apostolica tractari non posse : alioquin excluderetur  
 „ etiam Concilium , quo approbante ista definiuntur atque  
 „ roborantur . Nec valerent ea , quae semper , atque illo  
 praec-

„ praesertim tempore valebant , ut quae universalem Ec-  
 „ clesiam tangerent , ab universali Ecclesia communi  
 „ consensu decernerentur ; quibus vel maxime contineri  
 „ fidem consentiunt omnes .

At nos meliorem expetere ac dare non possumus verborum Clementis V. interpretem , quam Clementem VI. ejus post XXX. circiter annos in Sede Apostolica Successorem , doctissimum Pontificem , olim in Academia Parisiensi sacris litteris institutum , sacrae Facultatis Doctorem , Sorbonae Provisorum , Archiepiscopum Senonensem atque Rothomagensis ; qui proinde optime perspectam atque exploratam habebat Ecclesiae Gallicanae doctrinam . Is igitur in Epistola ad Consolatorem Catholicorum Armenorum , cum urgens , ut de Romani Pontificis primatu & auctoritate fidem suam absque ambagibus aperiret , haec habet : *Tertio decimo , si credidisti , & adhuc credis , SOLUM ROMANUM PONTIFICEM , dubiis emergentibus circa fidem Catholicam , posse per determinationem authenticam , cui sit inviolabiliter adhaerendum , finem imponere : & esse verum & Catholicum quidquid ipse auctoritate clavium sibi traditarum a Christo determinat esse verum ; & quod determinat esse falsum & haereticum , sit censendum .* An haec quoque Meldensis Episcopus eo trahet ut sine Sede Apostolica ista tractari non possint ? Sed vereor , an cuiquam Viro prudenti adeo a Clementis verbis alienam interpretationem esset adprobaturus . Non enim hic quaeritur , quid Romanus Pontifex cum Concilio oecumenico , aut cum Ecclesiae totius assensu , sed quid solus possit , traditarum sibi auctoritate clavium , ac determinationem authenticam emittendo . Itaque ad *solum* Romanum Pontificem pertinet de rebus fidei

fidei judicare; iudicio, quod controversiis finem imponat, cui sit inviolabiliter inhaerendum, quod tanquam certissima & immobilis regula habeatur, cui qui consonat, Catholicus; a qua vero qui dissonat, haereticus judicetur.

Sed ais, numquid & Concilia Oecumenica hac eadem auctoritate de fidei rebus judicare non possunt? Numquid & eorum authenticis definitionibus inviolabiliter adhaerendum non est? Numquid non & haereticus judicatur, qui ipsorum de fide regulis ac decretis pertinaciter contradicit? Ita profecto est; nec tamen minus verum ac ratum fixumque manet, ejusmodi, hoc est, omnino firmum & irrefragabile de fidei rebus iudicium ad solum Pontificem, quemadmodum a duobus Clementibus Quinto & Sexto, aliisque pluribus Auctoribus proditum est, pertinere. Quum enim dicitur Ex. Gr. solus Rex habere in Regno jus sanguinis, vel ad eum solum pertinere de bello ac pace decernere, sensus harumce propositionum non est, quod Senatus, cui Rex ipse praesit, vel Rex ipse, approbante Senatu, capitis sententiam ferre non possint, aut de bello & pace statuere: sed sensus est, quod Rex id potest sine Senatu, Senatus autem non potest sine Rege: Ita profecto quum Pontifices, quum Patres, quum Theologi docent, ad solum Pontificem pertinere, de fidei rebus judicare, fidei controversiis finem imponere, fidei regulam constituere; sensus non est, quod Concilium Oecumenicum, cui Pontifex per se ipsum vel per suos Legatos praesit, vel Pontifex ipse, sacro approbante Concilio, ista praestare non possint: sed quod ista non potest Concilium sine auctoritate Pontificis; potest autem Romanus Pontifex sine Concilii Oecumenici auctoritate. Qui sensus

sus apertissime patet in illis Florentinorum Patrum *adser-  
tionibus*, quas in Diaeta Moguntina Basileensibus propo-  
suerunt: *Summum Ecclesiae tribunal, & in terris su-  
preum iudicium apud Papam solum esse . . . qui omnia  
potest in terris. Et: Generale Concilium veluti arenam  
sterilem esse, nisi a Papa foecundetur.* Non enim negant  
Conciliorum generalium utilitatem atque auctoritatem;  
sed eam volunt, nullam esse, nisi a Pontifice velut a ca-  
pite ac fonte derivetur. Quo etiam sensu Archiepiscopus  
Tarentinus in Oratione habita pro Eugenio IV. coram iis-  
dem Basileensibus ad solum Romanum Pontificem retulit  
plenissimam & absolutam potestatem de rebus fidei decer-  
nendi; quod nimirum solus ipse vocatus sit in plenitudi-  
nem potestatis, ceteri autem in partem sollicitudinis; quod  
potestas & auctoritas per eum in alios diffundatur; quod  
solus potestatem clavium aliis communicandam accepe-  
rit (a): *Cui soli (Romano Pontifici) potestatem plenif-  
simam & absolutam tradidit ad omnia fidei mysteria  
exequendum, ut ad eum principaliter de gregis salute &  
directione, & fidei unitate ac integritate, dispositio, ju-  
diciū, ac sententia spectarent; & ut per eum ad alios  
hujusmodi Mysteriorum usus & auctoritas diffunderetur.*  
*Hinc primo Pastori ante Ascensionem suam Dominus  
dixit: Pafce oves meas. Et ante passionem suam: Tu ite-  
rum conversus confirma fratres tuos. Et illi soli promisit:  
Tibi dabo claves regni caelorum; ut ostenderetur (inquit  
beatus Doctor S. Thomas) quod potestas clavium per  
eum esset ad alios diffundenda usque ad saeculi finem,  
juxta illud Isaiae: „super solium David, & super re-  
„ gnum ejus sedebit, ut confirmet istud, & corroboret*  
in

---

(a) Append. I. Conc. Basil. cap. XLV.



in iudicio & iustitia, amodo & usque in sempiternum.

Neque ab hoc sensu abludit, aut longe abest in ipsis Concilii Viennensis convocationis litteris, quas nobis Bos. fuetius objicit, Clemens V. Sane, inquit, *Romana Ecclesia, mater alma fidelium, caput est, disponente Domino, Ecclesiarum aliarum omnium, & Magistra: a qua, veluti a primitivo fonte, ad singulas alias ejusdem fidei rivuli derivantur; ad cujus regimen voluit Christi clementia Romanum Pontificem vice sui deputare Ministrum, ut instructionem & doctrinam ipsius, eloquio veritatis Evangelicae traditam, cuncti renati fonte Baptismatis teneant, & conservent: ut qui sub hac doctrina cursum vitae recte peregerint, salvi fiant; qui vero ab ea devierint, condemnentur.* Si ab Ecclesia Romana velut a Matre omnium Ecclesiarum & Magistra, & velut a capite & fonte, in alias omnes Ecclesias fidei rivuli derivantur; palam est, quod eadem ratione, qua de rege vere atque jure dicitur, quod ad eum solum pertinet Regni negotia disponere, etsi aliquando quae majoris momenti sunt, non absque Senatus approbatione decernat; eadem, inquam, ratione vere atque jure de Romana Ecclesia & Sede Apostolica ab eodem Clemente dictum est, ad eam *dimittat horum*, hoc est fidei dogmatum, *declarationem pertinere*; etsi ad graviora Ecclesiae negotia pertractanda, generalem Synodum convocaverit, & quae tenenda essent, *sacro approbante Concilio*, decreverit. Quod nimirum quemadmodum juris dicendi & interpretandi auctoritas & potestas in inferiores Magistratus a Rege, velut a fonte promanat: ita ab Ecclesia Romana sacrorum dogmatum doctrina & instructio in alias omnes Ecclesias, velut a primitivo fonte rivuli derivantur. Non ignoramus qui-

dem, ejusmodi doctrinam hodie Parisiensibus Theologis improbari, & exosam esse; secus autem, ut alia in praesenti saecula omittam, eo temporis intervallo, de quo nunc agimus, & quod inter utrumque Clementem V. & VI. Romanos Pontifices intercessit. Florebat enim hoc aeo in Galliis Petrus Bertrandus (a) juris utriusque Professor in Academiis Avenionensi, Monspeliensi, Aurelianensi, & Parisiensi, Aniciensis Ecclesiae Decanus, deinde Johanna Reginae Francorum, & Burgundiae Comitissae Cancellarius, postea creatus Episcopus, primum Nivernensis, tum Aeduenensis anno 1325. demum S.R.E. Cardinalis a Johanne XXII. Pont. Max. renunciatus est die XX. Decembris anno 1331. quum ante biennium, die scilicet XV. Decembris anno 1329. jurisdictionem & libertatem Ecclesiae adversus Petrum de Cugneriis Regium Advocatum luculenta disputatione tuendo, coram Philippo Valesio Rege Christianissimo, de Religione praeclare meritus esset. Is igitur tantus Vir, & Ecclesiae Gallicanae ornamentum, Spiritualis potestatis originem ad regendam universalem Ecclesiam in Apostolorum Principe ejusque Successoribus collocabat, qui eam a Christo immediate habeant, per ipsos in ceteros derivandam: *Inter Christianos*, inquit (b), *necessaria est spiritualis potestas, quam Christus dedit Beato Petro, quando ei commisit regimen universalis Ecclesiae. Origo hujus potestatis immediate fuit a Deo, videlicet a Christo tradente eam certae Personae, scilicet Petro pro se, & suis Successoribus, a quibus derivatur in alios.*

Non igitur Episcopis, & Conciliis, potissimum genere-

---

(a) Nat. Alex. de Script. saec. XIV. art. IV.

(b) De Orig. Jurisd. quaest. II.

neralibus potestas adimitur judicandi de rebus fidei, quum dicitur, ad solum Romanum Pontificem pertinere dogmatum fidei declarationem: Id enim, ut ex Clementis VI. litteris discimus, de declaratione intelligitur, quae dubiis emergentibus circa fidem Catholicam, per determinationem authenticam, cui sit inviolabiliter adhaerendum, finem imponat. Quam certe auctoritatem, omnium sententia, singulares Episcopi non habent; quamcumque autem habent in Synodis seu particularibus, seu generalibus congregati, a Romano Pontifice mutuuntur, sine cujus auctoritate & adsensu finem quaestionibus de religione subortis imponere non possunt; quum ipse tamen etiam sine Synodis & aliorum adensione auctoritatem habeat ad eas judicio irretractabili terminandas. Sed de hac re juxta veterem & constantem superiorum saeculorum traditionem sequenti libro cum Meldensi Episcopo uberius ac data opera differemus. Haec enim in praesentia satis esse videntur, ad Clementis V. in Concilio Viennensi propositionem, ex horumce temporum, in quibus versamur, doctrina illustrandam, & ab Adversariorum insultibus ac ludibriis, quibus male vexatur, ac misere detorquetur, vindicandam.

## C A P U T   X X X I X.

„ Lateranensis Synodus sub Julio II. ex ea Conciliorum necessitas, & auctoritas .

**C**onciliorum necessitatem, seu potius utilitatem; atque auctoritatem luculenta oratione demonstrare aggressus est, & oratorio stylo, quo plurimum valebat,

extulit atque exaggeravit, sessione prima Concilii Aegidius Viterbiensis Augustiniani Ordinis Generalis. Ex ea Oratione quasdam lacinias adfert Illustrissimus Adversarius; additque & animadvertit, quod „ ceteri qui in eadem Synodo perorarunt, dispari eloquentia, eodem „ fere sensu (*unum tamen excipit Cajetanum*) Concilia nec-  
 „ laria demonstrarunt. Ex horumce itaque Orationum uno, & ex aliis hujusce Synodi monumentis demonstramus, quo pacto tanta Conciliorum necessitas & auctoritas, cum suprema Romani Pontificis auctoritate consistere & conciliari valeat.

## ARTICULUS UNICUS.

*Ex Quinti Concilii Lateranensis Actis ostenditur, supremam Romani Pontificis auctoritatem cum Conciliorum Generalium, quaecumque ea sit, necessitate & auctoritate, optime cohaerere.*

**C**hristophorus Marcellus Oratione habita Sessione quarta Concilii, qua de munere & officio Principis disserit, eam esse significat Conciliorum necessitatem in Ecclesia, cujusmodi Consiliariorum in Regno; quorum consiliis atque sententia in statuendis legibus rebusque aliis agendis, sic Princeps indiget, utiturque, ut nihil inde ipsi auctoritatis depereat: quum leges atque jura ex suprema Principis voluntate ac potestate dimanent, eoque auctore vim habeant, ac firma consistant; *At quoniam quandoque non est ea Regis prudentia, quae universos valeat supplere defectus . . . . plurium consilio in statuendis legi-*

legibus, aliisque rebus agendis, utatur necesse est. Ita namque multorum sententia confirmata magis, & laudabilior & gravior & acceptior cunctis efficitur: Quae praecipuae rationes sunt, quibus Conciliorum necessitas suaderi solet: Neque inde, subjungit laudatus Orator, Principi auctoritatis quidquam adimitur, sed ejus virtus, probitas, sanctitas amplius elucescit. Quae generatim disputata ad Conciliorum necessitatem, ac Pontificis potestatem declarandam, paucis interpositis, transfert: Quocirca toties frequentissimae Synodi, & Oecumenica, ex toto fere terrarum orbe convocatis Patribus; sunt hinc inde celebrata Concilia, sanctissimae confirmatae leges, institutiones mutatae, haereses abjectae, castigati errores, difficultates solutae, veritas probata, seditiones extinctae, concordia restituta, una monstrata fides, una religio, unus Princeps, qui summam in terris habeat potestatem. Hunc Principem in Ecclesia haud alium esse, quam Romanum Pontificem, cujus haec omnia suprema auctoritate fandienda sint, & cui proinde ex Conciliorum convocatione ac necessitate nihil auctoritatis adimitur, sequentibus verbis aperte luculenterque demonstrat: Quum igitur tantae Reipublicae unicus atque supremus Princeps fueris institutus, beatissime Pontifex, cui summa data potestas, ac divinum injunctum Imperium; tuum est, quemadmodum oppressam armis erexisti, amplificasti; ita moribus depravatam Ecclesiam reformare, corrigere, illustrare. Et infra: Ad hoc enim is tibi a Deo concessus est principatus, & totius Christianae Reipublicae dignitas, salus, vita, libertas, omniaque fortunae bona, tuae sapientiae & potestati sunt credita. Ad hoc Lateranense Concilium convocasti &c. Quibus ille ver-

bis

bis tum Conciliorum necessitatem & utilitatem adstruit, tum supremam nullique subjectam, & quae summum totius Ecclesiae & Christianae Reipublicae Principem decet, Romani Pontificis potestatem auctoritatemque tuetur.

Summum hunc Romani Pontificis Sedisque Apostolicae in Ecclesia Catholica principatum, ac supremam auctoritatem, unde omnia Ecclesiae jura, leges, sanctionesque dimanent, disertis conceptisque verbis agnoscit ac profitetur, Rex Christianissimus Ludovicus XI. in suis ad Pium II. litteris pro Pragmaticae Sanctionis abrogatione, quae Sessione IV. Concilii lectae sunt; & quibus piissimus Rex praedictam Sanctionem, tanquam supremo Romani Pontificis in Ecclesia Catholica principatui summaeque auctoritati infensam, a se abrogari declarat: *Omnibus itaque victimis potiore obediuntiam intelligentes; assensum sumus his, quae tuo nomine nobis aperta sunt; ipsam scilicet Pragmaticam Sanctionem Tibi, tuaeque Sedi esse infensam.....* & dum Tibi, A QUO SACRAE

LEGES ORIUNTUR ET MANANT, quantamlibet eripit auctoritatem, OMNE JUS ET OMNEM LEGEM DISSOLVIT. Illud enim exoritur, quod idem Consiliarius nomine tuae Sanctitatis adstruxit, ut dum per Pragmaticam Sanctionem ipsam summa in Ecclesia tuae sanctitatis auctoritas minuitur; dum Praelatis in Regno nostro quoddam licentiae templum praestruitur; dum congruens unitas ad alia regna conformitasque tolli videtur; abroganda sit ipsa pragmatica sanctio, tollendaque a Regno nostro, quippe quae adversus tuam Sedem, omnium Ecclesiarum matrem, ab inferioribus Praelatis lata sit, tanquam, ut Scriptura loquitur, Quomodo si elevetur virga contra le-

van-

vantem se, aut baculus, qui utique lignum est. Quae quidem, beatissime Pater, licet plerique docti homines confutare niterentur atque diluere, multaque nos debortarentur abrogare sanctionem ipsam; te tamen Principem totius Ecclesiae, te Antistitem Sacrorum, te Dominicū gregis pastorem profitemur & scimus, teque jubentem sequimur, tibi & Beatissimi Petri Cathedrae consentimus & jungimur. Et infra: Utere deinceps in Regno nostro potestate tua, ut voles, atque illam exerce. Nam ut hominum membra nulla contentione capite uno, atque una mente ducuntur; sic tuis sacris decretis Ecclesiae Praelati in Regno nostro & Delphinatu consonantiam & obedientiam plenam refundent. Quod si forte obnitentur aliqui aut reclamabunt, nos in verbo Regio pollicemur tuae Beatitudini, atque promittimus exsequi facere tua mandata, omni appellationis aut oppositionis obstaculo prorsus excluso; eosque, qui tibi contumaces fuerint, pro tuo jussu comprimemus & refraenabimus.

Consona iis sunt, quae pro ejusdem Pragmaticae Sanctionis abrogatione in eadem Lateranensi Synodo Leo X. provide animadvertit. Nam quemadmodum Rex Christianissimus, omnes sacras leges, & jus omne Ecclesiae a Romano Pontifice oriri ac manare docet; & ab eo omnes Ecclesiae Gallicanae Praelatos, velut ab uno Capite & una mente corporis membra, duci & gubernari vult: ita Leo universas Ecclesiae dignitates ab Ecclesia Romana tanquam rivulos a perenni fonte derivat, atque eidem tanquam membra capiti obsequi vult, omniaque ex ejus placito ac voluntate peragere (a): Primitiva illa Ecclesia in angulari petra a Salvatore nostro Jesu Christo fundata,

(a) Session. XI. in Bulla, quae incip. Primitiva &c.

data, Apostolorum praeconiis elata, Martyrumque sanguine consecrata & aucta, ubi primum iuvante Domino per orbem terrarum lacertos movere coepit, provide attendens, quantum oneris bumeris impositum haberet; quot oves pascere, quot custodire, ad quot etiam remotissima loca oculos intendere oporteret; divino quodam consilio Parochias instituit, Dioeceses distinxit, Episcopos creavit, & Metropolitanos praefecit, ut tanquam membra capiti obsequentia, cuncta secundum ejus voluntatem salubriter in Domino, & tanquam rivuli a perenni fonte, Romana videlicet Ecclesia, derivantes, ne angulum quidem Dominici agri irrigatum dimitterent; Deinde, quemadmodum Rex Christianissimus in superioribus litteris Romano Pontifici in universa Ecclesia summum adserit principatum; ita Leo in eadem Lateranensi Synodo eidem Romano Pontifici super omnia Concilia plenam & absolutissimam vindicat potestatem; sine qua profecto, ut alibi ostendimus, consistere proprie non potest summus ille super universam Ecclesiam Catholicam principatus; quo videlicet universum Ecclesiae corpus Romano Pontifici tanquam capiti cohaereat, ab eoque tanquam capite & mente ducatur, & ex quo reliquae Ecclesiae dignitates tanquam rivuli a fonte dimanent (a): Solum Romanum Pontificem pro tempore existentem, tanquam auctoritatem super omnia Concilia habentem, tam Conciliorum indicendorum, transferendorum, ac dissolvendorum plenum jus & potestatem habere; nedum ex sacrae Scripturae testimonio, dictis Sanctorum Patrum, ac aliorum Romanorum Pontificum, etiam Praedecessorum nostrorum, sacrorumque Canonum decretis; sed

---

(a) Bull. quae incip. *Pastor aeternus* Sess. XI.



*sed etiam propria eorumdem Conciliorum confessione manifeste constet.* Haec Leo, *sacro approbante Concilio;* Leo, inquam, qui perinde atque Julius, a quo primum Lateranensis haec Synodus indicta est, Conciliorum utilitatem, & quamdam, si ita libet, necessitatem perspectam habens, statim atque in ejus demortui locum successus est, eandem Synodum *ad Ecclesiae unitatem & exaltationem, ac fidelium omnium profectum* prorogari voluit *usque ad perfectionem caussarum,* quae ad illam indicendam Julii II. animum excitaverant. Adeo Leoni, adeo universo Concilio; e cujus coetu tot Patres pro Conciliorum necessitate luculentissime, ipsoque praesente Pontifice perorarunt; adeo, inquam, Leoni & universo Concilio; quo approbante, Romani Pontificis super omnia Concilia potestas & auctoritas praedicata est; persuasum erat, summam & absolutam, & cujusmodi a nobis defenditur, super Oecumenicas Synodos potestatem, & nulli omnino subjectam auctoritatem, cum Conciliorum utilitate, & quantalibet necessitate, & auctoritate optime cohaerere, Quo omnis nostra disputatio colimabat.



## CAPUT XL

- „ Post Lutheranam pestem , Concilii generalis  
„ habendi necessitas ab omnibus , atque  
„ adeo a Romanis Pontificibus , agno-  
„ scitur : Ea re Concilium Tri-  
„ dentinum convocatur .

**S**aepius observatum est , quum nihil aliud Adversario ex Conciliorum actis occurrit , quod ejus opinioni iutragari videatur , ad eum ipsum confugere consuetum & communem locum , ex quo illum toties dejecimus , de Conciliorum necessitate . Quod etiam unicum argumentum , quum alia omnino deessent , ex Tridentina Synodo profert . Nos autem illud eadem , qua saepius in praesenti libro usi sumus , methodo refellemus . Nam 1. ostendimus , Tridentinae Synodi Patres , qui Concilii necessitatem apertius praedicaunt , eam , quam nos propugnamus , de Romani Pontificis auctoritate sententiam tenuisse . 2. Si ex Concilii celebratione jure colligitur , obnoxias esse retractationi Romanorum Pontificum dogmaticas definitiones , inde consequens esse , nec eas esse irretractabiles , in quas Episcoporum maxima pars , ac fere universa Ecclesia consentit . 3. Imo nec eas esse certas & irreformabiles fidei regulas , quae Conciliorum generalium auctoritate constitutae sunt .

## ARTICULUS UNICUS.

*Ex Conciliorum generalium necessitate ac celebratione aut nostram sententiam minime labefactari; aut eodem telo ipsam quoque appeti Ecclesiae Catholicae, & ipsorum Conciliorum generalium auctoritatem.*

**Q**UOD primum proposui, innumeris possem Patrum ac Theologorum, qui Tridentinae Synodo interfuerunt, testimoniis confirmare; nempe quaecumque sit illa Conciliorum generalium utilitas aut necessitas, quam agnoverunt & praedicarunt; cum ea tamen nostram consociasse doctrinam de summa & irretractabili Romanorum Pontificum in definiendis fidei controversiis auctoritate. At ne in eorum recensendis testimoniis, quae omnium oculis patent atque exposita sunt, nimius existam, unum dumtaxat adferam, quod ob viri praestantiam, eruditionem, & auctoritatem plurimorum instar haberi poterit. Is est Reginaldus Polus, doctrina, pietate, rebusque pro Catholica Religione gestis, non minus quam Purpura Eminentissimus. Tractatum in hac ipsa Synodo edidit *de Concilio*, quem ipse Legatorum unus aliis duobus Cardinalibus Johanni Mariae de Monte, & Marcello Cervino suis in eadem Pontificia ad Synodum Legatione Collegis obtulit; in quo vir maximus totus est, ut supremam, & indeficientem, nullique subditam generali Concilio Romani Pontificis auctoritatem tueatur; ut penae integrum tractatum describere oporteret, qui omnia

vellet loca producere, quae huic dogmati apertissime suffragantur: Quare unum tantum aut alterum locum transcribam. Quæst. XXXVI. quum antea Personas, quae ut plurimum Conciliis interfunt, & Hierosolymitanae de Legalibus Synodo interfuerunt, in quatuor genera distribuisset; quaerit: *Quid vero tandem in persona Petri videmus, quod in reliquis non videamus?* Respondet: *Hoc sane primum, quod proprium est ejus, qui primas partes in Conciliis tenet, UT FINEM IMPONAT CONTROVERSIIS, EASQUE DIRIMAT, ut concludat, & auctoritate sua dimittat Concilium.* Et infra: *Quum autem haec in persona Petri videmus, omnium eorum, qui in Petri Cathedra successerunt, partes in Conciliis videmus; quae maxime in hoc exstare debent, ut controversias dirimant, ut gravitatem oneris a populi Dei cervicibus detrahant, & ut Concilium dimittant, omniaque auctoritate Petrae fidei, in fundamento Ecclesiae positae, faciant.* Et Quæstione LXXXIII. quum Ecclesiae reformationem ab ipso Capite inchoandam esse, antea dixisset, quaerit: *Quid tandem istuc est quod ais? An hoc ipse suades? An probas? An tanquam remedium opportunum tot malis, quibus Ecclesia est oppressa, proponis, ut summus Pontifex, Vicarius Christi, summi Sacerdotis partes agens, qui in omnibus Conciliis tanquam Judex corrigendis aliorum erroribus praeesse solet, in hoc Concilio se reum.... faciat; & judicio aliorum se subjiciat?* Respondet: *Non hoc ego quidem suadeo, ut Pontifex judicio subjiciatur Concilii inquirentis eum, neque ullo pacto id probo; at nec cuiusvis alterius: Verum, ut sui ipsius judicio subjiciatur, hoc maxime opto, atque ut etiam in hoc judicio se ipsum condemnet. Quod ergo habet commune effectum*

tot

tot Patrum & Conciliorum auctoritate firmatum, quod Romanus Pontifex, quod prima Sedes a nemine judicatur, etiam de Concilio Oecumenico doctissimus ac celeberrimus Cardinalis intelligit. Nec tamen quum tanta Pontifici Romano tribueret; nimirum ut controversias dirimat, ut eis finem imponat, ut tanquam Judex aliorum in Concilio sedeat, ipse a nemine judicandus, propterea Conciliorum generalium utilitatem ac necessitatem aut non agnovit aut minus dilucide praedicavit. Quaestione LXXIX. quaerit: *Quidnam est, quod materiam & causam dedit bujus Concilii (Tridentini) quod nunc indictum est, convocandi?* Respondet: *Haud simplex causa fuit sed varia & multiplex; quae tamen tribus illis capitibus, quasi terminis, quibus jam ab aliquot saeculis omnis materia Conciliorum circumscribi solet, satis qualis sit, explicatur. Quorum primum est, quod ad explicationem fidei dogmatum, & ad haeresum extirpationem pertinet: Secundum, quod ad collapsam morum disciplinam restituendam: Tertium, quod ad confirmandam pacem domesticam inter Principes Christianos spectat, ut externo hosti infideli, Reipublicae Christianae perpetuo insidianti, facilius resisti possit. Haec ergo in summa bujus Concilii nunc indicti materia dici potest: quae eo quidem amplior est, quo magis corrupta est morum disciplina; quo perniciosiora sunt intestinorum bellorum semina; quo denique potentior est ac paratior externus hostis ad invadendas Christianorum Provincias...* Atque eo quidem haec necessitatem imponunt gravissimam cogendi Concilii generalis, & difficiliorem reddunt de excogitandis remediis deliberationem. Itaque doctissimi Cardinalis judicio Romani Pontificis ad finiendas fidei

con-

controversias indeficiens auctoritas consistere potest cum *gravissima habendi generalis Concilii necessitate*.

Nunc ad alterum demonstrandum accedamus, quod supra propositum est; nimirum ipsas quoque Romanorum Pontificum dogmaticas Constitutiones, quibus Ecclesiae consensus accessit, non fore irretractabiles fidei Catholicae regulas, si argumento, quod ex Concilii Tridentini necessitate Adversarius ducit, quidquam inesset ponderis ac momenti. Nam nefaria Lutheri dogmata non solus Romanus Pontifex, verum & universa Ecclesia tanquam haeretica detestabatur; ac proinde non unius Romani Pontificis, sed Ecclesiae Catholicae iudicium fuisset tanquam dubium, aut nondum satis firmum in Tridentina Synodo retractatum. Quod sequentibus Cl. Thomassini observationibus demonstramus (a): Lutherum ita Leonis X. censura prostravit, ut Ecclesiae universalis auctoritas Pontificiae individuis nexibus copulata ostenderetur. Ait enim Leo: *Exsurgat denique omnis coetus Sanctorum, ac reliqua universalis Ecclesia &c.* Ita ille quum Petrum & Paulum antea compellasset. Laudat mox Colonensem & Lovanensem Universitates, quae istiusmodi errores jam inurere praeceperant. Nec omit- tam, quod inter Lutheri deliramenta Pontificio hoc diplomate contrita, istud quoque legitur: *Si Papa cum magna parte Ecclesiae sic vel sic sentiret, nec etiam erraret: adhuc non est peccatum, aut haeresis, contrarium sentire: Praesertim in re non necessaria ad salutem, donec fuerit per Concilium universale alterum reprobatum, alterum approbatum.* Quod delirium vides quantis hinc argumentis exsufflaverimus. Sed ut Pontifices, ita haereticos Prae-  
ccf-

---

(a) Dissert. XII. in Conc. Chal. num. XXVII. & seqq.

cessorum suorum fuisse imitatores, ex alia, quae statim ibi subjicitur, & feritur, Lutheri vecordia patebit: *Via nobis facta est enarrandi auctoritatem Conciliorum, & libere contradicendi eorum gestis, & judicandi eorum decreta, & confidenter confitendi quidquid verum videtur, siue probatum fuerit, siue reprobatum a quocumque Concilio.* Inolitum ergo haereticis est, Concilii obtentu decreta Pontificia ludificare; & ipsa mox Concilia de ridiculo habere. Usque adeo qui Pontificum anterioribus definitionibus illuserant, Concilia Oecumenica flocci fecere semper. Ut inde magis eluceat, non necesse fuisse plerumque coire Concilia: & ubi coaluere, indulgenter id datum, ut vel sic causationibus Adversariorum occurreretur. Denique summam errorum Lutheri hanc esse Leo concludit, quod inde sequeretur, *Ecclesiam, quae Spiritu Sancto regitur, errare, & semper errasse.* Suam ergo & Ecclesiae auctoritatem indivulsa cohaerere sentit. Hadrianus VI. similiter in Brevi ad Fredericum Saxoniae Ducem objurgat acerrime plus credentes uni homuncioni, quam tot Sanctissimis ab initio Patribus, tot universalibus Conciliis, sanctae denique Ecclesiae Catholicae &c. quam reliquo orbi universo &c. *Unus Apostata tibi potuit persuadere, fefellisse priores universos, errare posteros, & in solum se, & quos decepit, pervenisse regnum Dei?* Universalis, ut patet, Ecclesiae inexpugnabilem auctoritatem ubique intentat Pontifex, ut cujus consensus vicem gerat Concilii generalis. Nec aliter Concilium Senonense anno 1528. quum sola Pontificum diplomata haecenus detonuissent, fidenter Ecclesiae universae consensionem, ut veritatis faciem inextinctam novellis haereticis objectat. Nempe Pontificio decreto assentiente Ec-

cle-

clesia, stultum est praeterea Concilium generale expetere. haereticos, qui in Ecclesiae universalis consensu inesse Concilii vim perspicere debuerant: *Voluit Deus, tantam esse Ecclesiae suae stabilitatem & potestatem, ut per eam veluti per infallibilem quamdam regulam, ad salutem mortales dirigerentur &c.* Et infra: *Quasi vero magis sit paucis iisdemque temerariis errorum satoribus credendum, quam omnibus Doctoribus, Sanctis Martyribus, Academicis, Episcopis, Summis Pontificibus, generalibus Conciliis; quo stultius dici nil potest aut furiosius.* Quae in eo Concilio sexcenties ingeminantur contra serpentem Lutheri perfidiam, quum necdum de Concilio generali quidquam sonaret, quum sola Pontificum decreta irradiassent orbi, & Christianae Ecclesiae silentio velut indubitato assensu confirmata, vicem Concilii oecumenici obtinerent in antecessum.

Sed audiendus & Paulus III. in Bulla indictionis Concilii Tridentini: *Animo repetentes, majores nostros, sapientia admirabili & sanctitate praeditos, saepe in summis Christianae Reipublicae periculis, remedium optimum atque opportunissimum, Oecumenica Concilia, & Episcoporum generales conventus adhibuisse: ipsi quoque animum ad generale habendum Concilium adjecimus.* At infra quo fine Concilium post diplomata primae Sedis; habendum sit, ita declarat: *Quum peteretur a nobis, ut ab Ecclesia dissentientium quosdam articulos tolerandos declararemus, quoad per Oecumenicum Concilium illi excuterentur, & deciderentur: idque nobis, ut concederemus, neque Christiana & Catholica veritas, neque nostra, & Sedis Apostolicae dignitas permetteret; palam potius Concilium ut quamprimum fieret, mandavimus.*

Et





rum, quod nec ipsae generalium Synodorum de aliquo fidei dogmate definitiones habendae essent tanquam certissimae & ineluctabilis auctoritatis regulae, si quod saepius Adversarius inculcat, quidquam valeret argumentum, paucis demonstro ex iis, quae sessione IV. Concilii disputata sunt, quum de condendo aut confirmando sacrorum librorum Canone ageretur. Nam in privatis coetibus disceptatum fuit, an per novum examen fieri deberet sacrorum utriusque Testamenti librorum comprobatio. Cardinalis a Monte Legatus, Cardinalis Paccus, & alii, novum examen repudiabant, res a prioribus Conciliis definitas retractandas non esse adfirmantes, secundum S. Leonis, & Gelasii I. Summorum Pontificum documentum: nec praebendam esse Lutheranis occasionem gloriandi; quod suis argumentationibus suspectas falsitatis superiorum Conciliorum definitiones Catholicis reddidissent: Cervinus Cardinalis S. Crucis, & Polus Cardinalis, & alii, novam discussionem postulabant, non ad quaerendam, de qua nemo Catholicorum dubitabat, sed ad confirmandam, & tuendam ab Haereticorum objectionibus veritatem. Existimationis enim plurimum Concilii decretis accessurum censebant, ubi universae nationes audirent, Haereticorum rationes ab eo discussas & confutatas. Alioquin eam, quam Patres appellarent venerationem antiquitatis, ab aliis vocatum iri responsionis inscientiam, aut propriae imbecillitatis haud obscuram confessionem. Vicit posterior ista sententia. Haec ex Cardinali Pallavicino lib. VI. Hist. Conc. Trid. cap. XI. Nat. Alex. Dissert. XII. in Hist. Eccles. saec. XV. & XVI. Artic. II. Itaque inita est discussionis via, qua, si quidquam valet, quod saepius Meldensis Episcopus urget argumentum,

non

non modo Romanorum Pontificum, verum & generalium Synodorum auctoritas labefactatur. Nam harum perinde atque illorum definitiones Synodi retractationi & examini permittuntur. Si autem datur discussio & examen; ut reipsa dari primum plurimi, deinde universa Synodus sensit; quae non ad quaerendam, de qua nemo Catholicorum dubitet, sed ad confirmandam, & tuendam ab Haereticorum objectionibus veritatem, dirigantur; jam omnia concidant necesse est, quae toto hoc libro adversus summam & ineluctabilem Romanorum Pontificum auctoritatem, ex actis Conciliorum Adversarius congeffit argumenta.

## FINIS LIBRI PRIMI.





# LIBER SECUNDUS

Q U O

## MELDENSIS EPISCOPI

LIBER DECIMUSTERTIUS

*Examinatur & confutatur.*



U T U S C E Libri argumentum paucis hisce  
verbis Meldensis Episcopus complectitur :  
„ Solvuntur objectiones quaedam , ac  
„ praesertim illa , quae ex Conciliorum  
„ confirmatione petitur , ad idem Caput  
„ quartum Gallicanae declarationis .

Objectiones , quas Illustrissimus Auctor solvere hoc  
Libro aggreditur , nos pro virili parte tueri & confirmare  
conabimur , atque illam imprimis , quae pro Sedis Apo-  
stolicae indeclinabili auctoritate ex Conciliorum confir-  
matione confurgit .

CA-

## CAPUT PRIMUM.

- „ Objectio de confirmatis a Romano Pontifice  
„ Synodis generalibus proponitur; dissol-  
„ vendae hujus ratio atque  
„ ordo explicatur.



NIHIL in hoc Capite specialiter notandum occurrit. Aliquot pro Sedis Apostolicae summa & indeclinabili auctoritate argumenta eleganter Illustrissimus Adversarius proponit. Nos ea validissima judicamus; ipse autem infirmissima, & nullius roboris ac momenti. Uter sanius ac melius judicet, ex sequenti disputatione constabit.

## CAPUT II.

- „ Quid sit confirmare Ecclesiastico stylo, & quid  
„ autoritatis invehat: Confirmari decreta non  
„ modo ab aequalibus; sed etiam ab inferioribus  
„ passim. Tum speciatim explicatum,  
„ non modo a Romanis Pontificibus Conciliaria  
„ Decreta, sed & a Conciliis etiam particularibus  
„ Romanorum Pontificum decretis confirmari.

SI qui sunt Theologi, qui ex simplici confirmationis vocabulo probari judicent, superiorem esse quibuscumque Conciliis adeoque indeclinabilem ac prorsus ineluctabilem Romani Pontificis auctoritatem, eos in praesenti

senti Capite egregie Adversarius refellit . Fatemur enim , quod res est , aequivocum esse confirmationis nomen , pluresque huic voci subjectas esse notiones . At quemadmodum confirmationem agnoscimus , unde confirmantis superior & major auctoritas non probatur ; ita esse aliquem confirmandi modum contendimus , qui in confirmante demonstret superiorem & indeclinabilem potestatem . Esse autem ejusmodi , quem Romani Pontifices Conciliis etiam Oecumenicis impenderunt ; eoque proinde recte probari summam , & ipsis etiam Conciliis Oecumenicis superiorem , Romanorum Pontificum auctoritatem . His autem tribus vis nostrae probationis continetur .

1. Concilia ex quolibet Episcoporum numero , & quamlibet ex omnibus fere orbis terrae partibus congregata , & sine Romani Pontificis aut praecedente , aut comitante , aut subsequente consensu & approbatione celebrata , irrita ac nullius auctoritatis futura , aut saltem nunquam adeptura summam & irretractabilem firmitatem .

2. Conciliorum quamlibet generalium & Oecumenicorum gesta atque decreta , a Romano Pontifice minime confirmata , irrita & nullius roboris judicata fuisse : valitura tamen , si eis accessisset ipsius Romani Pontificis confirmatio .

3. Synodos Nationales ac Regionales , imo & locales & particulares , & ex quamlibet exiguo Episcoporum numero conflatas , & a Romano Pontifice confirmatas ; in iis , quae ad fidem pertinent , summam obtinuisse & irreformabilem auctoritatem .

Ejusmodi ergo esse contendimus adhibitae a Romano Pontifice gestis ac decretis Synodorum confirmationis vim : ex eaque jure probari ac demonstrari credimus , superio-

periores esse quibuslibet etiam Oecumenicis Conciliis, adeoque omnino firmam, ac prorsus inexpugnabilem Romani Pontificis auctoritatem. Et horum quidem integra & lucidissima demonstratio ex iis, quae ad singula Capita dicenda sunt, emicabit. Verum antequam ad ea speciatim discutienda accedamus, generatim ostendendum est; quam diversi generis sit ea gestorum Synodali confirmatio, quae ex Romanorum Pontificum, & quae ex aliorum Episcoporum consensu derivatur.

## ARTICULUS UNICUS.

*Quam dispar sit ea confirmatio, quae a singulis seorsim Episcopis aut Synodis Provincialibus Conciliorum generalium aut Romanorum Pontificum decretis; & quae a Romanis Pontificibus Conciliorum gestis & Canonibus adhibetur. Hac porro recte probari, maiorem esse Romani Pontificis, quam Concilii Oecumenici auctoritatem.*

**N**on modo a Romanis Pontificibus, verum & a singulis seorsim Episcopis, vel ab eisdem in Synodis provincialibus congregatis suo quodam modo cum Romanorum Pontificum, tum generalium Conciliorum praesertim de fide decreta suis & subscriptionibus & confessionibus confirmari; praeter ea, quae Illustrissimus Auctor in praesenti Capite adfert, plura sunt apud Cl. Thomassinum (a), & alios, quae id egregie invicteque demonstrant. Chalcedonensem Synodum numero Episco-

po-

---

(a) Dissert. VI. in Synod. Constant. I.

porum, concordia, & auctoritate longe maximam, Leo tamen Imperator, ut libro superiori haud semel animadvertimus, omnium Orientis Episcoporum fecit subscriptionibus roborari. Exstantque ad Chalcedonenſis Concilii calcem Epistolae Metropolitanorum triginta septem cum ſuis Synodis ad confirmationem ipſius Chalcedonenſis Concilii conſpirantium. Quae ſane tot Episcoporum tam mirifica confirmatio inſtar habuit Synodi alterius, quam in confirmatione Synodi Chalcedonenſis Leo Auguſtus ante meditatſus fuerat, ut a Liberato in Breviario cap. XV. memoriae proditum eſt. Sextae Synodo ut auctoritatem ſuam adjungerent, rogati a Leone II. Papa Hiſpaniarum Episcopi, in Concilio Toletano XIV. teſtantur, geſta Synodi ab eis perlecta, pertractata, & adprobata fuiſſe: *Praefatas geſtorum regulas pertractandas ſuſcepimus, ſuſceptas perlegimus, approbantes in his . . . . reſti dogmatis ſenſum, inculpandae diſputationis ediſtum, Apoſtolicae traditionis ſtylum.* S. Johannes Chryſoſtomus vel ipſi Nicaenae Synodo robur quodammodo acceſſiſſe ex orbis univerſi conſenſione, his verbis haud obſcure ſignificat (a): *At tu non illos tantum condemnas Nicaenos Patres, ſed & orbem terrarum univerſum, qui illorum ſententiam comprobavit.* Quo ſenſu & S. Athanaſius aliiſque Patres ejuſdem Synodi Nicaenae decretis auctoritatem ex omnium pene per univerſum orbem Eccleſiarum conſpiratione conciliant.

Verum, ut idem Thomaffinus ſubjungit, quamquam univerſus orbis Chriſtianus, quamquam Provinciales Synodi ſejuſtim, quamquam ſingulares ſeorſim Episcopi generalium Synodorum acta approbare & confirmare

ut-

---

(a) Tom. V. Hom. LII. pag. 707.



utcumque perhibeantur, quando assentiuntur & subscribunt: non infringitur tamen singulare Petri, & Apostolicae Sedis in confirmandis Synodis privilegium. Quinimo majestas & praerogativa capitis ex membrorum praecllentia exaggeratur. Nam si membris, pro suo cuique gradu, sua est tamen vis, suumque pondus in consentiendo: quanto major & longe maxima ejus est auctoritas, qui *Princeps in Episcopatu fidei* est, qui Caput, qui Occidentales omnes maxime Episcopos, strictius sibi devinctos, suo nutu circumagebat, sibi semper consentaneos, & secum gestae in Oriente Synodo vel consentientes, vel dissentientes?

Ut autem melius & apertius percipiatur, qua in re positum sit illud discrimen, quod inter confirmationem, quae ex Episcoporum, & quae ex Romani Pontificis approbatione confurgit; juvabit ea imprimis prae oculis habere, quae idem Auctor de subscriptionibus Episcoporum adjungit: Et quidem, inquit, si non cortici rerum inhaereas, sed in ipsam introspicias medullam, non latebit, quo illae pertinuerint subscriptiones Episcoporum, post quartam, quintam, sextamque Synodos corrogatae. An Chalcedonensis enim Synodus, a Leone Papa confirmata, Occidenti Orientique universo approbata, in suspensio tamen adhuc per aliquot annos fuit, donec Leo Imperator Orientalium Episcoporum novis sejunctim subscriptionibus confirmari curaret? Cui nisi vehementer insano tam delira in mentem venirent? Quae enim posthac Synodus Oecumenica non nutabit, si retractari a posteris, si novis semper suffragiorum corrogationibus confirmari indigeat? Idem de sexta Synodo, & aliis id genus pronuntiandum. Ergo peractae semel Synodo ceteri per orbem Episcopi

suae magis confessionis, quam approbationis vel confirmationis testimonium subscribebant. Id liquet ex verbis Metropolitanorum Chalcedonensi postea Synodo succipientium, quae supra ex Facundo retulimus. Profitentur enim, quod universaliter valet in omnes receptas semel in auctoritatem Synodos; nihil iis vel addi, vel demi posse; nihil ibi constitutorum retractari debere. Item patet ex Epistola Martini Papae I. ad Episc. Gall. post Monotheticam haeresin Romana in Synodo *Apostolico mucrone*, *Patrumque definitionibus*, uno ore unoque spiritu condemnata. Idcirco studeat fraternitas tua omnibus eadem innotescere, ut tam abominandam haeresim nobiscum exsecrentur, & Synodali conventionem scripta una cum subscriptionibus vestris, nobismet destinanda concelebrent, confirmantes atque consentientes eis, quae pro orthodoxa fide statuta sunt. Subscribi, & subscribendo confirmari hortatur Lateranensis Synodi statuta, sed citra novum examen. Id magis liquebit ex Leonis II. Epistola II. ad Episcopos Hispaniae, quos sextae Synodo hortatur subscribere, ut sibi consulant, non Synodo: *Ab omnibus reverendis Episcopis una vobiscum subscriptiones in eadem definitione venerandi Concilii subnectantur, ac sit profecto in libro vitae properans unusquisque Christi Ecclesiarum Antistes suum nomen adscribere; ut in unius Evangelicae fidei consonantia, nobiscum, & cum universalis Sancta Synodo per suae subscriptionis confessionem, tamquam praesens spiritu conveniat: quatenus Christo quum ad iudicandum venerit, cum titulo orthodoxae confessionis occurrens, consortem se traditionis Apostolicae per manus suae demonstret signaculum. Quamquam ergo Hispaniarum Episcopi supra dixerint, gesta sextae*

Sy-

Syno di nostri vigoris auctoritate suffulciri, & postea approbari; sed Leo tamen iterum iterumque ab iis non postularat, nisi suae subscriptionis confessionem, titulum orthodoxae confessionis, non ut novo auctoritatis pondere Synodum quasi alioqui vacillantem sustentaret: sed ut ipsi in libro vitae scribi, & consortes se traditionis Apostolicae per manus suae signaculum demonstrare properarent. Et infra idem Leo: Quum vestrarum subscriptionum paginas susceperimus, has apud Beati Petri Apostolorum Principis Confessionem deponemus, ut eo mediante atque intercedente, a quo Christianae fidei descendit vera traditio, offeratur Domino nostro Jesu Christo, ad testimonium & gloriam ejus mysterium fideliter consentientium ac subscribentium. Audin, non approbantium, aut confirmantium, sed consentientium ac subscribentium testimonium? Et rursus, ut ad quartam Synodum redeam, accipe quae Evagrius scribit lib. II. cap. IX. & X. Leonem Augustum non ad Episcopos tantum, sed & ad Monachos sanctitatis laude spectabiliores scripsisse, ac prae ceteris ad Simeonem Stylitam. Num etiam Monachis jus suppetit confirmandae Synodi? Sed quid rescribunt Episcopi? Decretis Chalcedonensis Concilii inhaesere, inquit. Quid Simeon? Ego abjectus, & vilis, & abortivus Monachorum, Imperatori significavi meum propositum circa fidem Chalcedonensem Patrum 630. inhaerescens & confirmatus ab ea fide &c. Inhaerere se & confirmari, non confirmare profitetur. Consule & Auctorem vitae Sancti Auxentii Abbatis, a quo similiter Marcianus confirmationem petiit Synodi Chalcedonensis. Haec Thomassinus de confirmatione Conciliorum generalium, quae ex Episcoporum subscriptionibus proficiscitur.

At longe aliter sentiendum esse de Confirmatione, quam eorundem Conciliorum gestis decretisque Romani Pontifices adhibent, idem pluribus demonstrat per octo priores Oecumenicas Synodos discurrendo, quae nos ad sequentia Capita proferemus. Interim aliquot generalibus testimoniis ostendimus, ex ea demum Romanorum Pontificum adprobatione & confirmatione habere generalium Synodorum Canones, ut omnino irretractabiles sint. Docet id perspicue Ferrandus Carthaginensis Ecclesiae Diaconus in Epistola ad Pelagium & Anatolium: *Universalia Concilia, praecipue illa, quibus Ecclesiae Romanae consensus accessit, secundae auctoritatis locum post Canonicos libros habent.* Et rursum: *Quae finiuntur judicantibus Episcopis sanctis, & ad Beati Petri memoriam perducta, diligentius examinantur, atque firman-  
tur, sequenda sunt, tenenda sunt, amplectenda sunt: in retractatione sub qualibet pietatis occasione teneri non debent.* Vides, inquit saepius laudatus Thomassinus, quam juridica, & auctoritatis summae insignibus ornata sit sententia Sedis Apostolicae, decreta Conciliorum generalium confirmantis; quandoquidem ea *diligentius examinat, & firmat*; & illud adjicit momentum, ex quo id consequuntur, ut deinceps irretractabilia sint. Denique idem Ferrandus infra: *Sufficere judicatur ad plenam confirmationem (universalium Conciliorum) si perducta ad notitiam totius Ecclesiae, nullum offendiculum moveant vel scandalum fratribus; sed Apostolicae fidei convenire firmentur Apostolicae Sedis roborata consensu.* Ubi consensum quidem totius Ecclesiae ad confirmationem generalium Conciliorum facere non abnuat; sed eo uno, quod nemo offendatur, nemo a vitae fidei ea obstrepere clami-

tetur:

ret: sed singulariter, & novo examinis atque auctoritatis pondere a Sede Apostolica confirmari.

Consona his sunt, quae Hincmarus observat lib. de Divort. Loth. & Theutber. p. 686. Tom. I. nempe, quod quemadmodum Synodus generalis, Provincialium Synodorum: ita generalium, Sedes Apostolica retractat, & vel irritat, vel confirmat judicia: *Quibus omnibus demonstratur, quia Synodus Comprovincialium Episcoporum judicia; generalis autem Synodus Comprovincialium dijudicationes, sive dissensiones vel probet, vel corrigat ... Apostolica vero Sedes & Comprovincialium & generalium retractet, refricet, vel confirmet judicia; sicut Epistolae Leonis, atque Gelasii, ceterorumque Romanorum Pontificum, & Sardicensis Synodus evidenter ostendunt. Et Episcoporum recte judicantium confirmatur, & secus judicantium corrigitur, & interim funditus non perit auctoritas.* Quae de ipsis etiam Oecumenicis Synodis esse intelligenda, patet ex iis, quas laudat, Leonis & Gelasii, ceterorumque Romanorum Pontificum Epistolis, quae, ut inferius, & ad sequentia Capita demonstrabitur, harum quoque Synodorum judicia Sedis Apostolicae examini & retractationi subjiciunt.

Concinnie Ratramnus lib. VI. adversus opposita Graecorum: *Siquidem omne Concilium, vel quod in Oriente, vel quod in Africa gestum esse dignoscitur; vel Romani Pontificis Vicarios semper habuit praesidentes, vel ejus auctoritate literarum, quae fuerunt decreta, firmitudinem acceperunt. Et mox: Et revera omnes Orientales Ecclesiae, simul & Occidentales, Romanae Ecclesiae Praesulem semper quasi caput Episcoporum veneratae sunt, & ad ejus sententiam respexerunt; & de rebus*

*bus dubiis quaecumque decrevit ejus judicium sustinuerunt, ipsiusque decreto paruerunt. Quaecumque Concilia ejus sententia roborata sunt, rata manserunt: quae vero damnavit, pro nihilo reputata fuerunt, nec auctoritatem ullam habere potuerunt.*

Neque ab his abludit Ratherius Veronensis Episcopus, qui sequenti saeculo floruit, in Itinerario, quum generatim docet, cuncta ad examen apud Sedem Apostolicam revocari; & quae proba sunt & genuina pietate constant, a reprobis & spuris ea auctoritate discerni, ut quaecumque alibi statuuntur, pro illius judicio ubique terrarum vel rata vel irrita judicentur: *Qua ignorantia quo melius exui, quo aptius possum quam Romae doceri? Quid enim de Ecclesiasticis dogmatibus alicubi scitur, quod Romae ignoretur? Illic summi illi totius orbis Doctores: Illic praestantiores enituerunt universalis Ecclesiae Principes: Illic decreta Pontificum universorum congregatio, examinatio Canonum, approbatio recipiendorum, reprobatio spernendorum. Postremo nusquam ratum, quod illic irritum; nusquam irritum, quod illic ratum. Ubinam ergo melius insipientiae consulitur meae, quam ubi fons sapientiae cernitur esse?*

Libet his addere duorum Romanorum Pontificum auctoritates: quibus, quae haecenus adlata sunt veterum Patrum ac Theologorum testimonia, egregie confirmantur. Gelasius Papa in Tomo de Anathem. *Totum, inquit, in Sedis Apostolicae positum est potestate. Ita quod firmiter in Synodo Sedes Apostolica, hoc robur obtinuit: quod refutarvit, habere non potuit firmitatem: & sola rescidit, quod praeter ordinem congregatio Synodica putaverat usurpandum.* Loquitur de Synodo Chalcedonen-  
si,

fi, cuius inter ceteras Oecumenicas est insignissima auctoritas. De hoc porro aliisque similibus Gelasii locis in sequentibus Capitibus differemus. Sanctus Nicolaus I. Epistola VII. ad Michaëlem Imperatorem Gelasio concinit, & quod ille de una Synodo Chalcedonensi, generatim de omnibus Oecumenicis Conciliis adfirmat: *Denique in universalibus Synodis quid ratum, vel quid prorsus acceptum, nisi quod Sedes Beati Petri probavit, (ut ipsi scitis) habetur? Sicut e converso quod ipsa sola reprobavit, hoc solummodo consistat haëtenus reprobatum.*

Haec itaque Romanorum Pontificum auctoritas est, quam omnibus Oecumenicis Conciliis superiorem esse adfirmamus, adeoque ineluctabilem, & nullius iudicio ac retractationi subjectam; ea nimirum, qua, ut ait Ferrandus, omnium Conciliorum acta diligentius examinantur atque firmanur; qua Sedes Apostolica, ut ait Hincmarus, omnium Synodorum retractat, refricat, vel confirmat iudicia; qua Conciliorum decreta, ut ait Ratramnus, aut robur & firmitudinem acceperunt, aut pro nihilo reputata sunt, & nullius prorsus auctoritatis; qua totum, ut ait Gelasius, in ejusdem Sedis Apostolicae potestate positum est; atque adeo ipsius iudicio jure debetur, ut nusquam ratum, quemadmodum ait Ratherius, quod Romae irritum sit; nusquam irritum, quod illic ratum: quod de Chalcedonensi Synodo idem Gelasius, de omnibus vero generalibus Conciliis Nicolaus I. adfirmant. Haec ergo nobis argumento sunt, Sedis Apostolicae generales Synodos confirmantis auctoritatem iis esse superiorem, ac proinde ipsius definitiones esse prorsus irretractabiles. Neque ad hujusce argumenti vim elevandam quidquam facit series illa testimoniorum, quibus Mel-

den-

denſis Epiſcopus probare in praefenti Capite aggreditur, etiam Romanorum Pontificum Conſtitutiones fuiſſe vel a particularibus, vel a generalibus Synodis confirmatas. Numquid enim vel particulares vel generales Synodi id ſibi jure aliquando vindicarunt, ut ipſarum judicio ſtarent aut caderent, rata vel irrita eſſent Romanorum Pontificum conſtituta? Imo, ut in ſuperiore libro apertiffime oſtenſum eſt, & laudatus Nicolaus Epiſt. IX. ad Michaëlem Imperatorem praeclare docet, non de illis Concilia Oecumenica, ſed juxta illa tanquam certiffimas & immobiles reſtitutionis formulas judicarunt; ac Sedis Apoſtolicae judicia Conciliorum judiciis veluti lampades ac nitidiſſima ſpecula praeluxerunt: *In Synodis priſco tempore collectis, Apoſtolicae Sedis ſcripta, non ſub occultationis modio tegebantur; ſed ut omnibus, qui in domo Dei erant, lucerent, in propatulo ponebantur; & ut ſi qua turpitudine, vel macula in fidei pulcritudine a quolibet tentaretur induci, facile pateſceret, ac ſi ſpecula in omnibus babebantur, & quaſi quaedam reſtitutionis formula, qua imprimi ceteri poſſent, poſita colebantur.* Quod ſtatim Concilii Ephefini & Chalcedonenſis praeclaro exemplo demonſtrat. Romani vero Pontifices, ubi ad ipſos Conciliorum acta atque decreta ipſorum ſuffragio & auctoritate roboranda deferrebantur, non ante illis ſuum calculum & approbationem adjiciebant, quam illa expendiſſent, an cum Apoſtolicis litteris convenirent. Hinc illud pervulgatum & commune veterum eſſatum, de cujus ſenſu ad lib. XV. diſſeremus, quod Sedes Apoſtolica de omnibus judicat, de illius autem judicio nemini fas eſt judicare. Quod idem S. Nicolaus Epiſt. VIII. ad eundem Imperatorem inculcat, & praeclaris ſuorum Praedeceſſorum



rum Gelasii & Bonifacii testimoniis confirmat. Alius itaque generis & rationis confirmatio illa est, quam reliquae Synodi vel Ecclesiae aut Conciliorum generalium aut Romanorum Pontificum decretis, consensum illis & obedientiam exhibendo, praestabant; & quam eorundem Conciliorum actis auctoritate sua Romani Pontifices adjungebant. Nam, ut ex Hincmaro Thomassinus ostendit (a), Nicaena statuta antiquitatis usus, hoc est, consensus & consuetudo Ecclesiarum, mores suos illis coaptantium, & Romani Pontifices dispari tamen ratione confirmarunt; *hi nimirum imperio, illae obsequio*. Imperio, inquam, quo Conciliorum judicia rata esse vel irrita decernere consueverunt. Quod summae potestatis & auctoritatis argumentum est: *quoniam*, ut idem S. Nicolaus in eadem Epistola observat, *secundum Canones, ubi est major auctoritas, judicium inferiorum deferendum est; ad dissolvendum scilicet, vel ad roborandum*. Sed haec ad sequentia Capita in meliore adhuc lumine collocabuntur.



## CAPUT III.

„ Quid in confirmandis Conciliis gestum sit ;  
 „ Nicaena, Constantinopolitana, Ephesina Syn-  
 „ nodi ; nihil in his de illa, quam quaerimus  
 „ confirmatione actum ; de Ariminensi Syno-  
 „ do ; de Epistolis Eutherii & Helladii ad  
 „ Sixtum III. adversus Ephesina decreta : Chri-  
 „ stiani Lupi vanae notae .

„ **I** Am ne quis existimet, *inquit Illustrissimus Adver-*  
 „ *sarius*, Concilia Oecumenica a Romanis Pontifi-  
 „ cibus alio sensu confirmari, aggredimur id, quod se-  
 „ cundo loco tractandum recipimus, nempe ut expona-  
 „ mus, quid circa Concilia a Romanis Pontificibus fir-  
 „ mata vel rejecta factum sit. Nos quoque an ejusmodi  
 expositio plena, & integra, & veritati consona sit, haud  
 segniter expendemus .

## ARTICULUS PRIMUS.

*De Synodis Nicaena, Constantinopolitana, &  
 Ariminensi: Quomodo in duabus prioribus  
 adprobandis, & altera irritanda Sedis  
 Apostolicae auctoritas emicuerit.*

„ **I**ncipimus, *inquit*, a Nicaena Synodo, ut omnium  
 „ prima, non tantum tempore, verum etiam auctori-  
 „ tate, in qua quidem de Romani Pontificis confirma-  
 „ tione nihil actum esse constat. *Et infra*: Sane memo-  
 „ ra-

„ravimus Ecclesiasticae Historiae certa monumenta ,  
„quibus constat , prolatam a Patribus sententiam , nul-  
„lo alio expectato decreto , statim apud omnes caelestis  
„instar oraculi valuisse. Sic finitae tres maximae quaestio-  
„nes Consubstantialitatis , Paschatis , Rebaptizationis ,  
„patuitque in Concilio I. generali , eas Synodos , quibus  
„Sedis Apostolicae Legatio interesset , nullius specialis  
„confirmationis indigere , ut robur obtineant .

Illustrissimus Auctor ignorare non potuit quid no-  
stratibus Theologis de Sedis Apostolicae ad Synodos Le-  
gatione communiter observatum est ; nimirum Summi  
Pontificis Legatos non solere ad Concilium accedere , ubi  
quaestio de fide agitanda est , nisi instructos prius & mo-  
nitos de Ecclesiae Romanae fide circa ea , quae sunt in  
Concilio finienda . Solere inquam , ait Canus ( *a* ) , non  
item oportere . Nam Legati ad Concilium Tridentinum  
non potuere commode de quaestionibus differendis ante  
instrui , quoniam erant propemodum infinitae . Sed cete-  
ra fere Concilia ad unam , aut alteram fidei tractandam  
causam coacta sunt ; uti Nicaena Synodus ad tres illas Il-  
lustrissimo Adversario commemoratas : ideoque Legati de  
Apostolicae Ecclesiae fide prius instructi accesserunt . Non  
enim Vitus , Vincentius , & Hosius ignorare poterant ,  
quaenam esset de tribus illis quaestionibus Sedis Aposto-  
licae fides atque traditio .

Praeterea observant ( *b* ) , posse quatuor modis con-  
tingere , ut fiat generalis Concilii definitio . Primo , con-  
sentientibus ac definientibus Patribus ; Legatis autem Se-  
dis Apostolicae dissentientibus ac repugnantibus . Secun-

Cc 2

do,

( *a* ) Lib. V. de Loc. Theolog. cap. V.( *b* ) Bellarmin. lib. II. de Conc. cap. XI.

do, consentientibus etiam Legatis, sed contra instructionem Pontificis agentibus. Tertio, consentientibus iisdem Legatis, sed qui certam ad Synodum instructionem Pontificis non adtulerunt. Quarto, consentientibus Patribus cum Legatis habentibus & sequentibus Romani Pontificis instructionem. Quid de Conciliis generalibus statuunt, a quibus tribus prioribus modis fidei decreta seu definitiones eduntur, postea videbimus.

Interim autem rursus observo; communem esse eorumdem Theologorum opinionem, atque doctrinam, quod si Legatis certam habentibus & sequentibus Romani Pontificis instructionem Synodus universa consentiat, non est opus nova Pontificis confirmatione, ut edita in hac Synodo definitio firma sit & inconcussa fidei Catholicae regula. Quod tamen, ut deinceps videbimus, minime prohibet, quin Pontifex suprema sua auctoritate ejusmodi Concilii acta examinet & retractet, ut illi constet, an omnia ad amussim Apostolicae doctrinae fuerint exacta; idque ubi ipsi constiterit, eadem rursus Apostolica auctoritate confirmet. Quod, ut suo loco videbimus, Leoni II. in confirmandis sextae Synodi Actis observatum est. Ita Legatis ab aliquo Principe pro belli pacisque negotiis tractandis, ad alium Principem destinatis, & juxta traditam ipsis instructionem agentibus & contrahentibus, statim natura sua validus censetur contractus, etsi penes Principem, a quo missi sunt, jus & auctoritas sit, ea quae acta sunt recensendi, ut ipsi constet, num aliqua in re Legati mandata eis tradita praeterierint aut ea omnino servaverint; unde rescindi contractus aut ratus haberi debeat. Qua in re profecto summa ipsius Principis potestas emicat, eoque acta probante, de illorum summa & irrevocabili

bili firmitate non cit jam ullus ambigendi locus . Hoc itaque sensu intelligo , quod Eminentissimus Bellarminus his verbis docet ( a ) : „ De quarto modo ( quum videlicet Patres cum Legatis sequuntur Pontificis instructionem ) „ vix dubium esse potest , videtur enim esse certum , „ tale Concilium non posse errare . Primum enim in tali „ Concilio invenitur expressus consensus capituli & membrorum , ac proinde totius Ecclesiae , quae sine dubio „ errare non potest . . . . deinde . . . . quando Concilium „ definit aliquid sequens expressam sententiam Pontificis , „ idem est , ac si confirmatum esset : *Et infra* : Ipse etiam „ Leo in Epist. LXI. ad Concilium Chalcedonense , quae „ illud confirmat , indicat , non fuisse opus sua confirmatione , nisi quia dubitabant aliqui , an revera cum ejus „ consensu factum fuisset decretum Concilii : quae etiam „ ratione confirmavit Pontifex multa alia Concilia , non „ quia errare potuerant , sed ut omnibus certius constaret , quae Legati egerant , vere ex mandato expressio „ Pontificis egisse . Itaque si aliquis bona fide hac de re dubitaret , haereticus habendus non esset , donec illi ex nova & expressa Pontificis confirmatione constaret : Sed de his rursus inferius .

His animadversis , constat , quid respondendum sit ad ea , quae de Nicaena Synodo Bossuetius observat . Ecce enim non exploratissima erat de tribus illis quaestionibus Ecclesiae Romanae fides atque traditio ? Quis ignorabat , quae circa Paschatis celebritatem adversus Arianos Victor ; quae de Haereticorum Baptismo adversus Cyprianum & Firmilianum Stephanus ; quae de Verbi divinitate & consubstantialitate Dionysius , Romani Pontifices constituerant ?

---

( a ) Ubi supra .

rant? Nulla ergo Romani Pontificis confirmatione opus erat, ut certo constaret, prolatam a Patribus, juxta Sedis Apostolicae de hisce controversiis traditionem, sententiam, caelestis instar oraculi habendam esse. In eo autem summa ejusdem Sedis Apostolicae auctoritas & potestas emicat; & quam illa ab omni errandi periculo tuta sit, inde haud obscure apparet, quod magna illa & celeberrima Synodus Romanae Sedis decreta velut certissimas & Apostolicas regulas sequuta est; & quamquam ingentes olim fuissent de Paschate & Haereticorum Baptismo insignium Ecclesiarum concertationes; attamen ubi in Synodum coaluerunt, & certo illis Spiritus divinus adfulsit, hoc eis constitit, non debere membra capiti reluctari, sed ab eo dirigi, seseque ad ejus nutum voluntatemque componere. Quod deinceps, ut Magnus Nicolaus Epist. X. ad Clerum Constantinopolitanum observat, in reliquis Oecumenicis Synodis factum est: nempe, qui ante Synodum in ipsa Ecclesiae unitate a suo Capite dissentire, quadam indulgentia mittebantur, eos postmodum in Conciliis Oecumenicis aut coactos esse Capiti sese obsequentes exhibere; aut contumaces a totius corporis compage revulsi sunt: *Haec sunt, inquit, quae de his Sedes Apostolica statuit: Haec sunt, quae Synodice regulariterque decrevit: Haec sunt, quae nos tanto studiosius oportet amplecti, tanto sollicitius observare, quanto certius nostis, quae ab ea statuta fuerint, haec universalem semper Ecclesiam tenuisse. Ita ut contra singulos errores in Ecclesia exortos prior haec secundum primatus sui auctoritatem sententiae terminum dederit. Et ita demum universalis Ecclesia, licet aliquando per aliquantulum temporis in quibusdam reluctata sit, quae illa tamen probavit, quandoque*

*doque probaverit: & quae illa refutavit, ipsa refutaverit.* Ita Nicaenae Synodo in condemnatione Quarta-decimanorum centum amplius annis Ecclesia Romana praecivit. Ita plenariae illi, de qua S. Augustinus, totius orbis terrarum Synodo, quae iterum baptizari ab Haereticis semel tinctos vetuit, longo temporis intervallo Sedes Apostolica facem praetulit. Ita in nulla legitima Synodo unquam accidit, ut quidquam de fide praeter Sedis Apostolicae & Romanorum Pontificum constituta decerneretur. Quo profecto non video, quodnam insignius argumentum adferri possit pro Sedis Apostolicae in fidei dogmatibus definiendis inerrantia. Non enim Cypriano, non Firmiliano, non Polycrati, non Columbano, aut aliis quibuslibet, & quamlibet insignibus pietate Viris, aut etiam martyrii ac doctrinae laureis redimitis, promisit Deus, cum eis mansurum Spiritum Sanctum ad omnem docendam veritatem, sed universo Ecclesiae corpori, & illud repraesentantibus Oecumenicis Conciliis promisit. Desinant proinde Adversarii Cyprianos nobis, Polycrates, Firmilianos &c. objicere: Nos enim illis potiori jure Nicaenam aliasque Oecumenicas Synodos objiciemus, quarum judicio cum isti, tum alii a veritate aberrarunt, quicumque Romanorum Pontificum sollennibus aut de fide aut de morum disciplina sanctionibus restiterunt. Quamquam autem universum Ecclesiae corpus divino Spiritu regatur & gubernetur; id tamen quodam ordine fieri, & ad reliqua membra directionem a capite proficisci, tum rerum naturalis ordo suadet, tum inde persuasum habemus, quod Capiti ad rite fidei dogmata definienda divinus spiritus nunquam defuit: Conciliis vero quolibet Episcoporum numero insignibus tunc solum adfuit, quum

Ca-

Capiti quidquam praefinienti & lucem praemonstranti indivulſe ac firmiter inhaeſerunt. Quum ea, ſtatim atque a Romani Pontificis doctrina & regulis deflexerunt, lux ſpiritusque defecerit.

Patet id multis exemplis, atque imprimis celebre illud eſt & notatu dignum, quod Concilium Ariminenſe ſuppeditat, quod quamquam ex magno Epiſcoporum numero congregatum, attamen quoniam abſque Romani Pontificis ſententia & auctoritate fidei formulam condere aut ſubſcribere aggreſſum eſt, inſaultum habuit exitum illudque Damasus hac imprimis ratione irritum eſſe decrevit ac declaravit: ſuoque decreto omnes proſus, quas ex Epiſcoporum numero & ſubſcriptionibus repetere videbatur, illius vires incidit: *Neque enim*, inquit Sanctus Pontifex in Epiſtola Synodica (a), *praejudicium aliquod naſci potuit ex numero eorum, qui apud Ariminum convenerunt: quum conſtet, neque Romanum Epiſcopum, cujus ante omnes fuit expetenda ſententia, neque Vincentium, qui tot annos Sacerdotium inlibate ſervavit; neque alios hujusmodi ſtatutis conſenſum aliquem commendaffe.* In quibus verbis hanc primam rationem adfert, cur ex numero Epiſcoporum Ariminenſium nullum Catholicae fidei praejudicium inferri poterat, quoniam eorum actis Romanus Epiſcopus non conſenſerat, cujus tamen primum fuerat requirenda ſententia. Itaque quolibet numero Epiſcopi congregentur, & inconfulto Romano Pontifice quidquam decernant, irritus eſt omnis eorum conatus.

Respondet Boſſuetius, haec nihil omnino ad rem, de qua nunc agimus, pertinere: „Primum enim, inquit,

„ non

---

(a) Ex Colleſt. Lucae Holſt.



„ non fuit haec Synodus Oecumenica, ex solo scilicet  
 „ Occidente convocata, cui praeterea Occidentis, to-  
 „ tiusque Ecclesiae Caput, Romanus Pontifex; alique  
 „ permulti magni nominis Occidentales Episcopi Aria-  
 „ norum fraude defuerint. Deinde malum factum, &  
 „ ipso jure nullum, quod rem Oecumenico Concilio,  
 „ Nicaeno scilicet, tota consentiente Ecclesia, defini-  
 „ tam, iterum in quaestionem vocabant; quo spectat il-  
 „ lud Athanasii (a): *Quae nova haeresis? Cur nova Sy-*  
 „ *nodus?* Quin ipsa Synodus Ariminensis quamdiu libe-  
 „ re & canonice egit, id professæ est, editaque sententia  
 „ declaravit (b), post Nicaenam Synodum fidei jam ex-  
 „ positæ nihil addi, nihil demi oportere: Denique his  
 „ omnibus circa ultimas actiones addita vis ac fraus. Quo  
 „ factum, Liberio in Synodo Romana teste (c), ut *om-*  
 „ *nes Ariminensis Concilii blasphemiae ab iis ipsis, qui*  
 „ *tunc decepti per fraudem fuisse videntur, anathemate*  
 „ *damnatae sint.* Idem habet Romana Synodus sub Da-  
 „ maso (d). Cum ergo Ariani haereticorum more sua,  
 „ quamvis inania, magnis clamoribus venditarent, facile  
 „ fuit Liberio, ac deinde Damaso, postremam Synodi  
 „ partem, per se nullam, nulloque ordine Canonico ful-  
 „ tam, postulante Basilio, omnibusque Orthodoxis Ori-  
 „ entalibus, consentiente Occidente, ipsis Ariminensis  
 „ etiam Concilii Episcopis ultro petentibus, nullam &  
 „ irritam declarare.

Ut his difficultatibus fiat satis, observandum est, vim

*To.I. Par.II.*

D d

argu-

(a) Lib. de Synodis.

(b) Epist. Syn. Arim. ad Const. ibid. & apud Soc. lib.II. Hist. Eccles.  
 cap. XXIX.

(c) Apud Soc. lib.IV. Hist. Eccl. cap. XI.

(d) Conc. Rom. sub Damas. ex Collect. Holst.

argumenti, quod ex Damasi verbis, & ex Synodi Ariminensis abrogatione conficimus, non in eo positam esse, quod ea Synodus Oecumenica reapse fuerit, & legitima, nullaeque aliae rationes se offerant cur nulla & irrita judicetur, quam quod a Romano Pontifice probata & confirmata non fuerit. Ultro enim agnoscimus, Synodum Ariminensem reapse Oecumenicam non fuisse, nec legitimam; neque existimamus, Damasum nullis permotum rationibus eam nullam & irritam declarasse: easque rationes optime perspectas habemus. Sed vim argumenti in his duobus principiis reponimus. Primo, Episcopos quovis numero, & qui alias ad constituendam Oecumenicam Synodum satis essent, congregatos, & in unam aliquam fidei formulam conspirantes, nisi eis Romanus Pontifex faciem & lucem praeferat, errandi periculo obnoxios esse; eorumque doctrinam nullius esse in Ecclesia auctoritatis, si Romano Pontifici improbetur. Id vero Ariminensis Synodi exemplo, & verbis Damasi, quibus illam irritam esse decernit, egregie comprobatur: Ait enim, ex numero Episcoporum, qui Ariminum convenerunt, Nicaenae fidei nullum praesudicium constari posse, propterea quod eorum actis, conditaeque aut subscriptae ab ipsis formulae fidei Romanus Pontifex non consenserit. Porro tantum fuisse constat Episcoporum numerum, qui Arimini in Occidente, & Constantinopoli in Oriente Ariminensi formulae subscripserunt, ut ad impertiendam illi Synodi Oecumenicae auctoritatem satis habitus fuisset, si ad eam accessisset Romani Pontificis confirmatio: Nam, ut Sulpitio Severo lib. II. memoriae proditum est, ex Italia, Africa, Illyrico, Hispaniis, & Galliis quadringenti & amplius Episcopi Ariminum confluxerunt: eorumque fidei

fidei formulam Contantinopoli post Seleucienſem Synodum quinquaginta Orientales Epifcopi confirmarunt ! Quae tot Epifcoporum in unam fidei formulam conſpirans multitudo , ſi numerum ſpectemus , pro Occumenica Synodo haberi potuiſſet , ſi eorum acta Romanus Pontifex adprobaffet . Hinc Ariani , aliorum Haereticorum more , parum de Romani Pontificis auctoritate ſoliciti ; Ariminenſem Synodum pro Occumenica venditarunt , ut patet ex verbis Reſcripti , quod Ariani per Juſtinam Auguſtam a Valentiniano extorſerunt ( a ) : *Damus copiam colligendi his , qui ſecundum ea ſentiunt , quae temporibus Divae memoriae Conſtantii , Sacerdotibus convocatis ex omni orbe Romano , expoſitaque fide ab iis ipsis , qui diſſentire noſcuntur , Ariminenſi Concilio , Conſtantinopoli etiam confirmata , in aeternum manſura decreta ſunt .* Jaſtabant ergo Ariani Ariminenſis Concilii velut Occumenicae Synodi inconcuſſam auctoritatem , opusque fuit ad eorum audaciam reprimendam , ut primum Liberius , deinde Damasus , ipſo etiam fatente Boſſuetio , poſtremam Synodi partem nullam & irritam declararent .

Sed ait , ea per ſe , & ipſo jure irrita & nulla erat . Fa-temur : ſed , numquid de hac re Arianis cum Catholicis conveniebat ? At multas Catholici cur eam repudiarent rationes adferebant . Rurſus fatemur : ſed , numquid & facile non erat Arianis ejuſmodi rationes eludere ? Numquid Arianis de iis , quae ipſis objiciebantur , fraudibus , dolis , & malis artibus , deque vi adhibita Patribus , cum Catholicis conveniret ? Numquid eorum , qui formulae ſubſcripſerant , prioris actus revocationem pro legitima poenitentia haberent , & non potius praevaricationem exi-

D d 2

ſtima-

---

( a ) Lib. IV. Cod. Theodoſ. de Fide Cath.

stimarent? Numquid qui callidiores inter ipsos erant, Ariminensem formulam reapse Nicaenae contrariam esse faterentur; quum unius tantum non necessarij verbuli omissione hanc ab illa differre jactarent, neque fraus statim plusquam trecentis Catholicis Episcopis suboluerit? Ejusmodi rerum judicium quum vulgi sermonibus ac disputationibus permittitur, veritas non illustratur, sed densioribus quotidie tenebris involvitur, magisque in dies obscuratur. Interim autem partibus litigantibus, tot Episcoporum in Synodum coactorum numerus magnum videri poterat pro Arianorum sententia praejudicium. Itaque ut simpliciores inter Catholicos ab Arianorum fraudibus tuti essent, non iis rationibus muniendi erant, quae ipsos in rerum gestarum examen conjicerent: sed aliquid simplex, & quod esset inter Catholicos pervulgatum, statuendum erat; nempe legitimas non esse & errandi periculo subjacere eas Synodos, quae sine consensu Romani Pontificis celebrantur, tum etiam nullius esse auctoritatis, nisi a Sede Apostolica confirmentur. Quare S. Basilii Magni etsi perspectum & exploratum habebat, ea, quae Arimini gesta fuerant, per vim acta fuisse, ac proinde ipsa per sese & ipso jure nulla & irrita esse; ne tamen Episcoporum numerus, qui Ariminensi formulae subscripserant, pluribus, ac praesertim simplicioribus inter Catholicos imponeret, scribendum Damasus duxit, petendumque ab eo, quid Romae pro Ariminensium gestorum dissolutione fecisset; deque hac re ad S. Athanasium ita perscripsit (\*): *Nobis autem operae pretium visum est ad Episcopum Romae scribere, ut res nostras inviset, & consilium dare, ut quum illinc communi ac Synodico decreto aliquos mitti*  
diffi-

---

(\*) Epist. LXIX. al. LII. ad S. Athanas.

*difficile sit, ipse hoc negotium suo Marte aggrediatur, eligens homines idoneos ad perferendos itineris labores, idoneos ad eos, qui apud nos perversi sunt, lenitate ac animi constantia corrigendos, apte & adtemperate utentes sermone, secumque habentes quaecumque post Ariminense Concilium gesta sunt, ad eorum, quae per vim illic acta fuerant, dissolutionem. Noverat enim Sanctus Doctor, huiusce rei ultimum ac peremptorium iudicium ad Sedem Apostolicam pertinere. Quare ubi Synodi Romanae Ariminensem irritantis Epistola ipsi reddita est, statim eam suscepit, eique incunctanter adensus est, ut ipse testatur Epist. XC. al. LXI. ad Occidentales his verbis: Omnibus autem, quae Canonice a vestra praestantia acta sunt, ad-sensi sumus, Apostolicum vestrae doctrinae studium laudantes. Et rursus Epist. XCII. al. LXIX. ad Italos & Gallos: Revera enim, inquit, laude summa dignum est, quod a Domino pietati vestrae datum est, adulterinum quidem a probo ac puro discernere, Patrum vero fidem sine ulla dissimulatione praedicare: quam quidem & nos suscepimus, agnovimusque Apostolicis notis signatam: eique & ceteris omnibus, quae in Synodico scripto canonice & legitime statuta sunt, assentimus. Itaque Romano Pontifice decernente, ac Synodice & legitime atque canonice iudicante, nullas prorsus Ariminensis Synodi formula & gesta vires habuerunt.*

At quemadmodum tot Occidentalium & Orientalium Episcoporum conatus, reluctante Romano Pontifice, frustra fuit: ita centum & quinquaginta Orientalium Episcoporum conventus, eorum de fide decretum eodem Damaso Romano Pontifice probante, ad Oecumenicae Synodi fastigium evehctus est. Secus enim,

enim, quo pacto tantam obtinuillet auctoritatem?

De hac Synodo haec Bossuetius: „In secunda Synodo generali, Constantinopolitana scilicet, certum est; nullum esse locum ei, de qua quaerimus, confirmationi, post Synodum gestam; cum Sanctus Damasus Papa ipse adfuerit Occidentalium Romae habitae Synodo; cuius consensu Constantinopolitana Oecumenica facta est.

At nobis id satis est, ut Constantinopolitana Synodus nonnisi Ecclesiae Romanae Romanique Pontificis consensione Oecumenica evaserit. Nam quod pertinet ad Synodum & consensum Occidentalium; quum hi a Romani Pontificis sententia nutuque omnino penderent; quae in Romanis Synodis eorum adhibito consensu decernebantur, eorum auctor solus Romanus Pontifex habebatur, Ita S. Gregorius Magnus lib. VI. epist. XXXI. de hac ipsa Synodo loquens: *Et canones quidem, inquit; Constantinopolitani Concilii Eudoxianos damnant... Romana autem Ecclesia eosdem Canones, vel gesta Synodi illius haecenus non habet, nec accipit. In hoc autem eamdem Synodum accepit, quod est per eam contra Macedonium definitum. Reliquas vero haereses, quae ibi memoratae sunt, ab aliis jam Patribus damnatas reprobabat.* Ergo secundam hanc oecumenicam Synodum, quam; ut alio loco testatur, instar unius e quatuor Evangeliiis venerabatur, haecenus S. Pontifex recipiebat, quatenus illam Romana Ecclesia receperat, videlicet in Macedoniani erroris damnatione. Ita Sexta Synodus Aët. XVIII. in Prosphnetico ad Imperatorem: *Macedonius Spiritus Sancti Deitatem denegabat, sed maximus Imperator Theodosius, & Damasus adamas fidei, cuius solida mens*

ag-

aggressionibus atque conflictibus alienarum sectarum nullatenus erat fauciabilis; Gregorius & Nectarius illam in hac Regia urbe Synodum congregabant: & sacrilegam quidem linguam a Sacerdotio abscindebant &c. Parum refert, ut jam ante monuimus, an ex praecedente, vel ex subsequente Romani Pontificis adprobatione & consensu Synodus aliqua robur auctoritatis obtinuerit; quum tamen constet, non nisi Romano Pontifice consentiente & adprobante, id eam obtinere non potuisse, ut in Oecumenicae Synodi auctoritatem invalesceret. Itaque Patres sextae Synodi, sprete ratione temporum, quam nihil ad rem, de qua nunc agimus, pertinere optime intelligebant, & ipsam in se se Synodum Oecumenicam intuentes, tum omnium Episcoporum Principem Damasum ante ceteros admirantur, ut fidei adamantem, ut Macedonii debellatorem; tum eum solum ex Occidentalibus nominant, perinde atque ipsius tantum consensione Constantinopolitana Synodus Oecumenica evaserit: quem etiam quum fidei Adamantem vocant alienarum sectarum aggressionibus nullatenus fauciabilem, annon ipsum ex omni errandi periculo his verbis eximunt? Photius quoque de eadem Synodo verba faciens, recensitis praecipuarum in Oriente Sedium Episcopis, Timotheo Alexandrino, Meletio Antiocheno, Cyrillo Hierosolymitano, Nectario Constantinopolitano &c. quos Synodi Principes fuisse refert; ex Occidentalibus solum Damasum in medium producit, qui Synodi de fide decreta comprobans confirmaverit: *Quibus non multo post tempore etiam Damasus Romanus Antistes, eadem confirmans agnoscebatur, consentaneus decretis factus*: perinde atque ex hoc tantum profecta decretorum confirmatio, eis pondus oecumene-

me-

menicae auctoritatis addiderit . Itaque quemadmodum Romani Pontificis Ariminensem Synodum reprobantis auctoritas sufficere visa est ad elevandam & infringendam quingentorum fere ex Occidente & Oriente Episcoporum auctoritatem : ita idem Romanus Pontifex centum & quinquaginta Orientalium Episcoporum decreta confirmans , summam eis oecumenicae Synodi auctoritatem adjunxit ,

## ARTICULUS II.

*De Synodi Ephesinae confirmatione , deque Eutherii & Helladii literis ad Sixtum III.,  
& in eas Christiani Lupi notis .*

**Q**UOD ad primum ac praecipuum, imo & unicum negotium pertinet, propter quod Synodus Ephesina coacta est, recte atque jure dici potest, in Actione tertia ejus esse finem ac terminum constituendum; nempe in haereseos Nestorianae damnatione, ac Nestorii ipsius depositione per Caelestini Legatos ipsius nomine & auctoritate Apostolica confirmatis. Nam ceteris Actionibus occasionem dedit Johannis Antiocheni & Orientalium schisma; quibus quum Comites & Ministri Imperatoris faverent, qui & ipsius animum in legitimam Synodum, ac praecipue Cyrillum & Memnonem concitarent; opus fuit ad hos compescendos turbines Concilium prorogari. Quum tamen Patres Actione tertia absoluta, veluti peracta Synodo, in Relatione ad Imperatorem abeundi veniam & potestatem enixe ab ipso petierint. Quum itaque, inquirunt, *negotium hoc finem Majestati*



*ſtati veſtræ peroptatum , Eccleſiſque omnibus tutiſſimum , & fidei firmitatem adferentem jam acceperit : rogamus veſtram pietatem , ut ab hac cura & peregrinatione noſ tandem abſolvat . Verum excitatae a Johanne Antiocheno & Orientalibus turbæ , eorumque in Cyrillo & Memnone exauſtorandis , & Occumenicæ Synodi actis irritandis temerarii auſus Patres diutius Ephēſi detinuerunt ; aliisſque Actionibus opus fuit , in quibus cum Cyrillus & Memnon , & acta Synodi vindicarentur ; tum Johannis & Orientalium audacia ac temeritas coerceretur . In his autem animadvertere eſt , quæ ſupra de Conciliorum confirmatione cum inſignibus Theologis Bellarmino & Cano obſervavimus ; nempe quod ubi Legati de rebus agendis ac per Synodum definiendis certa a Romano Pontifice mandata deferunt , cum iisſque Synodus conſentit , non eſt opus nova Pontificis confirmatione , ut Synodi ſententia firma & inconcuſſa ſit . Quod ſi Legati de aliquo negotio certam , ut ajunt , non adferunt inſtructionem , quod per Synodum agitur ac definitur , ſummam non habet & irretractabilem firmitatem , donec Pontificis acceſſerit confirmatio . Hujusce autem obſervationis præclarum exſtat in hac Ephēſina Synodo documentum . Quum enim tribus prioribus Actionibus juxta formam a Caeleſtino præſcriptam Neſtoriana hæreſis damnata fuiſſet ac Neſtorius exauſtoratus , rebusque geſtis Legati Sedis Apoſtolicæ ex ejuſdem Caeleſtini præſcripto aſſenſum præbuiſſent ; de his ad ſolum Imperatorem , non autem ad Pontificem ſub finem Actionis tertiæ relatio per Synodum facta eſt . At quoniam de turbis per Johannem Antiochenum & Orientales Episcopos concitatis , quum ex inſperato erupiſſent , nihil Legati in mandatis habebant ;*

*To. I. Par. II.**Ec**Sy-*

Synodus Aëtione quinta ad Caelestinum retulit; quid ad eorum coercendam audaciam interim decrevisset, exposuit; & Johannem tertiæ Sedis Antistitem ejusque Symmythas supremo Sedis Apostolicæ judicio reservavit: *Pietatis tuæ judicio hoc reservavimus; interim illos excommunicationi subjicientes, omnique Sacerdotali potestate exuentes, ita ut nullum suis sententiis laedere queant...* Convenientem proinde Sanctitas tua propter ea, quæ acta sunt, indignationem concipiat &c. Cujusmodi autem fuerit ea confirmatio, quam Aëtione tertia Sedis Apostolicæ Legati Caelestini vice ac nomine rebus hætenus gestis adhibuerunt; & quam in ea Sedis Apostolicæ ac Romani Pontificis majestas & auctoritas enituerit; non est opus, ut in præsentia pluribus demonstramus, quum id nobis abunde præstitum sit ad Caput XIII. libri superioris Articulo secundo & tertio; unde repeti possunt, quæ in hunc locum optime quadrant, atque iterum ingerere & inculcare piget.

Jam ergo ad Eutherii & Helladii litteras paullisper animadvertamus, ex quibus Christianus Lupus pro summa Romani Pontificis in Oecumenicas Synodos auctoritate insigne repetit argumentum, quod paucis exponit, ac refellere nititur Illustrissimus Adversarius: „Christi-  
 „ nus quidem Lupus nuper, inquit, edidit Epistolam  
 „ Eutherii Thyanensis, & Helladii Tarsensis scriptam  
 „ ad magni nominis Romæ Episcopum Sixtum (a):  
 „ in qua petunt ab eo, qui a Deo productus est gubernator,  
 „ retractari ac rescindi Ephesinæ Synodi acta ad-  
 „ versus Nestorium; ac terrarum orbem Synodo adhae-  
 „ rentem, & cum Synodo errantem adjuvari; quod est;  
 „ in-

---

(a) Var. PP. Epist. cap. CXVII.

„ inquit Lupus ( a ), *autenticum instrumentum appella-*  
 „ *tionis, non ad Synodum generalem, sed ad versus ge-*  
 „ *neralem Synodum interpositae apud Sixtum III. Pon-*  
 „ *tificem.* Quo deinde concludit, quod Orientalis Eccle-  
 „ *sia crediderit, Papam esse superiorem generali Synodo.*  
 „ Addere debuisset, *generali Synodo*, auctore ac praesi-  
 „ dente per Legatos Pontifice gesta, quam *cum toto or-*  
 „ *be terrarum* Sedes etiam Apostolica recepisset: hujus  
 „ decreta, hujus etiam fidem a Romano Pontifice retra-  
 „ ctari etiam & rescindi posse: Sic agit Vir doctus, sed  
 „ ubique nimius, antiquitatis indagator strenuus, parum  
 „ exactus iudex. Nos in egregio antiquitatis monumen-  
 „ to gaudemus tantam visam esse Haereticis quoque Ro-  
 „ mani Pontificis majestatem, ut qui Ecclesiam pertur-  
 „ batam vellent, ab eo per fraudem nimia etiam & in-  
 „ concessa, neque tantum refutanda, sed etiam irridenda  
 „ peterent.

Nimia esse reapse, imo & absona, quae Euthérius & Helladius iis litteris a Romano Pontifice petierunt, haud equidem diffitemur; at non propterea damus, exsufflandum esse argumentum, quod inde in rem suam & nostram Vir eruditissimus conficit. Si enim ad eas litteras animum diligenter advertimus, comperiemus, Episcopos ab Ephesinae Synodi decretis ad Sedem Apostolicam provocantes, hoc veluti Canone ac principio nixos, quod ipsis cum omnibus Catholicis Episcopis commune tunc erat, ac semper fuit; nimirum, quod Romanus Pontifex a Deo productus, hoc est divinitus institutus est orbis universi, id est universae Ecclesiae gubernator ac moderator; & quod hujusce muneris ipsi divinitus commissi ratione ad eum

pertinet, non unam dumtaxat aut alteram Ecclesiae partem collapsam erigere, aut labantem sustinere, sed orbem terrarum universum adjuvare, munire, ab errore liberare, a naufragio eripere: *Tuam*, inquit, *Deus protulit sanctitatem, per quam bonae spei sumus & nos, quod orbis terrarum ab Aegypto liberetur errore, qui Moyses novus existens omnem Aegyptium haereticum percuties, salvabis vero omnem Israëlitam orthodoxum.....* Nostrum quidem est ad eum clamare, qui a Deo productus est gubernator..... Sufficit vestra Apostolica Sedes per universum tempus... ad muniendum orbem terrarum... Cujus rei gratia & nos praesumimus has supplicationes offerre, ut adjuvetis orbem terrarum; & in illa parte, quae errat; & in illa, quae tyrannidem sustinet... Rogamus vero, & sanctis tuae Religiositatis provolvimur pedibus, ut manum porrigas salutarem, & auferas mundi naufragium. Quis porro Catholicorum in maximis Ecclesiae tempestatibus velut ad communem portum, ad Sedem confugiens Apostolicam, non has aut similes usurpavit voces; vel hisce, aut his simillimis uti, sibi unquam religioni duxit? Quis non orbe aegrotante, ad Romanum Pontificem velut ad communem medicum; & ad Sedem Apostolicam, orbe periclitante, velut ad commune omnium Ecclesiarum, ac totius orbis Catholici firmamentum, non sibi properandum existimavit? Videantur, quae superius produximus ex S. Maximo Martyre, & ex S. Sophronii, aliorumque Africanorum Praefulum Synodiciis Epistolis in Synodo Lateranensi sub S. Martino I. relictis, necnon & ex S. Ignatii litteris ad Nicolaum I. actione tertia octavae Synodi recitatis; ex quibus, si cum his conferantur, quae mox ex Eutherii & Helladii Epistola descri-

pta sunt, perspicue ac manifeste patebit, eas ad Pontificem voces communem Christianae pietatis sensum, quem non omnino exuerant, ex eorum pectoribus expressisse. Inde autem jure consequi intellexerunt; quod & S. Basilio, S. Flaviano, Theodoreto aliisque persuasum fuisse videtur; ad Sedem Apostolicam pertinere, ut eorum Conciliorum acta rescindat, & omnem auctoritatem evertat, quae ob Episcoporum qui ad ea undique confluerunt, vel iis adhaeserunt, numerum ac multitudinem pro Oecumenicis habentur, ac propterea periculum esse videtur, ne orbis terrarum fides in discrimen eorum auctoritate adducatur. Haftenus ergo nihil Eutherio & Helladio dictum est, quod non in Ecclesia Catholica didicissent. Sed eorum error in eo versabatur, quod hisce communibus ac pervulgatis regulis ad Synodi Ephesinae eversionem perperam utebantur; quum per eam orbis terrarum fides firmata fuisset, non everfa; quum omnia in ea, non, ut ipsi queruntur, ad unius hominis, hoc est, Cyrilli Alexandrini Praefulis arbitrium; sed ex praescripta a Romano Pontifice forma regulaque peracta fuissent; quum denique, quod ab eis dissimulatur, haec eadem fuissent ab ejusdem Pontificis Romani Legatis auctoritate Apostolica confirmata. Itaque Catholicorum fuisset ad Romanum Pontificem confugere adversus Synodum, cui, quamquam Oecumenica haberi posset ac vellet, Sedis tamen Apostolicae auctoritas defuisset: sed haereticorum aut schismaticorum fuit, id unum praeterire ac silentio tegere, quod eorum plane rationes conturbabat, nimirum fuisse eam Synodum auctoritate Apostolica confirmatam, unde consequens erat, iniri amplius non posse Nestorianae causae, & Nestorianorum dogmatum retractationem.

AR-

## ARTICULUS III.

*De iisdem Eutherii & Helladii litteris adversus  
Auctorem notae, quae huicce Capiti in  
Opere Meldensis Episcopi  
subiuncta est.*

**Q**ui fusio rem notam praesenti Capiti adtexuit, quum ei minus probaretur tradita ab Illustrissimo Auctore ad argumentum Lupi responsio; & in iis Episcopis, quorum proinde orthodoxiam vindicare operae pretium existimavit; statuere vellet exemplum, ac praetextere auctoritatem intolerabili quorundam audaciae, qui Apostolicae Sedis decretis receptis ab omnibus fere totius orbis Episcopis, citra culpam, & schismatis & haereseos notam, a paucis resisti posse contendunt; imo ut etiam adversus Oecumenicae Synodi auctoritatem, quam omnibus votis expetere simulant, si quando eam celebrari contingeret, eos muniret; aliam ejusdem solvendae difficultatis viam ineundam ac proponendam esse judicavit.

Primum autem, ad funditus evertendum Lupi argumentum statuit, „ ab his Episcopis non totum qua patet „ orbem supponi adhaerentem Concilio: adeoque minime adversus generalem Synodum, aut quam ipsi talem „ putarent, sed adversus coetum, quem tali omnino auctoritate carere censebant, imploratum Sixti Pontificis „ auxilium.

Secundo „ & alterum illud falsum esse pronunciat, „ quod Lupus addit; nempe solius Sixti iudicio permissam

„ sam ab his Episcopis causam fuisse , in qua de Concilii  
„ generalis auctoritate quaereretur .

Tertio ex ipsomet Sixto Pontifice probare nititur ,  
ne tum quidem quum pax Cyrillum inter & Johannem  
Antiochenum inita est , quidquam duos praedictos Epi-  
scopos *contra jus aut leges Ecclesiae peccasse* , quamquam  
Ephesinae Synodo adhuc obluſtari pergerent „ quod ea ;  
„ inquit ; nondum haberetur consensus , cui repugnare  
„ poenale esset , aut universalis Ecclesiae auctoritati con-  
„ tumeliosum , quae nihil tota decernere censetur , quam-  
„ diu non est ex communi examinatione unanimis , adeo-  
„ que nec tunc insuperabilem inducit parendi necessi-  
„ tatem .

Haec profecto magni , ut nemo non facile intelligit ;  
momenti sunt . Et si quidem cum veritate conjuncta sunt ,  
nihil egregius adferri potuit , ad funditus evertendum  
Christiani Lupi argumentum . Quare quibus haec omnia  
momentis nitantur , haud perfunctorie considerandum est :

„ Et quod ad primum quidem attinet ; absque ulla ,  
„ inquit , ambiguitate significant , ultro advolaturos ad  
„ Sixtum non ex una Provincia , sed *e diversis* plane re-  
„ gionibus , id est , *Euphratesia , utraque Cilicia , Cappa-*  
„ *docia , Bithynia , Thessalia , & Moesia Domini Sacer-*  
„ *dotes , qui nunc propter Ecclesiarum suarum periculum*  
„ *vice sua Clericos dirigerent & Monachos* . Unde Lu-  
„ pus ipse deducit , hanc appellationem & professionem  
„ non fuisse solius Eutherii & Helladii , sed omnium ista-  
„ rum Provinciarum , quae proinde omnes nondum Sy-  
„ nodum Ephesinam admiserant . Et ideo *in orbe terra-*  
„ *rum* , quem petunt *adjuvari* , distinguunt volunt partem  
„ quidem unam , quam ipsi *errantem* putabant , & alte-

„ ram ,

„ram, quam *tyrannidem pati* queruntur, & *impugna-*  
 „*ri, quod assensum non praebeat.* Haec quidem vera  
 esse fatemur; sed an usque adeo delirarent, ut tam modi-  
 ca pars totius orbis terrarum adimere posset Ephesinae Sy-  
 nodo Oecumenici Concilii praerogativam, ex his certe  
 verbis non constat. Quamquam enim in orbe terrarum  
 distingui velint partem quidem unam, quam *errantem*  
 putabant, & alteram, quam *tyrannidem pati* queruntur;  
 hanc tamen adeo modicam esse intelligebant, ut prohibe-  
 re non posset, quin absolute universo orbi terrarum error  
 adscriberetur. Laudant enim Nestorium, quod *Dei ti-*  
*more praelato, elegit potius multis periculis sibi injuste*  
*inferendis tradere semetipsum, quam dolis haereticis prae-*  
*bere consensum, & confirmare TOTIUS ORBIS errorem;*  
 Synodus ergo Ephesina, quae vocatum ipsis errorem san-  
 xit & confirmavit, *totius orbis* Synodus erat, aut saltem  
 consentientem sibi habebat orbem terrarum; quae Synodi  
 Oecumenicae ipsissima notio est.

Demus tamen, quod Adversarius contendit: „non  
 „eam plane sibi visam Synodum Ephesinam, quae uni-  
 „versitatem Christiani nominis aut repraesentaret satis;  
 „aut haecenus consentientem haberet: id, inquam, ul-  
 tro Adversario concedamus, quamvis mox relata ipsorum  
 verba aliud aperte significant; quid tum? Ut argumento  
 Lupi sua vis constet, satis est, ut ab eorum Adversariis  
 Ephesina Synodus pro Oecumenica haberetur. Quum  
 enim auctoritatem quaererent, quam ipsis suis Adversariis  
 objicere & se ab eorum sententiis & judiciis tueri possent;  
 ac demum penes quam esset abrogare atque irrita reddere  
 Synodi Ephesinae decreta, frustra fuisset omnis eorum  
 labor, nisi ad Romanum Pontificem tanquam Occumeni-



ea Synodo potiore ac superiore provocassent. Nam Cyrillus alique, quorum, ut aiebant, tyrannide premebantur, Concilii Ephesini tanquam Oecumenicae Synodi decretis nitebantur, ut paullo inferius perspicuis eorum testimoniis demonstremo. Quare nisi in Romano Pontifice auctoritatem agnovissent, qua retractare posset Concilii generalis decreta, nihil illis actum fuisset, frustra quae in eo quaererent, qui *totius orbis errorem* sua auctoritate, corrigeret, quique manum porrigeret salutarem, & *mundi naufragium* auferret. Illis enim ejusmodi auctoritate vel ipsis aperte fatentibus opus erat, quam nisi in Romano Pontifice & ipsi venerabantur, & eorum Adversarii suspiciebant, de ridiculo habitum iri eorum appellationem perspexissent, ut ad Judicem interjectam, cujus in ea hypothese non fuisset, Synodi generalis decreta rescindere ac retractare. Itaque, ne verbis ludamus, quamquam ab Eutherio & Helladio nequaquam Ephesina Synodus *Oecumenicae* appellatione donetur; attamen, vel ipsis fatentibus, *totius orbis* suffragio nitebatur, & adversus illam auctoritate sibi opus esse intelligebant, qua posset omnium conspiratione roboratus *totius orbis error* auferri. Quod profecto non erat nisi ejus, cujus in universam Ecclesiam auctoritas, omnium consensione, dominabatur.

Longe facilius evertitur, quod Auctor Notae secundo loco constituit; nempe non ad Sixtum solum tanquam Oecumenica Synodo potiore & superiore, sed ad omnes simul Occidentales fuisse ab his Episcopis provocatum: „Haec enim, *inquit*, Epistola perscripta est ex  
„ consilio, quod intimatur Alexandro Hieropolitano Epi-  
„ scopo, & ceteris Antistitibus Provinciae Euphratenfis  
„ in Epistola, quam idem Lupus ante hanc immediate

„ edidit, cujus ipsissima verba sunt: *Dirigendos aliquos*  
 „ *cum communi formula & literis accommodis ad Occi-*  
 „ *dentis partes, & excitandos ad hoc pro fide certamen*  
 „ *eos, qui illic sunt habentes insitum fidei zelum:* quibus  
 „ utique omnibus, non minus quam Romano Pontifici,  
 „ hae literae destinatae sunt; licet ad hunc unum directus  
 „ sermo videatur. Et tamen ubi distincte petitionem  
 „ suam enuntiant, rogant, *ut eorum omnium inquisitio-*  
 „ *nem jubeat fieri, & bis illicitis caelestem superduci*  
 „ *correctionem;* non ut ipse per se inquisitionem habeat,  
 „ aut correctionem solus inducat.

Attamen litteras, de quibus agimus ad solum directas fuisse Romanum Pontificem, ejusque dumtaxat auxilium imploratum fuisse, nulla prorsus injecta Synodi generalis mentione, tam evidens est, ut nihil exploratius haberi possit; solisque oculis ac litterarum inspectione opus est ad omnem de hac re ex animo scrupulum evellendum. Ad quem enim alium dirigi possunt hae voces: *Contra eos, qui nunc insurrexerunt inimicos, tuam Dominus protulit sanctitatem, per quam bonae spei sumus & nos, quod orbis terrarum ab Aegypto liberetur errore, qui Moyses novus existens &c.*? Ad quem alium & hae respicere possunt: *Nostrium quidem est . . . . ad eum clamare, qui a Deo productus est gubernator, eumque pro amore veritatis, quanta possibile est edocere; tuae autem gratiae sapientiaeque est non despicere &c.*? Denique haud alium, quam Romanum Pontificem adloqui possunt iis verbis, quae mox subjiciemus, ex quibus constabit, perinde esse has litteras ad solum Pontificem destinatas, quam quae ad Regem Galliae inscribuntur, ejusque in aliqua re opem & auxilium implorant.

Quo

Quo ergo, inquis, ea verba spectant, quæ Notæ Auctor ex præcedenti Epistola refert? *Ut dirigatis aliquos cum communi hac formula &c. & excitetis eos, qui illic sunt &c.* Dicimus, hosce præter Romanum Pontificem, haud alios esse, quam qui Sedis Apostolicæ, & Ecclesiæ Romanæ Clerum constituebant, qui Romano Pontifici in rebus gerendis adesse solent. Sic S. Sophronius Hierosolymorum Patriarcha Stephanum Dorensem *ad Sedem Apostolicam* destinans, illi in mandatis dabat, *ut non semel, non bis, sed multo saepius aperiret sacris Viris ibidem consistentibus omnia secundum veritatem, quæ in istis partibus mota sunt, & non quiescas instantius expetens, atque exorans eos, donec ex Apostolica prudentia, quæ in Deo est, ad victoriam iudicium perducere debeant, noviter introductorum dogmatum perfectam faciant secundum Canones destructionem.* Quæ verba nemo nisi infans negaverit, ad solum Romanum Pontificem, & eos, qui Pontifici assident, pertinere: quibus utique satis virtutis & auctoritatis S. Sophronius inesse fatebatur ad debellandam impietatem, & prava dogmata evertenda, quæ per universum Orientem immaniter grassabantur. Sic prorsus Euthérius & Helladius solam Apostolicam Sedem sufficere existimabant, ad reprimendam, ut ipsi ajebant, impietatem, ad muniendum orbem terrarum, eumque a naufragio eripiendum: *Et olim siquidem saepius jam ex Alexandria hujusmodi hæreticis zizanitis insurgentibus, suffecit vestra Apostolica Sedes per universum tempus illud ad mendacium convincendum, impietatemque reprimendam, & corrigenda, quæ necessarium fuit, muniendumque orbem terrarum, ad gloriam Christi, tam sub illo ter beato, & inter sanctos habendo Episcopo Damaso,*

*quam sub pluribus aliis, gloriosis, atque admirabilibus. Cujus rei gratia & nos praesumimus has supplicationes offerre, ut adjuvetis orbem terrarum &c.* An & haec verba ad alium spectare possunt, quam ad eum, qui Sedi Apostolicae praesidebat? Cui si satis virium inerat ad convincendum mendacium, ad reprimendam impietatem; ad muniendum orbem terrarum; quid opus erat, ut aliorum auxilium & opem implorarent, ut ad alios legatos & litteras destinarent, ut ab aliis peterent caelestem illicitis superduci correctionem? Reapse tamen quemadmodum Sophronius Stephanum Dorensem; ita Euthérius; Helladius, & alii, qui in eodem atque ipsi luto versabantur; haud alio, quam ad Apostolicam Sedem suos & Legatos & litteras direxerunt: *Quae, inquit, ex parte quidem videntes, ex parte vero audientes concurrissimus ad Sanctitatem tuam nos, qui e diversis regionibus sumus . . . . nisi detineret nos Luporum terror &c.* Unde coacti sumus nostra vice dirigere religiosissimos Clericos & Monachos, qui impleant locum nostrum. Quaesumus igitur, ut absque dilatione exsurgatis, & fervido zelo magnum victoriae trophaeum contra aemulorum cuneos erigatis &c. Quae omnino consona iis sunt, quae paullo ante ex Sophronio audiebamus, quibus Stephano Dorensi mandabat, ut tamdiu apud Sedem Apostolicam ageret; quamdiu ad victoriam judicium perduxisset. Ubi quaeso in iis, quae adduximus verbis, imo & in tota Epistola; Synodi generalis ab his Episcopis expetita? aut vestigium? Nam quod Notae Auctor ex hisce eam verbis extundit: *Omnium horum inquisitionem jubeas fieri, & his illicitis caelestem superduci correctionem;* vereor, ut multis suadere possit, fuisse rem tantam adeo obscuris & acqui-

aequivocis ambiguisque vocibus expetitam: praecipue quum ab ipso ante petierint, ut hujusmodi quaestionem tantamque causam ipse perscrutaretur nulli parcens labori; ut quae perperam gesta fuerant ipse cum tota constantia & animi alacritate emendaret; professi ad haec omnia satis esse in Sede Apostolica auctoritatis: *Tuae autem gratiae sapientiaeque est non despicere, neque otiose transcurrere hujusmodi quaestionem tantamque causam: sed & perscrutari cum dilectione boni laboris, & imponere emendationem cum tota constantia, & Deo dilecta fiducia.* Ac statim subjungunt, quae antea descripsimus, quod non semel ex Alexandria erumpentibus haeresibus *sufficit Apostolica Sedes* ad reprimendam impietatem, & munientem orbem terrarum.

Longe accuratius expendenda essent quae tertio loco, duabus praecedentibus propositionibus confirmandis, idem Notae Auctor adjungit; nimirum, quod *nihil contra jus aut leges Ecclesiae peccarint*, qui Duce Johanne Antiocheno, Ephesinae Synodo restiterunt „ quod ea „ nondum haberetur consensus, cui repugnare poenale „ esset, aut universalis Ecclesiae auctoritati contumeliosum, quae nihil tota decernere censetur, quamdiu non „ est ex communi examinatione unanimis, adeoque nec „ tunc insuperabilem inducit parendi necessitatem. Propositionem, inquam, adeo temerariam accuratius expendere oporteret, ut quam illa a communi & constanti omnium saeculorum doctrina, traditione, ac disciplina abhorreat, omnibus plene ac perspicue constaret. Verum id longius me a proposito opere abduceret. Quare iis tantum refellendis insistam, quae ex quibusdam Sixti Pontificis verbis in alienum sensum insigni fraude detortis, & ex  
ejus-

eiusdem erga Johannem Antiochenum aliosque Orientis Schismaticos oeconomia, in sui erroris confirmationem temerarius Adnotator adducit.

„ Idem, *inquit*, (Sixtus) semper putavit, tam Jo-  
 „ hannem Antiochenum, quam ceteros Orientis Episco-  
 „ pos, *qui sententiam suam suspenderant*, ne Helladio  
 „ quidem nostro & fociis exceptis, quos Synodus Maxi-  
 „ miani deiecerat, *sustinendos*, nec aures unquam ac-  
 „ commodare voluit instantibus, ut pro contemptu Syno-  
 „ di exerceret in illos auctoritatis Apostolicae severita-  
 „ tem. Imo post pacem testatus est, nihil tunc a se, nisi  
 „ *praecoquum* & praeceptum in ipsos *agi* vel decerni potuiss-  
 „ se. Hac quidem erga Johannem Antiochenum ipsique  
 „ adhacrentes Orientis Episcopos usum esse Sixtum oeco-  
 „ nomia, ultro agnoscimus ac fatemur. Sed hujusce rei ac  
 „ dispensationis rationem probare non possumus, quam no-  
 „ tae Auctor commentus est, ac sequentibus verbis exponit.

„ Quia nimirum quidquid alias perperam egissent con-  
 „ tra Synodum, aut Cyrillum ejus Praesidem, & vices,  
 „ ut ipse gloriatur, Romani Pontificis tenentem; nihil  
 „ tamen contra jus aut leges Ecclesiae peccassent, hoc  
 „ circa rei caput, id est, causam Nestorii, *statuentes*,  
 „ *quod a Ducibus fidei sua deberet perfidia judicari*. Un-  
 „ de nec dicere dubitat, *Christum Deum*, tunc demum  
 „ *quam vere sit sua causa monstrasse*, quando jam con-  
 „ summata pace, *ita res visus esset gubernare, ut tantae*  
 „ *rei & talis judicium servaret suorum conventui Sa-*  
 „ *cerdotum*. Ergo quantacumque autoritate per se polle-  
 „ ret Ephesina Synodus, inquisita & patefacta apud tam  
 „ multos, inter se & cum Romano Pontifice consentien-  
 „ tes, veritate; non tamen adhuc absolutissime liquebat,  
 „ suf-

„ suspensio Johannis & aliorum Orientalium suffragio ,  
 „ *quam vere in ea Christi causa acta esset* . Et hi quidem  
 „ in Sixti sinu querelas suas deponere poterant , uti fecisse  
 „ videntur hac Epistola Euthérius & Helladius , sed *tan-*  
 „ *tae rei & talis summum & ineluctabile judicium* non  
 „ ideo servabatur Sixto soli , sed , teste Sixto , *tali Sacer-*  
 „ *dotum Conventui* , in quo vel *cuncti Duces fidei* , ut vo-  
 „ lebat Johannes Antiochenus , vel , ut loquitur ipse Six-  
 „ tus , *Apostolici* , id est , Sedium Apostolicarum recto-  
 „ res omnes cum suis Coëpiscopis unirentur .

Haec produnt Auctoris nostri vel pessimam fidem ;  
 vel in evolvendis Veterum monumentis crassam & super-  
 nam oscitantiam : Tota enim haec fabula ex Sixti verbis  
 composita est aut per summam inscitiam prave intellectis ;  
 aut per summam malitiam in alienos sensus nequissime  
 detortis . Ait ergo primum , nihil Orientales contra jus  
 aut leges Ecclesiae peccasse , circa causam Nestorii *sta-*  
*tuentes , quod a Ducibus fidei sua deberet perfidia judica-*  
*ri* . Et infra : *Cuncti Duces fidei* , ut volebat Johannes An-  
 tiochenus . Itaque haec Sixti verba ad Johannem Antio-  
 chenum & Orientales ex ejus sententia referenda sunt .  
 Perperam omnino : quum Sixtus manifeste loquatur de  
 suavi Christi Domini Providentia , qua statuerat , ut tan-  
 dem ab omnibus fidei Ducibus Nestorii perfidia damnare-  
 tur ; quod tum demum perfectum est , quum Johannes  
 Antiochenus tertiae Sedis Antistes ad damnandum Ne-  
 storium sese Cyrillo Alexandrino , ac Romano Pontifici  
 adjunxit : *Nam quid* , inquit laudatus Pontifex , *in in-*  
*ventorem malorum posset aliud* ( Johannes ) *judicare , ni-*  
*si quod probatur ipse per Sacerdotes suos , cujus agebatur*  
*caussa , sentire ? Statuerat hoc nimirum de nostrorum de-*  
*ser-*

*sertore castrorum, quod a Ducibus fidei sua deberet perfidia judicari: quorum verborum apertissimus sensus est, Quod Johannes de Nestorio aliud reapse, & potentia cum effectu conjuncta, sive ut Theologi de schola loquuntur; potentia consequente judicare non poterat, quam statuerat ille, cujus per Sacerdotes suos causa agebatur; hic vero quis alius nisi Christus? qui aeterno suo decreto statuerat, ut ab omnibus fidei Ducibus, hoc est ab omnibus Patriarchis & praecipuarum Sedium Episcopis, Nestorii perfidia judicaretur. Cui sane ordinationi, uti dictum est, resisti a Johanne re ipsa & cum effectu non potuit.*

Ait praeterea notae Auctor, Sixtum dicere non dubitasse, tunc demum, *quam vere sit sua causa monstrasse, quando jam consummata pace, ita res visus esset gubernare, ut tantae rei & talis judicium servaret suorum conventui Sacerdotum; in quo vel cuncti Duces fidei, ut volebat Johannes Antiochenus, vel ut loquitur ipse Sixtus, Apostolici, id est, Sedium Apostolicarum rectores omnes, cum suis Coepiscopis unirentur: quum antea, suspenso Johannis & aliorum Orientalium suffragio, quam vere in ea, id est, in Ephesina Synodo, causa Christi acta esset, nondum absolutissime liqueret. Itane vero Lectorum simplicitati illudere libet? Itane in re adeo manifesta aut fallere aut falli delectat? Conventus Sacerdotum, quem Adversarius pro Synodo obtrudit, in quam omnes fidei Duces, vel omnes Apostolici, id est Apostolicarum Ecclesiarum Rectores convenerint, & in qua demum demonstratum sit, quam vere in Ephesina Synodo Christi causa acta esset; nihil est aliud, quam Conventus Episcoporum, qui Romam alia omnino de causa, hoc est, ad celebrandum Sixti natale convenerant: accidit autem, ut quum Romae ejus-*



ejusmodi conventus Episcoporum adesset, litteras a Cyrillo Sixtus acciperet, quibus ipsi pacem cum Orientalibus initam significabat, damnato ab ipsis Nestorio, & Maximiani in ejus locum ordinatione suscepta. Quas litteras quum ad S. Petri confessionem omnibus Episcopis perlegisset, omnium de reditu Johannis & aliorum Orientalium gratulationes suscepit: qui proinde probare visi sunt, quod Sixtus miti usus oeconomia (cui non deerant qui obloquerentur) & patientia sua & lenitate Johannis & aliorum obstinationem perfregisset, eosque tandem ad Ecclesiae Catholicae unitatem revocasset. Itaque hanc caelestis Providentiae divinam ordinationem, qua Christus providerat, ut quum ille Episcoporum conventus Romae ad Sancti Petri memorias haberetur, peractae pacis nuncias Cyrilli litteras Sixtus reciperet, eaque pax cum omnium gratulatione susciperetur, pro certo ac manifesto indicio & argumento laudatus Pontifex habuit; quod in universo hoc negotio, ac potissimum in ea miti ac benigna, qua erga Johannem & ceteros Orientales usus fuerat dispensatione, revera Christi causa, secus ac quibusdam visum fuerat, acta esset. En Sixti verba (a):

*Christus denique Deus noster, quam vere sit sua causa, monstravit; quando ita res dignatus est gubernare, ut tantae rei & talis judicium servaret suorum conventui Sacerdotum. In unum congregati Apostoli de fide saepe tractarunt: in unum nunc convenientes Apostolici, de ejus victoria gratulantur. O relatio digna mittente, digna conventu! Gaudii caelestis judicium tales habere debuit cognitores. Quinam fuerint ejusmodi Apostolici cognitores, & ubi fuerit habitus ille Sacerdotum conventus;*

To. I. Par. II.

G g

fe-

(a) Epist. ad S. Cyril. Alex. 3. Par. Conc. Ephes. cap. XLI.

sequentia verba aperte demonstrant : *Et quia res & causa deposcit, locum quoque, ubi fuerant congregati, convenit non taceri. Ad Beatum Apostolum Petrum fraternitas universa convenit. Ecce auditorium congruens, auditoribus conveniens audiendis. Habuerunt Cœpiscopi nostri illum congratulationis testem, quem habemus honoris exordium. Sanctae namque & venerabili Synodo, quam natalis mihi dies, favente Domino, congregarat, quia sic credendum est, ipse (S. Petrus) praesedit; quandoquidem probatur, nec spiritu, nec corpore defuisse. Adfuit palmae, qui contentioni non defuit &c.* Hæc itaque Synodus est, de qua tanta notae Auctor commentus est : Hic ille Sacerdotum conventus, de quo tam præclara & mirifica prædicavit; in quo voluerat Johannes cunctos Duces fidei, vel, ut loquitur Sixtus, *Apostolicos*, id est Sedium Apostolicarum rectores omnes, cum suis Cœpiscopis convenire; & in quo tandem Christus demonstrare voluit, quam vere ipsius causa in Ephesina Synodo acta esset. Ita ne in re tam gravi bonis Viris, & nihil mali suspicantibus licet illudere? Quos ergo Sixtus Apostolicos vocat, haud alii sunt, quam Episcopi, qui ad Sedem Apostolicam convenerant, & fidem Apostolicam sectabantur, quemadmodum hujusce vocis notionem in Epistola ad Johannem Antiochenum Sixtus ipse declarat (a) : *Ut sensu puro sequentes Apostolos, inter Apostolicos esse mereamur.*

Sixti verbis quam turpiter notae Auctor sit abusus, perspicue, ut mihi videtur, ostendi. Cetera ergo, quae suae confirmandae opinioni idem Auctor adducit: non sine debita censura prætereamus: „ Quod dudum, inquit,  
 „ edo-

---

(a) Ubi sup. cap. XLII.

„ edoctus in Ecclesia Theodosius Imperator , primum  
 „ quidem cum Synodo Ephesinae , sub Caelestino Sixti  
 „ Decessore , adhaesit , & Cyrillum ac Memnonem suis  
 „ Ecclesiis reddidit , nunquam tamen adduci potuit , ut  
 „ in Johannem & alios Orientales Episcopos gravius  
 „ quidquam decerneret ; e contrario vero ipsius Synodi  
 „ Episcopis edicto palam proposito significavit , *quod*  
 „ *quamdiu victurus esset* , eodem statu rerum manente ,  
 „ *Orientales Episcopos non condemnaret , in nullo coram*  
 „ *se convictos* , & paratos ubivis congregari , & tractare  
 „ cum aliis , *nemine volente cum his disceptare* . Postea  
 „ vero cum de pace tractari coeptum est , dejectiones om-  
 „ nes , sive privationes , aut interdictiones , medio tem-  
 „ pore attentatas , irritas esse voluit , quas Sixtus item  
 „ *praecoquas* judicabat & immaturas , quod ea nondum  
 „ haberetur consensus , cui repugnare poenale esset &c.

Quum Regum atque Imperatorum non sit de fidei  
 caussis & Ecclesiae judicium proferre , haec Theodosii de-  
 creta aliter probare non possumus , quam Sixto Pontifici  
 probata fuerunt . Hic vero non ideo dejectiones Episcopo-  
 rum , qui Ephesinae Synodi decretis reluctabantur , imma-  
 turas & *praecoquas* judicabat , quod ea nondum habere-  
 tur consensus , cui repugnare poenale esset &c. sed , quod  
 Johannem Antiochenum & alios Orientales , quos Nesto-  
 rii Personae , non dogmati patrocinari , haud immerito ju-  
 dicabat , ipsius quoque Nestorii damnationi ac dejectioni ,  
 & Maximiani in ejus locum subrogationi , deque his rebus  
 decreto Synodi consensuros sperabat ; ac proinde & pa-  
 tientia , & lenitate , ac prudenti oeconomia eos interim  
*sustinendos* , eorumque animos expugnandos existima-  
 bat . Hanc enim cum ipsis agendi rationem prudenti di-

spensationi, & Apostolicae oeconomiae tribuendam esse; latissime Thomassinus demonstrat Dissert. X. in Synod. Ephes. I. num. XLIV. & seqq. ubi inter cetera eleganter observat, ac monet: Quod Orientales in Cyrilli anathematismos & in Synodum Ephesinam moliti sunt, non jura sed facta esse; nec in exemplum trahenda, sed damnanda prorsus: etsi tunc ex indulgentia ea dissimulari ab Ecclesia Catholica necessum fuerit: Ac subjungit: Nemo ergo Johannis, nemo Orientalium abutatur exemplo. Nam quod remisso tunc jure toleratum est, id alias forsan ex juris rigore percelleretur. Dispensationis quippe non necessitas, sed potestas & arbitrium penes Ecclesiam est: aut non alia saltem, quam ex sua ipsius caritate profecta necessitas. Ceterum haec ita velle interpretari, ut quodam quasi jure nitantur, quod nondum habito Orientalium suffragio, ea nondum haberetur consensus, cui repugnare poenale esset, aut universalis Ecclesiae auctoritati contumeliosum, ab ipsius Sixti Pontificis mente per quam alienum est, qui ante initam pacem haec ad Cyrillum scripserat (a): *De Antiocheno autem, & reliquis, qui cum eo sectatores fieri Nestorii voluerunt, & de cunctis vero, qui contra Ecclesiasticam disciplinam Ecclesias regunt, accipientes, hoc definivimus custodiendum; ut si respuerint, & cum suo Duce, rejecerint omnia, quaecunque sancta Synodus, nobis confirmantibus, rejecit, redeant in Sacerdotum confessum. Sicut enim persistentes prioribus, non potuerunt in nostra esse communione: sic volumus, eos, propter unitatem ac pacem Ecclesiarum, satisfacientes, ut diximus, suscipi. Ipsi vero invenientur in se ipsos aequam sententiam protulisse, si extra manentes*  
*ostend-*

---

(a) 3. Par. Conc. Ephes. ex nova Baluz. Collect.

ostenderint, se cum dejecto & expulso tantae impietatis socios atque participes. Itaque Sixtus quamquam Orientales, prudenti quadam utens oeconomia, nondum e suis sedibus deiciebat, attamen eos in sua & Ecclesiae Catholicae communione non habebat, nec eos suscipiendos, & in sacerdotum confessum revocandos decernebat, nisi resipiscentes, nisi satisfacientes, nisi rejicientes omnia, quae Synodus Ephesina per Sedem Apostolicam confirmata rejecerat: cui proinde resistere & poenale erat, & universali Ecclesiae contumeliosum; quaeque adeo jam tunc inducebat insuperabilem parendi necessitatem: ut ipsemet Illustrissimus Auctor, ad quem tandem Adnotator provocat, diserte his verbis fatetur (a): „Postremo Caelestius ipse, re tota peracta, ad sanctam Ephesinam Synodum mittit Epistolam, quam sic auspicatur: *Tandem malorum sine gaudendum est*: Ubi finem agnoscat, Lector eruditus intelligit: Post damnatum scilicet Oecumenici Concilii, hoc est, totius Ecclesiae Catholicae INDECLINABILI AUTORITATE Nestorium.

#### C A P U T I V.

„ De Ephesino Latrocinio: Quid Leo egerit:  
 „ ut ultimam sententiam futurae uni-  
 „ versali Synodo reservavit.

**F**atetur Illustrissimus Adversarius, majore verisimilitudine a nobis objici Ephesinam Synodum pro Oecumenica a Theodosio Augusto, S. Leonis consensu, convocata, quam tamen idem Leo irritam declaravit. Respon-

---

(a) Sup. lib. XII. Cap. XIII. num. X.

spondet tamen, eam Synodum, licet legitime congregatam, ab ipsis initiis legitimæ Synodi titulo caruisse. Verum actorum in ea Synodo *nullitatis* eas rationes adfert, quibus, ut supra ostendimus, quum de Chalcedonensi Synodo disliceremus, manifeste probatur, totam Occumenicæ Synodi potestatem ex Romani Pontificis auctoritate pendere; quum eo neutiquam consentiente, irrita sit & plane nulla Synodi Occumenicæ celebratio; irrita pariter & nulla sint Concilii generalis decreta, quæ non juxta normam & regulam a Pontifice Romano præscriptam condita fuerint. Quæ, ipsomet fatente Illustrissimo Adversario, præcipuæ sunt rationes, ob quas omnes, inquit, agnoscunt, Ephesinam secundam Synodum, non modo iniquam, verum etiam per se nullam & irritam fuisse, neque tantum propter vim, sed etiam vel maxime ex defectu potestatis, quo defectu nullus est major.

„ Jam vero, *subjungit*, nemo negat, ad Papæ officium pertinere, ut his provideat, detque operam, ne  
 „ Fideles Concilii Occumenici nomine in fraudem inducantur. Id vero nos contendimus, congrue & efficaciter fieri non posse, nisi Romani Pontificis sit, Acta Occumenicæ Synodi retractare, eaque auctoritate sua & judicio rata vel irrita declarare; auctoritate, inquam, & judicio, cui a nemine resisti possit, & quæ compescere valeat eorum contumaciam, qui rationibus, quibus aliqua Synodus irrita demonstratur, minime moveantur.

Itaque officio suo continuo functum esse Leonem, Meldensis Episcopus observat: „ Verum ita, *inquit*, sententiam temperavit suam, ut judicium daret, non peremptorium, sed provisorium. Itaque Ephesinam Synodum ratam esse non est passus: Flavianum in communione

„ nione habuit, omniaque interim in suspenso esse voluit,  
 „ quoad Oecumenica Synodus haberetur. Synodo con-  
 „ gregandae ultimam sententiam reservavit. Id probat  
 ipsius S. Leonis, & S. Gelasii testimoniis, in quibus quanti  
 momenti sit, postea videbimus: ac subinde quaerit:  
 „ Quid ergo hinc consequuntur superioritatis Pontificiae  
 „ Defensores? Nempe, *inquit*, ut Pontifex Synodum  
 „ per se ab ipsis initiis nullam & irritam, non admittat  
 „ ille quidem; ultimum tamen iudicium futurae Synodi  
 „ relinquat arbitrio. Quodnam hinc ejus, quam quaerunt,  
 „ superioritatis indicium est? Nos autem, praeter illa,  
 quae jam indicavimus, hujusce *superioritatis* indicia &  
 argumenta; falsum quoque omnino esse contendimus;  
 quod ipse Illustrissimus Adversarius docet, ut, quoad ejus  
 fieri potest, Romani Pontificis in hoc negotio auctori-  
 tatem deprimat; nempe adversus hanc Synodum Ephesinam  
 dedisse Leonem iudicium, *non peremptorium, sed proviso-*  
*rium*: Synodo congregandae ultimam sententiam reser-  
 vasse: ultimum iudicium futurae Synodi arbitrio reliquis-  
 se. Haec, inquam, falsa esse contendimus, & sequenti  
 Articulo demonstrandum aggredimur.

## ARTICULUS UNICUS.

*S. Leo secundam Ephesinam Synodum supremo  
 ac peremptorio iudicio nullam &  
 irritam declaravit.*

**S**ANCTUM Leonem statim atque per Hilarum Diaco-  
 num, qui Epheso Dioscori tyrannidem fugiens, Ro-  
 mam pervenerat, certior eorum factus est, quae in Ephe-  
 sino

fino Latrocinio contra Canones ac tyrannice gesta fuerant, omnia ipsius acta in Romana Synodo rescidisse, ac penitus reprobasse, ipsemet Hilarus in Epistola ad Pulcheriam Augustam locupletissimus testis est: *Vestra*, inquit (a), *veneranda Clementia cognoscat, a praefato Papa cum omni Occidentali Concilio reprobare omnia, quae in Epbeso contra Canones per tumultus & odia saecularia a Dioscoro Episcopo gesta sunt, & nulla ratione haec in his partibus suscipi posse, quae per potentiam praedicti non sine laesione fidei, & praejudicio sanctissimi Viri innoxiique commissa sunt.* Itaque falsum omnino est, quod quidam apud Cl. Thomassinum (b) commenti sunt, & quod idem Auctor argumentum esse docet *haereticae vertiginis & imperitiae*; nempe S. Leonem solo dissensu, non autem vero & Synodico iudicio acta Ephesina irritasse: falsum quoque quod Meldenensis Episcopus docet, & in idem recidere videtur, nempe laudatum Pontificem satis habuisse, quod eandem Ephesinam Synodum ratam esse, passus non est: quod Flavianum in communione retinuit: quod omnia interim in suspensio esse voluit, quoad Oecumenica Synodus haberetur. Falsa prorsus haec esse, ex adlatis Hilari verbis apparet, quibus aperte testatur, Sanctum Leonem Ephesinae Synodi acta non modo rata non habuisse, verum ea Synodico iudicio penitus reprobasse; nec tali iudicio, quod a futurae Synodi iudicio penderet, aut posset aliquando retractari; sed quo constabat, *nulla ratione ea suscipi posse*, quae auctore Dioscoro Ephesi gesta fuerant.

Multo autem id luculentius demonstratur ex ipso

S. Leo-

(a) 1. Par. Conc. Chalced. cap. XXIV.

(b) Diff. XI. in Conc. Constantinop. sub Flav. & Ephes. II. n. XV.



S. Leone Epistola XLII. ad Marcianum Augustum, in qua conceptis disertisque verbis declarat, non esse in proxima Synodo retractandum, utrum Eutyches impie senserit, & utrum impie Dioscorus judicavit; quo nihil disertius desiderari potest ad Illustrissimi Auctoris opinionem refellendam: *Nimis, inquit, iniquum est, ut per paucorum insipientiam ad conjecturas opinionum, & ad carnalium disceptationum bella provocemur: tanquam REPARATA DISCEPTATIONE TRACTANDUM SIT, UTRUM EUTYCHES IMPIE SENSERIT, ET UTRUM IMPIE DIOSCORUS JUDICAVIT, qui in sanctae memoriae Flaviani condemnatione se perculit, & simpliciores quosque, ut in eandem ruinam provolverentur, impegit.* Si Leo, ut vult Melden- sis Episcopus, judicium dederat non peremptorium, sed provisorium; si omnia in suspenso esse volebat, quoad Oecumenica Synodus haberetur; si ultimum judicium futurae Synodi relinquebat arbitrio; utique in proxime futura Synodo reparata disceptatione tractandum erat, utrum impie Dioscorus judicasset. Quod tamen ne fieret, S. Leo gravissimis hisce verbis cavebat.

Praeterea idem sanctissimus Pontifex, non modo Flavianum, non modo Eusebium Dorilaeensem praedatoria Synodi sententia dejectos, in communione retinuit, & pro Episcopis habuit; verum etiam Clero & Populo Constantinopolitano scribens apertissime protestatus est, se nunquam in sua communione, vel inter Episcopos habiturum, qui, incolumi ac superstite Flaviano, fuisset in ejus locum Regiae Urbis Episcopus ordinatus (a): *Quisquis enim, inquit, incolumi atque superstite Flaviano Episcopo vestro, sacerdotium ejus ausus fuerit invadere, nunquam*

To.I. Par.II.

Hh

in

---

(a) 1. Par. Conc. Chalced. cap. XXII.

*in communione nostra habebitur, nec inter Episcopos poterit numerari.* Quod profecto Leo non scriberet, si adversus Ephesinum Concilium iudicium dedisset provisorium, non peremptorium, ultimum autem de illo iudicium futurae Synodi reliquisset arbitrio: juxta hanc enim hypothese[m] scribere debuisset, se neque in sua communione, neque inter Episcopos habiturum, quicumque Flaviani Sacerdotium ausus fuisset invadere, antequam Synodus Oecumenica haberetur, quae Ephesini Concilii acta probaret, ejusque de Flaviano iudicium confirmaret. Profecto quum ea Sanctus Pontifex ad Constantinopolitanos scribebat, definitivam sententiam de Ephesino Latrocinio protulerat, cujus iudicio fuerat Flavianus exauctoratus.

Quid ergo, inquis, Synodo opus fuit, si Leo peremptorio iudicio Ephesinae Synodi decreta resciderat? Quid ergo, inquam, S. Leo Episcopos, qui in Ephesino Latrocinio ceciderant velut ab Ecclesiae communione submotos non nisi tanquam poenitentes, & immane facinus detestantes atque damnantes, proque illo plenam exhibentes satisfactionem, ad eandem revocandos esse decrevit? (a) *Qui plenae satisfactionibus male gesta condemnant, & accusare magis se eligunt, quam tueri, pacis & communionis nostrae unitate laetentur: ita ut digno prius anathemate, quae contra fidem Catholicam sunt recepta, damnentur.* Quid, inquam, id statuit S. Leo, si omnia interim in suspenso esse volebat, quoad Oecumenica Synodus haberetur? Quid etiam, si omnia interim in suspenso esse debebant, idem S. Leo constituit, ne Dioscori, Juvenalis, & Eustathii nomina ad sacrum altare recitarentur? quoniam, inquit (b), *iniquum nimis est atque in-*

con-

---

(a) Epist. XL. ad Anatol. cap. I. (b) Ibid. cap. II.

congruum, eos, qui innocentes & Catholicos sua persecutione vexarunt, Sanctorum nominibus sine discretione misceri; quum damnatam impietatem non deferentes, ipsi se sua pravitate condemnent; quos convenit aut percelli pro perfidia; id est, non modo a communione removeri, verum & suis Sedibus deturbari; aut laborare pro venia. Quid est, quod eisdem sceleris Auctores, etiam poenitentes, & a facti sui defensione cessantes, suumque damnantes errorem, proque illo satisfaciennes, non tamen recipi in communionem permittit; sed Apostolicae Sedi reservari decernit, quae de illis, omnibus mature perpensis, sua auctoritate constituat? (a) Si forte respiciunt, & a facti sui defensione cessantes, in condemnationem proprii convertuntur erroris, eorum si sati factio talis accedit, quae non refutanda videatur, maturioribus Apostolicae Sedis consiliis reservetur, ut examinatis omnibus atque perpensis, de ipsis eorum actionibus, quid constitui debeat, aestimetur. Denique, si ultimum iudicium futurae Synodi relinquebatur arbitrio, quid est, quod Sanctus Pontifex conceptis verbis nolebat, reparata disceptatione tractari, utrum impie Dioscorus iudicasset? Synodo ergo, Leonis iudicio, opus erat, non ut gestorum Dioscori facta ab ipso damnatio retractaretur; sed, ut in eadem ad Marcianum Epistola statim subiungit, multis jam ex iis, qui Ephesi ceciderant ad sati factionis remedia conversi, & veniam de inconstanti trepidatione poscentibus, tractaretur, qualiter esset eorum precibus annuendum: ut Dioscorus, Juvenalis, Eustathius, alique Latrocinialis Synodi duces in futuro Concilio aut laborarent supplicarentque pro venia, aut suis sedibus pelleren-

H h 2

tur:

---

(a) Epist. XLVI. ad Anatol. Tom. IV. Concil.

tur: denique, ut injuria, quae Sedi Apostolicae fuerat per male gestam Synodum irrogata, etiam per bene gerendam Synodum, & non solum ipsius Sedis Apostolicae animadversione repararetur.

Hunc esse verborum Gelasii, quae Meldensis Episcopus objicit, genuinum sensum, adeo perspicuum est, ut mirum profecto sit, Sanctum Pontificem opinionis suae testem ab eo fuisse productum. Nam eo ipso in loco, quem Bossuetius objicit, adeo Sanctus Pontifex expresse docet, Ephesini Concilii decreta sola sua auctoritate Sedem Apostolicam rescidisse, ac rescindere potuisse, ut nihil discretius desiderari possit (a): *Sed nec illa praeterimus, quod Apostolica Sedes frequenter, more majorum, etiam sine ulla Synodo praecedente, & absolvendi, quos Synodus inique damnaverat, & damnandi, nulla existente Synodo, quos oportuit, habuerit facultatem.* Ac duobus aliis, hoc est, in Athanasio & Chrysostomo restituendis; hujusce rei prolatis exemplis; itemque, subjungit, *sanctae memoriae Flavianum, Pontificum congregatione damnatum, pari tenore, quoniam sola Sedes Apostolica non consensit, absolvit; potiusque qui illic receptus fuerat, Dioscorum secundae Sedis Praefulem sua auctoritate damnavit, & impiam Synodum, non consentiendo, submovit; ac pro veritate, ut Synodus Chalcedonensis fieret, sola decrevit.* Quin & adjungit, ac merito adjungit, quod quidquid adversus Ephesina decreta in Chalcedonensi Synodo decerni debuit, sola ipsa Sedes Apostolica praescripsit, ac proinde merito ad ejus tantum refertur auctoritatem: *In qua (Chalcedonensi Synodo) Pontificibus innumeris, qui latrocinio corruebant Ephesino, veniam poscentibus,*  
*sola*

---

(a) Epist. XIII. ad Episc. Dardan.

*sola concessit; & in sua perfidia permanentes, nihilominus sua auctoritate prostravit.* His porro Chalcedonensem Synodum consensisse: quoniam, quemadmodum quod Ephesina Synodus absque Sedis Apostolicae auctoritate decreverat, ab eaque fuerat improbatum, constare non poterat: ita quod eadem Sedes Apostolica probaverat ac decreverat, non poterat Chalcedonensi Synodo non probari: *Quam (Sedem Apostolicam) Congregatio, quae illic (Chalcedone) pro veritate reparanda collecta fuerat, est secuta: quoniam, sicut id, quod prima sedes non probaverat, constare non potuit; sic quod illa censuit judicandum, Ecclesia tota suscepit.* Itaque, Gelasii iudicio Ephesinae Synodi acta Sedes Apostolica sola rescidit, & in eadem sententia confirmanda obsequentem Chalcedonensem Synodum habuit.

## CAPUT V.

„ A Chalcedonensi Synodo nullam in fidei negotiis confirmationem petitam: Cujusmodi  
 „ di sit ea; quam S. Leo ultro dederit :

**I**N Concilio Chalcedonensi, quemadmodum omnes norunt, & Illustrissimus Adversarius observat, & fidei regula ac definitio promulgata est, & aliquot conditi sunt Canones ad disciplinam Ecclesiasticam pertinentes. Porro in praesenti Capite de sola fidei confirmatione tractatur: De Canonibus autem per Leonem probatis aut improbatis Capite octavo disseritur: „ Et quidem, *inquit,*  
 „ quod ad fidem, fideique causa depositum Dioscorum,  
 „ attinet; Patres Chalcedonenses in Relatione ad Leo-  
 „ nem,

„nem, nullam confirmationem petunt, satis esse rati;  
 „quod Leonis Epistolam praelucentem; ipsum sibi, *ut*  
 „*membris caput, praesidentem, ac spiritu praesentem,*  
 „ac pene in Legatis visum, habuissent. Et nos id satis  
 esse fatemur, ut edita per Synodum Oecumenicam fidei  
 definitio statim invictum robur obtineat, & irretractabi-  
 lem firmitatem. Verum quum ejusmodi auctoritas Conci-  
 liorum de fide decretis non adsit, nisi propter eorum cum  
 edita a Romano Pontifice fidei Catholicae formula conso-  
 nantiam; ac nisi propterea quod Patres in iis decretis con-  
 dendis Romano Pontifici velut membra capiti adhaese-  
 runt, eumque in omnibus ducentem ac dirigentem secuti  
 sunt: quis non videat, perinde esse, ad extollendam Ro-  
 mani Pontificis supra Concilia Oecumenica auctoritatem;  
 sive certam illis legem ac regulam statuatur, a qua declina-  
 re non liceat; sive decretis sine hac certa regula conditis,  
 seu quibus haec regula non praeluxit, opus sit Romani  
 Pontificis confirmatione, ut summam & indeclinabilem  
 obtineant auctoritatem? Utrumlibet enim contingat, per-  
 spicuum est, inde jure ac merito colligi, esse prorsus irre-  
 formabile Romani Pontificis de fidei rebus judicium;  
 quum aut forma sit, ad quam referri ac formari debent ge-  
 neralium Conciliorum decreta; aut, nisi hac adhibita re-  
 gula formata fuerint, Pontificis retractationi ac refor-  
 mationi obnoxia sint, antequam Sedis Apostolicae aucto-  
 ritate confirmentur. Utroque modo in Concilii Chalce-  
 donensis decretis Romani Pontificis auctoritas ac potestas  
 enituit. Et quoniam de primo, quum saepe de illo disce-  
 ruerimus, non est hic locus disceptandi; quid in altero  
 pro nostra doctrina praesidii ac momenti sit, expendamus.

## ARTICULUS UNICUS.

*Quantum in confirmatione Apostolica ponderis ac momenti sit, ex Concilio Chalcedonensis decretis aut de fide, aut ad fidem quodammodo pertinentibus demonstratur !*

„ **E**T res quidem Synodi, inquit Bossuetius, circa  
 „ fidei negotium sic se habent, ut de suis decretis a  
 „ Leone confirmandis, ne quidem cogitasse constet; &  
 „ tamen S. Leo etiam non petitam confirmationem misit.  
 „ Qua occasione ipse idoneus testis exponet. Quippe cum  
 „ occasione improbatum a Leone 28. Canonis maligni homines  
 „ in vulgus sparsissent, Chalcedonensem Synodum  
 „ ab ipso improbatam, ad Episcopos, qui in ea congregati  
 „ fuerant, haec scribit (a): *Ne ergo per malignos interpretes  
 „ dubitabile videatur, utrum, quae in Synodo Chalcedonensi  
 „ per unanimitatem vestram de fide statuta sunt, approbem:*  
 „ *haec ad omnes fratres & Coepiscopos nostros, qui praedicto  
 „ Concilio interfuerunt, verba direxi, ut omnium Fidelium corda  
 „ cognoscant, me non solum per fratres, qui vicem meam  
 „ executi sunt; sed etiam per approbationem gestorum Syno-  
 „ dalium propriam vobiscum iniisse sententiam; in sola videlicet  
 „ fidei causa, adversus malignos interpretes. Quod factum  
 „ fatebuntur omnes, non eo spectare, ut incerta firmentur;  
 „ sed, ut certa, summaque & indeclinabili auctoritate facta,  
 „ magis magisque asserantur & inculcentur.*

Et

---

(a) 3. Par. Conc. Chalced. cap. XVI.

Et nos id ultro fatemur, neque in eo vim nostrae orationis & argumenti reponimus; sed illam inde accersimus, quod ex hac aliisque Epistolis constet, fuisse tum pervulgatam opinionem, S. Pontificem, qua Canonem 28. Concilii Chalcedonenfis ad disciplinam spectantem, auctoritate rescidit, eadem & decretum ad fidem pertinens rescindere potuisse. Nisi enim haec invaluisset opinio, frustra & irritum prorsus conatu Chalcedonenfi Concilio defectum Apostolicae confirmationis ipsius hostes objecissent. Frustra autem quisquam reponeret, ex nostra quoque sententia, Synodum, cujus decreta ad certam Sedis Apostolicae regulam exacta sunt, confirmatione Apostolica non egere. Id enim tum verum est, quum hac de re manifesto constat, aut nulla suppetit dubitandi ratio. At qui indiscriminatim acta Concilii Leone improbata fuisse effutiebant, neutiquam constare volebant de Concilii cum Romano Pontifice in unam eandemque sententiam consensu & conspiratione; & hanc dubitandi rationem adferebant, quod quaedam hujusce Synodi acta Sanctissimus Pontifex improbaverat. Et quidem, ut ipse ait, (a) nulla de hac re unquam exorta fuisset dubitatio, si quas ad Anatolium dederat litteras, proferre, & non potius occultare, ipse Anatolius voluisset: his enim quemadmodum cum Canonem Concilii Nicaeni decretis adversum rejiciebat: ita fidei definitionem ut Apostolicae doctrinae consonam confirmabat. Has ergo litteras quum publicae luci Anatolius invidisset, alias dedit, quibus Concilii Chalcedonenfis de fide decreta confirmans, omnem de medio dubitationem auferret. Hanc *non petitam confir-*  
*ma-*

---

(a) Vid. Epist. sup. cit. & Epist. LIX. ad Marclan. Aug. Tom. IV. Conc.



*mationem Leonem ultro misisse, Bosluetius narrat. Quod tamen falsum est. Hanc enim Marcianus Augustus petiit, ut ex laudati S. Leonis ad ipsum Epistola compertum est: Quum vestro, inquit, praecipuo opere sit effectum, ut per Synodale Concilium, damnatis impii dogmatis defensoribus, omnes vires sacrilegus error amitteret: ad ejusdem devotionis pertinet palmam, si malum, quod in suis ducibus est oppressum, etiam in quibuscumque reliquiis deleatur. Quod facilius Clementia vestra arbitratur implendum, si per universas Ecclesias, definitiones sanctae Synodi Chalcedonensis Apostolicae Sedi placuisse doceantur. De quo quidem ratio non fuit ambigendi, quum ei fidei omnium subscribendo consensus accesserit, quae a me secundum formam Apostolicae doctrinae ac paternae traditionis emissa est &c. Quia vero omnibus modis obediendum est Pietati vestrae religiosissimaeque voluntati, Constitutionibus Synodalibus, quae mihi de confirmatione fidei Catholicae, & haereticorum damnatione placuerunt; lubens adjeci sententiam meam: Quae ut in notitiam omnium Sacerdotum Ecclesiarumque perveniat, vestrae Clementiae praeceptio ordinare dignabitur. Delendis Eutychianae impietatis reliquiis hoc Pontifex, hoc Imperator opportunum judicant esse remedium, si postquam de hac re dubitari coeptum esset, Chalcedonensis Concilii definitio per sedem Apostolicam confirmaretur. Unde colligere est, fuisse tunc omnibus persuasum, quod Synodaliū decretorum auctoritas ex Romani Pontificis confirmatione penderet.*

*Id porro longe luculentius apparet ex iis, quae pro vindicandis aut damnandis tribus Capitulis sequenti fasciculo scripta sunt. Qui enim Capitula propugnabant, non*

eo solum nitebantur, quod ea Chalcedonensis Synodus approbasset, verum etiam quod Concilii de illis iudicium Romanus Pontifex confirmasset: Qui vero Capitulorum damnationem urgebant, eorum causam retractari posse dicebant, quod S. Leo ad solam fidei causam ab Eutychianorum erroribus, & Dioscori furore ac tyrannide vindicatam, approbationem & confirmationem Apostolicam coarctaverat. Quod ad primum pertinet, id constat imprimis ex Ferrando Ecclesiae Carthagenensis Diacono ad Pelagium & Anatolium pro tribus Capitulis scribente, & maxime pro Epistola Ibae: *Si quis tunc* ( quum Epistola Ibae in Concilio Chalcedonensi recenseretur ) *accusator Epistolae, cujus Catholica esse dictatio claruit, ad maiora iudicia provocaret, accusationi forsitan secundum consuetudinem locus pateret. Sed quo iret? aut ubi majores in Ecclesia reperiret Iudices? Ante se habens in Legatis suis Apostolicam Sedem, qua consentiente, quidquid illa definivit Synodus, accepit robur invictum.* Et infra: *Quae finiuntur judicantibus Episcopis sanctis, & ad Beati Petri memoriam perducta, diligentius examinantur atque firmanentur, sequenda sunt, tenenda sunt, amplectenda sunt, in retractatione sub qualibet occasione teneri non debent.* Itaque acta Concilii Chalcedonensis de tribus Capitulis ideo retractationi obnoxia non esse iudicabat, quoniam pro certo habebat, eis ad Beati Petri memoriam perlatis ac diligentius examinatis, Apostolicae Sedis accessisse consensum, eaque consentiente, accepisse robur invictum. Paria his sunt, quae Facundus, alius eorumdem Capitulorum fervidus propugnator, in ejusdem Epistolae defensionem adfert lib. V. cap. V. *Sufficit nobis ad defensionem ipsius Epistolae, quod eam tanta Synodus,*

Et ipſus Auctor Synodi, Vir Apoſtolicus, Et in doctri-  
na veritatis toto orbe notiſſimus, approbavit. Haec eſt  
prima, Et immobilis ac ſecura noſtra ratio, quae nos  
tuetur, ac firmat adverſus omnes contradicentium quae-  
ſtiones. Et infra: Cernis igitur, religioſe Princeps, ad  
hujus Epistolae deſenſionem ſufficere, quod eam probavi-  
mus orthodoxam a Synodo judicatam; nec a beato Leo-  
ne, ut fingebatur, expulſam, ſed potius cum omnibus,  
quae ibi ſunt de fide ſtatuta, firmatam. Non ergo hoc  
tantum ſufficere ad illius Epistolae deſenſionem exiſtima-  
bat, quod eam orthodoxam Chalcedonenſis Synodus ju-  
dicaveſſet; verum & illud addendum eſſe cenſebat, quod  
Synodi de illa judicium Romanus Pontifex adprobaveſſet.

At contra, qui trium Capitulorum damnationem ur-  
gebant, aut a quinta Synodo prolatam in ea damnationis  
ſententiam propugnabant, id totis viribus conabantur  
adſtruere, quod quaecumque fuiſſet de illis Patrum in  
Conſilio Chalcedonenſi ſententia, attamen retractari ea  
poterant, & novo examini ſubjici, quod hanc Synodi  
ſententiam nequaquam Romanus Pontifex adprobaveſſet.  
Communem hanc fuiſſe omnibus Capitulorum hoſtibus  
mentem, ex eodem Facundo Hermianenſi compertum  
eſt, cujus haec in ejuſdem libri capite quarto verba ſunt:  
*Illud etiam diſquiramus, quale ſit, quod dicentes, ad  
Romanam Eccleſiam definitionem tantum fidei, non etiam  
geſta Concilii Chalcedonenſis fuiſſe perlata, ex hoc vo-  
lunt efficere, ut credamus, quod in ipſa tantum fidei de-  
finitione beatus Leo Synodi Chalcedonenſis decreta firma-  
verit, Et nos quoque memoratam Epistolam Venerabilis  
Ibae damnuemus.... Ut etiam ex hoc quos potuerint in  
condemnationem Epistolae hujus adducant, tanquam ab*

*ipſo non fuerit approbata.* Tota fere in hoc eodem argumento verſatur per quam proluxa longeque fuſa Pelagii II. Epiftola ad Eliam Aquilejenſem, & alios Epifcopos Iſtriae Schiſmaticos, qui, ut ex eadem Epiftola conſtat, propter auctoritatem S. Leonis, a quo fuerat Chalcedonenſis Synodus confirmata, damnationi trium Capitulorum pertinaciter reluſtabantur. Quare ut eos ad deſcendam eorundem Capitulorum deſenſionem impellat, pluribus S. Leonis teſtimoniis demonſtrare Pelagius aggreditur, quod ſanctus Pontifex *auctoritatem Synodi in ſola fidei definitione conſtrinxit.* Unde colligit, quod etſi aliquid, ipſis etiam conſentientibus Apoſtolicae Sedis Legatis, praeter fidei cauſſam fuiſſet in Synodo definitum, propter Leonis diſſenſum, aut Apoſtolicae confirmationis deſectum, nullius eſſe deberet auctoritatis. Quod ille perſpicuo ac luculento S. Leonis teſtimonio confirmat, qui hanc peracta Synodo ad Maximum Antiochenae Sedis Antiftitem ſcripſerat (a): *Si quid ſane ab his Fratribus, quos ad ſanctam Synodum vice mea miſi, praeter id, quod ad cauſſam fidei pertinebat; geſtum eſſe perbibetur, nullius erit penitus firmitatis: quia ad hoc tantum ab Apoſtolica Sede ſunt directi, ut exciſis haereſibus, Catholicae eſſent fidei deſenſores. Quidquid enim praeter ſpeciales cauſſas Synodaliū Conciliorum ad examen Episcopale deferretur, poteſt aliquam dijudicandi habere rationem.* Ex qua S. Leonis auctoritate Pelagius conficit, Epistolam Ibae potuiſſe damnari, quamvis eam Apoſtolicae Sedis Legati, & ceteri omnes Epifcopi ſuis in Chalcedonenſi Synodo ſubſcriptionibus approbaſſent: *Quamvis quia approbata ſit, aut difficulter, aut nullatenus demonſtretur; licen-*

ter

---

(a) 3. Par. Conc. Chalced. cap. XVII.

ter tamen unusquisque eam reprehenderet, etiamsi Episcopi in eodem Concilio residentes suis illam subscriptionibus approbassent: quia postquam, Beato Leone scribente, ius retractandi & dijudicandi conceditur, etiam si qua esse poterat eorum qui interfuerant in privatis negotiis auctoritas, vacuatur. Ex quibus omnibus perspicue demonstratur, quod tum Capitulorum defensoribus, tum eorum hostibus & impugnatoribus conveniebat, accessione vel detractioe approbationis Sedis Apostolicae fieri, ut acta Occumenicae alioqui Synodi; retractari possint vel non possint: omnibusque id praesumptum animo & praejudicatum erat, ea demum rata & fixa, nec ad novae disputationis incudem revocanda esse Synodi Chalcedonensis decreta, quae Leo Pontifex confirmasset. Proindeque merito a nobis cum doctissimis Theologis constitutum est, Conciliorum generalium decreta, etiam consentientibus Sedis Apostolicae Legatis, edita, antequam a Pontifice confirmentur, non obtinere summam & irretractabilem auctoritatem; nisi Legati ad Synodum accedant, instructi prius & moniti de Ecclesiae Romanae fide atque sententia circa ea, quae sunt in Synodo pertractanda. Quamquam enim Ecclesiae de librorum doctrina iudicium proxime ad fidem pertineat; attamen iudicium Synodi Chalcedonensis de Epistola Ibae ad examen revocari posse ex S. Leone Pelagius demonstrabat, quoniam Legatis Apostolicae Sedis minime constabat; cujusmodi esset de illa Epistola Ecclesiae Romanae iudicium.

## CAPUT VI.

„ Quintum, sextum, septimum, octavum  
 „ Concilium.

**Q**uae praesenti Capite Bossuetius observat, a nobis interim omitti possunt. Nam sexti, septimi, & octavi Concilii decretis Apostolicae Sedis Epistolae praeluxerunt, & formam ac regulam praescripserunt. Fatemur autem, per se valere, & nova & speciali confirmatione non egere, quae ad hanc normam exacta in Conciliis Oecumenicis decernuntur. Attamen petita est ab his Synodis Sedis Apostolicae confirmatio; utique non frustra, nec sine causa: quis autem fuerit petitae confirmationis effectus, ad Caput nonum ac decimum exponemus; ubi etiam de quintae Synodi approbatione & confirmatione differemus.

## CAPUT VII.

„ Reliquae Synodi usque ad Tridentinam:

„ **E**X primarum Synodorum confirmationibus, inquit Bossuetius, de reliquis judicare in promptu est. Post octo illas primas, quatuor omnino sunt, quibus Romanus Pontifex non ipse adfuerit, Pisana, Constantiensis, Basileensis, Tridentina. Ceteras per se ipse gessit. At nos quae ad tres priores Synodos adtinent, omittere in praesentia decrevimus: plura enim dicenda essent, de quibus suo loco data opera differemus.

Sola

Sola ergo superest Tridentina Synodus, quae, ut ipsemet Illustrissimus Adversarius observat, „ultimo decreto suo Romani Pontificis confirmationem peti jubet eorum, quae a se decreta & definita essent. Eo autem „usque intellexit, eas definitiones vel tum valuisse, ut „statim post eam confirmationem petitam acclamavit „Cardinalis a Lotharingia: *Sacrosanctæ Oecumenicæ Tridentina Synodus: Ejus fidem confiteamur, ejus decreta servemus &c.* Talia sentientes dum confirmationem „petunt, quid aliud, quam certa & valida magis magis, „que firmari & inculcari petunt? Hoc argumentum nullius esse ponderis, ex eo constat, quod non modo in Conciliis Oecumenicis, verum & in quibusdam particularibus Synodis, adversus erumpentes haereses & haereticos similes Anathematismi legantur: nec tamen propterea quis dixerit, ejusmodi particularium Synodorum de haeresibus & haereticis judicia confirmatione Apostolica non egere, aut vim habere indeclinabilem, & summam auctoritatem, & robur invictum, nisi a Pontifice confirmentur.

## CAPUT VIII.

- „ De Canonibus Conciliorum generalium a Sede
- „ Apostolica confirmatis vel infirmatis:
- „ Constantinopolitani Canones, praefertim III. Chalcedonenfes Canones, praefertim XXVIII.

**N**olumus hîc generatim de Canonum in Conciliis generalibus editorum auctoritate differere; & quomodo in universa Ecclesia recepti sint ac vim obtinuerint; & quo

& quo pacto in iis recipiendis & confirmandis Sedis Apostolicae consensus & auctoritas intervenerit, explicare: haec enim in alium locum rejicienda censemus. Quare de solis secundae Synodi Canone III. & Chalcedonensis Concilii XXVIII. praesentem disputationem instituimus; qua demonstrandum aggredimur, quantum in iis rejiciendis & infirmandis Sedis Apostolicae in Synodos Oecumenicas potestas & auctoritas emicuerit.

## ARTICULUS UNICUS:

*Ex Concilio Chalcedonensi ejusque Canonibus demonstratur, ex Romani Pontificis consensu vel dissensu pendere, quod rata vel irrita sint, quae a Conciliis Oecumenicis decernuntur.*

**F**ulcitur haec thesis apertissimo S. Gelasii in Tomo. seu Tractatu de Anathemate, testimonio: *Totum, inquit, in Sedis Apostolicae positum est potestate. Ita quod firmavit in Synodo Sedes Apostolica, hoc robur obtinuit; quod refutavit, habere non potuit firmitatem: & sola rescidit, quod praeter ordinem Congregatio Synodica putaverat usurpandum.* Itaque ex Sedis Apostolicae consensu vel dissensu pendet, quod rata vel irrita sint, quae a Conciliis Oecumenicis decernuntur; idque ex Concilii Chalcedonensis Canonibus demonstratur: quoniam, ut Gelasius observat, quibus illa consensit, quos firmavit, ii robur obtinuerunt; quibus adsensum negavit, quos reprobavit, iis omnem ademit auctoritatem, & e numero authenticorum, ac legitimorum, ipsis Orientalibus, ipsis

Con-



Constantinopolitanis Episcopis, ipsis Imperatoribus consentientibus, expuncti sunt. Id vero Gelasius ad eam auctoritatem refert, qua *totum*, ut apud ipsum Anatolius; cujus haec sunt verba, profitebatur, *in Sedis Apostolicae positum est potestate*; quam videlicet potestatem in Apostolorum Principe accepit; cujus auctoritate S. Leo, quae per Chalcedonensem Synodum perperam fuerant constituta, cassaverat (a): *Consensiones Episcoporum, sanctorum Canonum apud Nicaeam conditorum regulis repugnantes, in irritum mittimus, & per auctoritatem Beati Petri generali prorsus definitione cassamus*. Hinc autem illud conficitur argumentum, quod sibi solvendum his Bossuetius verbis proponit: „Hic ergo objiciunt, Ro-  
 „manum Pontificem Conciliis Oecumenicis longe superiorem, quorum Canones absque ejus approbatione  
 „non valeant, imo ab eo ex Beati Petri auctoritate cassentur, ipsis Orientalibus, ipsis Constantinopolitanis Episcopis, ipsis Imperatoribus consentientibus.

Ab hoc argumento quam feliciter Meldenis Episcopus se expediat, videamus: „Haec, *inquit*, qui objiciunt, ne statum quidem quaestionis intelligunt. Defendimus enim Constantiense Concilium, quo nempe Concilii potior auctoritas cognoscatur in fide, in schismate, in reformatione generali promovenda. At Orientales Episcopi isto Canone Episcopo Constantinopolitano consulebant, Imperatori gratificabantur, non fidei, non schismati, non reformationi generali providebant. Imo vero rectum ordinem, ac primarum Sedium honorem ab antiquo institutum evertebant, qui rei universae Ecclesiasticae conducere videretur. Non ergo adversus

To. I. Par. II.

K k

effrae-

---

 (a) Epist. ad Pulch. Aug. 3. Par. Conc. Chalced. cap. VII.

„ effraenem aut extraordinariam potestatem , Canones  
 „ ac jura , libertatemque Ecclesiasticam tuebantur , quod  
 „ Constantienses volebant ; sed Papae , Canones rectum-  
 „ que ac probum & canonicum ordinem defendenti re-  
 „ pugnant ; ac proinde ad nostram quaestionem non  
 „ pertinet , quidquid hîc actum ab illis fuit .

Haec quidem cum aliqua veri specie ad propositi vim  
 argumenti labefactandam adferri possent , si omnino no-  
 va , si veteris Canonis & consuetudinis auctoritate desti-  
 tuta , & quae in Ecclesiasticae disciplinae eversionem , in  
 ordinis perturbationem , in Nicaenorum Canonum &  
 aliarum Sedium injuriam manifeste vergerent , Chalcedo-  
 nensis Synodus statuisset . At Patres tantum abest , ut id  
 agnoscerent , ut etiam contenderent , quae ab ipsis statuta  
 fuerant , & vetusti Canonis , & veteris consuetudinis au-  
 thoritate niti , paci & ordini in Ecclesiis servando apta esse  
 & apprime necessaria , denique in ea non modo Principem  
 religiosissimum & Senatum , quorum utique habenda esset  
 aliqua ratio , verum & omnes Episcopos , eos quoque  
 ipsos , quorum maxime intererat , consentire ; ac proinde  
 tum nemini injuriam , tum nullum Nicaenis decretis vul-  
 nus infligi . Haec constant ex sequentibus sanctae Synodi  
 verbis in Relatione ad Sanctum Leonem : *Indicamus vero ,  
 quia & alia quaedam pro rerum ipsarum ordinata quie-  
 te , & propter Ecclesiasticorum statutorum definitivum  
 firmitatem , scientes , quia & vestra Sanctitas addiscens ,  
 & probatura , & confirmatura est eadem . Eam namque  
 consuetudinem , quae ex longo jam tempore permansit ,  
 quam habuit Constantinopolitanorum Sancta Dei Eccle-  
 sia , ad ordinandum Metropolitanos Provinciarum , tam  
 Asianae , quam Ponticae & Thracicae , & nunc Synodali*  
 de-

decreto firmavimus, non tam Sedi Constantinopolitanae aliquid praestantes, quam Metropolitanis Urbibus quietem congruam providentes, eo quod frequenter Episcopis vitam finientibus, multae turbae nascuntur, Clericis ac Populis, qui per easdem sunt Civitates, absque rectore remanentibus, & Ecclesiasticum ordinem confundentibus, quod nec vestram latuit sanctitatem, maxime propter Ephesios, unde quidam vobis saepius importuni fuerunt: Confirmavimus autem & CL. Sanctorum Patrum regulam, qui in Constantinopoli congregati sunt sub piae memoriae majore Theodosio, quae praecepit, post vestram Sanctissimam & Apostolicam Sedem, bonorem habere Constantinopolitanam, quae secunda est ordinata &c. Quae igitur ad interemtionem totius confusionis, confirmationem vero Ecclesiasticae ordinationis definivimus, haec sicut propria & amica, & ad decorem convenientissima, dignare complecti sanctissime & beatissime Pater..... Rogamus igitur & tuis decretis nostrum honora judicium..... Sic enim & pii Principes complacerebunt &c.

De Canone tertio secundi Concilii Oecumenici, quo secundae Sedis gradus delatus fuerat Episcopo Constantinopolitano, & quo freti eandem ipsi dignitatem Chalcedonenses Patres confirmarunt, haec Meldenensis Episcopus in hoc ipso Capite observat: „ Constat in Codicem Ca-  
 „ nonum cum aliis Constantinopolitanis insertum, toto  
 „ statim Oriente valuisse. Quin etiam in Chalcedonensi  
 „ Synodo Legati Apostolicae Sedis Anatolium Constan-  
 „ tinopolitanum Episcopum secundum habuerunt. Qua  
 „ de re usque adeo non questi sunt, ut e contra quereren-  
 „ tur, in quintum gradum a Dioscoro Flavianum rele-

„ gatum : quo loco laudantur a Diogene Cyzicensi, quod  
 „ *regulas scirent*, quas nempe Dioscorus contempsisset .  
 „ Ergo intelligebant omnes Episcopi , ipsique adeo Le-  
 „ gati Leonis , deberi Episcopo Constantinopolitano pri-  
 „ mum post se locum ; non alio Canone, quam Constan-  
 „ tinopolitano illo, quem Romana Ecclesia ignorare , ac  
 „ minime probare voluisse videbatur , visumque est satis,  
 „ quod nondum aperte improbasset . Eadem sed longe  
 „ luculentius & uberius demonstrat Illustrissimus Petrus de  
 „ Marca lib. III. de Concord. Sac. & Imp. cap. VII. §. IV.

Natalis Alex. dissertat. XXXVII. in Hist. Saec. IV.  
 Art. IV. laudato Canone non modo collatum fuisse existi-  
 mat Regiae Urbis Episcopo secundum honoris confessum  
 post Romanum Episcopum, verum etiam Patriarchicam  
 dignitatem & jurisdictionem in Dioeceses Thracicam,  
 Ponticam, & Asiaticam; nec tamen Nicaenos Canones  
 eo fuisse secundae Synodi Canone violatos . Quoniam de-  
 cernit quidem, inquit, Nicaena Synodus, ut sua Ecclesiis  
 privilegia servantur : sed non prohibet, ne conferantur  
 nova iis , quae nondum his donatae sunt : maxime si fiat  
 ista concessio ab iis , quorum interest . Volentibus enim  
 non fit injuria . Porro dignitatem & jurisdictionem Patri-  
 archicam Dioeceseon Ponticae, Asianae, & Thracicae  
 Episcopi, quorum maxime intererat, Episcopo Constan-  
 tinopolitano tribuerunt Canone tertio secundae Synodi .  
 Dissertatione autem XV. in Hist. Saec. V. Art. I. idem  
 Auctor statuit, quod Canon XXVIII. Synodi Chalcedo-  
 nensis primatum honoris post Romanum Episcopum, &  
 Ordinationes Dioeceseos Ponticae, Asianae, & Thraci-  
 cae, quas & secunda Synodus Oecumenica Episcopo Con-  
 stantinopolitano detulerat, & firmaverat consuetudo, ei-  
 dem

dem confirmavit. Ergo quod Chalcedonenſi Canone conſtitutum fuerat, jam pridem ſecunda Synodus Oecumenica decreverat, toto ſtatim Oriente valuerat, conſuetudo firmaverat, cum nullius injuria conjunctum erat, Nicaenis decretis non adeo videbatur infeſtum, utque vim legis obtineret, ſatis viſum eſt, quod Eccleſia Romana nondum aperte refragaretur. Hunc tamen Canonem confirmatione Pontificis indigere, Chalcedonenſibus Patribus viſum eſt; hanc a Leone demifſo animo modetiſque verbis elicere ſatagunt; abnuſit Leo, ac decretum Principis Apoſtolorum auctoritate reſcindit; fatetur Anatolius, totum in Romani Pontificis poſitum eſſe poteſtate, hoc eſt, Conciliorum decreta auctoritate ſua rata vel irrita eſſe decernere; tandem pervincit Leo & expugnat, ut e numero Eccleſiaſticarum legum, & Chalcedonenſium Canonum expungatur. Id vero noſtris Adverſariis non eſt, poteſtatem & auctoritatem in Synodos Oecumenicas exercere, imo qui hunc locum objiciunt, Boſſuetius ait, quod *primo ne ſtatim quidem quaefſtionis intelligunt*. Verum illi, ſi aliquod ejusmodi exemplum Pontificiae legis adferre poſſent, quam ſimili auctoritate Chalcedonenſis Synodus reſcidiffet, acta res eſſet, & Pariſienſium opinio non jam ex ſolis Conſtantienſium & Baſilcenſium, verum & ex Chalcedonenſium Patrum decretis, res inter judicatas reponenda eſſet. Sed ad ea, quae Boſſuetius adjungit, animum advertamus.

„ Secundo, *inquit*, Orientales Patres, hoc Canone  
„ conſtituto, id ſibi tribuebant, ut Patrum limites, &  
„ Canones Nicaenos ab univerſa Eccleſia conditos & re-  
„ ceptos, inconfulto, imo vero repugnante toto Occi-  
„ dente, convellerent; quod non illis licebat. Tertio in

„ co

„ eo Canone statuendo , nequaquam Concilii generalis  
 „ autoritate gaudebant , a quorum decretis in ea actione  
 „ cum Sede Apostolica universus Occidens recedebat .

Hoc , quod tantopere jactatur de totius Occidentis  
 dissensu & repugnantia ; perinde ac solius Romani Ponti-  
 ficis dissensus satis non esset ad irritandum Synodi Chal-  
 cedonenfis decretum , nec totum , ut apud Gelasium fate-  
 batur Anatolius , positum esset in Sedis Apostolicae pote-  
 state ; inane est effugium , & quod statim praecludere in  
 promptu est . Quum enim Occidens Concilio Chalcedo-  
 nensi non nisi in Sedis Apostolicae Legatis adesset ; haud  
 aliter dici & intelligi potest , Occidentales Chalcedonenfi  
 Canoni repugnasse , quam quod eidem Legati Sedis Apo-  
 stolicae intercesserunt : unde colligere est , quod repugna-  
 te vel consentiente Romano Pontifice , totus consentire  
 vel dissentire Occidens censebatur . Quare & Synodus ad-  
 versus Legatorum intercessionem non ad totum Occiden-  
 tem , sed ad solum Leonem Relationem misit : neque ab  
 omnibus Occidentalibus , sed a solo Leone confirmari Ca-  
 nonem postulavit ; gnara videlicet , totum in ejus esse po-  
 situm potestate , *qui* , ut verbis utar Cl. Thomassini , *prin-*  
*ceps in Episcopatu fidei est , qui caput , qui Occidentales*  
*omnes maxime Episcopos , strictius sibi devinctos , suo*  
*nutu circumagebat , sibi semper consentaneos , & secum*  
*gestis in Oriente Synodis , vel consentientes , vel dissen-*  
*tientes* . Hinc S. Leo Chalcedonensem Canonem non ali-  
 cujus Occidentalis Synodi , sed solius Principis Apostolo-  
 rum auctoritate cassavit . Hinc etiam , ut superius vidi-  
 mus , S. Gelasius , non Occidentalium dissensui , sed unius  
 Sedis Apostolicae auctoritati tribuit , quod Canon ille  
 Chalcedonenfis habere non potuit firmitatem : *Sola* , in-  
 quit ,

quit, *rescidit, quod praeter ordinem congregatio Synodica putaverat usurpandum.*

Petrus de Marca in dissertatione de Patriarchatus Constantinopolitani institutione, & ex eo & cum eo Nat. Alex. Dissert. XI. in Hist. Saec. V. Aët. II. docent, Sanctum Leonem non ob aliam rationem repudiassse Canonem XXVIII. Synodi Chalcedonensis, quam quia Nicaenis Canonibus repugnabat: atque hac in causa jure Primatus sui egisse, quod maxime in urgenda ac procuranda per totum orbem Christianum Canonum executione positum est: proindeque argumentum inde trahi non posse ad confirmandam Romani Pontificis in totum corpus definitionesque Oecumenicae Synodi auctoritatem: *Non ergo, inquit Illustrissimus Archiepiscopus, illo nomine statuta Concilii Chalcedonensis Leo reprobatur, quasi nullas habitura vires essent, nisi illi collibuisse: sed nullitatem dicti Canonis ex repugnantia Canonum Nicaenorum petitam declarat; magnifico sane & illustri Primatus sui seu Principatus privilegio, sed quod ad superiorem in corpus definitionesque Concilii exercendam auctoritatem extendi & porrigi non debeat. Si enim rite de quaestione aliqua Nicaenis regulis nondum decisa Synodus Chalcedonensis statuisse, tantum abest, ut Leo constitutioni illi, destitutus vitio nullitatis opponendae, refragatus fuisset, quin potius gestorum Synodali approbatione, Concilii sententiae ex officio adhaesisset. Quod eleganter insinuat in Epistola ad Maximum Antiochenum, hoc de negotio loquens: „ Quidquid enim praeter speciales causas Synodali Conciliorum ad examen Episcopale defer-*

„ tur, potest aliquam dijudicandi habere rationem, si

„ nihil de eo est a sanctis Patribus apud Nicaeam defini-

„ tum.

» tum. Nam quod ab illorum regulis & constitutione  
 » discordat, Apostolicae Sedis nunquam poterit obtinere  
 » consensum.

Mirum equidem, quod haec S. Leonis verba a Viris doctis ad confirmandam suam hanc ipsorum opinionem trahantur, quum illam manifestissime evertant. Ait quidem S. Pontifex, quod rata esse non possunt, neque Apostolicae Sedis obtinere consensum, quae Nicaenae Synodi Canonibus adversantur; sed non & illud adjungit, quod tamen uno Adversariorum opinio utcumque fulciri posset; nempe quod statim valuisset, aut vim legis obtinuisset, quidquid rite de quaestione aliqua Nicaenis regulis nondum decisa, Chalcedonensis Synodus statuisset, & quod sententiae Concilii statim ex officio adhaerere Pontifex debuisset. Non, inquam, id docet S. Leo, sed potius id docet, quod hanc opinionem funditus labefactat. Nam his, quae Marca descripsit, haec Sanctus Pontifex praemisera: *Si quid sane ab his fratribus, quos ad sanctam Synodum vice mea misi, praeter id, quod ad causam fidei pertinebat, gestum esse perbibetur, nullius erit penitus firmitatis: quia ad hoc tantum ab Apostolica Sede sunt directi, ut excisis haeresibus, Catholicae essent fidei defensores. Quidquid enim praeter speciales causas &c.* Unde merito colligit Pelagius II. in Epistola ad Eliam Aquilejensem & alios Episcopos Istriae, quod praeter causam fidei, quaecumque alia Concilii Chalcedonensis gesta poterant a Romano Pontifice retractari. Quod enim haec verba ad solam Patriarchicam dignitatem Regiae Urbis Episcopo praeter Nicaenos Canones attributam trahenda non sint, ex eo Pelagius demonstrat, quod Leo de iis Synodi actis loquatur, quae consentientibus Sedis



dis Apostolicae Legatis perfecta fuerant : at decreto , quo Sedi Constantinopolitanae is honoris gradus eaque iurisdictio conferebatur, Legati Leonis restiterant, illud etiam Leo in irritum miserat : Itaque de hoc decreto S. Leo intelligi non potest, quum ait, quod praeter causam fidei in Synodo gesta, poterant per Pontificem retractari : adeoque erui ex his verbis nulla ratione potest, quod statim valisset, ac vim legis obtinisset, quidquid rite de quaestione aliqua Nicaenis regulis nondum decisa, Chalcedonensis Synodus statuisset, & quod sententiae Concilii statim ex officio adhaerere Pontifex debuisset. De his enim, quae Nicaenis Canonibus non adversantur, id Leo non docet, sed hoc solum, quod ubi ad Pontificis examen referuntur, *possunt aliquam dijudicandi habere rationem*; hoc est, ut id Pelagius II. interpretatur, retractari ea possunt, & ad iudicium Pontificis revocari, potestque de illis Sedes Apostolica pro suo arbitrio statuere.

Denique respondet Bossuetius „ Chalcedonenses Patres a Leonis arbitrio hoc negotium pendere voluisse, „ quod relationis quidem verba demonstrant : sed aperte „ convincit illud Anatolii in Epistola ad Leonem (a) : „ *Cum & sic gestorum vis omnis & confirmatio auctoritati vestrae Beatitudinis fuerit reservata*. Unde nec „ mirum, de iis Leonem statuisset, quae in ipsius potestate ipsa Synodus reliquisset. Perinde atque in Synodi potestate & arbitrio positum esset, petere aut non petere huius Canonis a Romano Pontifice confirmationem; aut ei per suos Legatos, ac deinde & per se ipsam, Sede Apostolica refragante, vim Canonis & Ecclesiasticae Legis obtinere potuerit. Id vero cum universae Conciliorum &

To.I. Par.II.

L I

Pa-

---

(a) Coll. Holfst. 1. Par. cap. XXII.

Patrum traditioni, tum praemislis Adversarii responsionibus adversatur. Quare aut in illis nihil momenti est, aut haec futilis omnino est & inanis. Illis enim statuitur, quod sine Romani Pontificis ac totius Occidentis consensione laudatus Canon robur ac firmitatem obtinere non poterat: hac autem in arbitrio ponitur Synodi petere aut non petere ejusdem Canonis a Romano Pontifice confirmationem. Porro si id erat positum in Synodi potestate; non ergo ex Pontificis & Occidentis consensione pendebat, ut vim legis & Canonis obtineret: si autem Romano Episcopo & Occidentalibus minime consentientibus, id adsequi non poterat: ergo opus omnino erat Romani Pontificis confirmatione; proindeque eo confugiendum non est, ut dicatur, *non esse mirum, de iis Leonem statuisse; quae in ipsius potestate ipsa Synodus reliquisset*. Unde etiam consequens est, nullis responsionibus labefactari potuisse argumentum, quo ex Chalcedonenſi Synodo demonstramus, ex Romani Pontificis consensu vel dissensu pendere, ut rata vel irrita sint, quae ab Oecumenicis Synodis decernuntur.



## CAPUT IX.

- „ Recapitulatio eorum , quae de confirmatione  
„ ex Conciliorum actis dicta sunt : Hinc con-  
„ futantur allati a quibusdam Recentioribus  
„ Pontificiae confirmationis effectus : Eccle-  
„ siae consensus quatenus ultima Synodi be-  
„ ne gestae testificatio : Sancti Gelasii locus.

**Q**uae ex sexta & septima Synodo , & ex Caelestini & Leonis II. Epistolis Bossuetius in praesenti Capite adfert , ad nos non pertinent , & nostram opinionem minime laedunt , qui videlicet non repugnamus , ea Synodorum generalium decreta statim obtinere summam & ineluctabilem firmitatem , quibus condendis Romanorum Pontificum Epistolae praeluxerunt . Addimus tamen , opus esse aliquando clara & diserta Romani Pontificis confirmatione , ut contra malignos Interpretes omnibus Fidelibus constet , Synodum , & Oecumenicam & legitimam fuisse ; legesque servasse , quae in definiendo servandae sunt ; ac potissimum , eam nequaquam in suis decretis ab Apostolicae Sedis regulis ac dogmatibus deflexisse . Ab hac doctrina neque ipse Bossuetius omnino abhorret : „ Illud , *inquit* , haud absurdum , confirmatione  
„ declarari , Synodum & legitime fuisse convocatam , &  
„ legitimo ordine processisse , neque quidquam interve-  
„ nisse , quo nulla sit : qualia multa in Ariminensi atque  
„ Ephesina II. Synodo evenisse legimus : quae causa fuisse  
„ videtur , cur Leo Synodi Chalcedonensis definitionem ,  
„ ipso etiam autore , ac per Legatos praesidente factam ,

» speciali Epistola confirmandam duxerit, *propter malignos Interpretes*, ut vidimus. De his itaque inter nos convenit. Sed in hoc ipsi ab eo vehementissime dissentimus, quod praeter Romani Pontificis Ecclesiarum quoque omnium consensionem omnino requirit: nos vero Pontificis confirmationem & approbationem sufficere existimamus. Res magni momenti est, ac propterea quamquam de illa satis ex jam dictis constare possit, operae adhuc pretium erit, ut speciali Articulo discutiatur.

## ARTICULUS UNICUS.

*Sufficere Romani Pontificis confirmationem sive adprobationem, nec opus esse omnium omnino Ecclesiarum consensione, ut aliqua Synodus & Oecumenica & legitima, adeoque erroris expers judicetur.*

**P**Robatur id primum ex priore Synodo Ephesina, cujus actis statim ac per suos Legatos Sedes Apostolica adsensum praebeuit, Oecumenicam in suis Rescriptis ostentare coepit auctoritatem, & pro Oecumenica passim habita est, quamquam ipsi Johannes Antiochenus & Orientales Episcopi refragarentur: *Sancta proinde*, inquit Patres in Relatione per septem Episcopos missa, *& Oecumenica Synodus, cujus confessori adest & Caelestinus, & universa Occidentalis Synodus, totaque Africa & Illyricum &c.* Ergo ut Synodum, sanctam & oecumenicam vocent, satis esse judicant, ut ejus confessori, ex maxima Christiani orbis parte collecto, Caelestinus adsit.

ci-

eique agendorum decernendorumque formam regulamque praescribat : quod etiam non minus diserte agnoscunt & profitentur in Epistola ad ipsum Caelestinum , ubi Orientalium conatus adversus Synodum ex toto orbe collectam contemnendos esse hac ratione decernunt , quod ei Synodo per suos Legatos suam Caelestinus praesentiam exhibuerat : *Etenim viri numero triginta . . . . qualem Synodi faciem , aut qualem vim habere poterant contra Synodum ex universo , qui sub caelo est , orbe collectam ? Fuerunt enim in confessu nostro & illi quoque , qui a Sanctitate tua missi sunt , piissimi Episcopi Arcadius & Projectus , & cum ipsis Reverendissimus Presbyter Philippus , qui sua praesentia tuam nobis exhibuerunt , Apostolicaeque Sedis locum suppleverunt .* Unde , ut merito Cl. Thomassinus animadvertit ( a ) , elucet , ne tantam quidem ; quanta Antiochena seu Orientalis erat Dioecesis , Ecclesiae Catholicae portionem , & Episcoporum triginta , imo quadraginta & amplius multitudinem , dissensione sua Oecumenicum pondus & nomen Ephesinae Synodo detrudere potuisse . Ut ubi in Ecclesia agitur & definitur aliquid novae quaestionis , contemnatur semper paucitas dissonantium , sola superet numerositas Episcoporum , & auctoritas Sedium , & consensus orbis terrarum . Hinc etiam elucet , consensu & approbatione particularium Ecclesiarum opus non esse , ut Synodus , & Sancta , hoc est , in Spiritu Sancto canonice & legitime celebrata , & Oecumenica judicetur : quum Ephesina Synodus hoc sese nomine commendarit , antequam ad eam permagna , & una ex tribus praecipuis , Ecclesiae portio accederet , imo quum adhuc ab ipsa vehementissime dissentiret .

At

---

( a ) Dissert. X. in Synod. Ephes. I. num. XLIV.

At quemadmodum adversus Synodum Capiti suo adhaerentem frustra quorumlibet Episcoporum multitudo concitatur : ita ad elevandam ejus auctoritatem sufficere creditum est , si ab ea Ecclesiae Caput , hoc est , Romanus Pontifex dissentiret . Id constat ex Eutherii & Helladii adversus hanc ipsam Ephesinam Synodum ad Sixtum Pontificem litteris , de quibus ad Caput tertium disseruimus . Constat etiam ex Marciani litteris ad Leonem , quosdam adversus totam Chalcedonensis Synodi auctoritatem hoc se se clypeo munisse , idque solum obtendisse , quod eam Synodum Romanus Pontifex improbasset . Denique constat ex dictis in Capite superiori , quod XXVIII. Canonis confirmationem , quamquam illi , ut Bossuetius ait , universus Occidens repugnaret , a solo tamen Romano Pontifice eadem Chalcedonensis Synodus petiit , eamque sufficere creditum est , ut laudatus Canon plenum robur & firmitatem obtineret .

In quinta Synodo Thesis nostrae veritas adhuc luculentius resplendet . Statim enim atque ad ipsam Sedis Apostolicae consensus accessit , Oecumenicae titulo & praerogativa donata est , quamquam ab ea non modo Venetiae , Istriae , & Liguria schismatici palam abhorrent ; verum eam nondum Galliarum & Hispaniarum Episcopi receperant . Ita Pelagius I. Epistola III. ad Narsen Patricium & Ducem Italiae agens de Liguribus , Veneticis , & Isticis Episcopis , qui ob hanc Synodum a Sedis Apostolicae communione discesserant : *Si quid eos de judicio UNIVERSALIS SYNODI , quod Constantinopoli per primam nuper elapsedam indictionem actum est , forte movebat , ad Sedem Apostolicam ( quomodo factum est ) electis aliquibus de suis , qui dare & accipere rationem possent , dirigere*

gere debuerunt; & non clausis oculis corpus Christi Dei nostri, hoc est, Sanctam Ecclesiam lacerare. Et Epistola quinta ad eundem adversus Mediolanensem & Aquilejensem Episcopos, tum universalis Concilii nomen rursus eidem Synodo arrogat, quamquam eam nondum plures Occidentalium Ecclesiarum, quae tamen ex Sedis Apostolicae oeconomia & indulgentia in Ecclesiae Catholicae communione esse sinebantur, recepissent; tum etiam docet, quid ex juris rigore in omnes agi potuisset, qui sibi de iudicio Synodi universalis iudicium sumebant, & Sedis Apostolicae iudicio parere detrectabant: *Nec licuit alicui aliquando, nec licebit particularem Synodum congregare: sed quoties aliqua DE UNIVERSALI SYNODO aliquibus dubitatio nascitur, ad recipiendum de eo, quod non intelligunt, rationem, aut sponte ii, qui salutem animae suae desiderant, ad Apostolicam Sedem pro recipienda ratione conveniant: Aut si forte .... ita obstinati & contumaces exstiterint, ut doceri non velint; eos ab eisdem Apostolicis Sedibus aut attrahi ad salutem quoquo modo necesse est, aut (ne aliorum perditio esse possint) secundum Canones per saeculares comprimi potestates; hoc est, aut tolerandi sunt, donec a Sede Apostolica doceantur; aut puniendi sunt, si contumaces existant. Ceterum nulli unquam licitum fuit de universali Concilio iudicium sibi arrogare, sed de illo Sedis Apostolicae sequi omnes debent & amplecti iudicium.*

Non minus diferte S. Gregorius Magnus eandem quintam Synodum quatuor aliis Oecumenicis Conciliis ad censet in ea ipsa Epistola, in qua sese, *sicut Sancti Evangelii quatuor libros, sic quatuor illa Concilia suscipere & venerari* profitetur. Iis autem singillatim enumeratis

ratis quintum adjungit, ac de illo dislerit, quatuor Orientis Patriarchis rescribens (a): *Quintum quoque Concilium pariter veneror . . . . Cunctas vero, quas praefata veneranda Concilia Personas respuunt, respuo; quas venerantur, amplector: quia dum universali sunt consensu constituta, se, & non illa destruit, quisquis praesumit aut solvere quos ligant, aut religare quos solvunt. Quisquis ergo aliud sapit, anathema sit. Quisquis vero praedictarum Synodorum fidem tenet, pax ei sit a Deo Patre per Jesum Christum Filium ejus. Interim vero sinebat, non paucos in Italia & Hispania, qui Synodi quintae nec mentionem fieri patiebantur, Catholicae Ecclesiae communionem frui, ut ex variis ejus Epistolis compertum est. Unde apparet, non ex omnium omnino Ecclesiarum consensione, sed ex Sedis Apostolicae judicio & confirmatione pendere, quod aliqua Synodus pro legitima, & Sancta, & Occumenica habeatur. Nam ut certum est, nunquam ad ejusmodi auctoritatis fastigium sine Sedis Apostolicae consensione provehi quintam Synodum potuisse: ita constat, omnium Occidentalium Ecclesiarum non fuisse consensum requisitum, ut ejusmodi praerogativam, & honoris & auctoritatis gradum consequeretur.*

Ut ad sextam & septimam Synodum accedamus; ex monumentis, quae ad eas pertinent, probare vult Bossuetius, quod „universalis & plena consensio, non tantum „adversus *malignos Interpretes*, sed etiam interdum bonis ac probis viris est necessaria; etsi enim boni viri non dubitant, quin Oecumenica Synodus sit infallibilis, quandoque haud immerito ac bona fide dubitatur; utrum aliqua Synodus sit vere Oecumenica. Quale dubium

---

(a) Lib. I. Epist. XXIV.



„ bium contigisse vidimus Hispanicae & Gallicae Eccle-  
 „ siae circa Synodum sextam & septimam, ad quas vo-  
 „ cati non essent. Quare haud immerito affirmamus,  
 „ ultimum, quo Synodi Oecumenicae asserantur, esse  
 „ Ecclesiae universalis consensum cum Apostolicae Sedis  
 „ confirmatione conjunctum.

Sextam & septimam Synodos pro Oecumenicis fuisse habitas, etiam antequam ad eas Hispanicarum & Gallicarum Ecclesiarum consensus accederet, superiore libro suis locis uberrime demonstravimus. Quare hoc loco cura & labore superfedendum est. Inde autem colligitur, alienam esse a communi veterum traditione Illustrissimi Auctoris opinionem, quae omnium Ecclesiarum consensionem requirit cum Sedis Apostolicae confirmatione conjunctam, ne haud immerito ac bona fide dubitetur, utrum aliqua Synodus sit vere Oecumenica. Quod autem ait, universalem hanc & plenam consensionem, non tantum adversus *malignos Interpretes*, sed etiam interdum bonis ac probis Viris esse necessariam: id quidem admitimus, quoniam interdum & viri boni ac probi, quoniam homines sunt, humanis infirmitatibus obnoxii sunt, turbatur eis iudicium, & privatis affectionibus in transversum aguntur, quos interdum Sedes Apostolica tolerat, donec sanentur. Inde autem immerito quisquam efficiat, quod ex eorum iudicio pendeat, an aliqua Synodus pro legitima & oecumenica sit habenda. Nam supra ex Pelagio I. demonstravimus, huiusce rei iudicium non ad particulares Synodos aut Ecclesias, sed ad solam Sedem Apostolicam pertinere.

Adfert etiam Illustrissimus Adversarius in suae opinionis confirmationem Sancti Gelasii testimonium „ qui

„ approbationi Leonis universalis Ecclesiae consensionem  
 „ adjungit, eaque internosci docet *male gestam Synodum*  
 „ *a bene gesta Synodo*, quod *male gestam Synodum*;  
 „ puta Ephesinam secundam (a) *tota merito Ecclesia*  
 „ *non recepit*, & *praecipue Sedes Apostolica non proba-*  
 „ *vit*. *At bene gestam Synodum cuncta recepit Ecclesia*;  
 „ *ac maxime Sedes Apostolica comprobavit*; ut profecto  
 „ inter ceteras Ecclesias eminere oporteat Ecclesiae Prin-  
 „ cipalis assensum. At illud interim requiratur, ut Ec-  
 „ clesiae totius consensus accedat. Haec ergo est ultima  
 „ adversus *malignos Interpretes Synodi bene gestae* te-  
 „ stificatio: Sedis Apostolicae conjunctus cum totius  
 „ Ecclesiae approbatione consensus, quam confirmatio-  
 „ nem dicimus.

Respondemus, quod si Gelasii testimonium integrum  
 Meldensis Episcopus adtulisset, nullus huic difficultati lo-  
 cus pateret, quinimo ipsius omnino rationes conturbaret.  
 Nam S. Gelasius primo docet, quod sola Sedes Apostolica  
 Synodum male gestam evertit, & quod ipsa sola rerum in  
 legitima Synodo gerendarum auctrix fuit, & normam le-  
 gemque praescripsit, cui universa Ecclesia paruit & obse-  
 cuta est: SOLA Sedes Apostolica.....*impiam Synodum*  
*non consentiendo submovit*, ac *pro veritate ut Synodus*  
*Chalcedonenfis fieret*, SOLA decrevit; in qua Pontificibus  
*innumeris*, qui Latrocinio corruerant Ephesino, *veniam*  
*poscentibus SOLA concessit*, & in sua perfidia permanen-  
*tes nihilominus SUA AUCTORITATE prostravit*: quam  
*Congregatio*, quae illic pro veritate reparanda collecta  
*fuerat*, est secuta: quoniam sicut id, quod prima Sedes  
*non probaverat*, constare non potuit, sic quod illa censuit  
 judi-

---

(a) Epist. XIII. ad Episc. Dardan.

*judicandum*, *Ecclesia tota suscepit*. Ac deinde subjungit, quae Bostuetius exscripsit. Unde evidenter apparet, quod non ex Ecclesiae consensione bene gesta Synodus auctoritatem accepit; sed ideo bene gestam Synodum Ecclesia tota suscepit, quoniam ejusmodi Synodus Sedis Apostolicae auctoritate munita erat.

Praeterea nos nequaquam inficiamur, Sedis Apostolicae conjunctum cum totius Ecclesiae approbatione consensum, optimum esse & patentissimum bene gestae Synodi argumentum; quod unum, si placet, Gelasius docuerit; id, inquam, minime inficiamur, neque ulla de hac re potest esse inter Catholicos controversia. Sed in hoc ab Illusterrimo Auctore vehementissime dissentimus, quod non haberi existimat Ecclesiae universalis consensionem, donec exploratus fuerit & habeatur omnium particularium Ecclesiarum consensus: & bona fide nec immerito dubitasse Hispanos & Gallos, an sexta & septima Synodus vere Oecumenicae essent, antequam ab ipsis reciperentur. Id porro, de quo invicem ac potissimum dissentimus, nequaquam Gelasius docuit, nec proinde illo Gelasii textu confirmari potest. Non docuit etiam Synodus Ephesina, quae se ipsam Oecumenicam praedicabat, quamquam Johannes Antiochenus Patriarcha, & Orientales Episcopi diffiderent. Non docuit Pelagius I. qui Synodum quintam nondum ab Hispanis & Gallis receptam, universalem appellabat. Non docuit S. Gregorius, qui eandem Synodum pari cum aliis quatuor veneratione prosequebatur, eique universalem consensum vindicabat, quamvis adhuc Hispani in suis Toletanis Conciliis non nisi quatuor Oecumenicas Synodos recenserent. Non docuit Leo II. qui sextam Synodum Oecumenicae Synodi appellatione do-

M m 2

nabat,

nabat, antequam Hispanorum de illa mentem atque sententiam explorasset. Non docuit septima Synodus, quae ut se Oecumenicam celebraret, satis habuit, ut in suo confesso, quod pertinebat ad Occidentales, Sedis Apostolicae Legatos haberet. Subindeque cum ipsa, tum reliquae Synodi, & Romani Pontifices ab ea quam longissime abe- rant opinione, quod omnium omnino Ecclesiarum consensus requiratur, ut aliqua Synodus & Occumenica, & legitima, adeoque omnis erroris expers judicetur.

## C A P U T X.

- „ Andreae Duvallii de confirmatione sententiæ  
 „ confutatur; nempe quod ante eam Con-  
 „ ciliorum anathemata valeant tan-  
 „ tum sub spe rati: Concilii  
 „ octavi locus egregius.

**Q**uae adversus Duvallii opinionem Bossuetius intorquet, nostram doctrinam minime feriunt. Quare opus non est, ut in iis examinandis immoremur!



## CAPUT XI.

- „ Ex antedictis resolvitur illud, duodecim sae-  
„ culis inauditum, quod Episcopi juridi-  
„ ctionem omnem a Papa mutuentur;  
„ quodque Papae assistant, ut  
„ Consilarii tantum, non  
„ ut Judices.

**S**Aepe diximus, ab ea nos abesse opinionē, quam Illustrissimus Adversarius in praesenti Capite infectatur, quod nimirum Episcopi in Conciliis generalibus sedent *ut Consilarii tantum, non judices*. Agnoscimus; eos in Synodis Oecumenicis, una cum Romano Pontifice, & sub ipso, tamquam membra sub capite, de Haereticis judicare, anathemata in Haereticos intorquere, leges & Canones universae Ecclesiae praescribere. Id ipsum nobiscum agnoscunt insigniores graviorefque Theologi, qui Romanum Pontificem *ex Cathedra* definientem ab omni errandi periculo eximunt: quare nonnisi ad invidiam nostrae doctrinae conflandam, Meldensis Episcopus toties probare aggreditur, Episcopos in Conciliis Judices esse, & non simplices Consiliarios; perinde atque unum ex altero omnino pendeat; neque admitti possit, Judicium Papae in fidei rebus supremum esse & irreformabile, nisi judicandi facultatem ceteris Episcopis adimamus. Quomodo autem haec invicem conciliari possint, ad Caput hujusce Libri ultimum exponemus.

Eodem utitur artificio Illustrissimus Adversarius in altera hinc quaestione tractanda de origine Episcopalis jurisdictionis.

jurisdictionis; perinde ac nostra sententia eo potissimum fundamento nitatur, quod Episcopi jurisdictionem omnem a Pontifice mutuuntur. Quamvis autem huic opinioni confirmandae apta imprimis & idonea sint complura veterum Patrum & Romanorum Pontificum testimonia; ex eaque etiam sponte fluat, Episcopos quamlibet in Synodum Oecumenicam conjunctos, nihil posse adversus auctoritatis suae radicem & fontem: nos tamen longe certius existimamus, supremum esse & irreformabile Romani Pontificis de fidei rebus judicium, & uberiores esse ampliores & excellentiores in solo Capite quam in reliquo Ecclesiae corpore auctoritatem, quam omnem Episcoporum jurisdictionem & auctoritatem ab ipso Romano Pontifice derivari. Nolumus ergo ex minus certa opinione, & quae multorum odio & invidiae patet, longe certiores elicere & confirmare. Quum ad nostram doctrinam tuendam, in eo satis praesidii sit, quod quaecumque auctoritas in Ecclesiae corpore constituatur, ab ipsius Capitis majestate & auctoritate pendeat, undecumque ea corporis auctoritas immediate proficiscatur. Quare in id unum probandum in sequentibus Capitibus incumbemus; omissa interim illa ad rem nostram non necessaria disputatione de immediata & proxima Episcopalis jurisdictionis & auctoritatis origine, quae nos etiam a proposito nostro longius abduceret.

## CAPUT XII.

„ Quo sensu dictum sit ab Antiquis, a Petro,  
„ & per Petrum esse Episcopatum.  
Sancti Augustini locus.

**S**I Meldenſis Episcopus in hoc & ſequentibus Capitibus quum Scripturae & Patrum testimoniis respondet, quibus plerique Theologi demonstrare ſibi videntur; Episcopos jurisdictionem omnem a Romano Pontifice mutuari; ſi, inquam, Meldenſis Episcopus contentus eſſet ea testimonia in alium ſenſum inflectere, ac detorquere, nulla mihi cum ipſo in praesentia concertatio eſſet; ut qui nolum de iudicio Pontificis irreformabili certissimum dogma ex minus certa opinione pendere; & dum Episcopalis auctoritas Romano Pontifici ſubjiciatur, mihi perinde ſit, a quocumque illa principio immediate ac proxime derive- tur. Verum Meldenſis Antistes non ſatis habuit, ut laudata ex Evangelio & antiquis Patribus testimonia utcumque exponeret, & a nativa, aut ſaltem quam primo exhibent ſignificatione deſlecteret; verum & alienum omnino ſenſum illis adſinxit, ut iis nimirum neque ipſa Episcopalis dignitas & auctoritas a Romani Pontificis auctoritate pendere ſignificetur. Quare etſi eum ab Anglorum & Graecorum erroribus quam longiſſime abeſſe pro certo habeam; attamen quod pertinet ad haec duo Capita in quibus modo verſamur, nullum iudico repertum iri Graecum ſchiſmaticum, nullum Episcopum Anglicanum, qui non utroque pollice ſubſcripturus ſit interpretationi, quae ab ipſo, veterum Patrum & Evangelii testimoniis adhibetur.

Quis

Quis enim eorum non ultro ac libenter agnoscat, in Petro fuisse primū ostensam, inchoatam, & commendatam Episcopalem auctoritatem; ac Petrum ligandi atque solvendi claves recepisse, quatenus Ecclesiam praefigurabat? Addit quidem, haec in illo ut omnium Principe facta esse, & propter ipsius inter discipulos primatum. Verum id gratis ab ipso adjungi, Graecus schismaticus & Anglicanus Episcopus contendunt; quum ipse interim illustriora Evangelii ac traditionis loca evertat, viamque sternat ad alia similiter labefactanda, quibus Petri primatus ac principatus adseritur. Ut enim illud etiam obiter dicam, hac Illustrissimus Adversarius methodo usus est: ut quae a Catholicis adversus haereticos & schismaticos ad adstruendum Petri & Romani Pontificis primatum urgentur, ipse sibi objectionis loco solvenda proponeret: quae vero ab Haereticis adversum Catholicum dogma proferuntur, & Catholici cum Ecclesiae doctrina conciliare satagunt; ipse vult, ut pro certa regula, scripturae ac traditionis textibus interpretandis, habeantur. Qua methodo semel admissa; nemo non videt, quanta perturbatio in res Theologicas invehatur. Faciam ergo quod omnes Theologi faciunt: Patrum & Scripturae loca, quibus Petri & Romani Pontificis principatus continetur ac vindicatur, urgebo, ut par est, & quae sit eorum vis & efficacia demonstrabo. Contra vero ostendam, audiendum non esse Adversarium, quum quae ipse profert testimonia, pro regula haberi vult, ad quam Scripturae verba & Ecclesiae traditio exigenda sint.



## ARTICULUS PRIMUS.

*Aliquot Scripturae locis probatur, Episcopalem omnem jurisdictionem & auctoritatem aut a Petro & Romano Pontifice manare, aut esse omnino Romano Pontifici subjectam.*

**C**ontendimus ergo, quod ea ipsa Scripturae Patrumque loca, quibus Petri Romanique Pontificis principatus adseritur, probent etiam, quidquid in reliquo Ecclesiae corpore potestatis, auctoritatis, & jurisdictionis est, aut a Romano Pontifice proficisci, aut ab eo omnino pendere, ejusque subjeci auctoritati. Ut Patres interim seponamus, & ex solis sacris litteris differamus; primo id constare aperte videtur ex notione Monarchiae, sive Regni, seu Monarchici Regiminis, quod in Ecclesia fuisse a Christo institutum, sacris litteris proditum est; in quibus saepissime Ecclesia aut Regni, aut Regni caelorum appellatione donatur: Danielis cap. II. *In diebus regnorum illorum suscitabit Deus caeli regnum, quod in aeternum non dissipabitur &c.* Lucae cap. II. *Regni ejus non erit finis.* Matth. cap. XVI. *Tibi dabo claves Regni caelorum.* „ Id est principatum in Ecclesia (a) quae saepius „ nomine Regni caelorum appellatur, ut cum dicitur: „ *Simile est Regnum caelorum grano sinapis.* Porro Monarchicum regimen id requirit, ut non modo singuli Magistratus, verum & totius regni Comitia sub Rege sint, ab ipso pendeant, & quidquid in eis auctoritatis & juris-

To.I. Par.II.

N n

di-

---

(a) Lamy in Harm. Evang. lib. IV. cap. XVII.

ditionis est, ad Regem velut ad principium, fontem & originem, aut velut ad centrum lineae, referatur. Quum igitur Romanus Pontifex in hoc regno summus sit Princeps & Rex, summaque & Monarchica praeditus potestate; inde plane consequens est, quod quidquid in hoc regno auctoritatis & jurisdictionis est, ad ipsum velut ad principium, centrum, fontem; & originem referendum sit.

Haud me latet quid huic argumento Bossuetius reponit (a): „demonstrandum erat, *inquit*, Ecclesiasticam „ Monarchiam, sub Christo praecipuo Monarcha constitutam, ad formam Monarchiae saecularis penitus institutam esse. Quod est falsissimum: id, inquam, scripturis & traditione demonstrandum, non ex proprio „ cerebro vanisque ratiocinationibus Christianae Reipublicae forma effingenda erat.

Nos autem imprimis reponimus, quod quum Ecclesiam regni nomine frequentissime donatam in sacris litteris teneamus, non nostrum est demonstrare, quod ad ejus constitutionem illa pertineant, quae ad aliorum Regnorum constitutionem requiruntur: id enim ex ipsa Regni notione sponte fluit: sicut enim quum Deum in sacris litteris hominem esse legimus, quod ad naturam & naturales proprietates hominis pertinet, hominem nobis similem statim cogitamus: ita quum Ecclesiam Regnum esse in scripturis legimus, quod ad naturam & attributa Monarchici regiminis pertinet, Regnum ceteris simile pariter cogitamus. Quare id nobis demonstrandum non est: sed contra Adversariorum est demonstrare, quod quum Christus in Ecclesia Monarchicum regimen instituit, eam-

que

---

(a) Infra cap. XV.

quæ Regnum esse voluit, aliam Regni formam cogitaverit ab ea longe disparem, quam in ceteris Regnis conspiciamus. Nisi enim id aperte demonstrent; ex Regni nomine Ecclesiae in sacris litteris attributo sponte, ut jam diximus, fluit, quod quemadmodum in ceteris regnis quidquid auctoritatis & jurisdictionis est, ad regiam potestatem & majestatem velut ad fontem & originem referri debet: ita quidquid potestatis & auctoritatis est in universo Ecclesiae corpore ad Romanum Pontificem velut ad principium & centrum jure ac merito referatur.

Verum & illud praeferemus, quod a nobis exigit Illustrissimus Adversarius, & aliis scripturae locis ac traditione demonstremus, Christum haud aliam ab ea, quam sub nomine & notione Regni concipimus, Christianae Rei publicae formam effinxisse. Et ut a scripturis incipiamus, quaecumque loca, quibus Theologi Petri & Successorum ejus in Ecclesia primatum & principatum demonstrant, plane etiam & aperte suadent, non modo singulos Episcopos, non modo singulas Ecclesias, verum & universum Episcopatum, & universum Ecclesiae corpus Romanis Episcopis subjectum esse, ab eis pendere, eorum gubernari ac dirigi auctoritate; subindeque non esse in Ecclesia, & in Concilio oecumenico, quo ipsa repraesentatur; non esse, inquam potestatem, quae Romanorum Pontificum judicia retractare, eorumque acta sollemnesque de fide sanctiones ad examen & judicium revocare valeat.

Primum argumentum, quo Petri & Successorum ejus primatus demonstratur, ex illis verbis conficitur, quibus Christus Petro non modo Agnos, verum & Oves pascendas tradidit. Porro quemadmodum per Agnos ceteri fideles; ita per Oves Episcopi designantur: *Præ agnos, in-*

quit Sanctus Eucherius Episcopus Lugdunensis (a), *deinde oves commisit ei; quia non solum Pastorem, sed Pastorum Pastorem eum constituit. Pascit igitur Petrus agnos; pascit & oves; pascit filios, pascit & matres; regit & Subditos, & Praelatos. Omnium igitur Pastor est, quia praeter agnos & oves, in Ecclesia nihil est. Ex ovibus autem & agnis, hoc est, ex Episcopis & ceteris Christianis, unum Ovile conflatur, cui Christus unum summum Pastorem praeposuit: Fiet, inquit, unum ovile, & unus Pastor. Pastor ejusmodi, si de visibili loquamur, Romanus est Pontifex: unicum illud Ovile ex agnis & ovibus coalescens, Ecclesia est universalis, non *diversae*, ut ajunt, sed *collectivae* sumta: Non enim singulae oves seorsim; sed simul sumtae unicum Ovile constituunt. Quis autem ferat, quod Ecclesia, quae tamquam ovile repraesentatur, & Romano Pontifici velut unico & summo Pastori subjicitur, jus habeat, de ipso Romano Pontifice judicandi? An Pastor ab ovili regi debet & gubernari? Non ne greges pascuntur a Pastoribus & gubernantur? *Pastor*, nomen jurisdictionis est; *Ovile*, subjectionis. Porro Ecclesia universa cum Romano Pontifice velut ovile cum suo Pastore confertur: quoniam, ut ait laudatus Eucherius, *praeter agnos & oves, in Ecclesia nihil est*: ex agnis autem & ovibus non nisi ovile confurgit; quod nihil est aliud, quam agnorum & ovium congregatio.*

Deinde, Ecclesia domus est. Nonne igitur, subjungit Nat. Alex. (b), unus esse non debet illius Dominus, unusque in ea Oeconomus constitui? Id certe innuunt verba Christi Lucae XII. *Quis, putas, est fidelis dispensa-*  
tor

(a) Serm. de Nat. SS. Apost. Petri & Pauli.

(b) Dissert. IV. in Hist. 1. Saec.

tor & prudens, quem constituit Dominus supra familiam suam? Quae verba S. Petrum spectant. Nam quum paulo ante Dominus dixisset: *Beati servi illi, quos, quum venerit Dominus, invenerit vigilantes &c.* Ait ei Petrus: *Domine, ad nos dicis banc parabolam; an & ad omnes?* Respondit Dominus: *Quis putas, est fidelis dispensator &c.* Quasi diceret: Ad te imprimis, Petre, haec verba direxi: cui praesertim incumbit attendere, quae dotes necessariae sunt servo fideli, quem constituit Dominus super familiam suam. Quae verba S. Johannes Chrysostomus lib. II. de Sacerd. cap. 1. sic exponit, atque istum in scopum urget: *Quanam de causa ille (nempe Christus) sanguinem effudit suum? Certe ut oves eas acquireret, quarum curam tum Petro, tum Petri Successoribus committebat. Jure igitur ac merito sic loquebatur Christus: Quisnam fidelis servus & prudens, quem Dominus super familiam suam constituit? . . . . Illum (Petrum) Christus auctoritate praeditum esse voluit, ac reliquos item Apostolos longe praecellere.* Ex quibus S. Johannis Chrysostomi verbis colligo, inquit laudatus Auctor, S. Petrum ejusque Successores, Pontifices Romanos, supremos in domo Dei quae est Ecclesia, dispensatores a Christo constitutos esse, illorumque tam late fundi potestatem; quam late funditur Christi redemptio. Quare quum nullus omnino sit in Ecclesia, pro quo sanguinem suum non fuderit; nullus omnino est, qui curae Petri & Successorum ipsius non sit subditus. Haec Nat. Alex. At Emin. Bellarminus ulterius pergit; & ex eodem loco Evangelii, & familiae & Oeconomi seu dispensatoris analogia demonstrat, non modo singulos famulos & domesticos, verum & universam familiam, quae ex illis componitur, nullam ha-

ha-

habere in ipsum Oeconomum potestatem, qui proinde ab ea judicari non possit, solius Dei tanquam summi Domini iudicio reservatus: Quod autem, inquit laudatus Cardinalis (a), Oeconomus summus sit supra familiam, & ab ea judicari ac puniri non possit, patet ex hoc eodem loco: Dominus enim ait: *Quem constituit Dominus super familiam suam*. Et ibidem: *Quod si dixerit servus ille in corde suo, moram facit Dominus meus venire, & coeperit percutere servos & ancillas, edere, bibere, & inebriari, veniet Dominus servi illius in die, qua non sperat, & dividet eum, partemque ejus cum infidelibus ponet*. Ubi vides, Dominum servare suo iudicio servum illum, & non committere iudicio familiae. Idem etiam docet usus omnium familiarum: Nulla enim familia est, in qua liceat inferioribus famulis, etiam simul congregatis, punire vel expellere Oeconomum, etiamsi pessimus sit: id enim ad solum Dominum totius familiae pertinet.

Tertio, Ecclesia unum corpus est, cujus caput, ut ex constantissima omnium saeculorum traditione constat, Pontifex Romanus est. At caput non modo singula membra, verum & universum corpus ex eis compactum regit & gubernat, non autem ab ipso regitur & gubernatur: Non ergo Ecclesiae est, de Romano Pontifice judicare, ipsumque auctoritate sua dirigere & gubernare; sed contra ad Romanum Pontificem pertinet, non modo singulos Episcopos, verum & universum Ecclesiae corpus ex omnibus Episcopis veluti totidem membris compactum, & Concilium Oecumenicum, in quo Ecclesia repraesentetur, suprema potestate regere & confirmare, & in officio continere; quemadmodum caput non modo singula mem-

bra

---

(a) Lib. II. de Concil. cap. XVII.

bra unit & colligit, verum & illis jam unitis; & unum corpus conflantibus spiritum & vitam inspirat. Hinc Patres Concilii Chalcedonensis non modo S. Leoni paruerunt jubenti, ut in Synodum Oecumenicam convenirent; verum & omnes jam in Synodo congregati, in Relatione ad ipsum Leonem totius Concilii nomine conscripta; ipsum tanquam totius corporis caput, & universae familiae Patrem aut summum Oeconomum reverentur: *Quibus tu quidem, sicut membris caput, praeeras . . . Rogamus igitur, & tuis decretis nostrum honora judicium; & sicut nos Capiti in bonis adjecimus consonantiam; sic & Summitas tua filiis, quod decet adimpleat.* Univerſa Synodus Romanum Pontificem veluti Caput & Patrem agnoscit; ac turpe judicat, ut membra filiiſque Capiti & Patri jubeant, legemque praescribant. Rogant ergo, non jubent, ut non quae debet, sed quae decent, filiis & membris adimpleat. Quibus desiderari nihil luculentius potest ad hanc Meldensis Episcopi observationem refellendam (a): „ Et eos quidem (*Episcopos*) legitime convocari oportet, ne tumultu coeant: ceterum convocati, *auctoritate Spiritus Sancti, non Papae*, judicant; pronunciant; anathemata, *non Papae auctoritate, sed Christi*. Patres Concilii Chalcedonensis in eadem Relatione non modo Leoni tribuunt, ut singula membra colligat, ne vel dispersa jaceant, vel tumultu coeant; verum & ajunt, universae vineae custodiam illi fuisse a Salvatore commissam; tanquam universa Ecclesia unica vinea sit, cui Romanus Pontifex tanquam unicus & summus Villicus praefit: *Et post haec omnia, insuper & contra ipsum, cui Vineae custodia a Salvatore commissae est, (Dioscorus) extendit insa-*

---

(a) Cap. praeced.

*insaniam; id est, contra tuam quoque Apostolicam Sanctitatem; & excommunicationem meditatus est contra te, qui corpus Ecclesiae unire festinas. Deinde agnoscimus quidem, Episcopos in Synodis congregatos, seu Concilia ipsa Oecumenica, & Christi & Spiritus Sancti auctoritate judicare, & anathemata pronunciare: verum adjungimus, Spiritum Christi quodam ordine membris Ecclesiae communicari, & per caput in reliquum corpus diffundi; quod proinde spiritu destituitur, nisi Capiti subjiciatur. Ideo dicimus, non modo Christi & Spiritus Sancti, verum & Papae auctoritate, Synodos Oecumenicas judicare & anathemata pronunciare. Alioquin, cur Synodus Chalcedonenfis illius decreti confirmationem a Romano Pontifice peteret, quod Christi judicio, & Spiritu Sancto auctore, condidisset? Verum illa, ut ipse etiam Bossuetius observat, eorum decretorum, quae Capiti suo unita condiderat, confirmationem a Leone minime postulavit; ut illud confirmari petiit, quod Sedis Apostolicae Legatis repugnantibus sanxerat. Nimirum intelligebat, prioribus tantum condendis adfuisse Spiritum Sanctum, & Christi auctoritatem; ac proinde non nisi eo quem diximus ordine, Spiritum Sanctum & Christi auctoritatem Conciliis Oecumenicis communicari.*





## ARTICULUS II.

*Patrum loca vindicantur, quibus eadem doctrina, ac de eadem re Ecclesiae traditio, apertissime adferitur, & continetur.*

**A** Liquot veterum Romanorum Pontificum & Patrum, quibus doctrina, Scripturae testimoniis superiori articulo adserta, apertissime continetur, sibi in hoc Capite Bossuetius objicit; responderetque, nihil iis aliud doceri, quam quod „ Petrus primus fuerit, in quo per „ ligandi ac solvendi ministerium ostensa, inchoata, „ commendata fuerit Episcopalis potestas: *Et*, quod ille „ primus omnium sit Episcopus constitutus, sive designatus. Quae responsio si semel admittatur, latissima, ut jam diximus, aperietur via ad quamplurima Patrum testimonia eludenda, quibus a Theologis S. Petri principatus adversus haereticos demonstratur. Nos ergo paulisper in iis enucleandis immorabimur, ut quisque percipere valeat & judicare, an is sit legitimus & genuinus eorum verborum sensus, quem illis Bossuetius adfingit.

Primus apud eum occurrit S. Innocentius I. cujus haec verba refert ex Epistola ad Concilium Milevitanum: *Petrum Episcopalis nominis & honoris autorem*. Et iterum ex Epistola ad Concilium Carthaginense: *Unde ipse Episcopatus, & omnis auctoritas nominis hujus emerfit*. Respondet autem: „ ea causa vocari Petrum ab Innocen- „ tio Episcopatus autorem..... quod ab eo factum sit „ ejus potestatis inter homines collocandae, & constituendi sive designandi Episcopatus initium: *Et*: quod

*To.I. Par.II.*

O o

ille

„ ille primus omnium sit Episcopus constitutus, sive de-  
 „ signatus.

Quam non bene cohaereat cum verbis Innocentii ejusmodi interpretatio, nemo non videt, verum id evidentius patebit, si textus ipsos integros adferamus. In Epistola ad Concilium Carthaginense Patres Africanos Innocentius commendat, propterea quod suum de Pelagianis judicium ad Sedem Petri retulissent: *Scientes*, inquit, *quid Apostolicae*, hoc est, Petri Apostoli, *Sedi debeatur*, a quo ipse Episcopatus, & tota auctoritas nominis bujus emerfit. Et paucis interpositis subjungit, quod Patres non humana, sed divina decreverunt sententia; ut quidquid, quamvis de disjunctis remotisque provinciis ageretur, non prius ducerent finiendum, nisi ad bujus Sedis notitiam perveniret, ut tota bujus auctoritate, iusta quae fuerit, pronuntiatio firmaretur: indeque sumerent ceterae Ecclesiae (velut de natali suo fonte aquae cunctae procederent, & per diversas totius mundi regiones puri capitis incorruptae manarent) quid praeciperent, quos abluerent, quos velut in coeno inmundabili sordidatos, mundis digna corporibus, unda vitaret. Nolim quidem, ne delicatiores offendam, haec ad extremum urgere. Attamen quis ferat, eorum vim adeo extenuari, ut nihil aliud significant, quam quod vel ipsi haeretici non negabunt, Petrum fuisse primum omnium Episcopum designatum? Obvius eorum verborum sensus est, Petrum; ac Petri Sedem fontem esse, principium & originem totius Episcopalis auctoritatis; ac propterea ad Sedem Apostolicam, velut ad suum fontem aquae recurrerent, referenda esse ex omnibus Christiani orbis regionibus Episcoporum de fidei rebus judicia; ut nativae reddita puritati sine

sine ullius erroris admixtione perfluerent; indeque velut ex natali fonte, novis aucta viribus & pondere auctoritatis; non jam uni vel alteri regioni saluti essent, sed universum orbem irrigarent: Addit enim Sanctus Pontifex: *Et quum pro illis curam geritis, quibus praesidetis, Ecclesiis; sollicitudinem vestram pro omnium utilitate monstratis: & per cunctas totius orbis Ecclesias, quod omnibus profit, decernendum esse, una deposcitis.* Et in alia Epistola ad Concilium Milevitanum: *Quoties fidei ratio ventilatur, arbitror, omnes fratres & Coëpiscopos nostros, nonnisi ad Petrum, id est, sui nominis & bonoris auctorem, referre debere, velut nunc retulit vestra dilectio, quod per totum mundum possit Ecclesiis omnibus in commune prodesse.* Vis argumenti omnino deposcit, ut omnis Episcopalis auctoritas aut a Petri Sede velut a causa efficiente omnino dimanet, aut ab ipsa ita pendeat; ut nisi illi conjuncta subsistere non possit, quemadmodum si a fonte rivuli disjungantur; ac propterea ut nulla in Ecclesia auctoritas sit, quae vel non a Romano Pontifice proficiscatur, vel non illi omnino subjecta sit.

Consona iis sunt, quae ex Magno Leone, tum sermone III. in Anniv. Assumt. tum Epist. X. al. LXXXIX. ad Episc. Prov. Vienn. Bossuetius profert: *Si quid, inquit priore loco, cum eo, Petro scilicet, commune ceteris voluit esse Principibus, nunquam nisi per Petrum dedit, quidquid ceteris non negavit.* Et in alio loco, Christum; ait, ita concessisse ceteris Apostolis praedicandi ministerium, ut in eos a Petro, *tanquam a quodam capite, dona sua, velut in corpus omne, diffunderet.* „ Ut facile intelligatur, inquit Illustrissimus Adversarius, quid sit „ illud, *per Petrum*, quod apud Leonem legimus, reco-

„ lenda est antiquae Ecclesiae ab ipsis Scripturis ducta  
 „ traditio. Constat ergo, Domino interrogante Aposto-  
 „ los : *Quem dicunt homines , esse Filium hominis ?* Pe-  
 „ trum omnium Principem, omnium induta persona re-  
 „ spondisse : *Tu es Christus* : ac postea Christum Petro  
 „ talem gerenti personam dixisse : *Tibi dabo : Quodcum-*  
 „ *que ligaveris* . Quo patet, his verbis non modo Pe-  
 „ trum, sed in Petro suo Principe, ac pro omnibus re-  
 „ spondente, omnes Apostolos eorumque successores,  
 „ Episcopali potestate ac jurisdictione esse donatos. Ad-  
 „ ditque in hujusce interpretationis confirmationem verba  
 quaedam S. Augustini, de quibus in sequenti Capite dis-  
 feremus. Nunc enim in mentem S. Leonis incumbimus.

Quae ut penitus intelligatur, integra ipsius testimo-  
 nia describenda sunt. Et primum quidem in eo, quem  
 jam citavimus, sermone cap. II. de Apostolorum Princi-  
 pe loquens ait, quod *ab ipso omnium charismatum fonte*  
*tam copiosus est irrigationibus inundatus ; ut quum multa*  
*solus acceperit, nihil in quemquam sine illius participa-*  
*tione transferit . . . . de toto mundo unus Petrus eligitur ;*  
*qui & universarum gentium vocationi, & omnibus Apo-*  
*stolis, cunctisque Ecclesiae Patribus praeponatur ; ut*  
*quamvis in populo Dei multi Sacerdotes sint, omnes ta-*  
*men proprie regat Petrus, quos principaliter regit &*  
*Christus. Magnum & mirabile, dilectissimi, huic Viro*  
*confortium potentiae suae tribuit divina dignatio : & si*  
*quid cum eo commune ceteris voluit esse Principibus,*  
*nunquam nisi per ipsum dedit, quidquid aliis non nega-*  
*vit. Et infra cap. III. Specialis a Domino Petri cura sus-*  
*cipitur, & pro fide Petri proprie supplicatur, tamquam*  
*aliorum status certior sit futurus, si mens Principis victa*

non

non fuerit. In Petro ergo omnium fortitudo munitur, & divinae gratiae ita ordinatur auxilium, ut firmitas, quae per Christum Petro tribuitur, per Petrum Apostolis conferatur. Similia occurrunt Epistola pariter jam laudata ad Episcopos Provinciae Viennensis: Sed hujus muneris, hoc est, Apostolici Ministerii, Sacramentum ita Dominus ad omnium Apostolorum officium pertinere voluit, ut id in Beatissimo Petro Apostolorum omnium summo principaliter collocaret; atque ab ipso, quasi quodam Capite, dona sua vellet in corpus omne manare; ut exortem se ministerii intelligeret esse divini, qui ausus fuisset a Petri soliditate recedere. Hunc enim in consortium individuae unitatis assumptum, id quod ipse erat, voluit nominari, dicendo: Tu es Petrus, & super hanc petram aedificabo Ecclesiam meam; ut aeterni aedificatio templi, mirabili munere gratiae Dei, in Petri soliditate confisteret: hac Ecclesiam suam firmitate corroborans, ut illam nec humana temeritas posset appetere, nec portae contra illam inferi praevalerent. Verum hanc petrae istius sacratissimam firmitatem, Deo, ut diximus, aedificante, constructam, nimis impia vult praesumptione violare, quisquis ejus potestatem tentat invadere &c. Haec omnia nimium profecto deprimunt & infringunt, qui eo tantum pertinere contendit, ut in Petro omnium Principe, & omnium figuram, omnium gerentem personam, clavium potestatem, & Episcopalem jurisdictionem Apostoli omnes eorumque Successores acceperint. Nam omnia & singula Sancti Pontificis verba in Petro ejusque Successoribus potestatem & auctoritatem commendant, in ceteris Apostolis & Episcopis subjectionem. Quidquid enim Petrus habet, a Christo proxime accipit, a Christo ipse proxime irri-

irrigatur, a Christo proxime regitur & sustinetur, a Christo in consortium individuae unitatis adsumitur, a Christo petrae soliditatem accipit & firmitatem. Contra vero quidquid in Apostolis & Episcopis & universa Ecclesia donorum Christi resplendet, hoc Apostoli, hoc Episcopi, hoc universa Ecclesia per Petrum a Christo recipiunt. Per ipsum donis caelestibus irrigantur, per ipsum reguntur & gubernantur, per ipsum firmantur & solidantur. Ipse fons est, unde in ceteros aquarum rivuli derivantur; ipse caput, unde in reliquum corpus caelestia dona funduntur; ipse petra, cui totum aedificium innititur. Nihil ex nobis dicimus, haec Leo amplioribus verbis exaggerat. Quae profecto quid amplius indicant, quam quod omnes Apostoli eorumque Successores fuerint in Petro, hoc est, una cum Petro, Episcopi designati. Ait enim inter cetera, quod *magnum & mirabile Divo Petro consortium potentiae suae tribuit divina dignatio*, propterea quod *nunquam nisi per ipsum dedit, quidquid aliis non negavit*. Quodnam vero speciale Divinae potentiae consortium & argumentum est, una cum aliis a Christo Episcopum designari? non in eo certe magnum hoc & mirabile divinae potentiae consortium collocat S. Pontifex; sed in eo quod in consortium individuae unitatis adsumtum, id quod ipse erat, Petram scilicet voluerit nominari; in eo, quod hanc petram tanta soliditate donaverit, ut super illam nullis concutienda inferorum insultibus Ecclesiae aedificatio consurgat; in eo, quod in Petro omnium fortitudo munitur, ut firmitas, quae per Christum Petro tribuitur, per Petrum Apostolis conferatur; in eo, quod aeterni aedificatio templi, mirabili munere gratiae Dei, in Petri soliditate consistat; in eo, quod omnes proprie regat Petrus, quos prin-

prin-

principaliter regit & Christus; in eo denique, quod nihil in quempiam sine illius participatione transferit. Haec si ad extremum urgeantur, indicant plane, a Christo per Petrum jurisdictionem omnem & auctoritatem Apostolos accepisse. Verum non omnino displicet, quod Bellarminus observat (a): Nempe „loqui S. Leonem de modo „ordinario, quo Deus Ecclesiae Principibus, id est, „Episcopis confert dona sua; ac dicere, conferri ordinarie per Petrum: Apostoli autem, inquit laudatus Cardinalis, extraordinario privilegio a Christo acceperunt „suam jurisdictionem. Demus etiam, neque hoc velle Sanctum Pontificem, quod Bellarminus docet, nempe omnem Episcoporum auctoritatem & potestatem proxime a Romano Pontifice & immediate manare; quis tamen negare audeat, quin hoc saltem Leonis verba significant, omnem eorum jurisdictionem & potestatem ita a Romano pendere Pontifice, quemadmodum vis membrorum a capite, quemadmodum a fonte rivuli, quemadmodum a radice insitus ramus, quemadmodum a solido fundamento structura & soliditas aedificii? Ut proinde quae sine ipso geruntur, omni prorsus & vi, & soliditate, & stabilitate careant; nullaue polleant auctoritate, qui non in ipso consistunt; quemadmodum aut corpus a capite separatum, aut rivus a fonte disjunctus, aut lapides extra fundamentum jacentes, aut ramus a radice praecisus. Hoc certe sequentia verba clare ac diserte significant: *Atque ab ipso, quasi quodam capite, dona sua vellet in corpus omne manare, ut exfortem se ministerii intelligeret esse divini, qui ausus fuisset a Petri soliditate recedere. Quare hoc tantum disceptari posse videtur, an Episcopi similes sint*

---

(a) Lib. IV. de Rom. Pont. cap. XXIV.

sint naturalibus ramis, an ramis in aliam radicem insertis : Naturales enim rami omnem trahunt a sua radice viriditatem : insiti vero aliquam ex se ipsis habebant, antequam in aliam radicem infererentur ; quam tamen servare non possunt, si a radice in quam insiti fuerint praeceidantur . Ita Episcopi aut omnem trahunt a Romano Pontifice jurisdictionem ; aut si quam a Christo proxime accipiunt, eam prorsus amittunt, nisi Romano Pontifici tanquam radici cohaereant . Habeant singuli lapides suam a Christo soliditatem, ut ex eis aeterni templi aedificatio consurgat ; sed extra fundamentum disjecti, ullam in hoc aedificio partem habere non possunt . Porro in eandem mentem ac sensum interpretamur, quae ex SS. Optato Milevitano, Gregorio Nysseno, & Caesario Arelatenſi Bossuetius profert testimonia, ut non necesse sit in singulis immorari .

### C A P U T X I I I .

„ Patres ante Augustinum . Alij Augustini loci :  
 „ Traditio sequentis aetatis .

**S**ub finem Capitis praecedentis, ut probaret his Evangelicis verbis : *Tibi dabo ; Quodcumque ligaveris :*  
 „ non modo Petrum, sed in Petro suo Principe, ac pro  
 „ omnibus respondente, omnes Apostolos eorumque Successores, Episcopali potestate ac jurisdictione esse donatos, haec Bossuetius adtulit S. Augustini verba : *Quum omnes essent interrogati, solus Petrus respondit : Tu es Christus ; Et ei dicitur : Tibi dabo &c. Tanquam ligandi ac solvendi solus acceperit potestatem : cum & illud unus*  
*pro*



pro omnibus dixerit, & hoc cum omnibus; tanquam personam gerens unitatis acceperit. Quo, inquit laudatus Auctor, nihil est clarius. Et insuper hoc S. Augustini testimonio, quod aliis in hoc Capite ejusdem S. Doctoris locis illustrat, contineri docet veram & genuinam illius Evangelici textus expositionem; quae etiam constanti veterum Patrum & Ecclesiae traditione firmetur: Hujus autem traditionis, ex Patribus, qui S. Augustinum praecefferunt, testes producit S. Martyrem Cyprianum, & Sanctum Optatum Milevitanum; ex his vero, qui post S. Augustinum floruerunt, Christianum Drutmarum noni saeculi scriptorem, eodemque habitae saeculo Cabillonensis Synodi Patres & Caroli Magni Capitularia. Quae profecto nimium pauca sunt, ut constantem Ecclesiae traditionem adferant ac demonstrent. Multum autem eorum auctoritati detrahitur, si demonstretur, tum eum locum ceteros Patres aliter interpretari; tum esse reapse aliter interpretandum; tum denique nec eos omnes quos citat Patres, & imprimis SS. Cyprianum & Optatum Milevitanum huic interpretationi favere. Quae omnia sequentibus Articulis demonstrare aggredimur.



## ARTICULUS PRIMUS.

*Haec Christi Domini verba: Tu es Petrus &c. Et tibi dabo claves &c. Ad unam & singularem S. Petri personam retulit constans veterum Patrum & Ecclesiae traditio, quae ante & post Sanctum Augustinum obtinuit.*

**S**anctus Augustinus in iis omnibus locis, quae Bossuetius profert, aut indicat, & quae etiam apud alios Theologos obvia sunt, laudata Christi Domini verba exponens, nomen Petri a petra derivat, quemadmodum Christiani nomen a Christo, & ait, illo significatam fuisse totam Ecclesiam, quae supra petram, id est Christum, aedificatur; & quemlibet Christianum, qui Christi Divinitatem agnoscit & confitetur, suo quodam modo Petrum esse, quemadmodum & Christianus est & petrae vocabulo non ipsum Petrum significatum fuisse docet, sed Christum, cujus Petrus Divinitatem agnoverat, palamque professus fuerat. Denique eidem Petro, ut Ecclesiae personam & figuram gerenti, datas fuisse a Christo claves Regni caelorum iis verbis: *Tibi dabo claves &c.*

Protestantes hanc S. Augustini verborum Christi interpretationem obviis manibus exceperunt; & quamquam illa adversus sancti Doctoris mentem palam & manifeste abutuntur; attamen aptissima est ad omnia argumenta eludenda, quae ad adstruendum Petri primatum, Theologi ex illis verbis conficiunt. Bossuetius haud alia ratione eam ceteris expositionibus praefert, & Ecclesiae traditioni consonam praedicat & extollit, quam quod ipsius

rationibus accommodata est. Nam ignorare non poterat, tum ea minime contineri *literalem*, quem vocant, sive Historicum Scripturae sensum, aut si pro *literali* accipiat, eam Evangelico textui manifestam inferre vim; tum eam communi veterum Patrum traditione refelli, qui verba illa Christi ad unicam & singularem Petri personam referenda esse censuerunt.

Ita Tertullianus lib. de Praescript. cap. XXI. *Latuit aliquid Petrum aedificandae Ecclesiae Petram dictum; claves regni caelorum consecutum, & solvendi & alligandi in caelis & in terris potestatem?*

Ita Origenes apud Euseb. lib. VI. cap. XIX. *Petrus super quem Christi Ecclesia, contra quam inferorum portae non praevallebunt, aedificata est.*

Ita S. Cyprianus Epist. LXXI. *Petrus, quem primum Dominus elegit, & super quem aedificavit Ecclesiam.*

Ita S. Basilii ad Cap. II. Isaiae: *Illico per hanc vocem, Petrus, intelligimus Jonae Filium..... qui quoniam fide praestabat, Ecclesiae aedificationem in se ipsum recepit.*

Ita S. Gregorius Nazianzenus Orat. XXVI. *Vides, quemadmodum ex Christi discipulis, magnis utique omnibus & excelsis, atque electione dignis, hic petra vocetur, atque Ecclesiae fundamenta in fidem suam accipiat; ille impensus ametur &c.*

Ita S. Johannes Chrysostomus Homil. LV. in Matthaeum: *Tu vero mecum ex eis omnibus, quanta sit potestas ejus (Petri) intellige: Ego dico tibi, inquit. „Tu es Petrus: Et ego super te aedificabo Ecclesiam meam: „ ego tibi dabo claves regni caelorum.*

Ita S. Epiphanius Haeresi LIX. *Princeps Apostolorum*

*Petrus, qui quidem solidae petrae instar nobis existit; cui velut fundamento Domini fides innititur; supra quam Ecclesia modis omnibus exstructa est.*

*Ita S. Hieronymus lib. I. adversus Pelagianos cap. IV. Ut Plato Princeps Philosophorum; sic Petrus Apostolorum fuit; super quem Ecclesia Domini stabili mole fundata est.*

*Ita S. Hilarius Canone XXVI. in Matth. O in nuncupatione novi nominis felix Ecclesiae fundamentum, dignaque aedificatione illius petra, quae infernas leges, & tartari portas, & omnia mortis claustra dissolveret!*

*Ita S. Cyrillus Alex. lib. II. in Johan. cap. XII. Discipulum instruit, eum se esse, qui cuncta, etiam antequam fiant, novit; nec Simon fore jam nomen sibi, sed Petrus, praedicat; vocabulo ipso commode significans, quod in eo tanquam in petra lapideque firmissimo, suam esset aedificaturus Ecclesiam.*

*Ita apud S. Augustinum lib. I. Retract. cap. XXI. Sanctus Ambrosius; & Augustinus ipse lib. unic. contra Epistol. Donati, ut ipse fatetur sequentibus verbis: In hoc libro dixi in quodam loco de Apostolo Petro, quod in eo tanquam in petra fundata sit Ecclesia: qui sensus etiam cantatur ore multorum in versibus Beati Ambrosii, ubi de Gallo Gallinaceo ait: Hoc ipsa Petra Ecclesiae canente culpam diluit. Sed scio, me postea saepissime sic exposuisse, quod a Domino dictum est: Tu es Petrus, & super hanc petram aedificabo Ecclesiam meam; ut super hanc petram intelligeretur, quam confessus est Petrus, dicens: Tu es Christus Filius Dei vivi; ac si Petrus ab hac petra appellatus, personam Ecclesiae figuraret, quae supra hanc petram aedificatur, & accepit claves regni caelorum:*

*non*

*non enim dictum est illi : Tu es Petra ; sed , Tu es Petrus : Petra autem erat Christus ; quem confessus Simon , sicut eum tota Ecclesia confitetur , dictus est Petrus . Harum autem duarum sententiarum , quae sit probabilior , eligat Lector . Itaque S. Augustinus non revocat , quod ante docuerat , nec in priorem expositionem censorium stylum exercet ; sed Lectoris arbitrio & iudicio permittit , ut eam praeferat , quam probabiliorē existimat . Nobis autem non modo probabilior , verum & certissima esse videtur prior interpretatio , tum quod unice textui cohaereat Evangelii ; tum propter veterum Patrum , eam communiter probantium , auctoritatem . Traditionem usque ad Sanctum Augustinum perduximus . Facile autem esset eandem per sequentia tempora continuare : sed paucis , iisque insignioribus testimoniis contentus ero , ne Lectores fatigem .*

Philippus Presbyter & Sedis Apostolicae Legatus Aët. III. Concilii Ephesini ; *Nulli , inquit , dubium , imo saeculis omnibus notum est , quod sanctus beatissimusque Petrus , Apostolorum Princeps & Caput , fideique columna , & Catholicae Ecclesiae fundamentum , a Domino nostro Jesu Christo . . . . claves regni accepit , solvendi-que ac ligandi peccata potestas ipsi data est . Fidei columna & Ecclesiae Catholicae fundamentum Petrus dicitur , quoniam ipse petra illa est , supra quam Christus aedificavit Ecclesiam .*

Legati S. Leonis Aët. III. Concilii Chalcedonen-  
sis sententiam adversus Dioscorum his protulere verbis :  
*Sanctissimus . . . . Leo . . . . una cum ter beatissimo , &  
omni laude digno Beato Petro Apostolo , qui est petra &  
crepido Catholicae Ecclesiae , & rectae fidei fundamen-  
tum ,*

tum, nudavit eum Episcopatus dignitate &c.

S. Leo Serm. III. de Allumt. sua ad Pontificatum, verba Evangelica exponens ita Christum ad Petrum loquentem inducit: *Sicut Pater meus tibi manifestavit Divinitatem meam: ita & ego tibi notam facio excellentiam tuam*, quia tu es Petrus: *Id est quum ego sim inviolabilis petra, ego lapis angularis, qui facio utraque unum; ego fundamentum, praeter quod nemo potest aliud ponere; tamen tu quoque petra es, quia mea virtute solidaris; ut quae mihi potestate sunt propria, sint tibi mecum participatione communia.*

S. Prosper, vel quisquis Auctor est librorum de vocatione Gentium lib. II. cap. XXVIII. adfinia his, quae mox ex S. Leone retulimus, de Petro scribit: *Quis ergo ambigat, quis ignoret, hanc fortissimam petram, quae ab illa principali petra communionem & virtutis sumsit & nominis, hoc desiderium semper habuisse, ut ei moriendi pro Christo constantia donaretur?*

Sergius Cypriorum Metropoli in Epistola ad Theodorum Papam, quae lecta est Secret. II. Concilii Lateranensis sub S. Martino I. ita Romanum Pontificem Petri succiorem adloquitur: *Firmamentum a Deo fixum & immobile.... vestram Apostolicam Sedem constituit, o Sacer Vertex, Christus Deus noster: Tu es enim, sicut divinum veraciter pronunciat Verbum; Petrus, & super fundamentum tuum Ecclesiae columnae confirmatae sunt. Tibi & claves regni caelorum commisit, atque ligare & solvere potestative, quae in terra & in caelis sunt, promulgavit.* Haec ideo in Romanum Pontificem transcurrunt, ac de ipso singulariter praedicantur, quoniam primum uni Petro a Christo concessa sunt. Aliis, quae in-

nu-

numera sunt, hujuscemodi testimoniis describendis ultro superfedeo, quod haec sufficere existimem ad demonstrandum, quatenam sit vera constansque Ecclesiae traditio in horumce verborum interpretatione: *Tu es Petrus, & super hanc petram aedificabo Ecclesiam meam.*

Perinde autem concordēs sunt iidem veteres Patres in sequentibus Christi verbis: *Et tibi dabo claves regni caelorum &c.* ad eandem unam & singularem Petri personam referendis.

Id patet primo ex Tertulliani, Johannis Chrysostomi, Hilarii, Philippi Presbyteri & S. Caelestini Legati in Concilio Ephesino, & Sergii Cypriorum Metropolitae, quae jam adduximus testimoniis; qui, ut haec verba: *Tu es Petrus, & super hanc petram &c.* ita & ista: *Tibi dabo claves regni caelorum &c.* veluti ad solum directa Apostolorum Principem interpretantur. Et plane absurdum esset, priora verba ad ipsam proprie Petri personam, posteriora vero ad eundem, ut Ecclesiae personam & figuram gerebat, referre; quum textus ipse aperte suadeat; pronomen illud demonstrativum, *Tu, Tibi*, idem omnino subiectum indigitare. Quare qui in prioribus verbis nihil aliud, quam Petrum cogitant, eisdem necesse est in posterioribus exponendis ad solum Petrum respicere.

Praeter laudatos Patres Sanctus Optatus Milevitanus lib. VII. de schismate Donatistarum: *Bono unitatis*, inquit, *Beatus Petrus*, cui satis erat, si post quod negavit, solam veniam consequeretur, & praeferrī Apostolis omnibus meruit, & *claves regni caelorum communicandas ceteris solus accepit*: „Revera, inquit Bossuetius, quae „ Petro datae sunt Matth. XVI. communicandae erant „ postea Apostolis Matth. XVIII. & Johan. XX. commu-  
„ ni-

„ nicandae autem, non a Petro, sed a Christo, ut patet. Ergo ex S. Optato Milevitano, ipfomet fatente Adversario, Matth. XVI. claves regni caelorum, saltem proxime & immediate, non ceteri Apostoli, non Ecclesia, sed solus Petrus accepit.

S. Gregorius Magnus lib. IV. Epist. XXXII. ad Mauriciū Augustum: *Cunctis Evangelium scientibus liquet, quod voce Dominica sancto & omnium Apostolorum Principi Petro Apostolo totius Ecclesiae cura commissae est. Ipsi quippe dicitur.... Tu es Petrus, & super hanc petram &c. Et tibi dabo claves regni caelorum &c. Ecce claves regni caelestis accipit; potestas ei ligandi ac solvendi tribuitur; cura ei totius Ecclesiae & principatus committitur.* Ergo quemadmodum soli Petro totius Ecclesiae principatus commissus est; ita hoc loco soli Petro claves regni caelorum traditae sunt.

Stephanus Dorensis Episcopus in libello, quem Sancto Martino I. Romano Pontifici obtulit, & Secretar. II. Concilii Lateranensis relictus est: *Aperta lucubratione claves regni caelorum creditae sunt ei, atque ipse tantummodo ad aperiendum eas fidelibus.... magnus secundum veritatem, & Princeps Apostolorum meruit Petrus.*

Sanctus ipse Martinus eodem Secret. Stephano Dorensi Episcopo concinit, quum de Apostolorum Principe loquens, ait similiter, quod *solus, atque prae omnibus creditus est, atque accipere meruit a Rege regum Christo Deo claves regni caelorum ad aperiendum recte credentibus in eumdem Dominum nostrum, & claudendum infidelibus haereticis.*

Concinit & S. Maximus Martyr, quum in Epistola ad Petrum illustrem scribit, quod *Sanctissimae Romano-*

*rum*



rum Ecclesiae Beatissimus Papa ab ipso incarnato Dei Verbo . . . universarum, quae in toto terrarum orbe sunt, Sanctarum Dei Ecclesiarum in omnibus & per omnia percepit, & habet imperium, auctoritatem & potestatem ligandi, atque solvendi. Cum hoc enim ligat & solvit etiam in caelo Verbum, quod caelestibus virtutibus principatur. Quandonam vero Ecclesia Romana principatum & imperium omnium Ecclesiarum ab incarnato Verbo suscepit, & singularem hanc ligandi atque solvendi auctoritatem & potestatem? Tunc profecto, quum Petrus ab ipso Christo claves regni caelorum accepit; quae tunc proinde ipsi tantummodo traditae sunt, quemadmodum ipsi tantum omnium Ecclesiarum principatus & imperium traditum est. Et haec sufficere existimo, ut aliquod communis Ecclesiae traditionis in iis quoque verbis ad solum Apostolorum Principem referendis, specimen habeatur. Quare alia, quae huc congeri possunt, lubens praetermitto.

## ARTICULUS II.

*De Sancti Cypriani mente atque sententia operosius differitur: Aliqua item de S. Optato Milevitano, aliisque Patribus & Auctoribus, quorum testimoniis Bossuetius S. Augustini doctrinam & interpretationem confirmat.*

**S**ancto Augustino passim praeluxisse Sanctum Martyrem Cyprianum, Meldensis Episcopus jaetat; cujus Sancti Martyris auctoritas quum non minimi ponderis ac momenti sit, libet in ejus mentem atque sententiam ac-

curatius inquirere. Pluribus in locis hoc de argumento differit Sanctus Doctor, ex quibus omnibus invicem collatis ejus doctrina exculpenda est.

Primum occurrit celebris locus ex libro de Unitate Ecclesiae, qui varie in variis Codicibus & editionibus legitur, illum describam, prout eum legisse videtur sexto saeculo Pelagius II. quum secundam scribebat Epistolam ad Episcopos Ilthiae: *Loquitur Dominus ad Petrum*: Ego dico tibi, *inquit*, quia tu es Petrus &c. Et iterum eidem post resurrectionem suam dicit: *Pasce oves meas*. Super illum unum aedificat Ecclesiam suam, & illi pascendas mandat oves suas. Et quamvis Apostolis omnibus post resurrectionem suam parem potestatem tribuat, & dicat: Sicut misit me Pater &c. tamen ut unitatem manifestaret, unitatis ejusdem originem ab uno incipientem sua auctoritate disposuit. Hoc erant utique & ceteri Apostoli; quod fuit Petrus, pari consortio praediti & honoris & potestatis: sed exordium ab unitate profisciscitur, & primatus Petro datur, ut una Christi Ecclesia, & Cathedra una monstretur. Et pastores sunt omnes, & grex unus ostenditur, qui ab Apostolis omnibus unanimi consensione pascatur, ut Ecclesia Christi una monstretur. Quam unam Ecclesiam etiam in Cantico Canticorum Spiritus Sanctus ex persona Domini designat, & dicit: Una est columba mea &c. Hanc Ecclesiae unitatem qui non tenet, tenere se fidem credit? Qui Ecclesiae renititur & resistit; qui Cathedram Petri, super quem fundata est Ecclesia, deserit; in Ecclesia se esse confidit?

Verba ista, ET primatus Petro datur. Et ista: Qui Cathedram Petri, super quem fundata est Ecclesia deserit;

in quamplurimis, iisque etiam antiquissimis Codicibus

mi-

minime reperiri, Latinius, Rigaltius, Baluzius, & Oxonienses Editores adfirmant; ea proinde marginales esse notas, quae in textum postmodum irreperunt. Ea tamen, ut ante monebam, legisse videtur in suo Codice Pelagius II. quum ante mille fere & ducentos annos ad Episcopos Ilthiae scribebat: „ut merito hinc colligi debere vi-  
 „ deatur, *inquit Baluzius in Not. ad hunc locum*, haec  
 „ quae mihi videntur hodie non esse Cypriani, esse anti-  
 „ qua, & ea vere esse Cypriani, creditum esse aevo Pela-  
 „ gii, id est, ante mille annos. Quapropter etsi Cypriani auctoritatem non habent, Pelagii tamen auctoritate, qui illa citat & laudat, minime destituuntur.

Non sint tamen illa nec Cypriani, nec Pelagii, & omnino tanquam insititia & adulterina, expungantur & abjiciantur. Quod omnes tanquam genuinum agnoscunt, sufficit ad communem traditionem confirmandam de textu illo Evangelico ad solum Apostolorum Principem referendo. Ait enim, quod super unum aedificavit Christus Ecclesiam; quod quamquam eandem post resurrectionem suam ceteris Apostolis dedit, tamen ut unitatem manifestaret, unitatis ejusdem originem ab uno incipientem sua auctoritate disposuit; & quod exordium ab uno proficiscitur, ut Ecclesia una monstretur. Quorum utique verborum sensus non est, quem illis Bossuetius adfingit; nempe Apostolo Petro. ut unitatis vel Ecclesiae personam & figuram gerenti, ac proinde in eo etiam ceteris Apostolis & universae Ecclesiae Matth. XVI. traditas fuisse claves regni caelorum. Nam quemadmodum tunc super unum, non super omnes, aedificavit Ecclesiam; ne Ecclesia super Ecclesiam aedificata intelligatur; ita uni, & non omnibus, tradidit claves. Dedit quidem & aliis

Apostolis remittendorum & retinendorum criminum potestatem, verum post resurrectionem: hinc autem singulariter eas Petro tradidit, aut promisit; Petro, inquam, non ut Ecclesiae vel unitatis formam aut figuram gerebat; (nam huiusce rei in Cypriano ne vola quidem aut vestigium exstat:) verum illum constituens ipsius unitatis fundamentum, originem, & principium; quem proinde continendae servandaeque totius Ecclesiae unitati singulari potestate & auctoritate donavit: velut fundamentum, quod universo aedificio unitatis principium est & origo; firmum esse oportet & stabile, ne ipso nutante, universa compago solvatur ac dissipetur.

His illustrandis plurimum valent, quae, paucis interpositis, de Ecclesiae Catholicae unitate idem eleganter disserit Cyprianus: *Ecclesia quoque una est, quae in multitudine latius incremento fecunditatis extenditur: Quomodo Solis multi radii, sed lumen unum; & rami arboris multi, sed robur unum tenaci radice fundatum; & cum de fonte uno rivi plurimi defluunt, numerositas licet diffusa videatur exundantis copiae largitate, unitas tamen servatur in origine. Avelle radium Solis a corpore, divisionem lucis unitas non capit: Ab arbore frange ramum, fractus germinare non poterit: A fonte praecide rivum, praecisus arescit. Sic & Ecclesia Domini luce perfusa per orbem totum radios suos porrigit: unum tamen lumen est, quod ubique diffunditur, nec unitas corporis separatur. Ramos suos in universam terram copia ubertatis extendit, profluentes largiter rivos latius expandit: unum tamen caput est, & origo una, & una mater, fecunditatis successibus copiosa. Ex quibus Sancti Cypriani verbis colligit Nat. Alex. Dissert. IV.*

Hi-

Histor. Ecclesiast. Saec. I. „ Unitatem Ecclesiasticam a  
 „ S. Petro, & ejus successoribus derivari, quomodo radii  
 „ a Sole, rami ab arbore, rivi a fonte; & ita unum esse  
 „ Episcopatum, ut unitatis illius origo sit Sanctus Petrus.  
 Profecto hanc Ecclesiae unitatem ubique Sanctus Martyr  
 ad Petrum, ad Sedem Apostolicam, ad Ecclesiam Roma-  
 nam velut ad principium, radicem, fundamentum, & ori-  
 ginem refert: Ita Epist. XLVIII. al. XLV. ad Cornelium  
 de Polycarpo Hadrumetino: *Nosenim singulis navigan-*  
*tibus (Romam) ne cum scandalo ullo navigarent, ratio-*  
*nem reddentes, scimus nos hortatos eos esse, ut Ecclesiae*  
*Catholicae RADICEM ET MATRICEM agnoscerent ac tene-*  
*rent.* Et Epist. LIX. al. LV. ad eundem Cornelium; quum  
 prius dixisset, quod *super Petrum aedificata a Domino*  
*fuerat Ecclesia*, inferius subjungit: *Post ista adhuc insu-*  
*per Pseudoepiscopo sibi ab haereticis constituto, navigare*  
*audent & ad Petri Cathedram atque ad Ecclesiam princi-*  
*palem, unde unitas Sacerdotalis exorta est, a schismaticis*  
*& profanis literas ferre, nec cogitare, eos esse Roma-*  
*nos, quorum fides Apostolo praedicante laudata est, ad*  
*quos perfidia habere non possit accessum.* Ad haec verba:  
 Ecclesiam principalem, haec adnotat Stephanus Baluzius:  
 „ Haec verba, satis scio, nollent Adversarii nostri (*Pro-*  
 „ *testantes & Pseudo reformati*) non exstare in Cypria-  
 „ no. Itaque omnes machinas movent, ut ostendant, ni-  
 „ hil hic extraordinarium tribui Romanae Ecclesiae, prin-  
 „ cipalem vocari dicentes pro magnitudine sua, ut in Epi-  
 „ stola XLIX. ait Cyprianus, quia in principe civitate  
 „ constituta erat, quia prima est ordine. Et tamen scie-  
 „ bant, Irenaeum Episcopum Lugdunensem Cypriano  
 „ antiquiorem scripsisse lib. III. cap. III. necesse esse om-  
 „ nem

„ nem Ecclesiam concurrere ad Romanam *propter poten-*  
 „ *tiolem principalitatem* ... Poterant advertere, & Ter-  
 „ tullianum dixisse in libro de Praescriptionibus adversus  
 „ haereticos, nobis auctoritatem praesto esse ex urbe Ro-  
 „ ma, & Cyprianum non semel dixisse, Ecclesiam aedi-  
 „ ficatam esse super Petrum, & exordium unitatis ab eo  
 „ proficisci. Quae verba magni momenti sunt in hac caus-  
 „ sa. Denique observandum est, Cyprianum, cum con-  
 „ queritur de audacia Schismaticorum, qui post judicium  
 „ Episcoporum Africae provocaverant ad cathedram bea-  
 „ ti Petri atque ad Ecclesiam principalem, nullo modo  
 „ respexisse ad magnitudinem urbis Romae, cujus illi  
 „ praesidium non implorabant, sed ad Cornelium. Erat  
 „ enim causa Ecclesiastica. Itaque certum esse debet, hic  
 „ agi de auctoritate Episcopi Romani, ad quem antiqui-  
 „ tus confugere solebant Episcopi, qui se a Collegis suis  
 „ oppressos querebantur, ut isti Schismatici. Confundit  
 „ autem Cyprianus Cathedram Petri cum Ecclesia prin-  
 „ cipali, quia Cathedra Petri est Ecclesia principalis, &  
 „ Ecclesia principalis est Cathedra Petri. Haec autem  
 „ non modo adversus haereticos valent, verum & in eos  
 „ quoque, qui Petro claves traditas fuisse docent, ut Eccle-  
 „ siae sive unitatis formam gerebat: Id enim, ut articulo se-  
 „ quenti ostendemus, nihil auctoritatis & jurisdictionis Pe-  
 „ tro in ceteros Apostolos contulisset. Verum S. Cyprianus  
 „ non unitatis formam, sed unitatis originem & firmamen-  
 „ tum in Petri Cathedra collocat; idque propterea quod Ec-  
 „ clesia principalis sit, & Ecclesiae Catholicae radix & ma-  
 „ trix, tanquam petra, supra quam Christus aedificavit Ec-  
 „ clesiam. Quod non minus luculenter docet Epist. LXXXIII:  
 „ ad Jubajanum, ubi Ecclesiae unitatem non ex eo repetit,  
 „ quod

quod in uno praefigurata sit, sed super unum fundata, qui & claves regni caelorum accepit; & qui proinde non unitatis forma, sed fundamentum, & radix & origo est: *Quo venturus est, qui sitit, utrumne ad haereticos, ubi fons & fluvius aquae vitalis omnino non est; an ad Ecclesiam, quae una est, & super unum, qui & claves ejus accepit, Domini voce fundata est? Haec est una, quae tenet & possidet omnem Sponsi sui & Domini potestatem. In hac praesidemus, pro honore ejus atque unitate pugnamus.*

Hinc ergo facile intelligitur, quomodo accipiendus sit locus, quem ex Epist. XXXIII. al. XXVII. Meldenfis Episcopus profert: *Dominus noster, cujus praecepta & monita observare debemus, Episcopi honorem, & Ecclesiae suae rationem disponens, in Evangelio loquitur, & dicit Petro: Ego dico tibi, quia tu es Petrus &c. Inde per temporum & successionum vices Episcoporum ordinatio & Ecclesiae ratio decurrit, ut Ecclesia super Episcopos constituatur, & omnis actus Ecclesiae per eosdem Praepositos gubernetur.* „In uno igitur Petro, inquit Bosluetius, „ omnes Episcopos institutos Cyprianus agnoscit, neque „ immerito. Episcopatus, eodem Cypriano passim attestante, unus toto orbe terrarum, in uno est institutus. „ Idque factum est ad stabiliendam unitatis originem ab „ uno incipientem, ut idem Cyprianus docet. Episcopatum, atque adeo Episcopos omnes, in uno institutum, dispositum & inchoatum fuisse, agnoscimus & fatemur; sed eo sensu, quo in fundamento universae domus ac totius aedificii forma & structura disponitur & inchoatur: nec melius stabiliri potuisse contendimus unitatis originem, quam ordinando, ut ab uno inciperet, qui illius fons, & radix esset & firmamentum. Primum ergo in uno,

uno, id est, in Petro Apostolorum principe Episcopatus dispositus est & institutus, tanquam in capite, fonte, radice, ac fundamento, in quibus tota vis corporis, rivulorum, arboris, atque aedificii continetur: postmodum autem, hoc est, post resurrectionem, ut idem docet S. Cyprianus, & in se ipsis Episcopalem potestatem a Domino receperunt. *Nam Petro, inquit Sanctus Martyr laudata superius Epist. ad Jubajan. primū Dominus, super quem aedificavit Ecclesiam, & unde unitatis originem instituit & ostendit, potestatem istam dedit, ut id solveretur in caelis, quod ille solvisset in terris. Et post resurrectionem quoque ad Apostolos loquitur dicens: sicut misit me Pater, & ego mitto vos &c. Quod & Firmilianus non minus disertis verbis docet in Epistola ad ipsum Cyprianum, adversus Stephanum Papam, ubi S. Petrum vocat unius Ecclesiae fundamentum, tanquam petram, super quam ipsius Ecclesiae unitas, non quidem figurata, sed solidata est: ac soli Petro primum dictum fuisse, Quaecumque ligaveris &c. quod postmodum ceteris Apostolis dictum est: Nec permanet, inquit, in fundamento unius Ecclesiae, quae semel a Christo supra petram solidata est; hinc intelligi potest, quod soli Petro Christus dixerit: Quaecumque ligaveris &c. & iterum in Evangelio, quando in solos Apostolos insufflavit Christus dicens: Accipite Spiritum Sanctum: si cujus remiseritis peccata &c. Potestas ergo peccatorum remittendorum Apostolis data est, & Ecclesiis, quas illi a Christo missi constituerunt, & Episcopis, qui eis ordinatione vicaria successerunt. Quae plurimum valent ad objectum Cypriani locum intelligendum. Nam diserte docet, primum soli Petro, ut unius Ecclesiae fundamento, deinde & ceteris Apostolis tradi-*

tam



tam fuisse remittendorum criminum potestatem .

Hinc etiam intelligitur, quomodo sit accipiendum quod ait Optatus Milevitanus *bono unitatis* solum Petrum claves regni caelorum communicandas ceteris accepisse . Id enim bonum unitatis poscebat , ut unus esset , ad quem velut ad fontem & originem Ecclesiastica auctoritas referretur , & a quo velut a centro & fundamento penderet ; ut ipse apertius & luculentius declarat in alio loco , quem hîc adtexere libet cum Gabrielis Albaspinci Aurelianensis Episcopi in eum notis ( a ) : *Ergo probavimus , eam esse Ecclesiam Catholicam , quae est in toto terrarum orbe diffusa , ejus jam commemoranda sunt ornamenta , & videndum , ubi sint quinque dotes . . . . inter quas ( b ) Cathedra est prima . . . . videndum est ( c ) quis , & ubi prior Cathedram sederit . Si ignoras , discere ; si nosti , erubescere . . . . Igitur negare non potes , scire te ( d ) in urbe Roma ( e ) Petro primò ( f ) Cathedram Episcopalem esse collatam , in qua sederit ( g ) omnium Apostolorum caput Petrus , unde & Cephas appellatus est : ( h ) in qua*  
una

( a ) Lib. II. cont. Parmenian.  
( b ) Cathedra est prima . Potestas clavium & missio est prima . *Albasp. cujus & sunt notae seqq.*

( c ) Quis , & ubi prior Cathedra . Videndum est , cui primo potestas , missio , & Sacerdotium concessum mandatumque sit .

( d ) In urbe Roma . Romae igitur sedit , qui primus Cathedram obtinuit .

( e ) Petro primò . Docet , Christum D. Petro primam Cathedram , & primam missionem concessisse : hoc

*To. I. Par. II.*

est , eum Ecclesiae & omnibus Sacerdotis praefecisse .

( f ) Cathedram Episcopalem . Primam missionem : omnem potestatem , a qua ceterae deducerentur .

( g ) Omnium Apostolorum caput . Est caput Apostolorum , ex Optato , quia primam habuit Cathedram suam , ex qua ceteri potestatem & Cathedram acceperunt .

( h ) In qua una Cathedra . Habet Pontifex Christi Cathedram ; & ea Cathedra una , non multiplex : Quapropter ut quis eam habeat , oportet

R r

una Cathedra (a) unitas ab omnibus servaretur; ne ceteri Apostoli (b) singulas sibi quisque defenderent: (c) Ut jam schismaticus & peccator esset, qui contra (d) singularem Cathedram alteram collocaret. (e) Ergo Cathedram unicam, quae est prima de dotibus, (f) sedit prior Petrus, (g) cui successit Linus &c. Damasus Siricius, hodie qui noster est socius: cum quo nobiscum totus orbis commercio formatarum, in una communionis societate concordat. (h) Vestrae Cathedrae vos originem reddite, qui

oportet, ut eam a Pontifice, cui prima ea est tradita, accipiat; Haec est Optati doctrina.

(a) *Unitas ab omnibus.* Hoc est, ut omnes adhaerent Summo Pontifici: servare enim unitatem in prima illa Cathedra, est, ab illa Cathedra originem ducere, & Sacerdotium accipere. Nota loquendi formulam, servare unitatem in Cathedra Summi Pontificis, quibus liquet, Optatum credidisse & docuisse, primam Cathedram, potestatem, missionem, quae verba apud eum sunt synonyma, Romanam esse, eamque summum Pontificem occupare; ab ea ceteras vim suam & potestatem accipere debere; in ea, & cum ea omnibus adhaerendum esse, & qui cum ea non communicarent, schismaticos esse: nam Optatus ex his, & ex consequentibus, missionis & potestatis suae rationem reddit, eamque non alio argumento probat, nisi quod cum summo Pontifice conjunctus esset.

(b) *Singulas.* Ergo ceterorum Apostolorum Cathedrae non erant primae, neque singulae, sed erant Cathedrae a Cathedra illa una, quam Romae Christus constituerat, propagatae & genitae.

(c) *Ut jam schismaticus.* Ut esset schismaticus, qui suam Cathedram ab illa una & prima non accepisset, atque peccator, qui sine Pontificis missione Cathedram sibi arrogaret.

(d) *Singularem Cathedram.* Nota singularitatem Cathedrae. Quam male Antiquis illis conveniret cum haereticis nostris, qui singularitatem non agnoscunt.

(e) *Ergo Cathedram unicam.* Ex eo quod ceteri Apostoli non haberent singulares Cathedras, concludit, unicam esse Cathedram, & eam Romae esse.

(f) *Sedit prior Petrus.* Primus ex Pontificibus sedit.

(g) *Cui successit Linus.* Probavit primo unitatem Cathedrae Christi Secundo, eam Romae institutam fuisse. Tertio, D. Petrum primo eam occupasse. Quarto, Apostolorum Cathedras ab ea manasse. Quinto, illam Cathedram, quae Petro tradita esset, ad Siricium & Damasum usque, per seriem Pontificum maximorum pervenisse.

(h) *Vestrae Cathedrae.* Suae rationem & originem edidisse videtur Optatus, quando Parmenianum ad id faciendum invitet & compellat: hoc

*qui vobis vultis sanctam Ecclesiam vindicare. Sed & habere vos in urbe Roma partem aliquam dicitis; (a) ramus est vestri erroris, protentus de mendacio, non de radice veritatis.* Cathedrae suae legitimam esse originem probat ex sua cum Romana Cathedra communione, quam unam esse docet & singularem; ex qua proinde ceteras oriri & proficisci necesse est, quae tamen legitimam sibi originem vindicant, & rami sunt de veritatis radice surgentes, non de mendacio propagati. Itaque ubi Christus Petrum Apostolorum omnium caput constituit, quum eum Cephā vocavit, quum ei claves regni caelorum singulariter tradidit; Cathedram unam instituit, in qua unitas ab omnibus fervaretur, ne ceteri Apostoli singulas sibi quisque defenderent, quae non ab illa originem ducerent, & velut a radice penderent. Videantur notae doctissimi Aurelianus Episcopi.

Quibusdam interpositis S. Augustini testimoniis, de quibus sequenti Articulo disseremus, observat Illustrissimus Adversarius, manasse eamdem ad Posteriores traditionem de datis Petro clavibus, ut Ecclesiae formam & personam gerebat. Verum a quinto saeculo, in quo Augustinus florebat, ad nonum transitum facit, ex quo Christianum Drutmarum profert, qui S. Augustini opinionem amplectitur,

hoc autem fecit Optatus docendo, se cum Summo Pontifice communionem habere, & participare cum prima illa Cathedra, quae una est. Itaque ex summi Pontificis communione duo possunt deduci; Episcopum, schismaticum non esse; unaque & legitima eum uti potestate & missione.

(a) *Ramus est vestri erroris.*

Hoc est ille Pseudoepiscopus, quem Romae constituitis, est ramus productus ex trunco erroris vestri & schismatis, quod est in Africa; non est radix, sed ramus. Atqui Episcopi Romani non sunt missi ab aliquo, non sunt rami, sed sunt radix: ceteri ab eo manant, & originem ducunt, illi a nullo oriuntur.

tur, de qua nestrum iudicium sequenti articulo profere-  
mus. Interim vero ex eodem saeculo veteris & a nobis ex-  
positae traditionis testem adducemus Rhabanum Mau-  
rum, cujus profecto longe est quam Drutmari celebrior &  
insignior auctoritas, qui in eum de quo nunc agimus Mat-  
thaei locum scribens ait, quod *Beatus Petrus, qui Chri-  
stum bona fide confessus, vero est amore secutus, specia-  
liter claves regni caelorum, & principatum iudicariae  
potestatis accepit*. Possemus addere eidem concinentes  
alios ejusdem aevi & sequentium saeculorum Scriptores;  
verum in re tam obvia nolumus frustra tempus insumere.

Profert etiam Adversarius Cabillonensis & Remensis  
Synodi Patres, & Capitularia ab Ansegiso collecta, qui-  
bus dicuntur Episcopi potestatem & auctoritatem Episco-  
palem a Christo in Beato Petro accepisse; ac propterea in  
aliis quoque monumentis Episcopi vice Petri ejusque au-  
ctoritate anathemata intorquent. Quae tamen eo referri  
debent, quod est, ut jam ostendimus, antiquioribus Pa-  
tribus traditum; ut nimirum in Beato Petro velut in capi-  
te, fonte, & origine, Episcopalem auctoritatem accepisse  
intelligentur; & vice Petri ejusque auctoritate anathema-  
ta pronunciare, quod eorum auctoritas quaedam sit aucto-  
ritatis Petro traditae derivatio.



## ARTICULUS III.

*Admissa S. Augustini expositione , non posse ex cap. XVI. Matth. Petri primatum adversus haereticos demonstrari: Eam tamen expositionem textui minime cohaerere , ex ipsis Protestantibus demonstratur . Petro eo loci super universam Ecclesiam , non modo distributive , verum & collective , tributam fuisse supremam auctoritatem .*

**V**eteres Patres , & Romanos Pontifices , & Catholicos Theologos principatus Petri fundamentum in eo potissimum textu , de quo nunc agimus , collocare , nemo est qui ignoret. Quare de Catholico dogmate non bene profecto merentur , qui hujusce loci vim hisce temporibus non adferere & vindicare , sed exoticis interpretationibus infringere & labefactare conantur . Et quidem S. Augustinus , quod adversus Donatistas disputans , verba illa , *Et super banc Petram* , ad Christum traxerit , & Petro claves ut Ecclesiae figuram gerebat traditas propugnarit , a Theologicorum dogmatum tractatoribus optimis rationibus excusatur (a) . Sed nemo est , qui adversus haereticos disputans , traditionem exigi velit ad Augustinianae interpretationis amussim : haec enim inter objecta recensetur , quibus Catholicum dogma ab haereticis oppugnatur . Et certe si Petrus , ut Ecclesiae figuram gerebat Matt. XVI. claves accepit , hinc probari non potest , quod in ceteros Apo-

---

(a) Videfis Nat. Alex. Dissert. IV. in Hist. Saec. I. §. III.

Apostolos, & in universam Ecclesiam principatum obtinuerit.

Difficultatem in omnium oculos insipientem vidit etiam Illustrissimus Adversarius, eamque verbis sequentibus occupavit: „Neque propterea dixeris, nihil praece-  
 „ teris accepisse Petrum, qui tantum ceteros figuraret:  
 „ Meminisse enim oportet, quid Augustinus dixerit (a),  
 „ *Petrum Ecclesiae gessisse personam, propter primatum,*  
 „ *quem in discipulis habuit.* Et alibi (b): *Petrus Eccle-*  
 „ *siae figuram portans, Apostolatus principatum tenens:*  
 „ *quod assidue inculcat, & ceteri Patres uno ore praedi-*  
 „ *cant.* Hoc enim habuit prae ceteris, ut cum esset om-  
 „ nium Princeps, illud potestatis a Christo proxime &  
 „ immediate manantis commune depositum principali  
 „ jure & ipse acciperet, & ad successores transmitteret.  
 Verum haec quidem optime ostendunt, ac perspicue demon-  
 strant, S. Augustinum Catholicam de primatu &  
 principatu Petri doctrinam tenuisse; ac propterea illius  
 auctoritate ac testimoniis temere Novatores abuti; inde  
 tamen minime efficitur, vim argumento restitui, quod ex  
 Christi verbis adversus Haereticos Catholici Tractatores  
 eliciunt. Nisi forte quispiam huic argumento nonnihil  
 inesse momenti existimet: „Cui tamquam Principi Ec-  
 „ clesiae figuram gerenti Christus tradidit claves, in om-  
 „ nes Discipulos primatum & principatum contulit, &  
 „ eum omnium Principem instituit: Atqui Petro tan-  
 „ quam Principi Ecclesiae figuram & personam gerenti  
 „ Christus tradidit claves: ergo & in omnes Apostolos  
 „ primatum ipsi & principatum contulit, eumque om-  
 „ nium

(a) Conc. in Psalm. CVIII.

(b) Sermon. LXXVI. al. XIII. de Verb. Dom.

nium Principem instituit. Vis argumenti omnino postulat, ut probetur, Petrum quum claves accepit, non utcumque; sed ut omnium Discipulorum Principem, Ecclesiae figuram & personam gessisse; vel, ut Bossuetius ait (a), *placuisse Christo, Ecclesiam in Petro figurari ut in Principe*: Id autem facile quidem Augustini auctoritate probabis; sed hoc non quaerimus: volumus autem, ut Christi testimonio & auctoritate probetur: agimus enim de Petri principatu adversus Haereticos, qui traditionem & Patrum auctoritatem despiciunt, verbis Evangelicis vindicando. Semel autem admissa Evangelici textus tradita ab Augustino interpretatione, aut haeretici reponent; gratis a te affirmari; *placuisse Christo, Ecclesiam in Petro figurari ut in Principe*; vel id tibi ex hoc ipso textu demonstrandum est; aut fatendum, ad adstruendum Petri primatum eum prorsus ineptum & inutilem esse. Proba ergo ex hoc ipso Matthaei loco, *placuisse Christo &c.* Hic tibi prorsus haerere aquam necesse est. Nam verba illa, *Et super hanc petram*, juxta eam, quam amplecteris expositionem, ad Christum referenda sunt, non ad Petrum: haec autem, *Tibi dabo claves*, dictae sunt Petro ut Ecclesiae figuram gerenti: *tanquam principi*, adjungis: Petitio principii est, reponent Adversarii; id tibi probandum incumbit (b).

Male

(a) Infra cap. XIX.

(b) Reaple Auctor Notarum, nono Abbatis Fleurii in Historiam Ecclesiasticam discursui subjunctarum, quamquam Catholicus videri velit, & Ecclesiae Romanae conjunctus, attamen hac ipsa ratione contendit, non modo ex sacris litteris

probari non posse, Romanum Pontificem errori obnoxium non esse, verum & ejus primatum juris esse divini, seu divinae institutionis. Ita pag. 24. „Le sentiment de ceux „ qui regardent la primauté du Pa- „ pe comme d'institution humaine „ & de Police Ecclesiastique ne doit „ point

Male itaque Catholico dogmati consulunt, qui expositionem textui minime cohaerentem alteri praeferunt; quae in eum unice quadrat; cujusmodi est illa, quae ad solum Petrum ea Christi Domini verba dirigit. Id vero adeo clarum & apertum est, ut hac de re vel ipsis Protestantibus, qui paullo candidiores sunt, cum Catholicis Expositoribus conveniat. Latissime id & invictè demonstrat Camero in istum Matth. locum, ex cujus proluxa de hoc argumento oratione pauca hîc speciminis ergo subjiciam: „ Ex his, quae hactenus dicta sunt, liquet quidem,  
 „ aliquid singulare a Christo Petro fuisse his verbis collatum, quod non fuit illi cum reliquis Apostolis commune. Sed quia id novum & insolens multis videri  
 „ pos-

„ point être regardée comme hérétique. *Et infra pag. 31.* Les passages de l'Ecriture que Mr. l'Abbé Fleury emploie pour prouver que la primauté de l'Evêque de Rome est de droit Divin, ne sçavoient l'établir en aucune manière. Selon la règle reçue par tous les Catholiques, que le Concile de Trente a adoptée & que Pie IV. a insérée dans la profession de foi que l'on fait faire à tous ceux qui rentrent dans l'Eglise, on ne doit interpréter l'Ecriture que selon le consentement unanime de tous les Peres; or les deux passages que cite Mr. de Fleury expliqués selon cette règle ne donnent aucune privilege particulier au Pape. Quant au premier: *Tu es Pierre, & sur cette Pierre je bâtirai mon Eglise*, il est différemment expliqué par les Peres. *Quatuor autem ejusmodi expositionibus ex Launojo recensitis adjungit:*

„ que les trois dernières explications ne donnent aucune prerogative particulière à Saint Pierre. *Et*, qu'il n'y a que la première dont il semble qu'on pourroit conclure que Saint Pierre a reçu par ces paroles quelque privilege particulier de Jêsu Christ: *Prior autem illa expositio eorum Patrum est*, qui enseignent que l'Eglise a été bâtie sur Saint Pierre. *Et infra pag. 35. idem docet de altero Evangelico textu: Pisce oves meas: quoniam & iste est appliqué, inquit*, par toute la tradition à tous les Apôtres & à tous les Pasteurs quoiqu'ils soient. *Quod & dicendum de his verbis: Tibi dabo claves regni &c. si Petrus velut omnium gerens personam a Christo claves accepit, non autem illi speciatim ac singulariter datas fuisse dicamus.* Sed de hac re iterum ad priora Capita libri XV. Tomo seq.



„ possit, probandum jam & confirmandum nobis est:  
 „ deinde vero aperte definiendum, Quidnam sit illud sin-  
 „ gulare & praeceptum. Et ad prius quidem illud quod  
 „ attinet; multa sunt, quae evincunt, in Petrum aliquid  
 „ eximium supra reliquos Apostolos a Christo fuisse col-  
 „ latum, ac primum quidem ipsa totius orationis empha-  
 „ sis. *Et infra*: Haec arguunt, Christum his verbis Pe-  
 „ trum singulariter & seorsim compellere, proindeque  
 „ & singulare quidpiam illi tribuere. Quorsum enim  
 „ pertinet ista Christi oratio, quae illius mens, quis sco-  
 „ pus, si communiter, si aequae reliqui discipuli ac Petrus  
 „ compellantur? Numquid Petri nomen omnibus Apo-  
 „ stolis commune fuit? Tum vero illud *Simon Bar-Jona*,  
 „ quum ad reliquos Apostolos minime pertineat (neque  
 „ enim illi nati fuerunt patre Jona) quae ratio effecerit,  
 „ ut quae eodem tenore cum istis conjuncta & continua-  
 „ ta sequuntur, alio trahantur? Deinde etiam illa, *Tibi*  
 „ *dico, Tibi dabo, Tu es Petrus*, haud dubie magnam  
 „ habent emphasim, & clare aperteque significant, haec  
 „ tam dicta singulariter, Petro singulariter & peculiari  
 „ quadam ratione convenire.

Henricus Hammondus in suis ad hunc Matth. locum  
 Annotationibus: „ Petro dicit hîc Christus, cum fore  
 „ lapidem *καὶ ὅλιον*, qui post lapidem angularem,  
 „ primus in aedificio Ecclesiae Christi dici possit; qui  
 „ quum semel structus foret, numquam erat diruendus;  
 „ eumque potestatem regendae Ecclesiae, quam denotant  
 „ claves, habiturum. *Et infra*: Claves regni caelorum  
 „ significant potestatem administrandae Ecclesiae.....  
 „ Haec potestas, quam Christus promittit se Petro, sin-  
 „ gulari nempe homini daturum; ut quidquid solveret

„ vel ligaret, id esset solutum, aut ligatum in caelo.

Denique, ut alios omittam, Johannes Clericus, haec verba exponens, *Εἰ Πίτερος, καὶ ἐν ταύτῃ τῇ πύτρᾳ*: „ Similem, *inquit, παρανομίαν* observavimus ad Genes. XLIX. 8. ubi vide notata. Si vel hoc solum animadvertissent Interpretes, nunquam negassent, *Petrum* & *Petram* hîc esse unum eundemque Virum; nempe, „ Simonem in Apostolico collegio eximium. Consultatur Johannes Camero, in Praelectionibus ad hunc locum, aut in Myrothecio, ubi rem extra omne dubium collocavit. Videatur & Hugo Grotius in suis ad Matth. cap. XVI. Annotat. Porro illud ad nos non pertinet, quia in re positam esse velint singularem illam praerogativam, quam soli Petro fuisse tributam, Protestantes ejusmodi Expositores adfirmant; vel quid illi comminiscantur, ne Petro potestatem jurisdictionis in ceteros Apostolos fuisse collatam, & eam potestatem ad ipsius in Romana Cathedra successores pertransisse fateri cogantur. Sufficit nobis, ut quaecumque fuerit istiusmodi praerogativa, & ad Petrum, & ad solum Petrum, ex eorum sententia referenda sit. Quod autem illa sit potestas jurisdictionis, & quod ad Romanos Pontifices dimanarit, Galli Theologi non negabunt; qui passim, & verbis sane magnificis praedicant, Beatum Petrum totius Ecclesiae caput fuisse divinitus constitutum, eamque dignitatem & capitis auctoritatem in Romanis Pontificibus Petri successoribus usque ad consummationem saeculi permanere. Sed quaestio est alibi data opera pertractanda; an ejusmodi potestas sit in universam Ecclesiam *collective*, ut ajunt, an solum *distributive*. Quaestio ridicula, & Sophistarum propria; si a nobis excitaretur. Sed quoniam Galli Theologi hac di-

distinctione opus habent, ad Romani Pontificis auctoritatem coercendam, digna Theologica gravitate effecta est. Christus super Petrum Ecclesiam veluti unam domum aedificavit: Porro unam domum non faciunt singuli lapide seorsim ac distributive accepti, sed eorum tota collectio, & quae ex eis consurgit universa compago, id vero est, quod omnes hac voce, *domus*, intelligunt. Itaque & haec una domus, quam Christus supra petram aedificavit, universum corpus primo ac potissimum significat ex omnibus Episcopis simul & collective sumtis conflatum; cujus proinde corporis tota potestas & jurisdictio ex Romani Pontificis potestate & auctoritate veluti fundamento, radice, & capite pender.

## CAPUT XIV.

- „ Cleri Gallicani ab antiqua traditione ducta  
 „ sententia: Conventus generalis an-  
 „ ni 1655. adversus Johannem  
 „ Bagotium acta memo-  
 „ rantur .

**Q**uid Clerus Gallicanus anno 1655. adversus Johannem Bagotium de proximo & immediato Ecclesiasticae jurisdictionis in Episcopis & secundi Ordinis Sacerdotibus seu Parochis, fonte senserit ac decreverit; & utrum ejus sententia cum veteri traditione conspiret; quaestio est, quam hoc loco nolumus definire. Quum ad nostrum institutum & scopum satis, ut saepe diximus, in praesentia sit, ut undecumque Episcoporum & Parochorum auctoritas proxime derivetur; ea tamen,

S s 2

etiam

etiam prout in universo corpore reperitur; a Romano Pontifice velut a Capite pendeat, in eoque tanquam in radice & fundamento subsistat.

## CAPUT XV.

- „ Authoris Anonymi de jurisdictione Episcopali  
 „ a Summo Pontifice profecta, vanae com-  
 „ mentationes: Sancti Gregorii loci:  
 „ Bellarmini objectio: S. Feli-  
 „ cis tertii locus.

**Q**uae etiam in hoc Capite adversus Auctorem tractatus de libertatibus Ecclesiae Gallicanae disputat Bossuetius, nolumus ad trutinam revocare. Satis, & quantum praesenti instituto & proposito sufficit, nostrum de hac controversia sensum aperuimus. Auctor ille in omnium manibus est: an ipsius argumentis satis a Meldensi Episcopo factum sit, diligens & accuratus Lector judicabit.

## CAPUT XVI.

- „ Loci S. Johannis Chrysostomi, a novissimo  
 „ Authore Anonymo objecti.

**S**anctus Johannes Chrysostomus Hom. LV. in Matth. S. Petrum vocat *omnium Apostolorum os*, & *verticem consortii totius*; indeque colligit ille Bossuetio Anonymus Auctor, auctoritatem & sententiam Petri, non modo singulorum, verum & omnium simul Apostolorum auctoritati ac sententiae praevalere.

Re-

Respondet Adversarius, quod „ notare Anonymus  
 „ debuisset, eum esse oris loco, qui promat quid omnes  
 „ sentiant. *Et rursus*: Quis inter Catholicos dubitat,  
 „ quin Romanus sit caput & vertex totius Ecclesiae. An  
 „ proinde ejus sententia omnium sententiae praevaleat,  
 „ quaestio est. *Denique*, & Senatus Principem totius  
 „ Ordinis Principem Caputque dici.

Quod unus promat quid omnes sentiant, duplici fieri  
 ratione potest. 1. Rogatis prius aliorum suffragiis, quo-  
 modo Princeps Senatus totius Ordinis sententiam pro-  
 mit. 2. Propria, vel accepta divinitus auctoritate, non  
 tam promendo quid alii sentiant, quam quod alii sentire  
 debent. Quemadmodum Rex, totius Regni; quemad-  
 modum, juxta Adversarios, Concilium Oecumenicum,  
 Romano Pontifici cohaerens, totius Ecclesiae sententiam  
 promit. Hoc autem pacto, juxta Sanctum Doctorem,  
 Petrus Apostolorum os fuit, & promisit quid omnes Apo-  
 stoli sentiebant, aut sentire debebant: Non enim aliorum  
 suffragia rogavit, sed *confestim*, inquit, *prosilivit*, ac  
*praeveniens*, ait: „ Tu es Christus Filius Dei vivi. At-  
 que ut haec diceret, non ab Apostolis, ut Princeps Sena-  
 tus ab universo coetu, sed ab aeterno Patre per caelestem  
 inspirationem divinam & insuperabilem accepit auctori-  
 tatem: *In medium Patrem produxit, qui ad confessionem*  
*veritatis animum Petri commovit. Ita Petrus quidem*  
*locutus est; Pater autem illi, quod loqueretur, suggessit:*  
*ut non humanam opinionem, sed divinam sententiam*  
*divinitus dictam, Petrum credas enunciaſſe.*

Deinde, ex eo quod omnes fatentur; nempe, Roma-  
 num Pontificem caput esse & verticem totius Ecclesiae,  
 colligimus, quod Galli Theologi negant, ipsius videlicet sen-

sententiam omnium sententiae praevalere. Nam Petrus, qui in suis adhuc successoribus vivit, & iudicium exercet, & per ipsorum loquitur ora; Petrus per os Leonis locutus est; non ab Apostolis, non ab Episcopis, vel Apostolorum & Episcoporum Collegio, ad faciendam fidei dogmata auctoritatem accipit, sed quum ex Cathedra loquitur divinam sententiam, & divinitus dictam ipsique suggestam, pronunciat.

Praeterea ex eodem Chrysostomo probat laudatus Auctor, Petro vere ac proprie, & non tantum sicut Ecclesiam significanti, factam esse promissionem de aedificanda super ipsum Ecclesia: tum Petrum Pastorem universi gregis esse constitutum.

Reponit Bossuetius: „Id omnes, ac praecipue Parisienses, & Gallicanos Patres confiteri, neque in communi fide stabilienda laborandum fuisse.

Haec quidem fatentur verbis, sed reapse eorum virtutem negant, ac penitus labefactant. Nam si Petrus universi gregis, hoc est, universae Ecclesiae tanquam unius gregis Pastor constitutus est; annon inde consequens est, illi super unicum hunc gregem, ex universis & agnis & ovibus, hoc est, fidelibus & Episcopis, constitutum datam fuisse divinitus auctoritatem? Hinc S. Johannes Chrysostomus: *Hic aperte (Christus) praedixit, magnam eorum, qui credituri & erant, & sunt, multitudinem fore; & sublimiora sapere ipsum facit, & Ecclesiae Pastorem constituit.* Recte his verbis Anonymus ille subjungit: „An existimas, illum, quem Christus sublimiora

„sapere facit, a multitudine, cujus pastor constituitur,

„docendum esse, non multitudinem ab ipso? Pastorem

„Ecclesiae ab Ecclesia; non Ecclesiam a suo Pastore? Ad

haec,

haec, si vere & proprie, & in solo Petro tamquam firmo & immobili fundamento, suam Christus aedificavit Ecclesiam; & ad eum solum haec verba pertinent: *Tu es Petrus, & super hanc Petram aedificabo Ecclesiam meam*: pariter ad eum solum vere & proprie, & non ut Ecclesiae formam & personam gerentem, haec verba referenda sunt: *Tibi dabo claves regni caelorum*; subindeque defendi amplius non potest Augustiniana horumce verborum expositio, quam tanto conatu molitur Bossuetius adstruere. Erit enim sensus: *Tu es Petrus*; & super te veluti petram aedificabo Ecclesiam meam; tibi quoque tanquam Ecclesiae fundamento & Principi dabo claves regni caelorum, id est; (a) *principatum in Ecclesia & summam potestatem*, cuius traditio clavium symbolum est.

Id vero est, quod ab Anonymo sexto loco positum est, & a Parisiensibus non negari Bossuetius docet; nempe, *Ut Petro vere, proprie, ac excellentiore modo revelata fuerat Christi divinitas: ita ipsi vere, & proprie, & immediate dari claves regni caelorum*. „ Haec potestrema, inquit Meldensis Episcopus, sunt certissima; „ additis sane iis, quae ex Augustino ac Patrum traditione haufimus; ut nimirum claves regni caelorum, velut Ecclesiae personam gerens Petrus acceperit: cuius sane traditionis in hoc Chrysostomi loco, de quo in praesentia differimus, ne vola quidem aut vestigium est. Sed neque in aliis Patribus, ut jam superius ostendimus.

---

(a) Lamy in Harm. Evang. lib. IV. cap. XVIII.

## CAPUT XVII.

„ Alius Chrysostomi locus in Acta  
„ Apostolorum.

„ **N**oster Anonymus, *inquit Bossuetius*, ultimo lo-  
„ co memorat Beati Chrysostomi Homiliam III.  
„ in Acta Apostolorum, in eaque vim facit maximam.  
„ Ibi Sanctus Doctor exponit sermonem Petri de uno ex  
„ Discipulis in Collegium Apostolicum cooptando. Quo  
„ loco Chrysostomus id notat: Petrum ubique loqui pri-  
„ mum; Graeca autem sic habent: *Et ut fervidus, & ut*  
„ *is, cui a Christo Grex esset creditus, & ut coetus Prin-*  
„ *ceps semper primus incipit loqui*: hoc autem omnes  
„ consentitur.

Nos autem ex hoc ipso, quod omnes consentunt;  
conficimus id, quod ab Adversariis, quod ab ipso Bossue-  
tio negatur. Nempe, super omnes Apostolos simul sum-  
tos, & super universam Ecclesiam simul & collective ac-  
ceptam Principis Apostolorum auctoritatem & potesta-  
tem eminere. Nam Grex nihil est aliud, quam Ovium  
Agnorumque collectio, & Oves & agni simul sumti Gre-  
gem constituunt: Huic autem Gregi ex Ovibus & Agnis,  
hoc est, ex Apostolis & omnibus Fidelibus constituto Pe-  
trus veluti Pastor praeficitur ex Chrysostomo. Itaque non  
modo supra singulos Apostolos, verum & supra omnes  
simul & collective sumtos Petri auctoritas eminebat.

Hinc autem facile intelligitur, quid velit idem Chry-  
sostomus quum subjungit: *Merito primus omnem aucto-*  
*ritatem usurpat in negotio, ut qui omnes habeat in manu.*  
Nam ex praecedentibus constat, sic Petrum habuisse in

ma-



manu omnes Apostolos, quomodo Pastor gregem, ut eum ducat quo velit, non ut ab ipso ducatur. Quae ratio non modo in illo singulari negotio, de uno discipulorum in Judae locum adsciscendo; verum & in quibuscumque aliis negotiis valebat, quae ad universi gregis ductum & directionem pertinerent.

Negat id quidem Bossuetius, additque, quod Anonymus „quandoquidem rem ad extremos apices urget, ad-  
„dere debuisset, Petrum etiam solum omnia potuisse quo-  
„cumque in negotio. Nec tantum in designando Mat-  
„thia, sed etiam in exponenda fide, in extinguendo  
„schismate, in constituenda universali disciplina, idque  
„absolute & ad nutum, nec ulla Coapostolis deliberatio-  
„ne permessa, qualia nec Petrus, nec ipse Chrysostomus,  
„nec quisquam homo sanus somniavit.

Duo in electione Matthiae spectari possunt, quorum alterum juris erat, & ad fidem pertinebat & Scripturarum interpretationem; alterum vero in *facti*, ut ajunt, quaestione versabatur. Juris erat, & ad fidem & Scripturarum interpretationem pertinebat, quod pro Juda, qui ceciderat, esset unus ex Discipulis in Collegium Apostolicum cooptandus. Id vero Petrus sua statim auctoritate definit, nulla Coapostolis deliberatione permessa: *Exsurgens Petrus in medio fratrum dixit: Viri fratres, oportet impleri Scripturam, quam praedixit Spiritus Sanctus per os David de Juda.... Scriptum est enim in libro Psal-  
morum.... Et Episcopatum ejus accipiat alter.* De Juda esse hunc locum intelligendum, ad eum esse Propheticum ejusmodi oraculum referendum; ad eum respexisse Spiritum Sanctum; ac proinde velle Spiritum Sanctum, ut Episcopatum Judae alius acciperet, solus intelligit Petrus, solus

docet, solus sua auctoritate definit, nulla cum Coapostolis deliberatione praemissa, nec ullus queritur, nullus intercedit, nullus Petri sententiam ad examen revocare audent aut retractare; idque propterea, ut Chrysostomus animadvertit, quod omnes haberet in manu, velut Pastor gregem, cujus est gregem ducere, quemadmodum gregis, Pastoris vocem audire: *Ceterum sententiam ipse protulit, sed hanc quoque declarans, suam non esse, sed a supernis profectam juxta Prophetiam . . . . Merito primus omnem auctoritatem usurpat in negotio, ut qui omnes habeat in manu.* Ad facti vero quaestionem pertinebat, quis ex discipulis universo Gregi probator esse videretur & acceptior, subindeque aptior ad Judae locum implendum: quod ex aliorum consilio & suffragio pendeat: adeoque, quamquam potuisset, ut idem Chrysostomus adnotat, unum eligere, aut aliquem designare, in quem omnes facile consentirent; noluit tamen, sed *egit omnia ex communi discipulorum sententia, nihil auctoritate, nihil imperio.* Et infra: *Multitudini permittit judicium, & eos, qui eligerent reddens reverendos, & seipsum ab invidia liberans.* Ac postea. *An non licebat ipsi eligere? Licebat, & quidem maxime: Verum id non facit, ne cui videretur gratificari.* Igitur ubi agitur de fide & interpretatione scripturarum, solus Petrus sententiam profert, & omnes Discipuli acquiescunt: quemadmodum in alio de Legalibus Hierosolymitano Concilio postquam Petrus suum pronunciaisset judicium, *tacuit omnis multitudo.* Sed judicium de personis universo coetui permisit. Nos autem quum inerrantiam Petri Successoribus vindicamus, de judiciis loquimur non ad personas, sed ad fidem & scripturarum ac traditionis interpretationem pertinentibus.

## CAPUT XVIII.

- „ S. Augustini locus ab eodem Anonymo obje-  
„ ctus, contra Conciliorum auctori-  
„ tatem indeclinabilem.

## CAPUT XIX.

- „ Alii loci Augustini ab eodem objecti: An Papa  
„ Ecclesiam Catholicam repraesentet.

**N**on illud oneris in nos suscepimus, ut omnia Anonymi Scriptoris argumenta vindicemus. Quare, ut quae nobis solida videntur, urgemus: ita de aliis permittimus Lectoribus iudicium.

## CAPUT XX.

- „ Repetuntur & urgentur, quae pro Parisien-  
„ sium sententia, ab auctoritate & convoca-  
„ tione Conciliorum generalium dicta sunt:  
„ Confutantur vana suffugia: Bellarmini etiam  
„ responsionibus antedicta firmantur.

**Q**uemadmodum Illustrissimus Adversarius repetere in hoc Capite aggreditur & urgere, quae pro Parisiensium opinione duobus hisce libris disseruit: ita nos paucis complectemur, quae pro reliqui orbis Catholici doctrina, ex iisdem generalium Conciliorum fontibus hactenus disputavimus. Et quoniam duo sunt, quae Adversarii maxime urgent; nempe Conciliorum necessi-

tatem, quae nulla esse videtur, si Pontifex ad definienda fidei dogmata ineluctabili gaudet auctoritate: ac deinde eorumdem generalium Conciliorum in examinandis ac retractandis Apostolicis Constitutionibus constantem usum & libertatem; utrumque nobis penitus evertisse videmur.

Quod enim ad primum attinet, plane, ut credimus, ac luculenter ostendimus, quod quaecumque sit illa Conciliorum generalium utilitas seu necessitas, conciliari ea potest, imo, juxta eam, quae communiter obtinet inter Adversarios doctrinam, concilianda omnino est cum Romani Pontificis in dirimendis fidei Catholicae controversiis inerrantia. Nam Apostolicorum decretorum esse ineluctabilem vim, quum eis Ecclesiae consensus accesserit, quum in eis adprobandis moralis Episcoporum unanimitas intercedit, quum eis major Episcoporum numerus consensu sive expresso, sive tacito adhaeret, neque ipsi Parisienses Theologi dissententur, estque communis inter eos opinio, ut ex eorum & Libris & Thesis compertum est. Imo Turnelius docet (a), quod *si contingeret in aliqua fidei controversia divisos esse Episcopos, atque plures ex una parte cum Pontifice Romano, plures ex altera sine Pontifice stare, baud dubie ei parti adhaerendum foret, quae Capiti conjuncta esset: ista enim melior ac senior pars censeri deberet, & Ecclesiam sufficienter referre*. Jam vero negare quis audeat consensum majoris partis Episcoporum, & eorum cum Romanis Pontificibus conspirationem in iis erroribus praedammandis, quos deinde Oecumenicae Synodi confixerunt? An non cum Alexandro Episcopo Alex. & Silvestro Romano Pontifice ceteri fere omnes per orbem Episcopi Arianorum blasphemias dete-

---

(a) De Eccles. Tom. II. Quaest. V. art. III.

detestabantur, quum Nicaena Synodus habita est? An minor fuisset Episcoporum unanimitas in recipienda, si quam emisisset Silvester adversus Arianos solenni constitutione, quam in ipso Nicaeno Symbolo suscipiendo? Annon universus Occidens, & maxima Orientalium Episcoporum pars Liberii & Damasi adversus Semi-Arianos & Macedonianos decreta susceperat, quum secunda Synodus ad eorum errores profligandos coacta est? Synodus Ephesina & Cyrillus Occidentis & Orientis in damnando Nestorio consensionem jactabant, etsi Antiocheni Patriarchatus plures Episcopi Synodi decreto aperte refragabantur; qui forsitan soli ante Synodum in probando Caelestini judicio cunctati fuerant. S. Leonis Epistolam ad Flavianum jam universus Occidens vel expresso vel tacito consensu probaverat, jam fere omnes Orientales Episcopi, illi etiam, qui in Ephesino Latrocinio ceciderant, veluti certam fidei Catholicae regulam adprobaverant, antequam Synodus Chalcedonenfis celebraretur. Ab haereseos Monothelitarum initiis ad usque sextam Synodum Oecumenicam quinquaginta circiter anni interfluxerunt. Hoc temporis intervallo sufficere visa sunt S. Martini & aliorum Pontificum Romanorum decreta, ut ab universa Ecclesia Catholica Monothelitae pro haereticis haberentur, ut pro duabus in Christo voluntatibus, tanquam pro certo & irreformabili fidei dogmate, plures fidei Catholicae Athletae & exilia & vincula & carceres sustingerent; & usque ad effusionem sanguinis dimicarent. Quis Catholicorum non aliquo cultu & veneratione sacras Imagines prosequeretur, & Iconomachorum in eis dejiciendis & omni ludibriorum & injuriarum genere afficiendis sacrilegam temeritatem detestabatur, quum ad eorum furo-

furorem coërcendum Hadrianus I. septimam Synodum congregavit? Jam ergo antequam ejusmodi Concilia celebrarentur, Romanorum Pontificum adversus hujusmodi errores solennes constitutiones firmam obtinebant & indeclinabilem vim, nec Synodis absolute opus erat, quarum examine retractarentur, & quarum consensione ad summæ auctoritatis arcem evaderent. Quin & illud observatione dignum est, præter unam Chalcedonensem, nullam fuisse ex Orientalibus Synodis, quam absolute necessariam Romani Pontifices judicarent, & cujus habendæ cogitatio primùm ipsis inciderit: earum omnium celebrationem Imperatores, agentibus Orientalibus, & ut plurimum Regiæ urbis Episcopis, & adsentientibus Romanis Pontificibus, promoverunt. Quare non est, cur Meldensis Episcopus, & cur alii ejusdem doctrinæ Patroni ex nobis quaerant: „ Quorsum attinebat, ab ultimis Orbis partibus cieri Episcopos tantis laboribus, „ tantisque sumptibus, & Ecclesias Pastoribus viduari, si „ totum erat in Romano Pontifice positum? Non id, inquam, ex nobis quaerant, non ex Romanis Pontificibus Silvestro, Damaso, Caelestino, Agathone, Hadriano, qui nusquam indicant, post Apostolicæ Sedis decreta opus fuisse Oecumenicis Synodis, ut hæreses indeclinabili auctoritate confoderentur. Non item ex Magno Leone quaerant, qui quamquam ad refarciendas Orientis jacturas post Ephesinum Latrocinium Oecumenicam Synodum postulavit, tamen antea Synodi celebrationi totis viribus intercesserat, ratus suæ ad Flavianum Epistolæ satis inesse roboris ac momenti ad Eutychianam hæresim profligandam. Non ergo ex nobis, non ex Romanis Pontificibus, sed ex Orientis Imperatoribus & Regiæ urbis Episcopis

scopis quaerant, cur post Apostolicae Sedis decreta per universum Occidentem, & maximam Orientis partem recepta, voluerint tantis laboribus, tantisque sumtibus Synodos Oecumenicas celebrari, Episcopos fatigari, & Ecclesias Pastoribus viduari? Et si quidem responderint, quod non aliter potuerint, sollennia illa Romanae Sedis decreta toto jam fere orbe suscepta, invictum auctoritatis robur obtinere; eorum responsio non jam illam, quae nobis peculiaris est, sed quae etiam Gallicanis Episcopis communis est, doctrinam atque sententiam labefactabit. Quare aut fateri debent Adversarii, hoc argumento non probari Conciliorum generalium, ad sancienda fidei dogmata, & profligandas haereses, absolutam necessitatem; aut eo demonstrari, quod neque accedente majoris partis Episcoporum, & eorum moralis unanimi consensu, irreformabile evadat Apostolicae Sedis de fidei controversiis judicium.

Et haec quidem aperte demonstrant, Synodos Oecumenicas non fuisse absolute necessarias ad eas fidei quaestiones irretractabiliter terminandas, quas antea Romani Pontifices sollenni aliqua Constitutione sanxissent. At si loquamur de fidei controversia, quam nondum sollenni judicio Sedes Apostolica terminaverit; haud omnino displicent ea, quae Cardinalis Perronius animadvertit, ut Pontificum Romanorum in definiendis fidei quaestionibus ἀσφαλείᾳ cum Synodorum Oecumenicarum necessitate conciliet. „Car, *inquit* (a), l'infailibilité que l'on „presuppose estre au Pape Clement, comme il a esté „dict, au Tribunal souverain de l'Eglise, n'est pas pour „dire qu'il soit assisté de l'Esprit de Dieu, pour avoir la „lu-

---

(a) Perroniana, verbo, *Infailibilité*.

„ lumiere nécessaire à décider toutes les questions ; mais  
 „ son infailibilité consiste en ce que toutes les questions  
 „ auxquelles il se sent assisté d'assez de lumière pour les  
 „ juger , il les juge ; & les autres auxquelles il ne se sent  
 „ pas assez assisté de lumière pour les juger , il les remet  
 „ au Concile .

Hinc autem facile solvitur argumentum , quod contra nostram sententiam , ex Conciliorum necessitate post Bossuetium & alios , in hunc modum urget Turnelius (a) : Vis , inquit , praesentis argumenti in eo est : Si verum est , quod de Pontifice Romano affirmat Bellarminus ; nempe primo fieri non posse , divina invigilante providentia , ut solus ac temere judicet de rebus fidei . Secundo , nusquam illum errori esse obnoxium , cum ex Cathedra pronuntiat , adjuncto sibi ordinario coetu Consiliariorum ; plane inutilia & otiosa omni casu videantur Concilia generalia , ad finiendam controversiam , quae Pontificis judicio certo & infallibili terminari potest , & quidem via facili ac compendiosa , absque iis impensis , laboribus & molestiis , quae a Concilii generalis congregatione separari vix possunt . Haec Turnelius .

Verumenimvero juxta praemissam doctissimi Cardinalis observationem in promptu est repellere hoc , quod ab Adversariis velut ineluctabile jactatur argumentum . Quanquam enim illa duo verissima sint quae Bellarminus , & Canus alique docent ; nempe nec fieri posse , quod Romanus Pontifex solus ac temere judicet : neque quod in errorem incidat , quum ex Cathedra de fide pronuntiat adjuncto sibi ordinario Consiliariorum coetu ; adhuc tamen cum laudato Perronio dici potest , esse aliquando

ne-

---

(a) Tom. II. de Eccles. Quaest. V. art. III. pag. 139. edit. Paris.



necessaria Concilia oecumenica ; quum nempe res adeo implexa est totque altercationum nebulis involuta , ut ad eam certo iudicio terminandam sibi ipse Pontifex opus esse iudicat , non modo domesticae ac sibi iugiter adhaerentis , verum & plenioris imo & generalis Synodi consultatione . His ergo quatuor continetur Romani Pontificis in definiendis fidei controversiis indeficientia . 1. Quod non solus neque temere iudicet . 2. Quod iudicet adhibita pro negotii gravitate minore vel ampliore consultatione . 3. Quod quum re ipsa quidquam definit , eas credatur praemisisse dispositiones , quae pro rei definiendae difficultate praemittendae fuerant . 4. Quod praemittat Synodi generalis convocationem , quum tanto medio ipse opus esse iudicat ad eliquandam cuiuspiam dogmatis in quaestione positi veritatem .

Neque ab his prorsus dissentiunt Bellarminus & Canus ; hic quidem quum lib. V. de Locis cap. ultimo ait : „ Nec si Summus Pontifex firmus in fidei causa iudex est , Concilia frustra coguntur . Primum enim ut capite superiore admonebamus , Romanus Pontifex non temere & stulte , sed considerate atque sapienter habet fidei controversias definire , advocando scilicet Consiliarios , vel plures vel pauciores , iuxta rei de qua discutitur gravitatem . Juvant enim Patres Concilii Summi Pontificis fidem atque doctrinam . . . . Ita enim divina procuratio in Ecclesiam se fundit , ut membra praecipua , tametsi a capite ipsa pendeant , caput tamen tumentur . & juvent . Haec disertus ille atque eruditus Theologus . Quibus gemina sunt quae & Eminentissimus Bellarminus docet lib. IV. de Rom. Pontif. cap. VII. Hac enim sibi proposita difficultate : „ Si solus Pontifex potest

V u

„ in-

„ infallibiliter definire dogmata fidei; ergo frustra fiunt  
 „ Concilia, vel certe non sunt necessaria: *Respondet*; id  
 „ non sequi. Nam etsi in Pontifice sit infallibilitas; ta-  
 „ men non debet ipse contemnere media humana & or-  
 „ dinaria, quibus deveniri potest ad veram rei cognitio-  
 „ nem, de qua agitur: Medium autem ordinarium est  
 „ Concilium majus aut minus, pro magnitudine vel par-  
 „ vitate rei, de qua agitur. Quod patet exemplo Apo-  
 „ stolorum. Nam certe tam Petrus, quam Paulus po-  
 „ terant etiam soli quamlibet controversiam infallibiliter  
 „ definire; & tamen Concilium convocaverunt Act. XV.  
 Quae latius prosequitur & exponit idem Eminentissimus  
 Auctor lib. I. de Conciliis & Ecclesia cap. XI. ubi discrete  
 statuit, quod „ quamvis generalia Concilia non sint ab-  
 „ solute necessaria (nam tribus prioribus saeculis ac de-  
 inceps plurimae haereses absque Concilii generalis con-  
 gregatione damnatae ac profligatae sunt; & quemadmo-  
 dum S. Augustinus animadvertit, paucae fuerunt quae  
 hanc Ecclesiae habendae Synodi Oecumenicae adtulerint  
 necessitatem) „ tamen Concilia aliqua, sive generalia  
 „ sive particularia sint, omnino necessaria esse ad bonam  
 „ Ecclesiae gubernationem, vix in quaestionem revocari  
 „ posse dubito..... Nam etsi Summus Pontifex iudex  
 „ est vice Christi omnium controversiarum, eique ob-  
 „ temperare debet fraternitas universa, ut Cyprianus lo-  
 „ quitur lib. I. Epist. III. .... tamen non debet in contro-  
 „ versis fidei dijudicandis, aut solo suo iudicio fidere;  
 „ aut expectare divinam revelationem, sed adhibere di-  
 „ ligentiam, quantam res tanta postulat, & ordinaria  
 „ media; & tum demum expectare assistentiam Spiritus  
 „ Sancti, & directionem divinam. Porro medium ordi-

„ narium , ac proinde necessarium , esse Concilium , ma-  
„ gnum aut parvum , unum vel plura , prout ipse judica-  
„ verit , facile probari potest . Pluresque subinde ad id  
probandum rationes adfert . Quae tamen ut recte intelli-  
gantur , videnda sunt quae alibi cum Thomassino animad-  
vertimus , atque ex ejus Dissert. XX. in Synod. VI. oecum.  
num. XVI. descripsimus .

Frustra autem Turnelius loco superius laudato pagi-  
na 145. contendit , secum ipsum conflictari Eminentissi-  
mum Cardinalem , quum hinc docet Pontificis judicium  
errori obnoxium non esse , inde vero agnoscit Concilium  
generale posse aliquando esse medium necessarium , quod  
usurpare Pontifex teneatur . Atque hinc recurrit , inquit  
Parisiensis ille Theologus , vis tota praecedentis argumen-  
ti . Quippe si , Deo ita providente , fieri non possit , ut aut  
solus & temere de fide pronuntiet Pontifex ; aut ex con-  
sensu soliti sui & domestici coetus pronuntians , nusquam  
aberreret , ut quid tenebitur ad operosum ac laboriosum  
Concilii generalis remedium confugere ; quum habeat  
apud se domesticum , planum & facile , quod si adhibue-  
rit , certo & infallibili judicio Ecclesiam laborantem prom-  
tissime sublevabit ? At facile ista solvuntur ex dictis : fate-  
mur enim fieri non posse , ut Pontifex solus ac temere de  
fide pronuntiet ; & quod in errorem incidat , quum definit  
adhibito domestico & ordinario Consiliarium coetu : &  
tamen divino illustratus lumine sentiat aliquando non esse  
de aliquo dogmate sollenniter pronuntiandum , nisi adhi-  
bito ampliore , vel etiam oecumenico Episcoporum con-  
ventu .

Neque , ut jam latissime ostendimus , plus roboris ac  
momenti est in altero argumento , quod ex retractatis , ut

ajunt , & ad examen & judicium revocatis per Synodos Oecumenicas Apostolicae Sedis decretis , adversus ejus inerrantiam & summam auctoritatem Adversarii conficiunt . „ Jam ergo , *inquit ipso initio Capitis Bossuetius* , „ sententia Parisiensium , Conciliorum generalium traditione firmata est : Etenim vidimus , Romanorum Pontificum in Conciliis Oecumenicis judicia retractata , „ de his quaestionem habitam ; quaestione habita , Caelestini , Leonis , aliorumque probata judicia ; Vigili atque „ que Honorii rescripta improbata fuisse : neque quidquam a sancta etiam Sede profectum , aut a Patribus , „ aut a Romanis etiam Pontificibus , pro irrefragabili esse habitum , nisi postquam Ecclesiae consensus accessit .

Nos autem contra vidimus , haec quae jactant Caelestini , Leonis , Agathonis aliorumque decreta per Synodos oecumenicas retractata , totius jam fere Ecclesiae Catholicae consensione munita fuisse , antequam Synodi generales celebrarentur . Vigili autem & Honorii rescripta non ejus generis esse , in quibus condendis Romanis Pontificibus nulli obnoxiam errori vindicamus auctoritatem . Vidimus , Caelestinum , Leonem , Agathonem & Gregorium Decimum , disertis conceptisque verbis intercessisse , ne fides semel Apostolica auctoritate sancita , in tertia , quarta , & sexta Synodo , & in Lugdunensi secunda retractaretur ; & cum laudatum Leonem , tum Hadrianum I. & II. praecepisse ut libellis & formulis ab Apostolica Sede directis ante subscriberetur , quam Episcopi in Synodos admitterentur . Vidimus , haec , quae tantopere jactantur , decretorum Sedis Apostolicae retractationem & examen , ac de illis judicium in eo solum posita fuisse , quod lectis in publicis Actionibus istiusmodi decretis , & cum prae-

ce-

cedentium Conciliorum fidei formulis collatis, statim ab Episcopis pronunciatum est, ea invicem consentire, & vix toleratos fuisse, qui moras necerent, ac dubii & ancipites haerent. Porro si hoc argumento est, quod retractationi & superiori judicio obnoxiae sint Romanorum Pontificum dogmaticae Constitutiones; jam nec ipsae generalium Conciliorum de fide sanctiones irretractabiles erant. Nam & eas non semel vidimus, instituta cum sacrarum litterarum, & veterum Patrum, & praecedentium Synodorum testimoniis collatione probatas & confirmatas. Vidimus, Romanos Pontifices suas ad Synodos generales transmittere Epistolas, non ut de illis judicaretur; sed ut earumdem Synodorum judiciis formam regulamque praescriberent. Denique vidimus, Conciliorum generalium decreta ad Sedem Apostolicam, velut ad caput, fundamentum, crepidinem, fontem, radicem; & originem totius Ecclesiasticae jurisdictionis & auctoritatis relata, petitam ab ea eorumdem decretorum confirmationem; eaque decreta pro ejusdem Sedis Apostolicae judicio & arbitrio vel infirmata fuisse, vel auctoritatem & robur obtinuisse. Ex quibus omnibus constat, quam vana & futilia sint argumenta, quibus Adversarii sese tantopere effecerunt; contra vero quam firma & valida sint, quibus summam & indeclinabilem auctoritatem Sedis Apostolicae dogmaticis Constitutionibus vindicamus.

Haec enim quum validissimis sacrarum litterarum ac traditionis nixa principiis sit, immota omnino & ab Adversariorum insultibus firma consistere debet, postquam machinas disjecimus, quibus maxime ab illis impeti solet. Quid enim molestius illi ac prae fractius objiciunt, quam Conciliorum necessitatem, aut eorum in retractandis &

examinandis dogmaticis Apostolicae Sedis epistolis libertatem? quae prorsus illis interciderere videntur, si semel Romanis Pontificibus in fanciendis ac definiendis Christianae fidei dogmatibus indeclinabilis & ineluctabilis auctoritas adferatur. Hoc est quod toto XII. libro Meldensis Episcopus urget: nos vero, ut nobis videtur, iis argumentis depulimus, aut infirmavimus, quae certis utrinque & inconcussis regulis constant. Quis enim modestus, & gravis & eruditus Theologus has de hoc argumento regulas rejiciat, quas hîc iterum libet Cl. Thomassini verbis inculcare. „ De examinandis autem, *inquit* (a), & retractandis in Oecumenica Synodo litteris Pontificiis, has „ mihi videor regulas defixisse. Ubi illae litterae fuerant „ omnium aut longe plurimarum Ecclesiarum consensu „ ne roboratae, tum eas postea rursus non fuisse, aut ex „ venia & ad redundantiam juris fuisse in Synodo oecumenica examinatas. Item ubi Pontificiae de fide litterae, totius Occidentalis vel Synodi vel Ecclesiae assensu firmatae ad III. IV. VI. & VII. & si quas alias Synodos mittebantur in Orientem, non ita tunc eas Orientalium lubrico iudicio, & ancipiti examinis alcae creditas fuisse veluti dubias, ut ab illis solvi evertique possent: sed ut irreformabiles veteris fidei formulas, in quas Spiritus Sanctus Ecclesiae universae vegetator, & Paternarum conscientia traditionum, ita Orientales vel nutabundos inclinaret, vel revocaret devios, sicut Occidentales constantissime & inflexe adfixerat. Alioqui non de Pontificis diplomate Synodus Oecumenica, sed de Occidentalium cum Petri Cathedra conjunctissimorum fide inoffensa, Orientales inter novel-

la-

---

(a) Recens. Oper. de Concil. num. VII.

„ larum subinde haeresum lubrica lapsabundi, periculotae  
„ plenum aleae examen iudiciumque instaurassent. De-  
„ nique quomodocunque tandem novo examine Syno-  
„ dus Pontificias ventilaret epistolas, nequaquam nisi  
„ ipsorum assensu Pontificum id usurpatum. Ita confite-  
„ tur Petrus de Marca lib. IV. Concord. Sac. & Imper.  
„ cap. XVII. Id perspicue emergit ex jure Relationis,  
„ quod ille Pontifici adserit. Id ratio ipsa Synodi clami-  
„ tat, in qua Pontifex per se vel Legatos praesidet, judi-  
„ catque cum Synodo, numquam a suo Capite divellen-  
„ da. Haec laudatus Theologus toto passim Opere iis ar-  
„ gumentis demonstrat, quibus profecto nihil reponi solidi  
potest; ut ea proinde merito atque jure certarum instar fi-  
xarumque regularum haberi debeant, ad quas cetera, quae  
in hac disputatione difficultatem parere possent, exigan-  
tur. Cum his autem certis fixisque regulis, quas nemo  
unquam ulla aut dicendi vi aut disserendi arte convellat  
aut infringat, nullo pacto conciliari possunt, quae ab Ad-  
versariis de Synodorum Oecumenicarum necessitate, aut  
examinatis retractatisve per eas Dogmaticis Apostolicae  
Sedis Constitutionibus tanto strepitu venditantur. Quare  
iis semel in auctoritatem receptis, quas nemo profecto  
prudens sapiensque rejiciat, concidant necesse est quae  
duobus hisce libris adversus nostram doctrinam ab Episco-  
po Meldenensi operosissime disputantur.

## FINIS SECUNDI LIBRI.





DISSERTATIO  
DE SENTENTIA

*ILLUSTRISSIMI*

PETRI DE MARCA

CIRCA MODUM CONCILIANDI

Summam ROMANI PONTIFICIS  
auctoritatem

*Cum libertate suffragiorum*

IN SYNODIS OECUMENICIS.



ROMAE, MDCCXXXIX.

Typis Sacrae Congregationis de Propagandâ Fide.

*Superiorum facultate.*





# PRAEFATIO.



**N**IL est quod frequentius aut molestius nobis objiciant, qui in Romani Pontificis summam & ineluctabilem auctoritatem invadunt, quam quod nostra semel suscepta constitutaque sententia, Episcoporum in Conciliis generalibus jura prorsus labefactentur, imo jam nulla ratio, nulla necessitas sit, cur in Concilia generalia cogantur, aut cur Oecumenicae Synodi celebrentur. Nam si Romani Pontificis auctoritas ineluctabilis est; si nefas est ejus de fide decreta retractare; denique si de illius judiciis inquirere, deliberare, & judicare non licet; quae, inquiunt, Episcoporum partes seu munera in Conciliis Oecumenicis erunt? Etenim semel illis adempta suffragiorum libertate; quae profecto illis adimitur, si Roma-

ni Pontificis auctoritas ineluctabilis, ejusque de fide sanctiones irretractabiles sunt; nihil omnino reliquum est, quam ut Episcopi, perinde atque alii Fideles, caecam, ut ajunt, Apostolicis Constitutionibus obedientiam praestent, earumque meri executores sint, nullo autem judicis munere & officio fungantur: quum tamen eos in Conciliis generalibus sedere ut judices, neque a nobis negetur, & Bellarminus, & Canus aliique Theologi doceant, perspicuisque argumentis demonstrent.

Id ergo, inquam; est quod nobis Adversarii molestius & importunius objiciunt, neque adhuc, ut mihi videtur, ab Adsertoribus doctrinae nostrae satis nitide ac feliciter expeditum videtur. At contra, quam nos solidis gravibusque momentis non errandi praerogativam Romanis Pontificibus adferamus; quanta nobis ex sacris litteris, & ex Patribus, & ex Conciliis generalibus, aliisque vetustis ac probatissimis monumentis suppetant argumenta, non est quod hoc loco demonstramus, quum toto Opere, quo *Meldenis Episcopi quatuor postremos pro Gallicani Cleri declaratione de potestate Ecclesiastica* libros Apologeticos uberrime confutavimus, hoc labore copiose & amplissime perfuncti simus.

Hinc vero nodus existit ac nequitur difficultatis,

tatis, quam Illustrissimus Petrus de Marca his  
 verbis eleganter exponit (a): „ Si summam in  
 „ censendo & definiendo potestatem illi (*Roma-*  
 „ *no Pontifici*) tribuamus, perit libertas suffra-  
 „ giorum, quam tantopere commendant Caele-  
 „ stinus & Leo. At vero concessa suffragiorum  
 „ libertate, aequalitas quaedam hac in parte in-  
 „ duci videtur inter Romanum Pontificem &  
 „ ceteros Episcopos, quod multum de summa  
 „ ejus dignitate detrahit. Itaque aut unius liber-  
 „ tas aut dignitas alterius periclitantur; quem-  
 „ admodum in disputatione de auxiliis gratiae,  
 „ vel hinc arbitrii humani libertas laedi, vel il-  
 „ linc gratiae vis & efficacia minui, rerum ista-  
 „ rum inexpertis videtur.

Hunc nodum secant plerique Auctores non  
 solvunt, quum ad unam aut alteram partem ad-  
 haerentes, vel Episcoporum in Synodis Oecu-  
 menicis jura adeo extollunt, Pontificis autem ita  
 deprimunt, ut hujus principatum evertere, nec  
 illi nisi magni nominis umbram, reliquam face-  
 re videantur: vel contra in id unum intenti, ut  
 ejusdem Romani Pontificis in iisdem Synodis ma-  
 jestas & auctoritas dominetur, de tuendis aut  
 enucleandis aliorum Episcoporum juribus non  
 admodum solliciti fuisse videntur: Quare lauda-

tus

---

(a) Lib. V. de Conc. Sacerd. & Imp. cap. VII. num. II.

rus Petrus de Marca quum ad haec invicem concilianda operam suam industriamque conferret, in locum aliis intactum & intentatum se se invadere professus est: *Arduum*, inquit, *opus est invidiosum aggredior, quod nondum quisquam, ut existimo, in se recepit.* Quod nimirum quicumque alii in his rebus ac studiis versati sunt, in id unice incubuerunt, ut vel summam & indeclinabilem Romani Pontificis auctoritatem, vel adversus istam Episcoporum jura data opera tuerentur: nemo autem adhuc in se receperat, ut de conciliandis utriusque partis juribus ex professo differeret, aut hoc sibi industriaeque suae tanquam primarium, &, ut ajunt, directe petendum ac pertractandum proponeret argumentum.

Et hic quidem Illustrissimus Praeful utriusque partis juribus componendis optimam viam atque rationem sibi iniisse videtur, quum hinc Romanorum Pontificum, hinc autem Episcoporum seu Conciliorum generalium in decretis fidei eas fuisse partes contendit, cujusmodi olim hinc Romanorum Imperatorum, hinc autem Senatorum aut Romani Senatus in condendis S. C. partes sive jura fuerunt. Quare post pauca subjungit: *Quod (opus) ita temperabitur, ut quoddam jure Imperatorio usum hac in parte Summum*

*num Pontificem ostendam, & Synodum plena  
atque integra suffragiorum libertate.*

Quibus grandia, & praeclara, & magnifica  
verba sufficiunt, iisque delectantur, ii nihil ul-  
tra desiderabunt. Quid enim praeclarius atque  
magnificentius, quam Imperatorium jus Roma-  
no Pontifici adsertum? Hinc Cl. Thomassinus in  
Recensione suarum de Synodis Dissertationum:  
„ Pontificem Romanum Synodis Oecumenicis  
„ praeisse, & quasi dictasse quod sequerentur,  
„ audacule forsitan a me dictum quidam mussa-  
„ bunt. At postea edito posthumo Opere Illustris-  
„ simi Praefulis, & nunquam a me sine nominis  
„ elogio nominandi, Petri de Marca, absterfa  
„ mihi & effricata penitus haec invidia est. Ul-  
„ tra has enim ille metas evectus, & verborum  
„ praeterea magnificentia delectatus, Imperato-  
„ ria jura in Synodis Oecumenicis Romanum  
„ Pontificem obtinuisse docuit, Relationis vide-  
„ licet & Primae sententiae. Ut ipsius esset &  
„ referre ad Patres, quo de censendum esset &  
„ Primam ferre sententiam, quae definitionis  
„ vim haberet, Patrum suffragiis confirmandae.  
„ *Conc. lib. V. cap. VIII.* Stupui, & adgavisus  
„ mihi ipsemet sum, in tanti Viri verba nescium  
„ incidisse. Libertati enim Episcopalium suffra-  
„ giorum patrocinator & ipse sum satis prolixè.

Ve-

Verum si detractis verborum foliis, rem ipsam penitus investigabimus; facile intelligemus, nihil profecto esse, cur Apostolicorum jurium vindices & Adsertores hac Illustrissimi Praesulis utcunque splendida & eleganti observatione tantopere delectentur. Si enim, ut par est, non ea quae tyrannico dominatu veteres Imperatores usurparunt, vel eis ultro foeda Senatorum adulatio detulit, aut metus tulit; sed hinc eorumdem Imperatorum in Senatum, hinc autem Romanorum Pontificum in Synodos generales justa & legitima jura prae oculis habeamus, magno isthaec inter se intervallo distare, pluribusque differre capitibus, perspicue luculenterque constabit. Id porro ne gratis jactare videamur, libet in eam doctissimi Praesulis disputationem, seu propositam ab eo conciliandi Romani Pontificis auctoritatem cum Episcopali in Synodis Oecumenicis suffragiorum libertate rationem inquirere. Ac ne longius evagemur, iis nos omnino finibus continebimur, quos sibi ipse Illustrissimus Auctor constituit: „ Non quaero, *inquit*, „ quid utrinque doceant Theologi rationibus e „ Sacra Scriptura petitis, quum de auctoritate „ Concilii & Papae anxie & scrupulose disputant. Id tantum mihi rimandum propono, „ quatenam esset universalis Ecclesiae praxis in  
Con-



„ Concilio Ephesino & Chalcedonensi, quis tunc  
 „ Summorum Pontificum, & universae Ecclesiae  
 „ sensus in usu auctoritatis illius, quae in Apo-  
 „ stolica Sede vigeat. Arduum opus . . . quo  
 „ tamen defungi aliter nec possum nec debeo,  
 „ quam recitatis testimoniis unde regulae colligi  
 „ possint, quae totum negotium extra disputa-  
 „ tionis aleam evidentissime ponant. Ejusmodi  
 „ testimonia adversus Meldensem Episcopum di-  
 „ sputantes late congestimus. Quare hic ea solum  
 „ refricabimus, quae huic illustrandae sane gravis-  
 „ simae controversiae aptiora esse videbuntur; &  
 „ ex quibus tantum abest ut *evidentissime* demon-  
 „ stretur, apte recteque ab Illustrissimo de Marca  
 „ institutam esse Romanorum olim Imperatorum  
 „ & Summorum Pontificum, eorumque jurium  
 „ comparisonem; ut contra nitidissime lucidissi-  
 „ meque probetur, eosdem Romanos Pontifices Re-  
 „ giam potius & vere Monarchicam exercuisse in  
 „ Synodis Oecumenicis potestatem.



# INDEX CAPITUM.



## CAPUT PRIMUM.

**S**ummum ius summaque potestas, sub ipsis quoque Imperatoribus, penes Rempubicam & Senatum fuit, unde quaedam portio per varios rivulos ad ipsos Imperatores manabat; quum ejus interim plenitudo totaque vis in Republica & Senatu velut in fonte & origine haereret. At contra ex Conciliis Ephesino & Chalcedonensi aliisque Synodis Oecumenicis constat, fontem & originem Ecclesiasticae auctoritatis Christum in Apostolorum Principe ejusque Successoribus Romanis Pontificibus posuisse. pag. **I**

## CAPUT II.

Romani Imperatores pro tyrannis habiti fuissent, & nemo non eos Reipublicae ac Senatus libertatem opprimere judicasset, si placitis suis, antequam ab universo Senatu probarentur, injecto exsilii, & graviorum poenarum metu, subscribi, eaque recipi omnino a Senatoribus voluissent. At nemo Romanos Pontifices tyrannidis arguit violataeque Conciliorum libertatis, quod suis Decretis, gravissimis poenis intentatis, subscribi ante voluerunt, eaque omnino recipi, quam ab Oecumenicis Synodis probarentur. **16**

CA-

### CAPUT III.

*De Imperatorum placitis in Senatu libere a Patribus & in utramque partem disceptabatur. At Romani Pontifices omnino vetabant, fidei dogmata Sedis Apostolicae auctoritate sancita, velut adhuc dubia & incerta, in Synodis Oecumenicis retractari.* 26

### CAPUT IV.

*Senatus Romanus non modo libertate usus est in Imperatorum placitis retractandis, verum & in eisdem aut omnino improbandis, aut saltem reformandis: Nulli autem Oecumenicae Synodo fas aliquando fuit, Romanorum Pontificum de fide decreta aut omnino rejicere, aut vel unum in eis apicem permutare.* 35

### CAPUT V.

*Ex dictis conficitur, Romanos Pontifices in Synodis Oecumenicis Regiam potius, quam Imperatoriam in iis, quae ad fidem moresque pertinent, exercuisse auctoritatem. Exponitur illud Lucae 22. Reges gentium dominantur eorum .... Vos autem non sic.* 44

### CAPUT VI.

*De Episcoporum libertate in Synodis Oecumenicis. Ad retractandas veluti dubias & incertas Sedis Apostolicae definitiones non fuit unquam libertas Episcopis jure debita; sed id aliquando infirmis aut refractariis ex indulgentia permissum est.* 54

## CAPUT VII.

*In quo sita fuerit Episcoporum & Episcopatum suffragiorum libertas in Synodis Oecumenicis, quam, ut ait Petrus de Marca, Caelestinus & Leo tantopere commendarunt.* 63

## CAPUT VIII.

*Quotiescunque Patres in Synodis Oecumenicis in unam mentem atque sententiam conspirarunt, (quod praesentiae Spiritus Sancti certissimum indicium est) Dei ipsius inspirationem & auctoritatem in Romano Pontifice venerati sunt. Quare perinde est, Synodos Oecumenicas quidquam, Romano Pontifice, atque Spiritu Sancto auctore, decernere ac definire.* 72.

## CAPUT ULTIMUM

*Sive appendix, qua demonstratur, Gallos Theologos pugnantia tueri, quum & Romanum Pontificem Centrum Catholicae Unitatis esse docent; & nihilominus ejus de fide moribusque decreta Ecclesiarum retractationi subjiciunt. Ejusmodi avaritias exemplum in libris Petri de Marca De Conc. Sac. & Imp.* 82



## CAPUT PRIMUM.

*Summum jus summaque potestas, sub ipsis quoque Imperatoribus, penes Rempublicam & Senatum fuit, unde quaedam portio per varios rivulos ad ipsos Imperatores manabat; quum ejus interim plenitudo totaque vis in Republica & Senatu velut in fonte & origine haereret. At contra ex Conciliis Ephesino & Chalcedonensi aliisque Synodis Oecumenicis constat, fontem & originem Ecclesiasticae auctoritatis Christum in Apostolorum Principe ejusque Successoribus Romanis Pontificibus posuisse.*



**U**T ordine procedamus, & ex suis principiis clare luculenterque demonstramus, quam incongrue & inconcinne hinc Romanorum Imperatorum & Pontificum, illinc Senatus & Ecclesiae jura invicem conferantur; quaerendum est, an eodem ordine & gradu hinc potestas Civilis in Imperatoribus & in Senatu fuerit, hinc vero po-

potestas Ecclesiastica in Romanis Pontificibus & in Ecclesia sit.

Quod pertinet ad Civilem in Romano Imperio seu Republica potestatem, jamdudum est Romanarum Antiquitatum consultis animadversum, longe aliis fuisse rationis auctoritatem, qua olim Imperatores Romanam Rempublicam administrarunt, & qua olim Reges in Oriente potiebantur, aut quam etiamnum in quibusdam Occidentis Regnis exercent; seu, aliam olim fuisse, quum suis finibus continebatur, Imperatorii, aliam Regalis regiminis formam. Utriusque discrimina late prosequitur, atque eleganter exponit Joh. Vinc. Gravina lib. sing. *De Romano Imperio*, unde aliqua delibamus, quae ad praesentem disputationem illustrandam maxime apta & opportuna videntur. Imprimis autem illud ceterorum utriusque Potestatis discriminum veluti radix & caput prae oculis habendum est, quod sequentibus verbis laudatus Auctor describit (a): Id interfuit P. R. Imperatorem creare non Regem, quod Imperator deducit, Rex vero abducit a populo susceptam sibi maiestatem. Quum enim Rex creatur, (qualis creabatur apud Barbaros, quorum vile servitium Romani averfabantur,) in eum omnis populi potestas & voluntas publica rectè confertur: est enim uti Rex Persarum, *اوّل و آخر و اوّل و آخر*, ut Principem illum, jus fasque quandoque perturbantem, vitamque aliorum & bona rapientem, si populus tollere conetur, cogatur civilem evertere statum, publicam commutare voluntatem, novamque inde fundare Rempublicam. Regnum nimirum Rempublicam totam exhaurit, & cum ea maiestatem universam transfert in personam unius aut

Suc-

---

(a) Lib. de Rom. Imp. cap. XIX.

Successorum: quo vel solo, vel cum Posteritate, si Regnum sit haereditarium, populi seditione sublato, solvitur potestas publica, quae in eorum persona coaluerat, nisi civile regimen ex integro nova populi voluntate restituitur. Imperium contra est cumulus Magistratuum & Republica, penes Senatum populumque locata, continenter in Principem confluentium; ut sublato Imperatore vel Imperio, jura Magistratuum eorum refluant ad Rempublicam, neque Imperatore damnato a proprio statu discedentem, neque Imperio illo extraordinario evulso pereuntem, sed in Senatu & in ordinariis Magistratibus perpetuo permanentem.

Nullam ergo Imperator, qua Imperator (a) jure suo civilem potestatem habebat, sed jure Magistratuumceptorum, aut ipsius communione Senatus, de quo velut ex fonte publici juris Imperator potestatem, partim oblata occasione hauriebat, partim perenniter ducebat; ut ideo Princeps pars Senatus, & Senatus pars Principis censerentur, quod simul ex Senatoribus & Principe Senatorum, eorumque capite, universus Senatus ejusque corpus componeretur integrum. Nam in Senatum, praeter cognatam veteremque majestatem, a Tiberii aevo concesserat majestas etiam populi: quae utrinque prodiens in persona Imperatoris per Tribunitiam potestatem, & Senatorium principatum ita exprimebatur, ut derivaretur quidem in Caesarem; ab radice tamen sua, nempe a Senatu, nunquam avelleretur. Ideo Dion postquam consuetos Imperatoris Magistratus enumeraverat (b) subjicit illius facultates, non ex Imperatorio jure, sed ex illis Magistratibus

---

(a) Ibid cap XVIII.

(b) Ibid. cap. V.

tibus profluentes: ait enim (a) Imperatores ἐκ μὲν τῶν τῶν ὀνομάτων, ex horum (nempe Magistratuum) nominibus exercitus conscribere, pecunias cogere, bella suscipere, pacem facere. Et inferius, καὶ ὅπως ἐκ τῶν τῶν δημοκρατικῶν τῶν ὀνομάτων πᾶσαι τῶν τῶν πλείας ἰσχύος περιβιβλῶται: Itaque his popularibus nominibus omne induunt Republicæ robur. Plurima vero eorum, quæ Imperatoribus adscribunt Historici sine mentione Magistratuum susceptorum, ea omnia illorum ad Magistratum potestatem, non ad potestatem ullam Regiam Imperatoris esse revocanda, plurima antiquitatis monumenta testantur; præcipue illud Ancyranum, quo res ab Augusto gestæ, atque a se ipso in breviarium redactæ continentur, præcipue cap. 2. cujus hæc supersunt.

*Patriciorum numerum auxi Consul. V. jussu populi & Senatus, Senatum ter legi: & in Consulatu VI. censum Pop. Rom. Collega M. Agrippa egi.*

En hæc omnia, quorum ad exemplum & alia licet conjicere, non Imperatoriae potestati, sed Consulatibus; & potestati Censoriae a populo & Senatu impetratae tribuuntur.

Illud autem ad rem nostram propius pertinet, quod de jure referendi iisdem Romanarum Antiquitatum Consulibus animadversum est (b): Nempe ad aliorum Magistratuum plenitudinem adjecisse Senatum Imperatoribus munera quaedam Consularia, quæ scilicet etiam quando Consules non crearentur, communia cum Consule habebant Imperatores, non jure quidem suo, sed ex facultate tributa. Eaque sunt potestas habendi Senatus, & S. C. faciendi, & ad Senatum referendi semel, aut bis, aut ter, five

---

(a) Lib. LIII.

(b) Gravin. ubi sup. cap. XI.



sive de una, duabus tribusve rebus: quod jus primæ, secundæ, tertiæ, quartæ, quintæ relationis appellabatur: nam hunc supra numerum concessum non invenitur. Quod satis arguit, quam procul abiret ab Imperatorio munere potestas Regia; illa, quæ pulsus Tarquiniis singulis annis per populi Comitia conferebatur in Consules, in quos jure Magistratus transibant munera ista, quorum Imperator Senatus concessione potiebatur: adeo ut non quemadmodum Consules statim post initum Magistratum, aut aliquando post ipsorum designationem; sed post jus referendi eis a Senatu oblatum totidem de rebus relationem facere possent Imperatores, quot ferret a Senatu tributa facultas, quæ non eodem semper numero ad eos perveniebat. Augustus enim, quoties Senatus convocaretur, jus habebat unius tantum relationis, ut refert Dio (a), cujus sincerum sensum a Xilandro eversum optime reddit; Casaubonus, qui locum Dionis illum ita restituit: Καὶ κερματίζειν αὐτῷ πᾶσι ἐνός ὅτι ἀν' ἡμετέρας καὶ ἐνέσω βέλῳ, καὶ μὴ ὑπατάσσει, ἰδὼναι. Et ei permisit (nempe Augusto Senatus) de una re, quamcumque voluisset, quoties Senatus haberetur, relationem facere, quamvis Consul non esset. Xilander, neglecto ἐνός, non sine summo crimine, verterat, de quibuscumque rebus vellet; quasi liberum Augusto per Senatum esset de rebus omnibus referre in infinitum: quum id, utpote portio potestatis Consularis, nempe Regiæ, perquam parce tribueretur Imperatoribus, inter quos Probus jus tertiæ relationis accepit, Pertinax quartæ, M. Antoninus quintæ.

Denique idem & de potestate Legislativa, seu condendarum legum jure sentiendum est (b). Translatis quip-

To. I. Par. II.

Z z

pe

(a) Lib. LIII.

(b) Gravin. cap. XX. & XXI.

pe sub Tiberio Comitibus ad Patres, transit in Senatum jus condendarum legum, quod fuerat penes populum universum: quo in jure summa vertitur majestatis: quae ob discrimen Regnum inter & Imperium, neque ab Senatu abscessit, neque a populo, cujus a Senatu imago reddebatur. Nam utcumque legislatio cum Principe ipsiusque Consistorio ex S. C. communicaretur; tamen ob impressum in animis antiquae Reipublicae studium atque religionem, Principum placita, quae ab universi Senatus auctoritate procederent more Majorum, legis quidem habebant vigorem, ut Jurisconsultus docet; non tamen continuo ac statim, sed postquam tempore invaluissent atque inolevisent usu & consensu civitatis, qui & sententiis judicum tribuit juris auctoritatem. Communicata nimirum populi ac Senatus cum Principe, non vero in Principem translata universa potestate; leges a Principe latae, sive Constitutiones, non a Principe tamquam ex Regia persona prodibant, sed tamquam ab oraculo Reipublicae, atque ipsius voce Senatus: quem antequam quidquam in perpetuum ac pro universali lege statueret, oratione consulebat apud Patres habita, eadem ratione, qua populum universum rogabat laturus legem Tribunus plebis, cujus potestatem sibi adjunctam Princeps roganda lege non apud populum, ut Tribunus, exercebat, sed apud Patres, qui jura omnia populi, & Reipublicam retinebant universam.

Haec praemittere oportuit tanquam basim & fundamentum eorum, quae postea demonstranda sunt. Et quidem nemo non facile intelligit, cohaerere optime potuisse in Imperio Romano, sive in ea, quam delineavimus, Imperii Romani forma atque constitutione, Patrum Conscrip-  
ac

ac primae sententiae, seu praeogativam suffragii, qua potiebantur Imperatores. Quum enim haec nil aliud essent quam portio quaedam Consularis auctoritatis, cujus summa vis & potestas penes Senatum & Rempublicam erat, a qua in ipsos Imperatores, aut in Consules, velut a fonte & origine profluebat; hac profecto dum suis limitibus continebatur, obrui non poterat Patrum ac Reipublicae libertas. Quare si ad normam Romani Imperii vel Reipublicae suae Christus Ecclesiam constituit, non potuisset aptius quam hoc exemplo conciliari summa Romani Pontificis auctoritas, & potestas cum Episcopaliū suffragiorum in Synodis Oecumenicis libertate. Verum tantum abest, ut Ecclesiam suam Christus ad instar Romanae Reipublicae constituerit, ut illius ordinem ac regiminis formam pene invertisse videatur. Quum enim, ut ex dictis constat, suprema potestas Romae penes Rempublicam & Senatum esset, unde velut ex fonte per varios Magistratus quasi totidem rivulos ad Imperatores manabat; contra si sacras litteras, & Patres, & Synodos consulamus, apud Sedem Apostolicam, ex ipsius Christi institutione, summam esse ac fontem Ecclesiasticae auctoritatis & potestatis, nullo negotio intelligemus. Porro ne fines, quos Marcae vestigiis insiliendo, nobis, jam ipsi constituimus, transgrediamur; non quid universe de hac re vel ex sacris litteris eruatur, vel Patrum traditio doceat; sed quis fuerit Ephesinae & Chalcedonensis Synodi sensus, expendemus.

Philippus Presbyter, Sedisque Apostolicae in Synodo Ephesina Legatus in sententia depositionis adversus Nestorium notissima haec verba praefatus est: *Nulli dubium, imo saeculis omnibus notum est, quod Sanctus*

beatissimusque Petrus, Apostolorum princeps & caput, fideique columna, & Ecclesiae Catholicae fundamentum, a Domino nostro Jesu Christo Salvatore humani generis ac Redemptore claves regni accepit, solvendi ac ligandi peccata potestas ipsi data est: qui ad hoc usque tempus & semper in suis Successoribus vivit, & judicium exercet. Hujus itaque secundum ordinem Successor & locum tenens, sanctus beatissimusque Papa noster Celestinus, nos ipsius praesentiam supplentes ad hanc sanctam Synodum misit &c. Plura in hunc locum notanda sunt, ex quibus aperte liquidoque constabit, aliam regiminis formam ab ea, quae olim in Romana Republica vel Imperio floruerat, Christum in Ecclesia sua instituisse; adeoque non satis apte congruenterque Episcoporum in Synodis Oecumenicis libertatem cum ea fuisse collatam, qua olim Patres conscripti florente Romana Republica vel Imperio fruebantur. Imprimis enim quaecumque fuerit illa potestas, quam Philippus his verbis Apostolorum Principi adseruit, eam non ab Apostolis, vel Apostolorum collegio in Petrum derivavit, sed ab ipso Christo collatam fuisse docuit. At quaecumque olim fuerit in Imperio Romano Imperatoria Majestas & auctoritas, eam per varios Magistratus, & dignitatum & honorum titulos, in suos Imperatores Senatus seu Respublica conferebat. Ipsa enim iis, quos eligebat, aut ab exercitibus electos suscipiebat, Proconsulare Imperium, ipsa Tribunitiam potestatem, ipsa Pontificatum Maximum, ipsa Patris Patriae appellationem, ipsa denique vel Consulatus, vel aliqua Consulum munera, ut jus primae, secundae, vel tertiae &c. relationis, ac rogandarum legum auctoritatem tribuebat. Verum, auctore Philippo, & Oecumēnica

nica

nica Synodo minime refragante, sed verbis ejus plaudente, non Apostolicus Senatus, sed Christus ipse Petrum Apostolorum principem & caput instituit, Christus ei regnum, seu regni claves largitus est, Christus cum esse voluit fidei columnam & Ecclesiae Catholicae fundamentum, denique Christus cum ligandi atque solvendi, judiciiue exercendi potestate donavit. Id vero maximi in hac controversia ponderis ac momenti est. Non enim consequens est, ut si Respublica, quae suis Imperatoribus quam voluit suae auctoritatis portionem contulit, sibi quae summam ejus apicemque retinuit, plena in ferendis suffragiis, & suorum Principum sententiis probandis aut improbandis libertate gaudebat; eandem agnoscere debeamus in Ecclesiastico Senatu vel Episcopis suffragiorum libertatem ad probanda vel improbanda Petri ac Successorum ejus Romanorum Pontificum constituta; qui ut jam dictum est, non ab Apostolico vel Ecclesiastico Senatu auctoritatem ac principatum obtinuerunt.

Hoc enim inter Imperatoriam & Pontificiam auctoritatem semel constituto discrimine, tota haec utriusque potestatis, & Synodi Oecumenicae cum Senatu a Petro de Marca instituta collatio absque omnino & inepta est, nisi etiam probetur, ut quemadmodum Imperatorium, & quaecumque alia munera, quibus Respublica vel Senatus Imperatores induebant, ab ipsa Republica vel Senatu pendebant; ita etiam Christus Apostolorum principem, & fidei columnam, & Ecclesiae Catholicae fundamentum, ab Ecclesia ipsa pendere in fidei rebus ac decretis voluerit. Id vero tum ob alia plurima argumenta, quae in praesentia consulto praetermittimus, tum potissimum ob laudata ex Ephesinae Synodi actis Philippi verba falsum  
omni-

omnino esse, jure ac merito exultimamus. Ac ne in solis Principis & capitis titulis seu nominibus vim orationis collocemus; quae statim Legatus subjungit, ea decretoria esse contendimus, & rem extra omnem controversiam ponere judicamus. Non enim fidei columna seu fundamentum jure ac merito dici potest, cujus in dirimendis fidei controversiis auctoritas errori obnoxia sit. Quod vel ipsi Adversarii fateantur necesse est, quum ad adferendam Ecclesiae Catholicae in proponendis fidei mylteriis atque dogmatibus inerrantiam, iis Apostoli verbis utantur, quibus Ecclesia dicitur *columna & firmamentum veritatis*. Et merito quidem: quum enim adensus fidei firmus omnino sit ac prorsus immobilis & inconcussus; necesse omnino est, ut auctoritas, super quam veluti columnam & fundamentum innititur, & ipsa prorsus immobilis sit & firma, & stabilis, & inconcussa. Quod enim labi ac deficere, seu vacillare potest, immobilis aedificii columna seu fundamentum esse non potest.

Vult quidem Turnelius, ut alibi diximus has fuisse Apostolorum Principis personales praerogativas: *Esto, inquit, Sanctus Petrus firma fuerit columna fidei, & inconcussum Ecclesiae fundamentum, (ministeriale nempe ac secundarium) non tamen personales illas suas praerogativas, excepto primatu, ad suos Successores Romanos Pontifices transmisit*. Verum haec ejus opinio, ut alibi pariter ostendimus, Legati verbis & scopo, ejusque orationis contextui apertissime refragatur. Hanc enim fidei columnam, hoc Ecclesiae Catholicae immobile fundamentum, in Romanis Pontificibus ejus Successoribus adhuc subsistere, immoteque permanere, diserte Philip-  
pus testatur; adeoque quum vivere Petrus desiit, non  
pro-

propterea Romae & in ejus gloriosa Confessione defecit fidei columna & inconcussum Ecclesiae fundamentum; ubi nimirum, quemadmodum Gelasius ait (a), *sicut doctrinae virtute sublimis* (Petrus) *emicuit, ita sanguinis gloriosa effusione decoratus, aeterno hospitio conquiescit; praestans Sedi, quam ipse benedixit, ut portis inferi* NUNQUAM PRO DOMINI PROMISSIONE VINCATUR, *omniumque sit fluctuantium tutissimus portus*. Annon ille jure ac merito dicitur firma fidei columna, & Ecclesiae Catholicae inconcussum & immobile fundamentum, qui ab inferi portis ac viribus nunquam pro Domini promissione concutitur ac superatur? Id Petrus aeterno hospitio Romae conquiescens Apostolicae praestat Sedi, quae proinde post ejus obitum & gloriosam sanguinis effusionem esse non desit fidei columna & Ecclesiae fundamentum: adeoque ad personales Petri praerogativas, ad ejus Successores Romanos Pontifices ininime transmissas, ejusmodi privilegia revocari non debent.

Jam vero auctoritas indeficiens, & errori minime obnoxia, alterius potestatis, vel ipsis fatentibus Adversariis, inquisitioni subjecta non est, & ab alterius judicio minime pendet. Hinc autem oritur difficultas, quae Petro de Marca negotium facessit, conciliandi scilicet Episcopaliū suffragiorum libertatem cum hac Romani Pontificis summa & ineluctabili auctoritate; pro qua expedienda frustra nos in Romanam Curiam Illustrissimus Auctor introducit. Nam quaecumque in Romanos Imperatores conferebantur munera, adeoque & omnia eorum placita, ut rata firmaque essent, & vim legis obtinerent, ex Reipublicae & Senatus voluntate & auctoritate pendebant.

---

(a) Epist. XIV. Tom. V. Concilior. edit. Ven.

bant . Ut autem Romanorum Pontificum de fide placita & decreta rata sint & inconcussa, & summam obtineant atque immobilem firmitatem, non ex Ecclesiae consensione & voluntate, sed ex Christi promissione pendet, qua Petrum ejusque successores fidei columnam & Ecclesiae Catholicae, hoc est aeterni & immobilis aedificii aeternum & immobile fundamentum esse voluit, quod nullis unquam inferorum insultibus expugnaretur .

Hinc autem facile intelligitur, & quae sit vis horum-  
 ce verborum, quae statim idem Philippus adjungit : *A Domino nostro Jesu Christo .... claves regni (Petrus) accepit, solvendi-que ac ligandi potestas ipsi data est* . In hoc igitur veritatis & fidei regno Petrus claves accepit, hoc est, summam & a nullo, nisi ab ipso Christo, qui claves dedit, pendentem auctoritatem . Clavis, ut in caput XVII. Matth. observant Expositores (a) ,, nonnun-  
 ,, quam supremam significat potestatem . Apoc. III. Dei  
 ,, Filius describitur manu claves David gerens : *Qui ape-*  
 ,, *rit, & nemo claudit ; claudit, & nemo aperit* . Signi-  
 ,, ficat & nonnunquam praefecturam vel auctoritatem in  
 ,, Principis domo . Promittit Isaias cap. XXII. Eliacim  
 ,, futurum Regiae domus Juda Curatorem : *Ei dabo cla-*  
 ,, *vem domus David super humerum ejus ; & aperiet ;*  
 ,, *& nemo erit qui claudat ; claudet, & non erit qui*  
 ,, *aperiat* . Jesus Christus eandem S. Petro in Ecclesia  
 ,, sua dignitatem pollicetur, quam Isaias Eliacim in aula  
 ,, Regum Juda . Tu deferes clavem Ecclesiae meae, Re-  
 ,, gnique caelestis . Tu aperies & claudes, ac nulli sub-  
 ,, ditus eris ministro, cui rationem sis redditurus . Quid-  
 ,, quid feceris, probe factum esto ; quidquid vetueris,  
 vel

(a) Calmet, qui & citat Maldon. Menoch. Brugenf. Grot. Le Clerc.




„ vel praeceperis, nunquam antiquabitur. Te meum  
 „ Curatorem ac praefectum constituo.... Aliud etiam  
 „ Salvator addit, quod magnitudinem dignitatis S. Pe-  
 „ tri, ac potestatis ejusdem excellentiam ostendit: *Quod-*  
 „ *cumque ligaveris* &c. Nulla profecto hac major la-  
 „ tiorque potestas deferri potest: Neque haec est res me-  
 „ rae speculationis. Potestatem hanc S. Petrus exercuit,  
 „ & hodie per successores exercet, exercebitque. Frustra  
 vero esse, qui claves Regni caelorum, hoc est, supremam  
 in Ecclesia potestatem, non uni, sed unitati, hoc est, non  
 uni Apostolorum Principi, sed Apostolorum collegio tra-  
 ditas fuisse contendunt; vel ex hoc ipso Ephesinae Syno-  
 di loco apertissime demonstratur: non enim Apostolorum  
 Senatus, sed Petrus Apostolorum Princeps & caput claves  
 regni caelorum accepisse dicitur, & ligandi atque solvendi  
 summam in terra & in caelis auctoritatem. Hinc, ut alibi  
 prolatis eorum locis ostendimus, & Stephano Dorensi Epi-  
 scopo & S. Martino I. in Synodo Lateranensi, & S. Maxi-  
 mo Martyri in epist. ad Petrum Illustrem, soli Petro, aut  
 Petro tantummodo claves regni caelorum datae fuisse di-  
 cuntur. Qui Patres non ignorabant utique & alii Apo-  
 stolis ligandi atque solvendi fuisse a Christo traditam po-  
 testatem; sed Petro speciatim ac soli claves regni caelo-  
 rum, eisque adjunctam ligandi atque solvendi auctorita-  
 tem, ideo vindicabant, quoniam, ut Innocentius III. alibi  
 nobis laudatus observat, aliis non sine ipso, ipsi vero sine  
 aliis haec auctoritas data est, hoc est, quoniam in ipso vis  
 ejus tota velut in radice, fonte & origine posita est; ad  
 alios autem veluti per varios ramos, radios ac rivulos a  
 radice, aut sole, aut fonte deductos permeavit. Quae si-  
 militudines non hodie a nobis excogitatae, sed ab anti-

quis Patribus jampridem adhibitae sunt. Unde consequens est ac sponte fluit, Christum in Ecclesiae suae constitutione ordinem invertisse formamque regiminis, quod in Romana Republica vel Imperio obtinebat. Hic enim Civilis auctoritatis & potestatis summa vis, ac veluti fons & radix penes Rempublicam & Senatum erat, unde ad unum per varios Magistratus veluti per totidem rivulos variae illius portiones derivabantur. At Ecclesiasticae auctoritatis summam vim ac veluti fontem Christus in uno reposuit, quae per varias partes in multitudinem diffunderetur.

lis porro omnino consona sunt, quae Actione tertia Concilii Chalcedonenfis Paschasinus Apostolicae Sedis Legatus ait in sententia adversus Dioscorum lata, quam S. Leo in epistola ad Episcopos Galliae his verbis exhibet: *Unde sanctus ac beatissimus Papa caput universalis Ecclesiae Leo per nos ut Legatos suos, sancta Synodo consentiente, Petri Apostoli praeditus dignitate, qui Ecclesiae fundamentum, & petra fidei, & caelestis regni janitor nuncupatur, Episcopali eum dignitate nudavit &c.* Iisdem hic titulis Paschasinus Apostolorum principem celebrat, quibus eum in Synodo Ephesina Philippus ornaverat; quum eum perinde Ecclesiae fundamentum, & petram fidei, & regni caelestis Janitorem appellet. Paullo autem disertius significat, has Petri praerogativas personales non fuisse, sed in ejus Successoribus permanere; quum ait, Romanum Pontificem Petri esse praeditum dignitate; statimque veluti exponens, quibus in rebus posita sit ejusmodi dignitas, addit: *Qui Ecclesiae fundamentum, & petra fidei, & caelestis regni janitor nuncupatur.* Quare eadem atque in praecedentem Synodi Ephesinae, & in hunc locum Concilii Chalcedonenfis fieri de-

debet observationes : ex quibus , ut vidimus , aperte constat , in Ecclesia summum imperium , & supremam atque ineludibilem auctoritatem penes unum esse locatam , quae inde in plures derivaretur ; contra atque in Romana Republica vel Imperio , ubi summa vis & auctoritas in multitudine vigeat , indeque velut ex fonte ad unum per varios quasi rivulos confluebat . Unde consequens non est , ut si in Romana Republica unius placita ex multitudinis consensione pendebant , ad eaque probanda vel improbanda plena erat in Senatu libertas ; eandem libertatem in Conciliis generalibus agnoscere debeamus , ad probandas similiter aut improbandas solennes Romano- rum Pontificum de fide constitutiones . Sed haec in sequentibus capitibus , utriusque potestatis effectus invicem conferendo , luculentius confirmabuntur .



## CAPUT II.

*Romani Imperatores pro tyrannis habiti fuissent, & nemo non eos Republicae ac Senatus libertatem opprimere judicasset, si placitis suis, antequam ab universo Senatu probarentur, injecto exsilii, & graviorum poenarum metu, subscribi, eaque recipi omnino a Senatoribus voluissent. At nemo Romanos Pontifices tyrannidis arguit violataeque Conciliorum libertatis, quod suis decretis, gravissimis poenis intentatis, subscribi ante voluerunt, eaque omnino recipi, quam ab Oecumenicis Synodis probarentur.*

**Q**Uae, rogo, penes S. P. Q. R. pristinae libertatis imago vel umbra mansisset, si minis ac terroribus Imperatores egissent, ut suis placitis a Senatoribus ante subscriberetur, quam ab universo Senatu probata fuissent; imo si palam & aperte denunciaissent, nunquam sibi cum Senatu ipso pacem futuram, nisi ab illo quod ipsis visum ac libitum esset velut Jovis oraculum reciperetur? Ab hac tamen vi Patribus inferenda optimi Principes abstinabant. Quare Tiberius quum adhuc eam gloriam maxime appeteret, maximeque Civilis videri vellet, ut in futura sua ipsius acta a Senatu juraretur, minime permisit: *Numen patris patriae*, inquit Tacitus (a), *Tiberius a populo saepius ingestum repudiavit: neque*  
in

---

(a) Lib. I. Annal. cap. LXXII.

in acta sua jurari, quamquam censente Senatu, permisi:  
 cuncta mortalium incerta, quantoque plus adeptus foret,  
 tanto se magis in lubrico dictans. Non tamen ideo  
 faciebat fidem civilis animi. Verum est tamen, quod postea  
 id iuramenti suscepit ac probavit, quemadmodum Dio auctor est (a), qui etiam alibi testatur (b), factum  
 id esse pro omnibus summis Imperatoribus, siue vivis,  
 siue jam defunctis, ac non per ignominiam eo fastigio deturbatis.  
 Verum id ipsum argumento est, persuasum fuisse vel ipsis  
 Imperatoribus (c), eorum placita, sicut & alia, quae non habebant  
 jure Magistratus, haud secum ab origine sua ferre, sed ab auctoritate Senatus perpetuam  
 accipere firmitatem: adeo ut non ex Imperatorio jure, sed ex  
 voluntate Senatus, per iurisdictionis religionem continuata,  
 Principum iussa transierint in legitimam potestatem. Itaque  
 Principum iussa vel placita in Imperio Romano vim non habebant  
 definitionis, legis atque sanctionis, nisi Senatu in ea libere  
 consentiente, ut ipse etiam Petrus de Marca praeclare his verbis  
 observat (d):

» Cum autem Senatus de rebus omnibus vice populi con-

» suli coepisset, Principes Senatus-Consultorum aucto-

» res fieri voluerunt. Quod eam vim in se habebat, ut

» oratio Principis in Senatu recitata, seu mavis, relatio

» cum praerogativa suffragii, non solum cum unaqua-

» que gravissimorum Senatorum sententia comparanda

» esset, sed etiam decisionis auctoritatem indueret, si

» consensus Senatus accederet. Inde fit ut frequenter in

» jure aliquid oratione Principis constitutum dicatur ;

» quod

---

(a) Lib. LVIII. ad an. V. C. 785.

(b) Lib. XLVII. ad an. V. C. 712.

(c) Gravin lib. de Rom. Imp. cap. XXII.

(d) Lib. V. de Conc. Sac. & Imp. cap. VII. num. V.

„ quod alibi Senatus-Consulto tribuitur ad orationem il-  
 „ lam facto. Scilicet oratio continet in se auctoritatem  
 „ quamdam non solum censendi, sed etiam definiendi,  
 „ dummodo consensu & suffragiis Senatus juvetur :  
 „ quemadmodum etiam vice versa decreto Senatus res  
 „ propositae summa auctoritate definiuntur &c. Ergo nisi  
 per summam injuriam non potuisset Imperator aut singu-  
 los Senatores compellere ad subscribendum orationi suae,  
 antequam a Senatu probaretur, aut universum coetum  
 gravissimis poenis intentatis adigere ad eam suffragii sui  
 auctoritate muniendam.

His positis, videamus, an istud imperium, quod  
 olim in Romanis Principibus tyrannis & usurpatio fuisset,  
 Romani Pontifices in Ecclesia exercuerint, & an Episcopi  
 & Synodi conquesti sint, quod Romani Pontifices  
 tyrannidem exercerent, Conciliorumque libertas ab eis  
 violaretur. Quid egerit S. Leo, & qua sit usus auctoritate  
 ante Chalcedonenfis Concilii congregationem, adversus  
 Meldensem Episcopum differentes, ex variis ejus epistolis  
 demonstravimus. Non solum enim Synodum Ephesi-  
 nam rescidit, sed a communione quoque sua ejus Synodi  
 participes removit; Legatosque suos misit Constantinopolim,  
 qui Anatolio Urbis regiae Episcopo, ceterisque  
 Orientis Episcopis denunciarent, ut si Sedis Apostolicae  
 Ecclesiaeque Catholicae communione frui vellent, suae ad  
 Flavianum epistolae sine ulla mora ac tergiversatione sub-  
 scriberent. Qua de re ita scripsit ad Pulcheriam Augustam  
 (a): *Simplex enim est absolutumque quod posco, ut remoto longarum disputationum labore, sanctae memoriae Cyrilli Alexandrini Episcopi epistolae, quam ipse*

---

(a) Epist. XXXV. Tom. IV. Concilior.

ipse ad Nestorium miserat, adquietat .... & Epistolae meae, quae ad sanctae recordationis Flavianum Episcopum est directae, consentiat .... Quam si quis existimaverit non sequendam, ipse se a compage Catholicae unitatis abscindet. Suae ad Flavianum epistolae perinde subscribi vult S. Pontifex atque Cyrilli Alexandrini litteris ad Nestorium, quibus post Ephesinam Synodum tanquam certissimae fidei regulae atque definitioni subscribebatur. Neque hoc tantum monet atque suadet, verum & poenalem sanctionem adjicit; nimirum, nisi velint a compage Catholicae unitatis & communionis abscindi. Quod etiam in aliis epistolis sedulo ac vehementer inculcat: quibus Orientales Episcopos fere omnes ad subscribendum adegit, ut ipsimet Actione secunda Concilii Chalcedonensis sollenniter testati sunt, quum ab eis Judices ac Senatus requirerent, ut fidem exponerent, hoc est, aliquam fidei formulam concinnarent. Negarunt enim, aut ipsis licitum esse fidem exponere, aut opus esse alia fidei expositione, postquam Leo fidem exposuisset, & postquam omnes ejus Epistolae tanquam formae seu regulae fidei adversus Eutychianam haeresim subscripsissent: Emerferunt quae ad Eutychem pertinebant; & super iis formata est a sanctissimo Archiepiscopo Romanae urbis, & sequimur eum, & epistolae omnes subscripsimus .... sufficiunt quae exposita sunt: alteram expositionem non licet fieri. „ Quare, vel ipso fatente Illustrissimo Adversario (a), certum est & indubitatum, Apostolicae Sedis auctoritate assertam fuisse fidei veritatem adversus perfidiam Eutychis, Synodi Ephesinae latrocinium castigatum, Orientis Episcopos ad satisfactionem ad-

,, actos,

---

(a) Lib. V. de Conc. cap. VIII. num. I.

„ actos , & Leonis epistolam pro sincera fidei definitione  
 susceptam . Haec Petrus de Marca , a quibus sejungenda  
 non sunt , quae statim sequenti numero adjungit : „ Non  
 „ me latet , olim in provinciis erumpens haereticum vi-  
 „ rus Synodorum provincialium decretis expulsum , hae-  
 „ resi atque haereticis damnatis . Sed haereticis tantum  
 „ in provincia degentibus poena a Synodis indicebatur .  
 „ At vero Leo I. haeresim in Oriente natam & haereti-  
 „ cos ; non solum in Occidente , sed etiam in Oriente  
 „ damnat , ejusque sola epistola vim sententiae & defini-  
 „ tionis canonicae obtinet ; Synodum , quae faverat hae-  
 „ resi , rescindit , & perturbationis auctores suo judicio re-  
 „ servat . Sic olim Pelagianis a Zosimo damnatis , eorum  
 „ haeresis per totum orbem proscripta est ; ut diserte scri-  
 „ bunt Augustinus & Prosper ( a ) . Post haec vero judi-  
 cet aequus Lector , an Episcopaliū suffragiorum in Sy-  
 nodis libertas recte cum libertate Senatus in probandis aut  
 improbandis Imperatorum placitis conferatur . Impera-  
 toris enim oratio vim definiendi & decisionis auctori-  
 tatem non habebat , nisi Senatus consensus accederet , ac  
 nisi liberis ejus suffragiis juvaretur . At Leonis epistola ,  
 antequam Synodus Chalcedonensis celebraretur , vim sen-  
 tentiae & canonicae definitionis obtinuit ; & non solum  
 in Occidente , verum & in Oriente ad eam tanquam sin-  
 ceram fidei definitionem ac formulam suscipiendam com-  
 pulsi sunt , quicunque Catholicae communionis partici-  
 pes esse voluerunt . Orationi principis in Senatu ex se non  
 inerat nisi vis suadendi : Pontificis autem Epistolae etiam  
 vis definiendi : poterat illa a Senatu nullo periculo repu-  
 diari ; quum , ut ipse Petrus de Marca auctor est , Senatus  
 quan-

---

( a ) Augustin. Serm. 2. de verbis Apostoli , Prosper. in Chron.



quando consulebatur, summo jure sit ulus in decernendo; quare nil mirum si sua in hac re libertate utebatur, etsi amico foedere jungebantur majestas Imperatoris & libertas Senatus. At epistolae Pontificis ante Synodi celebrationem sanctio poenalis adjuncta erat, & vel ei subscribendum erat, aut subscriptionem abnuenti ab Ecclesiae Catholicae communione excidendum; nec sibi Synodus fas esse judicabat aliam fidei formam, seu credendi legem statuere. Hinc autem rursus emergit difficultas, quam Illustrissimus Auctor exaggerat, conciliandi cum Romani Pontificis auctoritate Episcopatum suffragiorum in Synodis Oecumenicis libertatem: quae illo Romani Senatus exemplo non satis expediri videtur.

Non solus autem Leo, verum & alii Romani Pontifices, non modo singulis seorsim Episcopis, verum eis in generales Synodos coeuntibus formulam fidei & credendi legem, poenali quoque sanctione adjuncta, proposuerunt. Id constat ex duabus Epistolis, quas Agatho & Romana Synodus ad Constantinum Pogonatum per Legatos suos ad sextam Synodum destinatos transmiserunt. Exposita enim Sedis Apostolicae adversus Monothelitas de duabus in Christo voluntatibus fide, palam ipse Romanus Pontifex alique Occidentales Episcopi denuntiabant, nunquam sibi pacem cum Orientalibus fore, nunquam eos fratrum loco habituros, nec utriusque Ecclesiae communionem unquam redintegrandam, nisi hanc omnino fidei Catholicae regulam, nullo prorsus auctam additamento, nulla subtractione minutam amplecterentur: *Si hanc .... irreprehensibilem Apostolici dogmatis regulam ....* inquit Agatho, *Constantinopolitanae Praesul Ecclesiae tenere nobiscum ac praedicare delegerit; pax*

To. I. Par. II.

B b b

mul-

multa erit diligentibus nomen Dei, & ullum non remanebit diffensionis scandalum &c. Sin autem (quod porro longe sit) novitatem nuper ab aliis introductam amplecti maluerit, & alienis a regula veritatis orthodoxae atque Apostolicae nostrae fidei sese irretire doctrinis . . . . ipse noverit, quid de tali contemptu in divino Christi examine satisfaciet &c. Et in alia epistola, cui una cum Agathone omnes Occidentales Episcopi subscripserunt, haec eadem rursus non minore auctoritate Orientalibus denunciantur: Quicumque proinde Sacerdotum haec, quae in hac nostrae humilitatis confessione continentur, nobiscum sinceriter praedicare desiderant, ut nostrae Apostolicae fidei concordēs, ut Consacerdotes, ut Communiſtros ejusdem fidei, & (ut simpliciter dicamus) ut spirituales fratres & Cœpiscopos nostros ſciſcipimus. Qui vero haec confiteri noluerint, ut inſeſtos Catholicae atque Apostolicae confessioni, perpetuae condemnationis reos eſſe cenſemus: nec aliquando tales in nostrae humilitatis collegio, niſi correctos, ſuſcipere patimur. Nec transgredi nos quiſquam eorum arbitretur, quod a Praedeceſſoribus noſtris accepimus. An ſuas in Senatu orationes & placita talibus proteſtationibus Romani Imperatores muniebant? Aut ſi muniffent, quam, rogo, ſuffragiorum libertatem Patribus reliquiſſent? Quam, inquam, libertatem ſibi Senatus adſeruiſſet, ſi diſertis verbis Imperatores Patribus ſignificaffent, ſibi nunquam cum Senatu pacem futuram; ſequē illos Civium loco non habituros, & non modo Republica & Civitate, verum & aqua & igni interdicens iis, qui ipſorum auderent placitis refragari? Aut ergo libertas Episcoporum in Synodis generalibus aliſus rationis eſt a libertate, qua olim Senatus Romanus fruebatur; aut

Aga-

Agatho in Orientalium Episcoporum & sextae Synodi libertatem temere involavit .

Eadem auctoritate usus est in VII. Synodum Hadrianus I. quam ea lege celebrari consensit, ut primum Pseudo-Synodus Constantini Copronymi adversus sacras Imagines in irritum mitteretur . Qua de re in suis ad Constantinum & Irenem litteris haec mandavit : *Si vero impossibile est haereticorum vesaniae pro incredulitate ipsorum ipsas sacras ac venerandas Imagines sine Synodi actione in pristino erigere ac confirmare statu . . . imprimis Pseudo-syllogum illud, quod sine Apostolica Sede enormiter & irrationabiliter, nequiterque contra sanctorum venerabilium Patrum traditionem de sacris Imaginibus actum est, anathematizetur praesentibus missis nostris .* Quod rursus praecipit in aliis ad Tarasium litteris, in quibus etiam adjungit, se illius consecrationem recipere, adeoque cum ipso tanquam Catholico Patriarcha communicare non posse, nisi ipsius ope ac vigilantia sacrarum Imaginum cultus in Oriente restitueretur : *Si autem sacras ac venerabiles Imagines illis in partibus non restituerint, consecrationem vestram recipere non audemus .* Quae litterae quum Actione secunda lectae fuissent ; Tarasius illarum auctoritatem agnovit, ac publice professus est, illis omnino esse parendum, & eis resisti non posse . Quare quum Paulli verba laudasset, quibus Romanae fidei praeconium continetur : *Hoc, inquit, testimonium sequi necessarium est, & inconsulte agit, qui huic conatur resistere .* Quae verba & ipse Petrus de Marca (a) expendens merito observat : Tarasium Sedis Apostolicae auctoritatem suo suffragio ita coluisse, ut ab ejus regulis in sinceræ

B b b 2

fidei

---

(a) Lib. V. de Concord. cap. XIV. num. III.

huic praedicatione diicedere, nemini fas esse putaverit; Apostolo testante, Romanorum fidem annuntiari in universo mundo.

In octava Synodo nullus omnino Metropolitanorum, Episcoporum, & Clericorum, qui a Constantinopolitana Sede pendebant, in sacrum illum conventum admissus est, qui non ante Libello coram testibus subscripsisset, quem Hadrianus II. ut ab eis reapse subscriberetur, per Legatos suos transmiserat. In hoc autem Libello, cujus saepius in Opere adversus Bosluetium mentionem fecimus, sancte ac sollenniter profitebantur, sese omnia decreta suscipere, quae pro Ignatii restitutione, & Photii dejectione, & Gregorii Syracusani & sectatorum eorundem damnatione cum Nicolaus I. tum Hadrianus ipse sanxissent. *Ita ut*, inquit Anastasius Bibliothecarius, qui praesens aderat, *nullus vel Antistitum, vel reliquorum Clericorum in Synodalem fuerit conventum receptus, qui non secundum exemplar hujus codicilli Chirographum scripsit, & Missis Sedis Apostolicae Ecclesiae Romanae minime deferendum porrexisset*. Post hujus vero Libelli subscriptionem, quo praecipua capita continebantur, ob quae Synodus indicta fuerat; quae rogo libertas iis qui subscripserant reliqua erat, ad eadem Sedis Apostolicae decreta in ipsa Synodo retractanda? Postquam anathema in Photium, & in Gregorium Syracusanum, & in acta Photiani Conciliabuli, & in eorum sequaces intorserant; & postquam Nicolai I. & Hadriani II. Romanis Synodis eorumque actis atque decretis pro Ignatii restitutione, & schismaticorum damnatione subscripserant; quis eos liberos fuisse pronunciet ad judicandum, jure ne recteque, an secus Ignatium Romani Pontifices restituissent, Photium

rium autem Photianoque damnassent? Hoc factum, ut ipse Petrus de Marca observat (a), adeo commendabat auctoritatem Summi Pontificis, ut id Episcopi quidam Constantinopolitanae Dioeceseos in invidiam trahere conati sint, Basilii Imperatoris & Ignatii Patriarchae acribus insufurrantes, (quemadmodum observat Anastasius Bibliothecarius, qui rebus gestis praefens aderat) *non bene factum fuisse, quod Ecclesiam Constantinopolitanam tanta subjectione Romanae subdi Ecclesiae permiserint, ita ut hanc ei tanquam dominae ancillam tradiderint.* Qua exprobratione commotus Imperator, clanculum Chirographa illa subscripta a scriniis Legatorum subripi iussit. Quod ex parte impletum, justam Legatis conquerendi occasionem dedit. Sed opera & industria Anastasii Bibliothecarii Imperator chirographa restitui praecepit, iis verbis adiectis, quae Sedem Apostolicam ut negotiorum Ecclesiasticorum magistram profitentur: *Ego quidem, inquit, magistram Ecclesiasticorum negotiorum Sedem Apostolicam per meos Legatos adii, & ideo vestram praesentiam praestolatus sum, ut vestro decreto & solertia Ecclesia nostra remedia sanitatis acciperet; & nos non nostris motibus, sed vestrae sententiae pareremus.* Quibus verbis Imperator professus est, jure ac legitime Romanum Pontificem eam in Graecos Episcopos auctoritatem exercuisse, eosque adigere potuisse ad subscribendum Sedis Apostolicae decretis, vel antequam Synodus celebraretur: quoniam ipsa quum sit Ecclesiasticorum negotiorum magistra, ejus sententiae parendum est: adeoque non eam Basilii Imperator in Episcopis ac Synodis auctoritatem & potestatem agnoscebat, quam veteres Imperatores in

Pa-

---

(a) Ubi supra num. VI.

Patribus & Senatu, quum jure ac modeste agerent, suspiciebant: quum se illi Senatui obnoxios profiterentur, hic vero Episcopos Pontificis decretis & auctoritati subjeceret. Nam Senatus jura Tiberius agnoscens, ita Patres apud Suetonium cap. XXIX. adloquebatur: *Dixi & nunc & saepe alias, P. C., bonum & salutare Principem, quem vos tanta & tam libera potestate ornastis, Senatui servire debere, & universis Civibus saepe, & plerumque etiam singulis, neque dixisse me poenitet: & bonos, & aequos, & faventes vos habui dominos, & adhuc habeo.* At contra, ut vidimus, Constantinopolitanae Dioeceseos Episcopi & Clerici conquerebantur, & cum Imperatore & Ignatio Patriarcha expostulabant, quod Synodi initio amplissimam illam Orientis Ecclesiam Sedi Apostolicae tanquam ancillam dominae subjecissent. Quod jure factum esse, tandem & ipse Imperator agnovit, ac professus est.

### C A P U T I I I.

*De Imperatorum placitis in Senatu libere a Patribus & in utramque partem disceptabatur. At Romani Pontifices omnino vetabant, fidei dogmata Sedis Apostolicae auctoritate sancita, velut adhuc dubia & incerta, in Synodis Oecumenicis retractari.*

**N**on modo aequi bonique Imperatores, aut qui tales haberi vellent, eamque gloriam aucupabantur, nullam Senatui, ut in eorum placita sententiamque concederet, vim inferebant; verum & Patribus permittebant,

banit, ut de rebus in medium adlatis, quanquam explorata Principis voluntate, libere disceptarent. Plura hujusce juris & libertatis, qua, Tiberio Imperatore, frui Senatus adhuc videbatur, & qua frui plenissime debuisset, Tacitus exempla notavit. Unum aut alterum, ut res illustrior evadat, exemplum adferam.

Primum exstat lib. III. Annal. cap. LXX. narraturque a Tacito his verbis: *L. Ennium equitem Romanum majestatis postulatam, quod effigiem Principis promiscuum ad usum argenti vertisset; recipi Caesar inter reos vetuit.* At ejus sententiae atque judicio non statim omnes adquieverunt; quin eorum unus libertate usus, quae amplissimo ordini conveniebat, & ejus illi imaginem quamdam & umbram Tiberius adhuc servabat, palam judicio Caesaris contradixit: *Palam, inquit, aspernante Atejo Capitone quasi per libertatem; hoc est, quasi Senatus libertatem adfereret: Non enim, inquiebat, debere eripi Patribus vim statuendi: neque tantum maleficium impune habendum. Sane lentus in suo dolore esset; Reipublicae injurias, ne largiretur.*

Illustrius est alterum ejusdem libertatis exemplum, qua Senatus Tiberii placito adversatus est, quod idem Auctor Annalium lib. IV. cap. XV. his verbis refert: *Sub idem tempus de Flammine Diali in locum Servii Maluginensis defuncti legendo, simul roganda nova lege differuit Caesar; hoc est, retulit ad Senatum de nova lege sancienda.* Quanquam autem plures rationes adtulit, cur veterem ritum emendari vellet, aut cur ei *medendum* censeret *Senatus decreto aut lege*, addito etiam Augusti exemplo, qui *quaedam ex horrida illa antiquitate*, hoc est veterum legum sylva, *ad praesentem usum flexisset*: libere tamen

Senatus placitum Caesaris ad examen revocavit; *tractatisque religionibus*; hoc est, perspectis perpensisque ceremoniis, *placitum*, contra atque Tiberius censuerat, *instituto Flaminum nihil demutari*.

Similia & apud Suetonium in ejusdem Tiberii vita legere est: ex quibus facile colligas, non eam sibi Imperatores, quum principatus jura suis finibus coërcebant, auctoritatem usurpasse, ut omnia pro suo ipsorum arbitrio decerni vellent, nec facultas Patribus esset secus de rebus propositis judicandi: Hinc quemdam (a) *dicentem*, *auctore eo Senatum se adiisse*, *verba mutare*, & *pro auctore, suasorem . . . dicere coëgit*. Hoc autem auctor a suasore differt, quod hujus consilium non semper sequimur. Hinc etiam paullo inferius eidem Suetonio (b) memoriae proditum est, quod *speciem libertatis quamdam induxit, conservatis Senatui ac Magistratibus & majestate pristina & potestate*; hoc est, iisdem pene juribus, quibus florente Republica fruebantur: *Neque tam parvum quidquam, neque tam magnum publici privatiue negotii fuit, de quo non ad P. C. referretur*. Et rursus (c): *Quaedam adversus sententiam suam decerni, ne questus quidem est*. Cujus moderationis aliquot statim exempla describit.

Paria sunt quae de eodem Imperatore Dio Cassius refert lib. LVII. in Xiphilini Excerptis: *Suo, inquit, arbitrio nihil aut perpauca agebat: De rebus etiam minutissimis ad Senatum referebat . . . Proposita sua in medium sententia, non tantum omnibus contradicere liberum relinquebat, sed ferebat etiam aliquando contrariae*  
suae

(a) Sueton. in Tiberio cap. XXVIII.

(b) Ibid. cap. XXX.

(c) Ibid. cap. XXXI.



*fuae sententiae decreta fieri. Nam ipse quoque saepenumero suffragium dicebat .... Plerumque ne videretur libertatem aliis adimere, dicere solebat, se si sententiam fuisset laturus, hoc vel illo modo dicturum fuisse. Quo fiebat, ut liberius alii quid ipsis placeret, exponerent. Quin saepius diversum ab ipsius sententia posteriores probaverunt, ac saepenumero, nihil cuiquam succensente ipso, obtinuerunt. Quae libertas, ut iidem Auctores monent, tamdiu in Senatu viguit, quamdiu Tiberius bonum principem egit; hoc est, ipsius Imperii novem prioribus annis: quibus, ut rursus Tacitus auctor est (a), & publica negotia, & privatorum maxima apud Patres tractabantur: dabaturque Primoribus differere; hoc est, libera erat de quibuslibet negotiis deliberatio; & in adulationem lapsos cohibebat ipse .... sua Consulibus, sua Praetoribus species: minorum quoque Magistratuum exercita potestas &c. hoc est, quemadmodum Senatui Patribusque conscriptis, ita & Consulibus Praetoribusque manebat aliqua pristinae majestatis imago, & minores Magistratus suam potestatem sine ullo impedimento exercebant.*

His positis, videndum est, an eandem libertatem, qua olim Imperatores de suis placitis Senatores differere permittebant, Romani quoque Pontifices ad sua circa fidem decreta retractanda Synodis Oecumenicis indulgerent; seu an ejusmodi auctoritatem ipsis Oecumenicis Synodis jure competere judicarent. Adfirmat Illustrissimus de Marca his verbis (b): „Quemadmodum autem relationis Imperatoriae haec erat necessaria & velut innata

To. I. Par. II.

C c c

con-

(a) Lib. IV. Annal. cap. VI.

(b) Lib. V. de Concord. cap. VIII. num. V.

„ conditio, ut rectae rationis praescriptum sequeretur,  
 „ atque utilitati publicae consuleret, vel sane non in-  
 „ commodaret; (qua de re libera erant Senatorum suf-  
 „ fragia), ita quoque relationis Pontificiae partes erant,  
 „ ut in fide & pace Ecclesiarum constituenda, a Sacris  
 „ Scripturis, a Canonibus, & a traditione Majorum nul-  
 „ lo pacto discederetur. Quare illud anxie a Synodo dis-  
 „ quirebatur, an Pontificum epistola cum Scripturis &  
 „ Canonibus congrueret; ut ita demum auctoritate illius  
 „ omnes tenerentur, atque duobus veluti vinculis in fide  
 „ confirmati essent, definitione Pontificis, & declara-  
 „ tione Synodi. Perinde atque ut olim Hadrianus ad Se-  
 „ natum scribebat (a): *Vestrum est aestimare quid velitis:*  
*nam ego usque ad Senatus iudicium incertus & varius*  
*fluctuabo:* ita usque ad Synodi iudicium nutarit adhuc,  
 aut non satis firma fuerit in fidei rebus sanciendo Aposto-  
 licae Sedis Decretorum auctoritas. Paullisper autem se-  
 posita Synodicae consultationis seu deliberationis praxi,  
 qua potissimum Adversarii nituntur; quis fuerit ipsorum  
 Pontificum Romanorum de suis decretis ad fidem perti-  
 nentibus sensus, interim exponemus. Adlatisque eorum  
 testimoniis, plane aperteque constabit, noluisse Roma-  
 nos Pontifices, constanterque inhibuisse sua de fide decreta  
 tanquam dubia & incerta in Synodis Oecumenicis retra-  
 ctari: adeoque non eandem illos in Conciliis generalibus  
 auctoritatem suspexisse, quam olim Senatui aequi bonique  
 Imperatores sartaque tectaque servabant.

Initium ducam a Leone Magno, quo tritae ab Illu-  
 strissimo Praefule orbitae ac vestigiis insistam. Is ergo  
 sanctissimus & acquissimus Pontifex, qui *libertatem sus-*

fra-

(a) Apud Spartian. in Hadriani vita cap. VIII.

*fragiorum*, ut idem ipse Illustrissimus Auctor observat, tantopere commendavit, in suis epistolis gravissime ac sollicitè cavit, ne causa fidei adversus Eutychem auctoritate ipsius asserta, ejusque de mysterio Incarnationis ad Flavianum epistola tanquam dubia & incerta vel in ipsa generali Synodo in disceputationem adduceretur. Ita epistola XLII. ad Marcianum Augustum (a), quum jam de cogenda Synodo tractaretur: *Nimis autem iniquum est, ut per paucorum insipientiam ad conjecturas opinatum, & ad carnalium disceptationum bella provocemur: tanquam reparata disceptatione tractanda sit, utrum Eutyches impie senserit, & utrum impie Dioscorus judicaverit.* Et infra: *Non cujusmodi sit fides tenenda tractandum, sed eorum; hoc est, in Ephesino Latrocinio lapsorum, precibus qualiter annuendum.* Et epistola sequente ad eundem: *Per ipsum, inquit, Dominum nostrum Jesum Christum, qui regni vestri est auctor & rector, obtestor & obsecro clementiam vestram, ut in praesenti Synodo fidem, quam beati Patres nostri ab Apostolis sibi traditam praedicarunt, non patiamini quasi dubiam retractari.* Et epistola L. ad eundem Imperatorem: *Compressa enim vel remota inquietudine ac pravisate paucorum, facile probabitur firmanda concordia, si in eam fidem, quam Evangelicis & Apostolicis praedicationibus declaratam, per antiquos Patres nostros accepimus & tenemus, omnium corda concurrant; nulla penitus disputatione cujusquam retractationis admissa, ne per vinam fallacemque versutiam aut infirma videantur aut dubia, quae in ipso angulari lapide Christo fundata sunt, & sine fine mansura.* Quam porro fidem his verbis delinearet,

& prorsus irretractabilem esse vellet atque decerneret, plenius ac disertius declarat in epistola ad ipsum Chalcedonense Concilium (a): *Unde, inquit, fratres carissimi, rejecta penitus audacia disputandi contra fidem divinitus inspiratam, vana errantium infidelitas conquiescat; nec liceat defendi, quod non licet credi; quum secundum Evangelicas auctoritates, secundum Propheticas voces; Apostolicamque doctrinam, plenissime & lucidissime per litteras, quas ad beatae memoriae Flavianum Episcopum misimus, fuerit declaratum, quae sit de sacramento Incarnationis Domini nostri Jesu Christi pia & sincera confessio. Hanc ergo fidem, quae in suis ad Flavianum litteris continebatur, quam plenissime declaraverat, & adversus Eutychem adseruerat, nolebat Leo in disputationem adduci, ac vehementer intercedebat, ne eadem semel ab ipso sancita in generali Synodo retractaretur.*

Praeiverat hac in re Magno Leoni S. Caelestinus, qui quum Legatos suos ad Ephesinam Synodum mitteret, eis in mandatis dedit, ut suam & Occidentalis Synodi adversus Nestorium sententiam Oecumenco Concilio significarent, nec se se Orientalium disceptationibus immisce-  
rent. Quare in Communionitorio eis tradito haec S. Pontificis verba leguntur: *Auctoritatem Sedis Apostolicae custodiri debere mandamus: siquidem & Instructiones, quae vobis traditae sunt hoc loquantur, ut interesse conventui debeatis: ad disputationem si fuerit ventum, vos de eorum sententiis judicare debeatis, non subire certamen.* Quibus verbis, ait Baluzius, Baronii confirmari sententiam docentis: „ a Caelestino Romanaeque Synodo „ missos esse Legatos in Orientem, non ut redditis irri-

„ tis,

---

(a) 1. Par. Concil. Chalcedon. cap. XL.

„ tis, quae anno superiore adversus Nestorium ab eodem  
„ Pontifice decreta essent, causa ejusdem novo subjaceret  
„ examini, sed potius ut sententiae in Nestorium latae  
„ iidem Legati essent executores.

Eadem omnino fuit & sequentium Pontificum mens, quum Legatos suos ad Orientales Synodos destinarent; ut constat imprimis ex hisce Agathonis & Occidentalis Concilii verbis in Epistola ad Constantinum Pogonatum Imperatorem: *Personas autem de nostrae humilitatis ordine praevidimus dirigere ad vestrae a Deo protegendae fortitudinis vestigia, quae omnium nostrum, id est universorum per Septemtrionales vel Occiduas regiones Episcoporum suggestionem, in qua & Apostolicae nostrae fidei confessionem praelebarimus, offerre debeant: non tamen tanquam de incertis contendere, sed ut certa atque immutabilia compendiosa definitione proferre.*

Idem etiam ex octava Synodo compertum est: nam ipsa statim Actione prima Sedis Apostolicae Legati Synodo significarunt, haud aliam sibi suppetere potestatem, quam ut Nicolai decreta firmarent, eaque exsequerentur: *Sanctissimus Papa Hadrianus potestatem nobis dedit, ut secundum quod beatissimus Papa Nicolaus disposuit de sancta Constantinopolitanorum Ecclesia, ita ordinemus; & moderemur atque firmemus, ut nullus adversus eam pugnare possit; & ut quae ipse sanctissimus Hadrianus edidit, confirmemus.* Quod & reapse constanter ac fideliter praestiterunt. Nam & in eadem Actione, antequam ulla de rebus Romae decretis ac definitis disputatio haberetur, Graecos Episcopos adegerunt ad subscribendum libello ex Urbe transmissio, quo Sedis Apostolicae de Ignatii Photiique causa, seu de Photiano schismate decre-

ta continebantur. Et quum Actione quarta Principes seu Senatus per Bahanem patritium peterent, ut Photiani Synodum ingrederentur; aegre id quidem Legati tulerunt, nec alia ratione consenserunt, quam ne admitterentur ad disceptandum, sed ut latam in eos a Nicolao sententiam ejusque definitiones audirent, & juxta illas praesentes judicarentur: *Ingrediantur, & exaudiant legi Synodicas definitiones & judicia beatissimi Papae Nicolai, & certificentur magis ac magis.* Et rursus: *Ingrediantur: sed nos non propter contentionem advocamus eos; sed ut tantum beatissimi Papae Nicolai epistolam audiant.*

His fretus exemplis Gregorius X. quum Graecos Imperatorem, Patriarcham, & Episcopos ad secundam Lugdunensem Synodum invitaret; concinnatam a Clemente IV. fidei Catholicae definitionem, qua dogmata, ob quae ab Ecclesia Latina Graeca dissidebat, auctoritate Apostolica sanciebantur, eis ante per Legatos suos subscribendam transmisit; hac adjecta declaratione, ad eam formulam retractandam, aut novo examini subjiaciendam, nequaquam debere Synodum celebrari: *Non, inquit, ad praedictae discussionem, vel novam diffinitionem fidei, quam tanquam innumeris sacrae paginae auctoritatibus, numerosis Sanctorum Patrum sententiis, & Romanorum Pontificum stabili diffinitione firmatam, nec ipse (Clementis) voluit, nec nos intendimus, sicut nec decet nec foret expediens, in dubium, novo ipsam exponendo examini, revocare.*

Si ergo Synodis Oecumenicis eadem libera facultas est ad retractandas excutiendasque Romanorum Pontificum dogmaticas Constitutiones, quae olim Senatui Patri-

tri-

tribusque conscriptis ad differendum atque deliberandum, de Romanorum Imperatorum placitis; necesse omnino est, ut laudatos Pontifices tyrannicam in Ecclesia dominationem exercuisse dicamus: quemadmodum & illos Imperatores tyrannidis argueremus, imo & reipsa arguimus, qui hanc libertatem Patribus ademissent, aut qui reapse ademerunt. An ergo Leonem Magnum, Caelestinum, Agathonem, Hadrianum II., Clementem IV., Gregorium X. tyrannici dominatus insimulabimus? Absit. Quis tantis nominibus tam gravem atrocemque notam inurat, quam nunquam illis Veterum ullus impressit? Quibus proinde nequaquam persuasum fuit, ea in Synodis Oecumenicis Episcopos libertate pollere, qua in Senatu Patres conscripti, nondum omnino eversa Republica, potiebantur.

## CAPUT IV.

*Senatus Romanus non modo libertate usus est in Imperatorum placitis retractandis, verum & in eisdem aut omnino improbandis, aut saltem reformandis: Nulli autem Oecumenicae Synodo fas aliquando fuit, Romanorum Pontificum de fide decreta aut omnino rejicere, aut vel unum in eis apicem permutare.*

**E**X iisdem Historicis monumentis, quibus superiore capite ostendimus, in potestate Patrum olim fuisse de Imperatorum placitis differere atque deliberare; apparet etiam Senatum eadem potestate usum, ea vel omnino improbasse, vel quibusdam deitis aut additis ad publicam

cam

cam utilitatem adtemperavit. Id quod certe ex jure & auctoritate deliberandi sponte fluebat. Ut quid enim illa Senatus deliberatio, nisi ut quod optimum esset, maximaeque rationi & legibus, rei publicae congruens & consentaneum, decerneretur? Facilius enim erat, ut se habent humanae res, ut id plures collatis consiliis, quam unus, adsequerentur: adeoque fieri non poterat, quin ab unius plurium sententia quandoque discordaret. Quod non aegre ferebant Imperatores, qui sua Patribus jura integra & intemerata esse volebant. Ita Suetonius de Tiberio (a): *Quaedam adversus sententiam suam decerni, ne questus quidem est. Negante eo, destinatos Magistratus abesse oportere, ut praesentes honori adquiescerent; Praetor designatus liberam legationem impetravit. Iterum censente, ut Trebianis legatam in opus novi theatri pecuniam ad munitionem viae transferre concederetur, obtinere non potuit, quin rata voluntas legatoris esset. Quum Senatus-consultum per discessionem forte fieret, transeuntem eum in alteram partem, in qua pauciores erant, secutus est nemo.* Sed nullum celebrius aut pervulgatius hujusce in Patribus libertatis argumentum, quam quod de eodem Imperatore Tertullianus his verbis refert (b): *Tiberius ergo, cujus tempore nomen Christianum in saeculum introivit, annuntiatum sibi ex Syria Palaestina quod illic veritatem illius divinitatis revelaverat, detulit ad Senatum cum praerogativa suffragii sui. Senatus, quia non in se probaverat, respuit.* Quae jam adduximus & alia quae adhuc adferri possent ex iis quae a Senatu sub eodem Imperatore ejusmodi lib-

---

(a) In Vita Tiberii cap. XXXI.

(b) Apolog. cap. V.





exempla, quin vera narret Tertullianus dubitare non sinunt; quum non aliam adversus istiusmodi historiae veritatem morosiores aliquot Critici rationem adferant, quam quod verisimile non videtur, Senatum, de Christo in Deorum numerum referendo, Imperatoris placito repugnasse. Qui certe si ad Senatus jura, & alia id generis exempla animum attendissent, nunquam gravissimi Scriptoris narrationem in falsi suspensionem adducere moliti essent.

Ut ergo Patres de Imperatorum placitis dissierebant; ita ab eis libere quandoque dissentiebant; qua in re summa Senatus auctoritas explicabatur. Quare si eadem in Conciliis generalibus Episcopi libertate & auctoritate pollebant, eam aliquando exercuissent, aut exemplo aliquo comprobassent. Cur enim illos Christus ea potestate & auctoritate donasset, quae semper munere actuque suo vacaret? Aut qua ratione contigisset, ut nullo unquam exemplo aut Pontificis lapsu demonstraretur, supremam ad res fidei definiendas auctoritatem penes Oecumenicas esse Synodos, & solennes & ex Cathedra pronunciatas Romanorum Pontificum de fide definitiones posse ac debere aliquando per easdem Synodos reformari? Jam vero tantum abest, ut id aliquando contigerit, ut quum ac una legitima Synodus imprudens aggressa esset; & contrarium a Legatis Sedis Apostolicae restitutum est; ac nil inter Legati intercessissent, in minimum Synodus incurrisset. Res ita se ha-

Conferunt tande

versus

de qu

bis

II

ilium Chalcedonense, & S  
nam haereticum, concilio  
lice lecta est, nequaquam  
Apostolica Legatis, omni-  
bus

bus placuit ; consensione inque suam & adprobationem publicis acclamationibus testati sunt : *Definitio omnibus placet . Haec fides Patrum . Qui praeter ista sapit , haereticus est . Qui aliter sapit , anathema sit . . . . definitio Deo placuit . Ista fides Orthodoxorum . . . . Petimus , ut definitio subscribatur coram Evangeliiis . . . . Jubete subscribi definitionem . . . . Qui non subscribit definitioni , haereticus est .* His tamen clamoribus Sedis Apostolicae Legati minime territi , intercedere perstiterunt ; caussati adjiciendum formulae fidei , quod sententiam S. Leonis plene atque integre repraesentaret . Reponentibus Episcopis , nihil esse addendum definitioni , eo contentio processit , ut pene rebus infectis tanta Synodus solveretur ; Legatis constanter rejicientibus definitionem , nisi in ea Patres juxta epistolam S. Leonis duas esse in Christo naturas unitas inconvertibiliter , inseparabiliter , & inconfuse , diserte atque perspicue profiterentur . Quod tandem pervicerunt , & formula fidei omnium votis ita concepta est , ut diserte Leonis epistola recepta sit tanquam Petri confessioni congruens ; & omnia dubia juxta praescriptum illius epistolae explicata sunt .

Ex disceptationis hujus narratione duo , juxta Petrum de Marca , praecipua colliguntur ( a ) : „ Unum est ,  
 „ omnes Episcopos epistolae Leonis subscripsisse . Quod  
 „ ejus auctoritatem demonstrat , cum decretis subscriba-  
 „ tur , & non Episcoporum suffragiis . Alterum est , ne-  
 „ fas tandem Synodo visum , si vel uno verbo ab ea epi-  
 „ stola discederetur . Etenim cum superioribus Actioni-  
 „ bus praejudicatum fuisset omnium Patrum suffragiis ,  
 „ Epistolam Leonis congruere cum traditione Majorum ,  
 „ auctoritas Romanae Sedis id exigebat , ut formula fi-  
 „ dei

---

( a ) Lib. V. de Conc. cap. IX. num. IV.

„ dei edita a Concilio, & Leonis definitionem disertus  
 „ verbis amplecteretur, & ex ejus praescripto ambiguita-  
 „ tes tolleret; nempe Synodus declararet, quod Leo de-  
 „ finiverat, quemadmodum loquebatur Marcianus Im-  
 „ perator. At nos ex eadem narratione alterum colligi-  
 „ mus, nempe quod ubi a Leonis epistola Synodus oculos  
 „ deflexit, parum absuit, quin aequivocam, atque ineptam  
 „ Eutychianae haeresi proligandae, fidei formulam obtru-  
 „ deret. Ut enim ipsis Judicibus observatum est, nec ipsi  
 „ Eutychianorum principes omnino repugnabant, Chri-  
 „ stum ex duabus dici naturis; at duas in ipso naturas agno-  
 „ scere recusabant; quare fidei definitio, quae tantum ex  
 „ duabus naturis habebat, ab Eutychiana impietate satis re-  
 „ mota non erat: *Gloriosissimi Judices dixerunt*: „ Dio-  
 „ scoros dicebat, propter hoc se damnasse Flavianum;  
 „ quia duas naturas ajebat esse: definitio autem, ex dua-  
 „ bus habet naturis. *Et rursum*: *Dioscoros dicebat*:  
 „ Quod ex duabus naturis est, suscipio, duas non suscipio.  
 „ Quod verum esse, nec Anatolius quidem inficias ivit; sed  
 „ reposuit, propter fidem damnatum non fuisse Dioscorum.  
 „ At constabat tamen, illum omnia sua deque vertisse, divi-  
 „ naque omnia & humana jura violasse, ut damnato Fla-  
 „ viano, qui duas naturas praedicabat, Eutyches unius na-  
 „ turae adsertor absolveretur. Quod satis erat, ut ea formula  
 „ velut errori damnando non satis idonea rejiceretur. Dein-  
 „ de, illud quidem absolum erat, ut qui Leonis epistolae  
 „ jam subscripserant, in fidei formam admittere recusarent,  
 „ quod in ea Epistola maxime Eutychianos urebat, & quo  
 „ ferme uno a Catholicis diffidebant. Ut enim Episcopos  
 „ Judices recte jureque monebant: *Si epistolam Sanctissimi*  
*Leonis suscipitis.... ergo quae in ea inferuntur, inferan-*

*tur definitioni*. Attamen ad epistolam suscipiendam & subscribendam vel ante Synodum Leonis auctoritate coacti fuerant; quare & eadem auctoritate in eam necessitatem adstricti fuerant, ut ne vel uno verbo ab ea epistola discederetur; vel, eis jam fuerat ademta libertas ad eamdem in ullo capite reformandam.

Hoc, ut conjicere licet, exemplo edoctus S. Agatho Papa, quum suos ad sextam Synodum Legatos mitteret cum Sedis Apostolicae de duabus in Christo voluntatibus sollenni decreto ac definitione, non modo illis ademit facultatem de re, semel Sedis Apostolicae auctoritate sancita disputandi; non modo ejusdem Sedis Apostolicae communione Orientalibus se interdicturum minatus est, nisi illam incunctanter amplecterentur: verum etiam eisdem Legatis fas esse noluit Synodo consentire, si forte Apostolicae confessioni quidquam aut demendum, aut adjiciendum esse contenderet: *Licentiam proinde eis sive auctoritatem dedimus apud tranquillissimum vestrum Imperium, dum jusserit ejus clementia, simpliciter sati faciendi, inquantum eis dumtaxat injunctum est, ut nihil profecto praesumant augere, minuire, vel mutare: sed traditionem hujus Apostolicae Sedis, ut a praedecessoribus Apostolicis Pontificibus instituta est, sinceriter enarrare*. Similiter & in octava Synodo Hadriani II. Legati professi sunt, sibi fas non esse, neque canonicis institutis permissum judicia rescindere Pontificum Romanorum: *Nobis, non licet rescindere judicium sacrorum Romanorum Pontificum*. Hoc enim contrarium est canonicis institutis.

His Romanorum Pontificum & sacrorum Canonum institutis omnes Oecumenicas Synodos paruisse, rum ex  
earum

eārum actis comperitum est, tum etiam ipsi Romani Pontifices haud semel testati sunt. Quid enim hoc Agathonis testimonio praeclarius in epistola saepius laudata ad Constantinum Pogonatum Imperatorem? *Beatus Petrus . . . spirituales oves Ecclesiae ab ipso Redemptore omnium aeterna commendatione pascendas suscepit: cujus annittente praesidio, haec Apostolica ejus Ecclesiae nunquam a via veritatis in qualibet erroris parte deflexa est: cujus auctoritatem, utpote Apostolorum omnium principis, semper omnis Catholica Christi Ecclesia, & universales Synodi fideliter amplectentes, in cunctis secutae sunt.* Consona his sunt quae S. Nicolaus scribit epistola nona ad Michaëlem Imperatorem: *In Synodis, inquit, prisco tempore collectis Apostolicae Sedis scripta non sub occultationis modio tegebantur: sed ut omnibus, qui in domo Dei erant, lucerent, in propatulo ponebantur: & ut si qua turpitudine vel macula in fidei pulcritudine a quolibet tentaretur induci, facile patefceret, ac si specula in omnibus habebantur, & quasi quaedam rectitudinis formula, qua imprimi ceteri possent.* Et epistola decima ad eundem Imperatorem: *Haec sunt quae de his Sedes Apostolica statuit: haec sunt quae Synodice regulariterque decrevit: haec sunt quae nos tanto studiosius oportet amplecti, tanto sollicitius observare, quanto certius nostis, quae ab ea statuta fuerint, haec universalem semper Ecclesiam tenuisse. Ita ut contra singulos errores in Ecclesia exortos prior haec secundum primatus sui auctoritatem sententiae terminum dederit: & ita demum universalis Ecclesia, licet aliquando per aliquantulum temporis in quibusdam relictata sit, quae illa tamen probavit, quandoque probaverit: & quae illa refutavit, quandoque re-*  
*futa-*

*futuraverit*. Quorum verborum sensus esse non potest, quod absolute universalis Ecclesia dogmaticis Apostolicae Sedis decretis reluctata aliquando sit: hujus enim rei nullum in Ecclesiae monumentis occurrit exemplum: quare quod ait, *in quibusdam*, referri commodè potest ad quaedam non doctrinae capita, sed ipsius Ecclesiae membra; ut sensus sit, licet Ecclesia *in quibusdam* adhuc sibi cohaerentibus membris, ut in Polycrate & Episcopis Asianis, in Cypriano & Episcopis Africanis, in Firmiliano & aliquot Episcopis Orientalibus, Sedis Apostolicae constitutis reluctata aliquando sit; ejus tamen deinde sententiam in omnibus amplexa est, nec fas illi aliquando fuit Romanorum Pontificum de fide judicia vel decreta rescindere.

Hinc autem exsurgit viresque sumit argumentum, quod in hoc capite urgemus, & supra paucis attigimus. Nam in legibus condendis quoniam Romanorum Imperatorum haud aliae partes erant, quam de rebus negotiisque fanciendis ad Senatum referre, primamque, si eis libitum fuisset, sententiam pronunciare, quae tamen liberae Senatus consultationi ac deliberationi erat obnoxia; ideo saepe contigit, ut ab Imperatorum sententia Senatorum suffragia discreparent; atque id saepius etiam contigisset, si Patribus integra stetisset libertas, nec eorum constantiam aut metus displicendi, aut nimium placendi studium fregissent. At Romanorum Pontificum dogmaticis epistolis ad generales Synodos destinatis, quibus, juxta Petrum de Marca, vis inerat relationis primaeque sententiae, nulla unquam generalis Synodus refragata est. Quod neque ipsimet Adversarii inficiari audent, sed palam agnoscunt ac profitentur; ut sequens Turnellii locus demonstrat. Postquam enim dixit, quod si forte Pontificiis de fide

fide decretis Ecclesiae consensus non accederet, & reclamarent Episcopi, certum id esset falsae & erroneae definitionis argumentum, cui propterea obsequi ex animo fideles non tenerentur; statim addidit (a): „Sed vanam & „ inutilem esse hanc hypothesim, spem certam facere videtur experientia septemdecim saeculorum: nusquam enim haec contigit, ut aliquod Sedis Apostolicae de fide ac moribus decretum, ad consultationem Episcoporum, & iis conditionibus factum, quas exigit ordo a Christo institutus, erroneum fuerit, aut ceterarum Ecclesiarum non habuerit consensum. Si ergo septemdecim saeculorum experimentum spem certam facit, vanam esse futilemque istiusmodi hypothesim, quod Ecclesia Pontificiis de fide moribusque decretis aliquando relictura sit; vana pariter futileque illa hypothesis erit, qua fingitur, Christum ad instar Romanae Reipublicae vel Imperii Ecclesiae suae regimen instituisse. Si enim ambigua essent, & non potius omnino perspicua, ea Evangelii traditionisque loca, quibus Petrum ejusque successores firma & immota Ecclesiae fideique fundamenta Christus constituit, eisque fidem nunquam defecturam promissit: attamen tot saeculorum experimentum suadere omnino deberet, alio prorsus ordine ex Christi institutione esse in Ecclesia res divinas administrandas, atque olim in Romana Republica vel Imperio. Si enim ad fidei dogmata irretractabiliter definienda ex Christi certa promissione universae Ecclesiae Sanctus Spiritus adest, non autem Sedi Apostolicae, vel Romano Pontifici; ut sese in toto corpore vis & efficacia Divini Spiritus constanter explicasset; ita se in capite quandoque humani spiritus imbe-

---

(a) Tom. II. de Eccles. Quaesit. V. art. III. pag. 278.

imbecillitas prodidisset. verum, ut ostendimus, omnes Oecumenicae Synodi agnoverunt palamque professae sunt, Petrum in Romanis Pontificibus adhuc vivere & iudicium exercere, Petrum per eos loqui, & Spiritum Sanctum illis dictare quae ipsae Oecumenicae Synodi tanquam suorum iudiciorum regulas formasque sequantur: quas etiam nisi prae oculis constanter habeant, periculum est, ne a veritatis orbita excedant, ut Ariminensi & Ephesinae Pseudo-Synodis reapse contigit, & contigisset etiam Chalcedonensi Concilio in fidei formula construenda, nisi agentibus Legatis omnia demum ad Leonis epistolam revocata & exacta fuissent. Quod argumento est, Spiritus Sancti vim & auctoritatem ab uno, cui tanquam capiti insideat, & a quo velut a fonte manet, in multitudinem derivari: contra atque in Romano Imperio vel Republica obtinuit, ubi auctoritas a multitudine in unum pluribus ornatum muneribus veluti per varios rivulos confluebat.

## C A P U T V.

*Ex dictis conficitur, Romanos Pontifices in Synodis Oecumenicis Regiam potius, quam Imperatoriam in iis quae ad fidem moresque pertinent, exercuisse auctoritatem. Exponitur illud Lucae 22. Reges gentium dominantur earum . . . . Vos autem non sic.*

**Q**uin haec nostra thesis delicatiores Adversariorum aures graviter offensura sit, minime dubitamus; illosque nobis obstrepentes audire videmur, Christum procul ab Ecclesia sua & ab Apostolis voluisse



regium dominatum; ut constat ex illis ejus verbis: *Reges gentium dominantur earum &c. Vos autem non sic*. Observat enim Illustrissimus Petrus de Marca (a): „quod  
 „his verbis de legitima Regum potestate Christus agit;  
 „non vero de tyrannica, cum de iis Regibus loquatur,  
 „qui benefici & *Διηγύται* a populis dicerentur. Et si quis  
 „abuti velit voce Graeca *κατακυριεύειν*, quae exstat apud  
 „Matthaeum, reponetur illi, Lucam simplici verbo *κυ-*  
 „*ριεύειν* usum. In eo autem discrimen versatur, quod  
 „Regibus summo imperio multa peragere liberum sit:  
 „quam effusam licentiam suis Apostolis Christus adimit:  
 „ita ut verus dominatus sit penes Reges, non autem pe-  
 „nes Sacerdotes; quorum potestas non est despotica, sed  
 „temperata, & ad populorum usum accommodata; ita  
 „ut Monarchia Ecclesiastica ex Aristocratico regimine  
 „sit commixta: contra quam accidit in plerisque Regnis,  
 „quae jure optimo a Principibus possidentur. Haec lau-  
 „datus Auctor, quae tamen alio loco accuratius exponit (b).  
 Nempe observat, quod praeter jus privatum, quo priva-  
 torum commodis Reges consulunt, legibus populorum  
 tacito suffragio firmatis, controversias ambigui juris tem-  
 perantes, jus quoque publicum penes Reges est, quod in  
 negotiis publicis versatur, atque ita Regibus commissum  
 est, ut constitutiones & mandata, quae hanc partem im-  
 perii attingunt, ab eorum nutu pendeant, nec indigeant  
 ullo Civium consensu. In hac ergo imperii parte verum  
 & merum dominatum ipse constituit: qui, inquit, longe  
 abest ab Ecclesiae auctoritate &c.

Verum ut ut sit de legibus Pontificiis, quae ad meram

To.I. Par.II.

E c c

spe-

(a) Lib. II. de Concord. Sac. & Imp. cap. XVI. num. VI.

(b) Praef. sec. in libb. de Conc. num. VI.

inspectent disciplinam, de quibus in praesentia disputare non vacat; in iis certe, quae ad fidem moresque pertinent, non possumus juxta haecenus disputata, non agnoscere in Romano Pontifice verum & merum dominatum, vel jus publico illi Regum adfuisse, quod illi ita commissum sit, ut Constitutiones & decreta, quae hanc partem Apostolicae auctoritatis attingunt, ab ejus judicio pendeant, nec absolute indigeant ullo Episcoporum aut Synodorum consensu. Id vero nos haud inanibus conficimus conjecturis, sed consecrarium esse judicamus earum propositionum, quas superioribus capitibus stabilivimus, & quarum, ut nobis videtur, explorata veritas est. Hoc enim interest inter regnum & imperium, sive illam regiminis formam, qua olim sub imperii nomine Caesares vel Augusti Romanam Rempublicam administrarunt; quod in Imperio summa & veluti fons auctoritatis & potestatis penes multitudinem aut Optimates erat, quae per varios Magistratus in unum Principem confluebat: at in Regno summum jus & summa potestas penes unum est, a quo aliorum non modo divisim ac singulatim, verum etiam simul & collective; hoc est non modo singulorum membrorum, verum & totius corporis, vis & auctoritas pendet. Vidimus autem, & tum in praesenti Dissertatione, tum passim in Opere adversus Illustrissimum Bossuetium, pluribus atque perspicuis sacrarum litterarum, ac veterum Patrum testimoniis demonstravimus, ita Christum suam instituisse Ecclesiam, ut summa regiminis, ac veluti centrum, fundamentum, radix & fons Ecclesiasticae auctoritatis, & potestatis penes unum esset, a quo non modo singulorum Ecclesiae Praefulum, verum & totius Ecclesiae, seu corporis Episcopalis potestas auctoritasque penderet.

Ex

Ex hoc autem discrimine Imperium inter & Regnum seu Monarchicum Ecclesiae regimen, aliud sive alia prodeunt, quibus similiter Romani Pontificis auctoritas Regiae quam Imperiali auctoritati adfinior est. Leges enim, quae in publicis regni negotiis versantur, ex sola Regis voluntate vim & auctoritatem habent, juxta celebre illud ac notissimum effatum: *Quod Principi placuit, legis habet vigorem: quum lege regia, quae de imperio Principis lata est, populus ei, & in eam omne suum imperium & potestatem conferret.* Itaque ex eo, quod omne jus omnisque potestas Reipublicae in Regiam personam confluit, sequitur, quod ex ejus judicio & voluntate vim obligandi leges trahant; seu, quod legis habeat vigorem, quidquid pro publico bono Principi placuit. Hoc autem & in Christi regno, quod est Ecclesia, jam olim obtinuisse, ex jam dictis compertum est. Ostendimus enim, Romanorum Pontificum epistolas, quibus lex & norma credendi constituta est, ex seipsis legis vigorem habuisse, eisque subscribere Episcopos debuisse, antequam undique in generales Synodos cogerentur. Haec autem potestas ideo Romanis Pontificibus inest, quoniam in eos ex Christi munere & institutione, velut in centrum lineae, omnis Ecclesiae dignitas & auctoritas confluit, vel ab eo, ut a fonte rivuli, derivatur: Vel ipse enim Clariss. de Marca fateatur (a), *eam esse vim Unitatis, quae principium & originem a Sede Petri trahit, ut cum ea sentiendi necessitatem ceteris imponat.*

Hinc porro aliud oritur Regis privilegium, sive aliud ipsius ab Imperatore discrimen: nempe quoniam leges in regno ex sola Regis voluntate vigorem habent, ubi summo

Ecc 2

im-

---

(a) De Conc. Sac. & Imp. Lib.I. cap. II. num. VI.

imperio Rex agere atque uti velit, non eas tenetur populi vel optimatum consultationi ac deliberationi subijcere; contra atque in Imperio accidebat, in quo Principum placita ad Senatum referebantur, ac liberae Patrum disceptationi permittebantur, nec nisi eorum consensione liberisque suffragiis vim legis obtinebant. Itaque Regio potius quam Imperatorio jure usi sunt Caelestinus, Leo Magnus, Agatho, Hadrianus II. alique Romani Pontifices, quum sua de fide decreta, legesque ad universum Christianae Reipublicae statum pertinentes, Conciliorum generalium retractationi nequaquam subjecta esse voluerunt. Quod certe sibi jure adsumere nequiverunt, nisi hac in re eorum potestas a Regia majestate, quam ab Imperatoria propius abesset, & nisi Ecclesiae regimen ad regni magis quam ad Imperii formam accederet. In Imperio enim, semel indicta Synodo, reque controversa ad Patres relata, summum & irretractabile ipsius judicium ad Synodum pertinuisset: adeoque Pontificii juris non fuisset, illius rei retractatione Synodo interdicere.

Quod ad regnum pertinet Regiamque auctoritatem, recte Hugoni Grotio animadversum est (a): „Multum  
 „ falli eos, qui existimant, cum Reges acta quaedam sua  
 „ nolunt rata esse, nisi a Senatu, aut alio coetu aliquo  
 „ probentur, partitionem fieri potestatis: Nam quae acta  
 „ cum in modum rescinduntur, intelligi debent rescindi  
 „ Regis ipsius imperio, qui eo modo sibi cavere voluit,  
 „ ne quid fallaciter impetratum, pro vera ipsius voluntate  
 „ haberetur, quale erat Antiochi tertii regis rescriptum  
 „ ad Magistratus, ne sibi parerent, si quid legibus  
 „ adversum jussisset. Sed hac cautione in iis, quae ad  
 fidem

---

(a) Lib. I. de Jure bel & pac. cap. III. num. XVIII.

fidem pertinent, opus non fuit in Christi regno. Quum enim istud sit regnum ipsius veritatis, Petrum ejusque successores, quos in hoc regno principes esse voluit, ita veritati Christus adfixit, ut ab ea deficere, & ullis inferiorum viribus, ullis erroribus disjungi atque divelli non possent. Quapropter nulla unquam Synodus Oecumenica, profecta ab Apostolica Sede de fidei negotiis decreta, nedum rescindere, imo ne attingere quidem ausa est, ea-que alicujus vocis vel detractatione minuere, vel adjectione interpolare. Quod quum septemdecim saeculorum experimento compertum exploratumque sit, id argumento est, Christum ita suum instituisse regnum, ut qui in eo primatum teneret, ac veluti regalia jura exerceret, id haberet prae ceteris Regibus eximium, ut solenne illius de fidei rebus judicium ab ipsius fidei regulis deviare non posset: adeoque omnino vacasset Synodis Oecumenicis ab Adversariis nostris gratis adtributa potestas ad retractanda & reformanda Romanorum Pontificum sollemnia de fidei dogmatibus constituta. Nam neque ejusmodi potestatem ulla hactenus Oecumenica Synodus exereuit, nec ulla deinceps, quantum de futuris ex praeteritis experimentis, si alia ad hoc argumenta deessent, conjicere liceret, unquam exercebit.

Hic autem mihi solvenda est superius proposita ob-  
jectio ex illis Christi verbis conflata: *Reges gentium do-  
minantur earum . . . Vos autem non sic*. Quibus Christus  
a suis regiam dignitatem, seu verum ac merum domina-  
tum removisse videtur: ut ea verba Bernardus (a), & Ori-  
genes (b) interpretantur: quorum expositioni alia Pa-  
trum

---

(a) Lib. II. de Consid. cap. VI.

(b) Traët. XII. in Matth.

trum loca , quae congerit Illustrissimus de Marca , ut Gregorii Nazianzeni ( *a* ) , Hieronymi ( *b* ) , & Johannis Chrysostomi ( *c* ) apertissime suffragantur .

Huic expediendae difficultati primū observo , vel ipsum Petrum de Marca , quum illis Christi verbis Patrumque locis fretus Ecclesiae abrogat verum & merum dominatum , suam moderari sententiam , illamque ad eas leges Ecclesiasticas coërcere „ quae , *inquit* ( *d* ) , de rebus jure „ naturali vel divino non vetitis , ad ὁρτάζου & ordinem „ Ecclesiae externum tantummodo componendum feruntur . *Et rursum* ( *e* ) : In legibus Ecclesiasticis , quae jus „ naturale aut divinum non exsequuntur , summum illud „ imperium locum non habet . Quo sensu accipienda sunt „ quae adduxi testimonia e Gregorio Nazianzeno , Hieronymo , Chrysostomo , & Bernardo , ad loci Evangelici explicationem . Itaque non abnuat Illustrissimus Auctor , quin in legibus , quae jus naturale aut divinum exsequuntur , exerceat Ecclesia summum imperium , & verum ac merum dominatum . Quod & nemo Catholicorum unquam in controversiam adducet , sed ii tantum inficiabuntur , qui cum Richerio , Quesnelio , eorumque Symmystis , claves regni caelorum primo & immediate universae Ecclesiae traditas fuisse contendunt : Ecclesiae autem nomine omnium Christianorum coetum intelligunt , qui unius fidei & communionis vinculo colligentur : quo pacto Ecclesiae vox ipsos quoque Laicos & foeminas comprehendit ; quorum adeo consensus , ex herumque Pseudo-Theologorum sententia , necessarius est , ut quidquam inter

---

( *a* ) In Apolog.  
 ( *b* ) In Epitaph. Nepot.  
 ( *c* ) Hom. III. in Acta Apost.

( *d* ) Lib. II. de Concordia capite XVI. num. VI.  
 ( *e* ) Ibid. num. VII.

inter fidei dogmata recipiatur: quo certe verus dominatus, & summum imperium, etiam in iis legibus sancientis, quae divinum jus exsequuntur, cujuscumque imprimis sunt eae, quae ad fidem pertinent, ipsis quoque summis Sacerdotibus penitus abrogatur.

Nobis ergo, quibus omnis in praesentia cum solo Petro de Marca disputatio est, & qui disputationem nostram ad eas leges coercemus, quae in divini juris, ubi dubium aut controversum fuerit, interpretatione & executione versantur; id tantum inquirendum superest, an cum illis Christi verbis conciliari possit nostra doctrina, quae hoc summum imperium, ab aliorum auctoritate minime pendens, penes Romanum Pontificem esse decernit: An vero in solo generali Concilio, vel in omnium, aut majoris partis Episcoporum, Capiti suo adhaerentium, consensione, summa illa auctoritas ob ea Christi verba constituenda sit.

Nobis omnino videtur, quod si locus ille sedulo consideretur, sententiae nostrae nihil obest, verum & plurimum prodest. Protulit enim ea verba Christus, quum Apostoli prava inter se de principatu aemulatione contendeant, nec alium principatum cogitabant, quam humana gloria & splendore fulgentem, quo, qui ceteris imperant, honori & admirationi sunt, ac veluti terrena numina habentur, ut ipsi vicissim subjectos sibi populos dominatione premunt, neque eo se efferunt ac felices existimant, quod pluribus provident ac prodesse possunt, sed quod pluribus dominantur. Ab hujus itaque principatus cogitatione & spe ut suorum Apostolorum mentes Christus revocaret, alius principatus ideam eorum animis informavit; quo nimirum, ut ait S. Augustinus (\*) *qui imperant,*  
*ser-*

---

(\*) Lib. XIX de Civit. Dei cap. XIV.

*serviunt eis, quibus videntur imperare: nec enim domi-  
nandi cupiditate imperant, sed officio consulendi; nec  
principandi superbia, sed providendi misericordia. Non  
ergo hinc confici potest, quod imperandi auctoritatem  
suis Apostolis Christus ademerit; quemadmodum nec ab  
eis docendi auctoritatem abstulit iis verbis (a): Vos au-  
tem nolite vocari Rabbi . . . nec vocemini magistri. His;  
inquam, verbis ab eis docendi & judicandi auctoritatem  
non abstulit, quos mundi Judices atque Doctores insti-  
tuit: sed fastum atque jactantiam ubique damnat, quae  
vitia docendi atque regendi alios potestati & auctoritati  
facile inhaerent.*

Ceterum in eo quem versamus loco, neque negat  
Christus, esse aliquem inter Apostolos ceteris praelatum,  
aut praeferendum, & hunc esse Petrum, palam diserteque  
significat. Quum enim Discipuli ambitiosius de principa-  
tu contenderent; non ait Christus, nullum eorum in regno  
suo principem fore, sed futuros omnes aequali praeditos  
potestate & auctoritate. Verum qua potissimum virtute  
excellere deberet, qui major inter illos futurus erat, exem-  
plo suo demonstrat: *Qui major est in vobis, fiat sicut mi-  
nor: & qui praecessor est, sicut ministrator. Nam quis  
major est, qui recumbit, an qui ministrat? Nonne qui re-  
cumbit? Ego autem in medio vestrum sum sicut qui mini-  
strat.* Quibus verbis, aliquem inter suos majorem ac prin-  
cipem fore, non modo non inficiatur, verum & aperte in-  
dicat, & sacri Principatus ideam exemplo suo informat.  
Hanc autem Petro dignitatem esse repositam, statim osten-  
dit, quum repente ad eum sermone converso, his eum ver-  
bis adloquutus est: *Simon, Simon, ecce Satanas expetivit*

vos

---

(a) Matth. XXIII. v. 8. & 10.



vos, ut cribraret sicut triticum: Ego autem rogavi pro te, ut non deficeret fides tua: & tu aliquando conversus confirma fratres tuos. Ad quae Christi verba, haec Leo Magnus observat (a): Commune erat omnibus Apostolis periculum de tentatione formidinis, & divinae protectionis auxilio pariter indigebant: quoniam diabolus omnes exagitare, omnes cupiebat elidere; & tamen specialis a Domino Petri cura suscipitur, & pro fide Petri proprie supplicatur, tanquam aliorum status certior sit futurus, SI MENS PRINCIPIS victa non fuerit. In Petro ergo omnium fortitudo munitur, & divinae gratiae ita ordinatur auxilium, ut firmitas, quae per Christum Petro tribuitur, per Petrum Apostolis conferatur. Concinit Sancto Leoni vetus Auctor Quaestionum veteris & novi Testamenti, qui sub Sancti Augustini nomine delitescit: Pro Petro, inquit, rogabat, & pro Jacobo & Johanne non rogabat, ut ceteros taceam? Manifestum est in Petro omnes contineri.... semper enim IN PRAEPOSITO populus aut corripitur, aut laudatur. Concinit & Theophylactus ad Caput XXII. Lucae: Manifestus verborum sensus est: quod quum TE DISCIPULORUM PRINCIPEM FECERIM, tu quum post negationem fleveris, & respueris, confirma reliquos. Hoc enim te decet, qui post me ECCLESIAE PETRA ET FUNDAMENTUM ES. Concinunt denique ii omnes Patres Romanique Pontifices, qui ex his Christi verbis, non modo ipsius Petri, verum & Successorum ejus Sedisque Apostolicae in universam Ecclesiam principatum demonstrant: quorum plurima testimonia in Opere adversum Meldensem Episcopum a nobis congesta sunt.

To. I. Par. II.

Fff

Qui-

(a) Serm. III. de Anniv. die Adsumt. suae ad Pontif. & Serm. II. de Nat. App. Pet. & Paul.

Quibus si adjicias, quod in illo pariter Opere ex iisdem Patribus, prolatis eorum verbis ostendimus; nempe ob hunc ipsum Christi locum persuasum illis fuisse, quod in Petro & Successoribus ejus, quum ex Petri Cathedra oracula fundunt, nullum possit fides sentire defectum; plane ex hoc ipso Christi loco juxta veterum Patrum expositionem habebis, Christum absolutum, & verum ac merum principatum & imperium Petro ejusque Successoribus Romanis Pontificibus, in iis quae ad fidem pertinent, contulisse. Nam auctoritas, quae ex Christi promissione deficere non potest, ullius retractationi obnoxia non est, nec ab aliorum consensione & auctoritate pendet: adeoque in Regno veritatis summum, & verum merumque obtinet principatum.

## C A P U T V I.

*De Episcoporum libertate in Synodis Oecumenicis. Ad retractandas veluti dubias & incertas Sedis Apostolicae definitiones non fuit unquam libertas Episcopis jure debita; sed id aliquando infirmis aut refractariis ex indulgentia permissum est.*

**Q**Uamquam ex dictis satis aperte constare arbitror, non hanc fuisse penes Episcopos in Synodis Oecumenicis libertatem, ut Sedis Apostolicae dogmaticas Constitutiones retractarent, aut in eas inquirerent, aut de illis vel etiam contra illas libere disputarent: attamen ut de hac re, quae sane ad praesentem controversiam illustrandam maximi momenti est, nulla omnino dubitan-

di

di ratio superfit, libet adhuc aliquantulum in eodem argumento versari. Id prorsus exigit susceptae a nobis disputationis ratio, qua de conciliandis invicem Romani Pontificis auctoritate & Episcoporum in Synodis generalibus libertate differimus. Postquam enim ostendimus, quam sibi in Synodos Oecumenicas auctoritatem Romani Pontifices adseruerunt: quam in eisdem Synodis libertatem Episcopi exercuerint, demonstrandum est. De iis autem Synodis loquimur, quibus eorundem Romanorum Pontificum certa definitio praeluxit, qua & Catholica doctrina sanciebatur, & haeretica impietas proscribebatur. Id ergo imprimis generatim statuimus, non eam sibi libertatem Episcopos tanquam jure sibi debitam adseruisse, ut Romanorum Pontificum solennes Constitutiones, vel ad fidem, vel ad communem Ecclesiae disciplinam pertinentes, veluti dubias & incertas examini subicerent, & in controversiam vocarent; sed solis haeticis & refractariis ex indulgentia datum atque permissum, ut suas in medium difficultates adferrent, quo earum solutione ipsorum pervicacia expugnaretur.

Id primum luculentissime demonstratur ex iis quae Chalcedone circa epistolam S. Leonis in variis Actionibus gesta sunt. Actione II. petentibus Judicibus, ut fides ab Episcopis exponeretur; *Reverendissimi Episcopi clamaverunt*: non esse opus altera Expositione, hoc est formula fidei, quum Leo fidem adversus Eutychem exposuisset; ipsi vero omnes ejus Epistolae tanquam fidei formulae subscripsissent: *Ista omnes dicimus: sufficiant quae exposita sunt: alteram expositionem non licet fieri*. Quum iis vero Judices minime adquiescerent: Florentius Episcopus Sardium inducias petiit; Cecropius autem Episcopus Se-

bastopolitanus, ut Nicaenum Symbolum, & S. Leonis epistola recitarentur, ab iisdem Judicibus postulavit. Uterque tamen una cum sibi adhaerentibus Episcopis, qui se *omnes* esse clamabant; ac proinde paucos adhuc dubitantes nullo loco & numero habebant; uterque, inquam, rursus aperta voce professus est, fidem a S. Leone, perinde atque a praecedentibus Synodis, recte fuisse expositam, nec esse in ea quod correctione indigeret. Statimque lecto Nicaeno Symbolo, antequam Leonis epistola legeretur, iisdem Episcopis clamaverunt: *Papa Leo sic credit . . . Papa Leo ita interpretatus est*. Et rursus, lectis Cyrilli epistolis, in has voces Episcopi eruperunt: *Papa Leo sic credit . . . Haec fides Leonis . . . Leo Archiepiscopus sic sapit, ita credit, ita scripsit*. Quibus vocibus, quae similiter lectionem Leonis epistolae praecesserunt, apertissime Patres testati sunt, se se firmiter credere, quod Leonis epistola praecedentium Synodorum Symbolis ac fidei regulis omnino consona esset; adeoque non ex eorum dubitatione procedere, quod collatio epistolae cum aliis fidei formulis in Synodo instituebatur. Post Epistolae lectionem iterum ab iisdem Patribus acclamatum est: *Haec Patrum fides: haec Apostolorum fides. Omnes ita credimus: Orthodoxi ita credunt. Anathema ei, qui ita non credit. Petrus per Leonem ita loquutus est &c.* Ex quibus omnibus comperit & exploratum habemus, Catholicos Episcopos, quorum consensus Synodum absolute constituebat, non hanc sibi libertatem vindicasse, ut de Leonis epistola disceptarent, vel eam in controversiam adducerent.

Datum id est & ex indulgentia Synodi permissum (petentibus Judicibus & Senatu) Illyricianis & Palaestinis Episcopis, quorum adhuc animi in Dioscorum & Juvenalem,

lem, aliaque Latrocinialis Synodi Capita propendebant \*, quo ipsis omnes penitus scrupuli evellerentur. Quod praeter jam dicta, adhuc sequentia magis confirmant. Quamquam ad tria Leonis Epistolae loca, quum legeretur, haerentibus praedictis Illyricianis & Palaestinis Episcopis, consona his locis S. Cyrilli testimonia ab Aëtio Archidiacono & Theodoro prolata fuissent: attamen lectione completa, auditisque Patrum acclamationibus, quum Judices Episcopos interrogassent: *Post haec omnia. adhuc quis dubitat?* Ceterisque respondentibus: *Nemo dubitat;* Atticus Nicopolitanus cum aliis antea memoratis Illyricianis & Palaestinis Episcopis, rursus aliquot dierum inducias petierunt, ut rem accuratius examinarent. Quas cum illis Judices indulgissent, *ut qui dubitant,* inquebant, *doceantur;* quam id aegre tulerint Patres, statim exorti clamores demonstrarunt: *Omnes enim Reverendissimi Episcopi clamaverunt: Nos ita credimus: Omnes ita credimus: Sicut Leo ita credimus: Nostrum nullus dubitat: Nos jam subscripsimus.* Aegre itaque ferebant, quod quum jam fere omnes Epistolae subscripsissent: quum tota fere Synodus declarasset, eam esse Apostolorum fidem, & Petrum per Leonem esse loquutum: quum jam fere ab omnibus in eos, qui secus crederent, anathema intorqueretur; aegre, inquam, ferebant, adhuc aliquos dubitare, & inducias petere, eisque concedi ad consulendum atque deliberandum, num S. Leonis epistolae cum reliquis fere totius orbis Episcopis consentirent. At Judicibus in proposito permanentibus; ut nimirum *interlocutio quae praecesserat,* qua quinque dierum induciae permittebantur,

tra-

\* Hi sunt enim, qui paullo post *Patres Synodo reddite.... Dioscorum clamaverunt: Tre Patribus petimus: Synodo, Dioscorum Ecclesis.*

*traderetur effectui*; his tandem & Episcopi adquieverunt. In qua rerum gestarum serie & accurata narratione nemo non videt, ex mera Synodi indulgentia, petentibus Judicibus & Senatu permissum fuisse Illyricianis & Palaestinis Episcopis, ut sua adversus Leonis epistolam dubia depromerent, ac de illa aliquamdiu deliberarent.

Eadem indulgentia jurisque relaxatione usâ Synodus est Actione quarta erga Episcopos Aegyptios, qui subscribere S. Leonis epistolae abnuebant, donec Alexandrinus Episcopus in locum Dioscori renuntiaretur. Hos scilicet primum universa Synodus jure agens velut haereticos insectabatur, certaeque damnationi subjiciendos esse judicabat, nisi S. Leonis epistolae incunctanter subscriberent, & anathema in Dioscorum intorquerent: *Petimus, ut non eis (quod volunt) concedatur: Sed aut consentiant Epistolae, aut regularem damnationem suscipiant, & cognoscant, quia excommunicati sunt.* Et rursus: *Suscipiant epistolam Sanctissimi Archiepiscopi Leonis; si autem nolunt, excommunicati sunt.* Quae per Acacium Ariarathiae, & Photium Tyri Episcopos pronuntiata, statim ceteri omnes Episcopi confirmabant: *Omnes Reverendissimi Episcopi clamaverunt: Haec omnes dicimus, omnes sic sapimus.* Et rursus infra: *Omnes Reverendissimi Episcopi clamaverunt: Isti haeretici sunt... subscribant damnationi Dioscori.* Aegre namque ferebant Patres, quod decem Aegyptii ab unius hominis in Alexandrinum Episcopum eligendi judicio penderent, ipsumque praestolarentur, atque interim tantae Synodi judicio sese subicere recusarent. Verum & his, Judicibus & Senatu sequestribus, Paschasinus Sedis Apostolicae Legatus consensit, ut quas petebant induciae concederentur. Quod

ex mera indulgentia factum esse, haec Legati ad ipsos Judices verba demonstrant : *Si praeceperit gloria vestra, & jubetis, illis praestari aliquid humanitatis, fidejussoribus datis, non exeant de ista Civitate, quamdiu Alexandria Episcopum accipiat.* Quo exemplo patet, non omnia, quae in Synodis Oecumenicis acta sunt, ad juris apices exacta fuisse, nec ex eo quod aliquid permissum est fieri, consequens esse, id jure fieri debuisse, aut non aliter, servato juris ordine, fieri potuisse.

Idem dicimus, & omnino dicendum esse judicamus de examine, quod in sexta Synodo de Agathonis & Synodi Occidentalis epistolis institutum est. Quid enim jure ab Orientalibus Agatho exigere potuisset, tum exemplo suo demonstraverat Leo; tum in suis litteris ipse Agatho minime dissimulaverat, quibus & fidem Apostolicae Sedis auctoritate sancitam retractari vetuerat, & aperte denuntiaret, non aliter iniri posse concordiam, quam si in eam fidem Orientales Episcopi consentirent. Haec quidem juris erant. Verum quum ab annis ferme quinquaginta ab Apostolica Sede & Occidentis Ecclesiis ob Monotheliticam haeresim omnes fere Orientis Ecclesiae disjunctae essent : quumque Georgius Constantinopolitanus & Macarius Antiochenus Patriarchae ipsi quoque Imperatori fere persuassissent, eam controversiam, quae utriusque tractus Ecclesias invicem disjungebat, in vocibus verbisque positam esse; ut ex ejus divali ad Donum Pontificem compertum est : quum denique idem ipse Imperator Synodo praesens ordini judiciorum suis interlocutionibus immineret; omnino prudentiae fuit ex juris rigore aliquid relaxare. Quum ergo Actione IV. lectae fuissent Agathonis & Synodi Occidentalis epistolae, quae totius Ecclesiae

Catholicae certam, & indubiam & immutabilem fidem perspicue repraesentabant; Sedis Apostolicae Legati jure exigere potuissent, ut eae citra examen ab Orientalibus Episcopis reciperentur. At quum Aetione VII. petentibus ab Imperatore iisdem Legatis, ut a Georgio Constantinopolitano & Macario Antiocheno, eisque subiectis Episcopis quaereretur, num Agathonis & Occidentalium epistolis consentirent: iisque aliquot dierum inducias petentibus; ad conferenda Patrum testimonia de duabus in Christo voluntatibus, quae Legati protulerant, cum Codicibus, qui in Patriarchio servabantur; Imperator his verbis annuisset: *Citra dilationem quod postulatum est, fiat*: an Imperatoris voluntati, qui restituendae pacis ardore flagrabat, prudenter Legati refragati fuissent, contendissentque, pervicacium hominum & rebellium contumaciam unius Sedis Apostolicae, Romanorumque Pontificum, quorum ex suis diptychis nomina expunxerant, auctoritate frangere? Itaque qua indulgentia usi sunt Patres in Synodo Chalcedonenfi cum Illyricianis & Palaestinis & Aegyptiis Episcopis, eandem & Sedis Apostolicae Legati erga Orientales Episcopos in sexta Synodo adhibuerunt. Cujus rei illud quoque argumento est, quod etiam postquam Agathonis litteras tanquam per Spiritum Sanctum dictatas omnes jam Patres susceperant, solusque Macarius ejusque discipulus Stephanus Monachus reluctarentur; adhuc tamen examen & collectio processit testimoniorum, quae utrinque pro una vel duabus in Christo voluntatibus prolata fuerant; ut nimirum haeretici homines, qui veteres Patres Synodosque jactabant, eorum saltem expugnantur auctoritate, & ad sanam mentem revocarentur.

Sed nullibi luculentius apparuit, quid jure Sedis Apostoli-



stolicae majestati & auctoritati debeat, quove se aliquando ejus erga errantes indulgentia inclinaverit, nullibi id, inquam, luculentius apparuit, quam in octava Synodo. Quod enim primum, & absque ullo praevio retractatu Metropolitani & Episcopi alique Clerici, Urbis regiae throno seu Patriarchatui subjecti, Libello ab Hadriano II. per Legatos in Orientem transmissio subscribere coacti sunt: & quod Episcopi quidam ex parte Photii nonnisi poenitentes, & Libelli subscriptione satisfacientes Actione secunda admissi sunt; haec Sedis Apostolicae jus auctoritatemque demonstrant. Quod autem post sollemniter adprobatam Actione tertia totiusque Synodi consensione susceptam Hadriani ad Ignatium epistolam, qua tota illa inter ipsum & Photium causa auctoritate Apostolica sanciebatur; Actione quarta & sequentibus Photius ipse ejusque Symmytae velut ad disceptandam suam causam admissi sunt; id agentibus quidem Judicibus, at repugnantibus Legatis, atque identidem monentibus, retractanda non esse Romanorum Pontificum de Photio & Photianis judicia. Ita enim Actione quarta quum Judices instarent, ut Photiani, in Synodum ingredi permetteretur: *Ingrediantur*, responsum est a Legatis, *sed nos non propter contentionem advocamus eos: sed ut tantum beatissimi Papae Nicolai epistolam audiant*. Et Actione quinta: *Non nos convocamus eum (Photium) ut discamus aliquid ab eo; sed ut laborem, quem habuit Sancta Romana Ecclesia, simul & Orientales Ecclesiae propter eum, nunc terminemus eodem ipso praesente*. Et rursus in eadem Actione: *Nos nihil aliud facimus: neque subvertimus, neque rejudicamus judicium Sanctae Romanae Ecclesiae.... Si voluerint audire nos.... per libelli satisfactio-*

*etionem recipimus eos . . . . Si vero noluerint , anathematizamus , & maledicimus eis &c. Et Actione sexta , sese Constantinopolim directos fuisse docent ob promulgandum iudicium Romae in Photianos latum : ita ut , inquirunt , non habeant ( Schismatici ) vocem repedationis vel appellationis ; sed quemadmodum jam iudicati sunt & dejecti , in saeculum maneat . Et Actione septima : Nos nihil aliud interrogamus eos , nisi si voluerint facere libelli fusi factionem : propter hoc enim interrogavimus eos : Nihil aliud petimus nos ex illis . Interim tamen , Iudicibus annuentibus , sinebantur homines temerarii dicere quidquid eis libitum erat ; non eo profecto , quod de Romani iudicii rectitudine Iudices dubitarent ; sed ut eorum , qui dubitabant , animorum acgritudines sanarentur , eadem illis revocandis adhibita tolerantia , qua olim Christus Thomae infidelitatem curaverat : His enim verbis Actione quarta Iudices Legatos adloquebantur : Nos enim , & antequam veniret Sanctitas vestra . . . eandem opinionem habuimus , tam de iudicio beatissimi Papae Nicolai &c. Rogamus ergo , ut hi qui languent , sanentur , & corrigamus qui non habent certitudinem veritatis , & erigamus qui deorsum jacent . Nisi enim ita haec omnia discutiantur , conscientiae hominum non curabuntur . Et rursus infra in eadem Actione : Non est malum litigare verbis utiliter . Duodecim Discipulos habuit Dominus noster Iesus Christus : Thomas vero , qui dubitavit , & incredulus , & infidelis , damnatur ? Non . Ad multorum enim certitudinem facta est incredulitas ejus : Veniant & isti , si forte magis per infidelitatem impiorum , & verborum impugnationem , lucrum multum per duos multis efficiatur . Quod ergo in Synodis Oecumenicis permissum*  
*hac-*

haereticis est & Refractorius adversus Sedis Apostolicae Romanorumque Pontificum solennes Constitutiones, sancitaeque ipsorum auctoritate dogmata disputare, juris relaxatio fuit: adeoque inde nequaquam efficitur, eandem jure sibi adferere posse Catholicos Episcopos libertatem.

## CAPUT VII.

*In quo sita fuerit Episcoporum & Episcopali-  
um suffragiorum libertas in Synodis Oecumeni-  
cis: quam, ut ait Petrus de Marca,  
Caelestinus & Leo tantopere  
commendarunt.*

**Q**Uaenam adferri producique possint ex S. Caelestino loca, in quibus Episcopali-um suffragiorum libertas magnopere commendetur, prorsus ignoramus. Nec enim unquam haec Caelestino mens fuit, habitum a se jampridem de Nestorio judicium, latamque in impium sententiam, velut adhuc nutantia nec satis firma Synodi examini ac retractationi subicere; perinde atque in Patrum potestate futurum esset, Nestorium nisi poenitentem in Episcopatu & Ecclesiae Catholicae communione firmare. Hanc nunquam fuisse Caelestini mentem, non meris conjecturis, sed certissimis argumentis discretissimisque ipsius Sancti Pontificis testimoniis ostendimus. Idem ejus ad S. Cyrillum, ad Nestorium, ad Clerum & populum Constantinopolitanum, & ad Johannem Antiochenum epistolae (a); id ab eo traditum Legatis ad

G g 2      Sy-

---

(a) 1. Par. Concil. Ephes. cap. XV. & XVIII. & seqq.

Synodum proficiscentibus Commonitorium (a); id denique datae ad Concilium Ephesinum, & rursus ad Cyrillum, & ad Theodosium Imperatorem litterae (b), aperte luculenterque testantur: Quibus nimirum Nestorium, nisi intra decem dies haeticam doctrinam revocet; ab Ecclesiae Catholicae communione repellit; quibus gravissime vetat, ne se Apostolicae Sedis Legati turbulentorum hominum disputationibus immisceant; eosque una cum Cyrillo & Synodo sententiae in Nestorium latae non iudices, sed executores esse definit: Quibus eundem Nestorium nisi poenitentem recipi finit; atque Imperatorem *sub divini obsecrat obtestatione iudicii, ne quid turbidae novitati (in ipsa Synodo) licere permittat, neve facultas aliqua his, qui divinae majestatis potentiam in humanae disputationis rationem arctare contendunt, quo perturbetur pax Ecclesiastica, tribuatur.* Monetque Patres, quod excitatis per Nestorianam impietatem disputationibus *vocatur in iudicium, qui judicaturus est mundum; discutitur, qui discussurus est omnes; & calumniam patitur, qui redemit.* An S. Caelestinus liberas esse vellet insanas hujusmodi & impias disputationes?

Hanc ergo de rebus a se jam pridem definitis differenti licentiam Caelestinus minime commendavit, neque in hoc positam esse voluit Episcoporum in Ephesina Synodo libertatem. In quo ergo, inquires, illam Sanctus Pontifex reponebat? Non in eo profecto, ut sibi praedicanti veritatem obluſtarentur, sed ut sibi cohaerentes & indivulſe conjuncti, in ea vindicanda & adferenda, nullis terroribus cederent, ac de erroribus & saeculi potestatibus triumpharent.

---

(a) Post Syn. Rom. ann. 431. Tom. III. Concilior,

(b) Actione II. Co nc. Ephes.

rent . Haec ex ejus ad Patres Ephesinos epistola aperte liquet : in qua eos quidem admonet muneris & potestatis , quam in Apostolis a Christo per Spiritum Sanctum acceperant ad docendam & tuendam semel traditam fidem , non autem eos liberos praedicat ad eam futilibus disputationibus exagitantam : hortaturque illos ad eamdem cum Sede Apostolica fidem libere praedicandam & propugnandam , non autem vexandam & retractandam : *Agendum igitur est labore communi , ut credita , & per Apostolicam Successionem hucusque detenta servemus . . . . non enim nunc species , sed fides nostra vocatur ad causam . Spiritualia arma sumenda sunt , quia bella sunt mentium , & tela verborum ... Ne quis aliter sentiat , & quaestiones praestantibus maxime fabulis ne quis intendat .* Et rursus infra : *Annuncientur vobis quae ab Apostolis intemerata regnarunt : quia nunquam contra Regem regum verba tyrannicae dominationis admissa sunt , nec opprimi per falsitatem potuit negotium veritatis .* Adlatoque Apostolorum exemplo , qui in Actis enixe Dominum deprecabantur , ut cum fiducia verbum Dei loquerentur , eaque agerent , quorum a Christo acceperant potestatem ; statim adjicit : *Et vestro nunc sancto conventui quid est aliud postulandum , quam ut cum fiducia loquamini verbum Domini &c.* En in quo ille reponit Episcoporum in Synodis libertatem ! Non ad disputandum contra Romanum Pontificem , & retractandum velut incerta , quae ab Apostolica Sede sancita sunt ; sed ad ea cum fiducia & libere praedicanda , & ad resistendum illis , qui tyrannica dominatione volunt opprimere veritatem . Haec nimirum libertas Episcopos decet , quum a Romano Pontifice ad tuendam veritatem armantur & excitantur : quo videlicet capiti

mem-

membra concordent, ejusque alacriter sequantur motum & impressionem. Recte id quidem, ais; sed postquam libero examine & inquisitione perspexerint, ea quae Romanus Pontifex praedicanda & propugnanda proponit, Evangelicae veritati consona esse & avitae Patrum traditioni. At tu id dicis, Non Caelestinus. Nos autem hâc quaerimus quam Caelestinus Episcoporum in Synodis Oecumenicis libertatem commendet. Nec aliam in ejus litteris invenimus praeter eam, qua praediti esse debent Episcopi ad vindicandam, una cum Romano Pontifice, adversus quamcumque tyrannicam dominationem Catholicam veritatem, & constanti excelsoque animo ea, quae per Romanum Pontificem decreta sunt, exsequendum.

Quae quum certa sint & extra omnem posita controversiam, inde profecto consequens est, haud aliam, ex Caelestini mente, post Romanae Sedis solenne judicium vindicari posse Episcopis in Synodis Oecumenicis libertatem, quam quae Senatoribus adscriberetur, si Rex sua Regnique jura adversus perduellem, & Patriae hostem & proditorem, jam Regia auctoritate legeque vindicata, Senatus quoque decreto firmari vellet. Ut enim hinc aliqua esset hujusce decreti vis & auctoritas, hinc autem Regiae Majestatis summa in legibus ferendis potestas in tuto esset; permitti quidem Patribus deberet, ut perspectam prius haberent & exploratam conditae lataeque a Principe legis aequitatem, & rationes ac momenta librarent quibus ea niteretur; alioquin revocandis ad Regis obsequium perduellibus nulla esset in decreto Senatus vis & auctoritas; attamen Regia majestas & summa potestas violarentur, si libertatem Senatus usurparet, aut sibi inesse putaret ad legem Principis infringendam, aut sui decreti auctoritate  
opus

opus esse contenderet, ut ea toto regno valeret, & ad sui observationem subjectos populos obligaret. Ut ergo Regiae maiestatis jura in tuto sint, necesse est ut lex, quae ex Regiis adytis prodiit, nullius auctoritate possit infringi. Ut autem dignitatis Senatus aliqua ratio habeatur, necesse est ut non more servorum ac pecudum ad obsequium adigatur, sed ut perspecta & explorata veritate Regiarum legum executionem urgeat: quae una, in his maxime casibus, libertas est, quae cum summo Regum jure & Monarchico imperio conjungi possit. Porro si quis ea, quae ad Cyrillum, ad Theodosium, & ad Ephesinam Synodum Caelestinus scripsit, attente ac sedulo, solutoque praesudicii animo scrutatus fuerit, profecto consentiet, haud alia in re positam fuisse, aut reponi debere libertatem, quae in exsequendis adversus Nestorium Apostolicae Sedis decretis Ephesinis Patribus tributa est. Non enim illis, ut saepius diximus, & Baluzius ipse fatetur, fas & potestas fuit ad irritandum Caelestini decreta adversus Nestorii haeresim & personam, vel ad infringendum eorundem decretorum vim: sed solum ad eorum sub auctoritate Sedis Apostolicae urgendam executionem: quod pro Synodi Oecumenicae dignitate caeco modo fieri non debuit; sed perspectis libratisque rationibus, quibus ejusdem Apostolicae Sedis judicium, & sancita per eam dogmata nitebantur. In hoc enim vere Synodi libertas posita erat, ut non modo summae Sedis auctoritate munita, verum & luminibus illustrata, & zelo incensa, omnia posset adversus impios & perduelles pro religione & veritate; non autem in eo, quod aliquid posset contra veritatem, quae Romanorum Pontificum pro sancienda fidei regula sollennibus decretis indivulsa conjuncta est.

Observari tamen velim, quod quamquam Cyrilli & Nestorii epistolae in Synodo lectae sint, & ad Nicaenae fidei regulam & normam exactae, ejusdemque Synodi suffragiis, illae quidem tanquam cum ea regula consonae comprobatae, hae vero ut ab illa dissonae reprobatae; non id tamen circa Caelestini epistolam actum est. Nam ea simpliciter lecta, nihil a Synodo de illa pronunciatum est; ut quae Synodi adprobatione non egeret, neque a Synodo auctoritatem mutuaretur; sed potius rebus a Synodo agendis auctoritatem daret, & normam regulamque praescriberet. Hinc Patres in sententia lata adversum Nestorium coactos se dicunt ad eum exauctorandum, & Ecclesiae communione & Episcopatu pellendum, per sacros Canones & epistolam Caelestini: *Coacti*, inquit, *per sacros Canones, & epistolam sanctissimi Patris nostri & Comministri Caelestini Romanae Ecclesiae Episcopi, lacrymis subinde perfuncti, ad lugubrem hanc contra eum sententiam necessario venimus*. Haec Synodi verba ad commendandam Romani Pontificis auctoritatem magni esse momenti, Petrus de Marca fatetur; verum eorum vim sua interpretatione penitus infringit & labefactat: „Ma-  
 „gni, *inquit* (a), momenti sunt illa verba, quibus se  
 „coactos dicunt, id est, ex officio adstrictos, ut Cano-  
 „nibus, qui contumaciam pledebant, & rebus a Caele-  
 „stino adversus impietatem decretis, morem gererent.  
 „Ea est enim auctoritas epistolae Pontificis, ut parendi  
 „necessitas incumbat, postquam discussione facta, sacris  
 „Scripturis & traditioni Majorum congruere invenitur.  
 „Quo examine defuncta erat Synodus Ephesina, ante-  
 „quam judicium ferret adversus Nestorium. At falsum  
 „omni-

---

(a) Lib. V. de Conc. cap. XI, num II.



omnino est, ut jam diximus, Caelestini epistolam discussam a Synodo fuisse & examinatam, nisi simplex hujus epistolae lectio pro discussione & examine habenda est. Itaque non ad aliam regulam exacta est, sed ipsa statim pro regula habita est, ad quam alia exigenterentur. Statim enim post ejus lectionem Petrus Presbyter Alexandrinus & Notariorum Primicerius adjunxit; sese alias prae manibus habere Cyrilli litteras illis Caelestini consonas, quas petiit similiter recitari: *His quae modo recitata sunt, sanctitas quoque piissimi Episcopi nostri Cyrilli consona scripsit, quae & prae manibus habemus, & si pietas vestra jusserit, recitabimus.* Igitur epistola Caelestini lecta non est, ut a Synodo discuteretur, sed ut regula esset & forma; quae aliis probandis vel improbandis adhiberetur, & Synodi ipsius judiciis praeluceret. Quemadmodum Firmus Caesareae in Cappadocia Episcopus Actione secunda post adventum Legatorum diserte his verbis testatus est: *Apostolica & sancta Sedes Caelestini sanctissimi Episcopi per litteras &c. etiam ante de praesenti negotio SENTENTIAM REGULAMQUE PRAESCRIPTIT: quam nos quoque sequuti ... FORMAM ILLAM executioni mandavimus, canonicum Apostolicumque judicium in illum (Nestorium) proferentes.* Non ergo id sibi juris adrogarunt Ephesini Patres, neque sibi liberum esse duxerunt, ut de Caelestini litteris discussis & examinatis judicium ferrent, sed ut juxta illas Nestorii causam judicarent, seu potius prolatum in illum ab Apostolica Sede judicium executioni mandarent. Quemadmodum ait de legibus temporalibus Sanctus Augustinus (a), quod *quamquam de his homines judicent, quum eas instituunt, tamen quum fuerint institutae at-*

To. I. Par. II.

H h h

que

(a) Lib. de vera Relig. cap. XXXI.

*que firmatae, non licebit iudici de ipsis judicare, sed secundum ipsas.*

Eodem obsequii genere, quo S. Caelestini epistolam Ephesinae Synodi Patres prosequuti sunt, mens fuerat etiam Patribus Chalcedonensibus S. Leonis epistolam ad Flavianum excipere; ut nimirum, quemadmodum superius ostendimus, citra ullum examen ab omnibus tanquam certissima fidei Catholicae regula subscriberetur. Verum ut Laicis Iudicibus morem gererent, seque quorundam infirmitatibus inclinarent, atque Illyricianis & Palaestinis Episcopis scrupuli, quibus ab ea suscipienda remorabantur evellerentur permixtum ab eis est, ut ad vetustiores fidei regulas exigeretur. Haec porro est illa libertas, quam S. Leo scribens Theodorito Episcopo Cyrensi commendat his verbis (a): *Nam ne aliarum Sedium ad eam, quam ceteris omnium Dominus statuit praesidere, consensus assentatio videretur, aut alia quaelibet subrepere posset adversa suspicio, inventi sunt qui de iudiciis nostris ambigerent. Et dum nonnulli dissensionum incitati auctore, ad contradictionis bella prosiliunt, ad majus bonum, malum ejus, auctore totius bonitatis dispensante, perventum est.* Quod ergo aliqui de Sancti Leonis epistola dubitabant, quod eam discuti & examinari volebant, quod circa illam vitiligabant, quod ad aliqua ipsius loca haerebant; ipso Leone iudice, malum erat, & ad excitandas ejusmodi quaestiones atque disputationes ab ipso talium auctore dissensionum incitabantur. Si autem id malum erat & perperam exigebatur; non ergo juris erat, aut jure competens Synodis Oecumenicis libertas; quod Leonis epistola, quibusdam petentibus, retractaba-

tur;

---

(a) Epist. LXIII. Tom. IV. Conciliorum.

tur; sed id potius ex indulgentia, & quadam juris relaxatione permittebatur. Ex hoc tamen malo plura bona totius bonitatis auctor elicit, quae disertissimus Pontifex sequentibus verbis prosequitur; & enarrare pergit: *Dulcius siquidem munera divinae gratiae proveniunt, quoties non sine magnis sudoribus acquiruntur: & minus bonum videri solet pax continuata per otium, quam reddita post laborem. Ipsa quoque veritas & clarius renitescit, & fortius retinetur, dum quae fides prius docuerat, haec postea examinatio confirmaret. Multum denique Sacerdotalis officii meritum splendescit, ubi sic summorum servatur auctoritas, ut in nullo inferiorum putetur imminuta libertas. Et ad majorem Dei gloriam proficit finis examinis, quando ad hoc se accipit exerendi fiducia, ut vincatur adversitas: ne quod per se probatur reprobum, silentii praejudicio videatur oppressum.* En, quo Synodicum examen, juxta Sanctum Pontificem, referendum est; non ut veritas velut adhuc latens & in incerto posita detegatur, sed ut clarius renitescat & fortius retineatur: neque ut quod humana auctoritas errori obnoxia, sed quod fides, adeoque divina & ineluctabilis auctoritas ante docuerat, confirmetur: nec tandem ut adversa doctrina post discussionem reproba evadat, aut talis esse incipiat quae ab omnibus improbetur, sed ne quae jam per se se reproba erat, oppressa silentio videatur. In hoc ergo examine, quod non ad eruendam, sed ad illustrandam veritatem; non ad vexandam, sed ad confirmandam fidem; non ad inquirendam, sed ad demonstrandam & profligandam haeretici dogmatis improbitatem instituitur, libertas illa versatur, quam in Synodis Oecumenicis post Caelestinum Leo in hoc loco commendat, &

quae sola cum summa sedis Apostolicae auctoritate conciliari potest.

## CAPUT VIII.

*Quotiescumque Patres in Synodis Oecumenicis in unam mentem atque sententiam conspirarunt, (quod praesentiae Spiritus Sancti certissimum indicium est) Dei ipsius inspirationem & auctoritatem in Romano Pontifice venerati sunt. Quare perinde est, Synodos Oecumenicas quidquam, Romano Pontifice, atque Spiritu Sancto, auctore, decernere ac definire.*

**S**ed quis tandem exitus hujus examinis quod tantopere Galli Theologi jactant urgentque adversus summam atque divinam Romani Pontificis auctoritatem? Is nempe ut omnes hoc ipsum agnoscerent ac publice profiterentur, quod Galli Theologi obstinate negant, scilicet divinum esse, & ex Numine proficisci, & Spiritu Sancto auctore proferri Romani Pontificis ex Cathedra definientis judicium. Donec res in quaestione posita esset, & in diversas partes Episcoporum studia scinderentur, id jam omnibus bonis, & modestis, & Catholicis Episcopis persuasum erat; ab iis tantum dissentientibus aut professis haereticis, aut qui adhuc inter Catholicam doctrinam & haereticam fluctuabant, aut qui, si minus haereticis pravisque dogmatibus, saltem personis haeretica labe notatis suffragabantur. Verbo dicam: ii tantum sub initium cujuscunque Synodi Romani Pontificis judicio restiterunt, quos postea sub finem Synodi omnibus patuit, atque omnes pro-

professi sunt, Spiritus Sancti judicio restitisse. Sic Caelestini judicio soli Orientales refragati sunt, qui Nestorii, sin minus dogmatibus, saltem personae impensius favebant. Sic de Leonis epistola suscipienda diu deliberarunt Illyriciani, Palaestini, & Aegyptii, qui Dioscorum & Juvenalem gravius a Leone notatos, impensius coluisse videntur. Sic adlata ab Agathone pro duabus in Christo voluntatibus Patrum testimonia ad Graecos Codices exigi voluerunt Georgius Constantinopolitanus, & Macarius Antiochenus, quorum alter pene Imperatori persuaserat ob meram *λογομαχίαν* seu de vocibus conflictationem Ecclesias fuisse disjunctas, alter vero in haeresi tuenda pertinacissime stetit. Sic in octava Synodo soli Photiani, seu qui Photii partes pertinaciter tuebantur, de Nicolai Primi & Hadriani Secundi contra Photium judiciis conquesti sunt, ac de illis per plures Actiones disserere & altercari permitti sunt. Contra vero Cyrillus Alexandrinus vel ante Synodum Ephesinam palam Orientalibus denunciabat, omnino esse parendum Caelestini de Nestorii haeresi & persona judicio. Et in Synodo Chalcedonensi, vel antequam Leonis epistola legeretur, Patres anathemati subjicebant eos, qui de Incarnationis mysterio secus ac Leo ipse sentirent. Et in litteris ad Constantinum Pogonatum Imperatorem, antequam sexta Synodus haberetur, Occidentales aperte significabant, pacem iniri non posse, nisi Orientales in eandem fidem cum Sede Apostolica conspirarent. In septima autem Synodo ad Romani Pontificis nutum & voluntatem omnia composita sunt: sub ipsum Synodi initium Iconomachi non nisi tanquam haeretici & poenitentes recepti: suscepta omnium votis Hadriani epistola tanquam regula fidei, antequam Patrum

loca de Imaginibus colendis expendere, & Haereticorum sophismata confutarentur. Denique in octava Synodo, ipso statim initio, ab omnibus, qui ad unitatem Catholicam adspirabant, subscriptum est Nicolai Primi & Hadriani Secundi decretis & libello seu professioni fidei, qua Sedis Apostolicae doctrinam, ex vi promissorum Christi, quae deficere non possunt, puram & immaculatam, & integram permanisse, sancte ac sollemniter profitebantur. Ex quibus liquido constat, quod si qua in Synodis Oecumenicis de Romanorum Pontificum epistolis quaestio aliquando mota est, ab iis ejusmodi disputationes excitatas fuisse, quos haeretica pestis adflaverat, aut qui nondum satis ad Catholicam sanitatem accesserant.

At rursus quaero: Quis tandem harumce disputationum exitus fuit? Is nempe, ut omnes tandem divinam Romanorum Pontificum in sanciendo fidei dogmatibus auctoritatem agnoscerent. Ita universa Synodus Ephesina his Philippi legati verbis consensit: *Petrus Apostolorum princeps & caput, fideique columna.... semper in suis successoribus vivit, & judicium exercet.* Et post reditum Orientalium ad Catholicam communionem, haec Johanni Antiocheno in eandem sententiam Xystus III. Romanus Pontifex scripsit (a): *Expertus es negotii praesentis eventum, quid sit sentire nobiscum. Beatus Petrus Apostolus in successoribus suis quod accepit hoc tradidit. Quis ab ejus se velit separare doctrina, quem ipse inter Apostolos primum Magister edocuit?* Ita in Synodo Chalcedonensi non modo statim atque Leonis epistola lecta est, communis vox Patrum fuit, Petrum per Leonem esse loquutum; verum & in Relatione ad ipsum Leonem omnes

tan-

---

(a) III. Part. Concil. Ephes. cap. XLII.

tandem professi sunt, sese ipsum Christum velut eos in Leonis litteris adloquentem prae oculis habuisse (a): *Et eram in communi corona gaudii quasi in imperialibus coenis deliciis spiritualibus epulantes, quas per tuas litteras Christus praeparaverat invitatis, & supercoelestem Sponsum inter nos conversantem nos cernere putabamus.* Ita Actione VIII. sextae Synodi Demetrius Episcopus Prusianos sese suscipere & amplecti Agathonis epistolae professus est, *tanquam a Spiritu Sancto dictatas per os sancti & beatissimi principis Apostolorum Petri, & digito praedicti ter beatissimi Papae Agathonis scriptas.* Quae fuit etiam ceterorum Patrum sententia; ut ex sermone Prophonetico compertum est, in quo universa Synodus profitetur, quod confessionem a Deo scriptam illa Romana antiqua Civitas obtulit, & dogmatum diem a vespertinis partibus extulit: Charta & atramentum videbatur, & per Agathonem Petrus loquebatur. Quibus consona sunt quae Imperator ad Leonem II. de iisdem Agathonis litteris ex totius Synodi mente his verbis scripsit: *Ac veluti ipsum principem Apostolici Chori, primaeque Cathedrae Antistitem Petrum contuiti sumus mentium nostrarum oculis, totius dispensationis mysterium divinitus eloquentem, verbaque haec per eas litteras Christo facientem: Tu es Christus Filius Dei vivi. Nam ipsum totum Christum nobis sacrae ejus litterae differendo exprimebant: quas omnes libentibus animis sincereque accepimus, & veluti Petrum ipsum ulnis animi suscepimus.* Ita ex septima Synodo Tarasius ad Hadrianum scribebat, Christum per ejus litteras omnium Patrum coronam veluti spiritualibus quibusdam eduliis recreasse:

quas

---

(a) III. Part. Concil. Chalcedon. cap. II.

quas proinde litteras venit a Christo dictatas, & manu Pontificis exaratas, non secus atque illas Agathonis sexta Synodus, venerati essent: *Et quum praelatae primitus sanctitatis vestrae litterae legerentur, praestolabantur omnes, spiritualibus eduliis tanquam in regalibus coenis fruantes, quae Christum per litteras tuas epulantibus prae- parabat.* Quae adfinia sunt iis, quae paullo ante ex Chalcedonensi Concilio descripta sunt. Denique octava Synodus Canone secundo, Nicolaum I. & Hadrianum II. in suis adversus Photium pro Sancto Patriarcha Ignatio judiciis velut organa Spiritus Sancti fuisse; adeoque parendum omnino esse illorum decretis veluti a Spiritu Sancto profectis, verbis sequentibus statuit: *Itaque beatissimum Papam Nicolaum tanquam organum Sancti Spiritus habentes, necnon & Sanctissimum Hadrianum Papam successorem ejus, definimus atque sancimus etiam omnia, quae ab eis Synodice per diversa tempora exposita sunt & promulgata....servari semper & custodiri &c.*

Haec ergo tria, priorum Conciliorum acta haud perfunctorie legentibus, perspecta & explorata sunt. Primo; siquae circa recipiendas Summorum Pontificum solennes Constitutiones subortae in iis Oecumenicis Synodis difficultates sunt, ab iis illas fuisse excitatas, aut quorum non erat integra & incorrupta fides, aut qui vel ipsius Ecclesiae Catholicae Synodique universalis judicio refragari minime vererentur. Secundo, Catholicos, pios & modestos Episcopos citra ullum Synodi examen; vel, antequam ad Synodicum examen revocarentur, Romanorum Pontificum decreta in Ephesina, Chalcedonensi, Septima & octava Synodis recepisse, & nonnisi invitos, & ex quadam



dam erga Refractarios indulgentia jurisque relaxatione, & ad ampliorem jam notae & creditae veritatis elucidationem, ea retractari in eisdem Synodis permisisse. Tertio, sublatis & compositis dissensionibus, omnes Episcopos in hanc tandem conspirasse sententiam, quod Christus ipse per epistolas Romanorum Pontificum veritatis pabulo & Caelestibus dapibus Synodos recreaverat: quod Romani Pontifices in suis decretis ex Cathedra pronuntiatis Spiritus Sancti organa fuerant: quod per eos Petrus, Apostolorum princeps & caput, fideique columna, loquutus fuerat, suumque de rebus in controversia positis iudicium pronuntiaverat. Ex his porro in rem nostram plura colligere est.

Primo, quod quicumque ante Synodum Romanorum Pontificum decretis refragati sunt, ii reapse & Christo, & Spiritui Sancto, & Apostolorum Principi, quorum illi organa & interpretes fuerant, restiterunt. Quod sane post tot experimenta; etsi certa Apostolorum Principi facta Christi promissa deessent; post tot, inquam, experimenta verendum iis omnibus esset, qui Sedis Apostolicae Constitutiones (quas olim Synodi Oecumenicae velut oracula caelo delapsa veneratae sunt) nullo in honore & pretio habent, & profanorum hominum, seu Theologiae Mysteriis nequaquam initiatorum ludibriis objiciunt.

Secundo, quod quum vere testatur Spiritus Sancti praesentiam concors & unanimis congregatio Sacerdotum, tum vox una resonat omnium Episcoporum; quod Christus, quod Spiritus Sanctus per os Romanorum Pontificum loquutus est. Adeoque ipsius Spiritus Sancti testimonio constat, quod ipse unus atque idem Spiritus prout vult, modo solum Ecclesiae caput, modo universum cor-

pus veritatis suae luce perfundit: qui propterea non minus audiendus sit quum vocem suam per solum caput, quam quum per universum corpus emittit. Profecto, si testimonia invicem conferantur, quibus probari solet, Conciliis Oecumenicis adesse Spiritum Sanctum, divinarumque eorum decretis adjungere auctoritatem, & quae, vel in hoc solo Capite ex ipsis Conciliis protulimus ad probandum, eundem Spiritum Sanctum perinde adesse Romanis Pontificibus, quum e Petri Cathedra de fidei rebus pronuntiant; nemo non facile intelliget, &, si verum amat, etiam fatebitur, non minus in his esse momenti quam in illis. Quid enim pro Synodis Oecumenicis praeclarius aut magnificentius adferri posset, quam Spiritum Sanctum per eas loqui, & organa esse, per quae ille caelestia oracula fundit? Haec vero constanter de Romanis Pontificibus celebriora Concilia praedicarunt.

Tertio, non modo Spiritus Sanctus perinde Romano Pontifici, ac Synodo generali, vel capiti seorsim atque universo corpori suum lumen & vigorem adspirat; verum etiam prius caput, quam universum corpus illustrat; ut nimirum decenti ordine caelestia dona in universum corpus a capite deriventur, quemadmodum S. Leo identidem animadvertit. Non enim Patres docent, tum primum quum in unam eandemque sententiam cum Romano Pontifice Synodus consentit, Spiritum Sanctum suum proferre de rebus controversis judicium, sed quod jampridem istud protulerat, quum universam Ecclesiam per Caelestini ex. gr. Leonis, & Agathonis epistolas adloqueretur. Id vero permagni sane momenti est. Hinc enim plane consequens est, Romanorum Pontificum decreta; non ex Conciliorum generalium adprobatione & consensu,

fu, sed ex seipſis, vel potius ex Spiritus Sancti inſpiratione, divinam habere, adeoque & ineluctabilem auctoritatem. Nam quemadmodum quum Politicus Magiſtratus declarat, legem aliquam vere ex Principe eſſe proſectam, non ei tum confert auctoritatem, quam totam ex voluntate Principis trahit: ita quum Synodus declarat, Spiritum Sanctum auctorem fuiſſe decreti, quod Romanus Pontifex promulgaverat, non tum primum huic decreto divinam confert auctoritatem, quae tota ex Spiritus Sancti inſpiratione promanat.

Hinc quarto loco colligitur, perinde eſſe, ſive aliqua Synodus generalis dicatur quidquam Romano Pontifice, ſive Spiritu Sancto auctore, decernere. Quum enim Romani Pontificis aliquod ſolenne decretum Synodus generalis amplectitur & promulgat, ſimul declarat illius decreti auctorem fuiſſe Spiritum Sanctum, quum primum e Petri Cathedra pronuntiatum fuit. Quare non recte Illuſtriſſimus Petrus de Marca illud Marciſani Imperatoris & Pulcheriae Auguſtae de Epiſcoporum munere in futura Synodo ad Leonem ſcribentium (a): *Te auctore decernant*; non, inquam, recte ſatisque apte ſequentibus verbis expoſuiſſe videtur (b): Sane quaenam futura ſit Summi Pontificis poteſtas in Concilio Oecumenico, facile animadverti poteſt. Nempe rerum gerendarum & ſanciendarum auctor eſſe debet; quemadmodum Senatus conſulta olim in Imperio fiebant auctore Principe. Unde Marciſanus Auguſtus de propoſito ſuo cogendae Synodi ad Leonem ita ſcribit, ut *eo auctore* illam celebrare velit, id eſt, eodem jure quo Principes Senatui

Iii 2

aucto-

(a) 1. Part. Conc. Chalcedon. cap. XXXIV. &amp; XXXV.

(b) Lib. V. de Concord. cap. VIII. num. IV.

auctores fiebant aliquid censendi. Imperatorum placita, quemadmodum jam saepius animadvertimus, Senatus iudicio subiecta erant, nec nisi Senatu consentiente, penes quem condendarum legum summa potestas erat, vim legis consequebantur: quare auctore Principe id fieri dicebatur, quod eo potius suadente, quam cogente vel decernente fiebat. At decretorum fidei, seu legum, quae ad fidei rationem pertinent, ferendarum, penes Spiritum Sanctum summa potestas & auctoritas est, qui solus jus habet Christianae fidei obsequium ab humanis mentibus exigendi. Quapropter qui de rebus fidei Spiritu Sancto auctore decernit, is certe non suavoris, sed Legislatoris partes obit, & ad obsequium fidei humanas mentes cogere auctoritate sua potest: ex se ipsis enim rata sunt Spiritus Sancti iudicia, nec ex quorumlibet hominum consensione eorum vis & auctoritas pendet. Quum ergo quae summo Pontifice auctore in Synodis generalibus decreta sunt, Spiritu Sancto auctore decreta fuisse dicantur, non eadem ratio de Pontificiis decretis habenda est, ac de Senatus-Consultis, quae olim in imperio auctore Principe fieri dicebantur.

At, inquires, saltem eo similes erunt ab Imperatore & a Pontifice dictae sententiae, quod quemadmodum illarum auctoritate subiecti populi minime tenebantur, nisi postquam illas Senatus veluti rectae rationi consonas, & bono publico consulentes approbasset: ita neque Pontificis Romani sententiis Christi-fideles adstringuntur, nisi postquam Synodus generalis facto examine declaraverit, eas reapse e Romana Sede Spiritu Sancto auctore profectas esse. At neque id jure obtendi posse, satis ex superioribus constat. Nimirum ostendimus, decretis Apostolicis tanquam fidei Catholicae formulis ante fuisse subscriptum, quam

quam Concilia Oecumenica cogerentur, vel Apostolicorum decretorum examen fuisset in iis ipsis Conciliis a Patribus institutum. Non est autem auctor fidei nisi Spiritus Sanctus: quare qui formulae fidei a Romano Pontifice constitutae antea subscribebant, quam Synodus celebraretur, his certe Synodi declaratione, opus non erat, ut certo illis constaret, auctorem formulae vel regulae fidei ab Apostolica Sede praescriptae fuisse Spiritum Sanctum. Quid enim ex. gr. opus erat Anatolio Regiae Urbis Episcopo Synodi Chalcedonensis oraculo, quum haec de illo ad Leonem Pontificem in ea ipsa epistola, quam laudat Petrus de Marca, Pulcheria Augusta scribebat? *Anatolius in eadem fide permanfit atque religione, & tuarum litterarum Apostolicam confessionem complectitur, illo errore sublato, qui ab aliquibus nunc ortus est. . . . & epistolae similiter Catholicae fidei, quam ad sanctae memoriae Flavianum Episcopum tua Beatitudo direxit, sine aliqua dilatione subscripsit.* An ambigere poterat, Spiritum Sanctum per Leonem esse loquutum, qui illius fretus auctoritate, haeresim, quam ille damnaverat, & ipse damnabat, & quam fidem praescripserat, incunctanter & ipse profitebatur? Hinc autem intelligitur quid eadem Augusta vellet sequentibus ejusdem epistolae verbis: *Facto concilio, & de Catholica confessione, & de his Episcopis, qui ante hoc segregati sunt, sicut fides & Christiana pietas exigit, te auctore (Patres) decernant: hoc est, Christiana pietas & fides exigunt, ut de Catholica confessione Patres in Conciliis decernant juxta regulam fidei, quam per Romanum Pontificem Sanctus Spiritus constituerat.*

## CAPUT ULTIMUM

Sive appendix, *qua demonstratur, Gallos Theologos pugnantiâ tueri, quum & Romanum Pontificem Centrum Catholicae Unitatis esse docent; & nihilominus ejus de fide moribusque decreta Ecclesiarum retractationi subjiciunt. Ejusmodi ἀντιλογίας exemplum in libris Petri de Marca De Conc. Sac. & Imp.*

**H**oc idem argumentum paucis ab hinc annis data opera pertractavit Joh. Laur. Mosheimius inter Protertantes haud infimi Subsellii Scriptor, edita Dissertatione Theologico-Historica *De Gallorum appellationibus ad Concilium universae Ecclesiae, unitatem Ecclesiae spectabilem tollentibus*. Quamquam autem plura sunt in hacce Lucubratiuncula, quae merito Catholicus Theologus improbet ac detestetur; attamen si praecipuum illius scopum spectemus, in eandem & nos sententiam manibus pedibusque descendimus; atque non semel in Opere adversus Illustrissimum Bossuetium (quum nondum in manus nostras ea Dissertatio pervenerat) hoc idem argumentum paucis attigimus, & in Gallorum opinionem intorsimus. Nunc ergo libet ex ea Heterodoxi hominis lucubratione aliqua excerpere, quae rem hanc in meliori lumine collocent, & si rite expendantur, plane conficere videantur.

Triplicem ille (a) ex antiquissimis Patribus, & recentioribus ex ipsa quoque Gallia Theologis, unitatis

Ec-

Ecclesiae speciem informat, *Moralem, Physicam, & Civilem*. Subditque, quod quaecumque Galli earum eligant, per nullam fieri potest, ut Concilii decreta Pontificis praeferant legibus. Quod ille per singulas discurrendo species, egregie, ut quidem ego sentio, invicteque demonstrat: „*Moralis*, inquit, *Unitas* ex summa perfectione animorum sententiarumque cum Principe Doctorum consensione, originem trahit. Talem igitur si velint Galli esse in Ecclesia, hoc illis ratum esse debet, omnes omnino coetus eandem, quam Pontifex Maximus, doctrinam profiteri debere, eo quod pretiosissimum veritatis depositum Romanae a Christo conceditum sit Ecclesiae. Hanc antiquissimorum Doctorum animis infedisse opinionem, nec ipse Moshemius diffitetur, imo & candide agnoscit; subjungitque duorum Galliae Scriptorum testimonia, qui celebrem ac notissimum S. Irenaei locum ex lib. III. adv. haereses cap. III. *Ad hanc Ecclesiam* (Romanam scilicet) *propter potiorem principalem, necesse est omnem convenire Ecclesiam, hoc est eos qui sunt undique fideles, in qua semper ab his, qui sunt undique, conservata est ea, quae est ab Apostolis traditio*: in hanc mentem atque sententiam interpretantur. Haec enim verba Renat. Massuetius expendens: *Ut vero*, inquit (a), *unitas inter tot Episcopos, totque singulares Ecclesias, tam longe a se invicem distantes foreri, omniumque consensus facilius explorari posset, nec omnes emergentibus controversiis, maximo cum singularum gravamine, simul in unum locum convenire cogerentur, necesse erat primam aliquam inter omnes Ecclesiam constitui, quae ceteris omnibus praeesset, ceteris pro jure in-*  
vigi-

---

(a) Dissert. III. in Iren. Art. IV. §. 30.

*vigilaret, ac veluti quodam UNITATIS CENTRUM ESSET, in quod omnes confluentes, ejusdem fidei & communio-  
nis nexu colligarentur. Cognita igitur hujus primae Ec-  
clesiae sententia, ceterarum omnium satis ut plurimum  
cognita fuerit: una enim omnium cum ea Ecclesia fides  
atque doctrina: haec ceterarum Caput, CUI ARCTISSIME  
ADHAERERE TENENTUR OMNES. Concinit Petrus de Mar-  
ca: Dei, inquit (a), Optimi Max. beneficio singulari sum-  
ma & veluti arx quaedam Christianae Religionis in fa-  
stigio Sedis Apostolicae collocata est, ubi depositum verae  
fidei Majorumque traditiones tutissime custodiuntur:  
Clarius etiam Vir magnus alio loco (b): Commune hoc  
officium communionis cum Ecclesia Romana, cui impen-  
dendo cum ceteris Provinciis Gallia astringitur, cogno-  
verat ante omnes vetustissimus ille Lugdunensium Anti-  
stes Irenaeus, qui unus scripsit quod omnes sentiebant:  
Ad Romanam Ecclesiam, inquit, propter potentio-  
rem principalitatem, necesse est omnem convenire Ecclesiam:  
quasi diceret, juxta sincerio-rem illorum verborum inter-  
pretationem, eam esse vim unitatis, quae principium &  
originem a Petri Sede trahit, ut CUM EA SENTIENDI  
NECESSITATEM ceteris imponat. Haec utriusque laudati  
Scriptoris consecutiones ex illo Irenaei testimonio, quem-  
admodum & ex aliis huic adfinibus Tertulliani, Cypria-  
ni, aliorumque veterum Patrum locis, quae alibi expen-  
dimus, sponte fluere ac proficisci, idem Heterodoxus  
Scriptor sequentibus verbis testatur (c): „Nesciverit  
„Cyprianus & reliqui consecraria, quae cum eorum con-  
„juncta sunt praeceptis de Ecclesia. Id vero quin sentiat,  
„nemo*

(a) De Conc. Sac. & Imp. lib. V. cap. XV. §. IX.

(b) Ibid. Lib. I. cap. II. §. VII.

(c) §. XIV.



„ nemo unus tam hebes esse potest, inter unitatem quam-  
 „ dam universae Ecclesiae in Romano Pontifice desinen-  
 „ tem, talemque qualem ex Irenaeo & Cypriano descri-  
 „ ptus, communitatem, vix tantum esse spatii, quan-  
 „ tum inter atrium & cubiculum, aut inter manum &  
 „ digitos. Si primorum saeculorum innocentia obstitit,  
 „ quominus cogitando praesentirent insidias, quas sacrae  
 „ libertati nescii & inviti struebant, posterius certe acutio-  
 „ res fuerunt, neque diu Pontificibus obscurum fuit,  
 „ quantum illa placita virtutis haberent, ad potentiam &  
 „ auctoritatem suam stabiliendam. Quis non jure miretur  
 „ hominis candorem ingenue fatentis, proximos illos Apo-  
 „ stolorum discipulos, & post eosdem Apostolos Ecclesia-  
 „ rum Magistros, & Catholicae fidei Praedicatores & adser-  
 „ tores semina jecisse, ex quibus sponte doctrina nostra ef-  
 „ florescat? Nec modo illa de Romani Pontificis primatu;  
 „ in quam omnes Catholici consentiunt; verum & illa, de  
 „ qua cum aliquot communionis nostrae Theologis digla-  
 „ diamur. Ex his namque principiis tandem concludit (a)  
 „ quod omnis a Pontifice provocatio cessare debet, si  
 „ haec unitas, quae ex summa perfectaue animorum  
 „ cum Principe Doctorum consensione originem trahit,  
 „ inviolata custodiri debet. Si enim, *inquit*, jus divinum  
 „ exigit, ut ab ejus nemo desciscat sententia, Concilium  
 „ si aliter ac Caput pronuntiaret Ecclesiae in rebus fidei,  
 „ gravissimum scelus committeret, atque communita-  
 „ tem sacram tolleret. Nullo itaque Concilio, si haec va-  
 „ leat sententia, opus est: eo quod Pontificis opinione  
 „ percepta & intellecta, Conciliorum etiam non ignota  
 „ potest esse decisio. Si Pontificis opinione percepta,

To. I. Par. II.

K k k

Con-

(a) §. XVI.

Conciliorum ignota non poteit esse decisio; ergo nunquam contingere potest, ut legitimum Concilium riteque & ordine celebratum, a Pontificis desciscat sententia, gravissimumque hoc scelus committat, ut sacram communiatem de medio tollat. Nec tamen propterea nulla est Conciliorum utilitas aut necessitas. Alioquin frustra fuissent celebriores Synodi celebratae. Quis enim Catholicorum ignorabat, cujusmodi futura erat de Verbi aeternitate atque Divinitate, deque illius Incarnatione, Nicaenae, Ephesinae, Chalcedonensis, sextaeque Synodi decisio, dum eae tamen rite libereque celebrarentur?

Ad alteram *unitatis* speciem accedamus, quam *Physicam* Moshemius appellat, quoniam optime naturalibus declaratur exemplis: ejusque forma & idea, non secus atque praecedens, ex primaevae traditionis fontibus derivatur, & communibus Catholicorum Theologorum notionibus informatur. „ Quidquid id est, *inquit heterodoxus Auctor* (a), qui hac ratione dogma de Ecclesiae unitate saeculo secundo & tertio depravarunt, physicam quamdam unitatem animo complexi sunt. Nisi vehementer fallor, huc fere redit sententia eorum: „ Apostolos Spiritu Sancto praeditos, dona sua contulisse illis, quos praefecerant Ecclesiis: ab his eorum discipulis easdem dotes manasse in consequentium temporum Doctores iisdem coetibus praepositos; ab Episcopis in Presbyteros, & multitudinem Sanctorum reliquam, caelestem illam gratiam derivari: quemadmodum a radice succus omnis in totius arboris ramos diffundatur, aut omnis fluminum copia agrorumque fertilitas ab ultima proficiscatur scaturigine, sic ab Apo-

„ stolis

„ stolis eorumque successoribus omnem caelestis virtutis  
 „ abundantiam defluere : quamobrem ab his divulsum ,  
 „ nec Spiritus Sancti , nec veritatis participem fieri posse .  
 „ Aut nihil sibi volunt Irenaeus & Cyprianus in verbis ,  
 „ quae continuo subjicio , aut hoc ipsum quod dixi : sic  
 „ vero ille (a) : *Hoc enim Ecclesiae creditum est Dei munus , quemadmodum ad inspirationem plasmationi , ad hoc ut omnia membra percipientia vivificentur ; & in eo disposita est communicatio Christi , id est Spiritus Sanctus , artha incorruptelae , & confirmatio fidei nostrae , & scala ascensionis ad Deum : In Ecclesia enim , inquit , posuit Deus Apostolos , Prophetas , Doctores , & universam reliquam operationem Spiritus : cujus non sunt participes omnes , qui non currunt ad Ecclesiam , sed semetipsos fraudant a vita per sententiam malam & operationem pessimam . Ubi enim Ecclesia , ibi est Spiritus Dei ; & ubi Spiritus Dei , illic Ecclesia & omnis gratia : Spiritus autem veritas . Quapropter qui non participant eum , neque a mamillis Matris nutriuntur in vitam , neque participant de Corpore Christi procedentem nitidissimum fontem .* Quisquis ad locum illum Apostoli respexerit , ad quem Irenaeus digitum intendit , haud aegre percipiet , neque ab ipso Irenaeo , neque a Cypriano , neque ab aliis secundi tertiique saeculi Scriptoribus depravatam fuisse , sed mirifice illustratam illis exemplis Apostolorum de Ecclesiae unitate doctrinam . „ Cyprianus enim , subjungit „ Moshemius , his verbis utitur (b) : *Ecclesia quoque una est , quae in multitudinem latius incremento foecunditatis extenditur : quomodo solis multi radii , sed lumen*

(a) Lib. III. adv. haeref. cap. XXIV.

(b) Lib. de Unitat. Ecclef. cap. V.

*unum: & rami arboris multi, sed robur unum tenaci radice fundatum: & quum de fonte uno rivus plurimi defluunt, numerositas licet diffusa videatur exundantis copiae largitate, unitas tamen servatur in origine. Avelle radium Solis a corpore, divisionem lucis unitas non capit: ab arbore frange ramum, fructus germinare non poterit: a fonte praecide rivum, praecisus arescet. Sic & Ecclesia Domini luce perfusa, per orbem totum radios suos porrigit: unum tamen lumen est, quod ubique diffunditur, nec unitas corporis separatur.* „ In promptu  
 „ sunt multa alia tam ex his quam aliis telimonia, quibus id quod dixi, extra omnem controversiam collocem: sed his alium dicare locum instituti fines jubent.

Hoc itaque *physicum*, ut vocat, Ecclesiasticae unitatis genus, vehementius etiam consilio eorum obitare, qui ad vocem Conciliorum confugiunt, vel a Romano Pontifice provocant, jure Moshemius adfirmat: „ Qui enim,  
 „ inquit (a), huic generi favent, sic censent: Omnes  
 „ gratiae thesauros uni Maximo Pontifici a Christo collatos esse, & ab hoc in reliqua redundare Ecclesiae  
 „ membra: sicut venae & arteriae a corde tractae & profectae in corpus omne ducantur, uti arbores ex radice  
 „ succum trahant, quemadmodum vitales spiritus a capite in reliquum corpus diffundantur: ita a Pontifice in  
 „ eos, qui ipsi dignitate sunt proximi, ab his in Episcopos, porro in universam Sanctorum multitudinem omnia Spiritus Sancti dona descendere: propterea avulsi  
 „ instar ab arbore rami, aut membri amputati & mortui sese habere, qui Pontificis & Ecclesiae communionem  
 „ deserat. Haec saepe numero vis est tritissimae similitudinis,

„ dinis , qua corpori Ecclesia , Pontifex autem capiti ejus  
 „ comparatur , id quod vel ex Bellarmino apparet . Nec  
 „ aliter Gallos interdum loqui solere , ex his omnium to-  
 „ tius regni Doctorum vocibus constat ( a ) : *Aequum igitur est , ut Episcopi sanctam Sedem Apostolicam & Ecclesiam Romanam colant & observent ; namque ea non modo divinis promissis falli nesciis , ut & sanguine Apostolorum & Martyrum nixa est ; sed etiam , ut cum Athanasio loquamur , sacrosanctum illud caput est , a quo reliquae Ecclesiae , quae membra ejus sunt tantummodo , vitam , sanitatem & vigorem accipiunt .* „ Cum hac si  
 „ aliquis opinione Concilium appellat , is vero tam prudenter & graviter agit , ac si membra abscissa , aut rimum truncatum vivere tamen , nec capitis indigere disputet . Quod si enim quidquid in Episcopis virtutis caelestis est , propter consociationem cum Pontifice in illis est , quid de illis , quaeso , pronuntiandum erit , qui sine capite conveniunt , ut in ipsum caput , a quo nutriuntur , sententiam ferant ? Lepidus foret , qui adseveraret , esse in brachiis & pedibus a corpore scissis vim quamdam judicandi , an caput vivat , vel extintum sit , an recte membra gubernet , an vero secus . Haud vero multo melius illi , qui membra Ecclesiae capiti , cui vitam debent unice , diem dicere posse putent . Non ergo stolidè , quod ad hanc rem attinet , Rob. Bellarminus ( b ) : *Caput a membris regi , & non ea potius regere , contra naturam est : sicut etiam est contra naturam ,*

K k k 3 ram ,

( a ) Avis de l'Assemblée générale du Clergé de France à Mgrs. les Archevêques & Evêques du Royaume le 20. Jan. 1626. art. 137.

( b ) De Conciliis. auctor. lib. II. cap. XVII.

*ram, quod membra sibi caput praecidant, cum forte graviter aegrotat.*

Haec lucem mutuari possunt ex his, quae latius ad librum XIII. Meldenfis Episcopi, & alibi disseruimus: ex quibus perspicue constat, Romanum Pontificem, juxta sacrarum litterarum, & veterum Patrum testimonia, non modo singulis membris, verum & universae Ecclesiae, quae ipsi etiam in Conciliis Oecumenicis congregata velut corpus capiti subest, fontem esse, radicem & originem vitae, auctoritatis, & potestatis, nec illi Spiritum Sanctum ejusque vigorem & inspirationem infundi, nisi cum Petro in suis adhuc Successoribus vivente, a quo Christus voluit dona sua in Ecclesiam, quemadmodum ait Leo Magnus, velut in corpus omne diffundi, indivulso nexu conjuncta sit. Hinc autem vires trahit argumentum, quod hinc adversus Gallos Theologos Moshemius intorquet. Hinc enim consequens est, non modo singulos seorsim Episcopos, verum & eosdem in Conciliis Oecumenicis congregatos nihil posse adversus potestatis suae & auctoritatis fontem, originem & principium. Pergit Moshemius (a).

„ Ultimum in *Civili unitate* praesidium Gallis restat:  
 „ a quo si depulsi fuerint, conclamatum erit. Quaelibet  
 „ civitas, id quod nullum praeterit, arcto quodam colligata est vinculo, omniaque ejus membra certis ordinibus & gradibus inter se apta sunt: cujus quidem consociationis atque unitatis apex & fons is est, qui Rempublicam gubernat & administrat. Qui Ecclesiam cum civitate confundunt Pontificii, hujus generis in ea sibi fingunt unitatem: Vicarium Christi & caput sacri Imperii Pontificem esse statuunt, ad quem ideo reliquae  
 „ vasti

---

(a) §. XVIII.

„ vasti corporis partes referri debeant . Quum universam  
 Ecclesiam unius instar civitatis, sive etiam familiae vel  
 domus habent Catholicae communionis Theologi, ejus-  
 que caput, & veluti Patremfamilias, Romanum esse  
 Pontificem statuunt; hasce de Ecclesia ejusque unitate  
 notiones ex sacris litteris & veterum Patrum testimoniis  
 hauriunt, quemadmodum loco superius indicato uberrime  
 demonstravimus . „ Ilthuc unitatis genus, *inquit Mosbe-*  
 „ *mius*, plus ceteris arridere videtur Gallis: qui licet de  
 „ natura imperii sacri cum ceteris dissentiant, haud ta-  
 „ men esse magnam potestatem Pontifici, & in omnes re-  
 „ gni Christi provincias jurisdictionem, diffiteri audent ...  
 „ Ad nostrum id satis est institutum, quod omnes conce-  
 „ dunt Galli, Magistratum quemdam, licet haud supre-  
 „ mum, (hunc enim generale Concilium esse judicant;  
 „ ad quod velut ad supremum Ecclesiae tribunal appellari  
 „ licite & jure posse contendunt,) in Ecclesia tenere Pon-  
 „ tificem; ideoque ut sacrae unitatis caput, principium-  
 „ que unitatis, spectari debere (a): In hac ego sententia  
 „ id primum male meditatum esse dico, quod superius  
 „ Pontifice Concilium esse perhibent; & nihilo tamen  
 „ minus spectabilis eum unitatis initium esse defendunt.  
 „ Ab eo, nisi me ratio fallit, unitas in Republica repe-  
 „ tenda est, quod praecipuum est auctoritate & dignita-  
 „ te, nec is appellari princeps civitatis potest, cui major  
 „ aliquis leges ferre potest. Apud Venetos non in Duce;  
 „ qui nihil sine consilio valet, sed in Senatu, majestas,  
 „ Reipublicae principium, & unitas requiescit. Quam-  
 „ obrem si conspicua quaedam in Ecclesia consociatio  
 „ floret, Concilium vero Pontifice dignius est, in hoc  
 „ pun-

---

 (a) §. XIX.

„ punctum illud civilis concordiae collocandum est , non  
 „ in Romano Antistite ; cujus decreta in Concilii disce-  
 „ ptationem cadere possunt .

In hac heterodoxi Scriptoris disputatione improba-  
 mus quidem , ut jam diximus ac detestamur , hominis au-  
 daciam & insaniam , qua Catholicam de Ecclesiae adspe-  
 ctabili unitate doctrinam , Scripturarum & veteris tradi-  
 tionis perspicuis testimoniis nixam , passim ac temere vel-  
 licat , ac monstri instar traducit : laudamus tamen atque  
 suspicimus tum ejus candorem , quo hanc eandem doctri-  
 nam prioribus Ecclesiae seculis obtinuisse fatetur ; tum  
 etiam ingenii perspicaciam , qua inde consequens esse in-  
 tellexit , Romani Pontificis , qui illius unitatis origo , ra-  
 dix & centrum esse statuitur , summam esse debere & in-  
 eluctabilem in omnem Ecclesiam auctoritatem . Id enim in  
 circulo centrum dicitur , in quod omnes & singulae , &  
 divisim & conjunctim ductae a peripheria lineae desinunt ,  
 in quo invicem conjunguntur , in quo immote quiescunt ,  
 & nisi centrum varietur , & alius circulus describatur , ul-  
 tra procedere nequeunt . Sic porro , ut omnes juxta com-  
 munem omnium Ecclesiarum traditionem Theologi fa-  
 tentur , constituta est Ecclesia , ut omnes ad Petri Sedem ,  
 velut ad centrum lineae , ferantur . Id ipse Petrus de Mar-  
 ca sequentibus verbis docet ( a ) : *Sane communi omnium  
 Ecclesiarum consensu fuisse receptum , ut ad Cathedram  
 Petri , tamquam in descriptione circulari lineae ad cen-  
 trum , respicerent ; non solum nos docuit Leo Primus , sed  
 etiam omnes Africani Patres . Ergo nisi Ecclesiae consti-  
 tutio varietur , in Petri Cathedra , ejusque auctoritate &  
 judicio universa quiescere Ecclesia debet ; ut nimirum in  
 illa ,*

---

( a ) Lib. I. de Conc. Sac. & Imp. cap. II. num. IV.



illa, ut verbis utar Tertulliani (a), sit *finis quaerendi, statio credendi, expunctio inveniendi*.

Hunc autem tres illae quas memoravimus unitatis species inter se ordinem habent, ut ea praecedat, quam *physicam* appellare libuit, quod naturalibus exemplis fontis, radicis, & capitis explicetur; hanc unitas *moralis* excipiat, quae in sententiarum & dogmatum consensione posita est; ex qua demum Ecclesiae pax & tranquillitas, ac veluti fraterna & unius familiae concordia, vel unius civitatis ac regni seu *civilis* unitas efflorescat. Ex quo enim a prima Sede, seu Cathedra principali docendi munus & auctoritas in universa Ecclesia velut a capite, fonte & origine pendet; sequitur, quod eam omnes veluti magistram colere ac suspicere debeant; adeoque eadem cum illa sentiendi necessitas omnibus incumbit. Ex hac vero sententiarum & dogmatum consensione pendent ea caelestis civitatis jura, quae Tertulliano dicuntur (b) *communicatio pacis, & appellatio fraternitatis, & contesseratio hospitalitatis*: quae jura, subjungit laudatus Auctor, *non alia ratio regit, quam unius sacramenti una traditio*. Ut nimirum haec cum Sede Apostolica civilis communio ac veluti consociatio argumentum sit consensionis in eandem doctrinam: *Communicamus*, ut idem ait (c), *cum Ecclesiis Apostolicis, quod nulla doctrina diversa*. Hoc vero, ut ipse concludit, argumentum sit ac testimonium veritatis: *Hoc, inquit, est testimonium veritatis*. In hoc ergo veritatis regno, quod est Ecclesia, eadem est Sedes, vel, ut ait S. Cyprianus (d), idem est *domicilium unitatis*.

(a) Lib. de Praescript. cap. X.

(b) Ibid. cap. XX.

(c) Ibid. cap. XXI.

(d) Epist. in edit. Oxon. LI. al. XLVII.

ius & veritatis; ac proinde ut Sedes Apostolica centrum est unitatis, in quo semper servanda communio est, vel a cujus communione nunquam excidere licet; ita Sedes est veritatis, cum qua propterea semper sentiendum est, vel cujus de fide moribusque sanctionibus atque decretis nunquam resistere ac refragari fas est: adeoque pugnancia docent, qui eandem Sedem Apostolicam ut centrum immobile unitatis colunt, nec eandem ut veritatis fontem indeficientem, & arcem inexpugnabilem venerantur. Hujus autem ἀντιλογίας, ut ex dictis apparet, insigne exstat exemplum in libris Petri de Marca de Concordia Sacerdotii & Imperii. Hinc enim, ut jam vidimus, docet; summam & veluti arcem Christianae religionis in fastigio Sedis Apostolicae collocatam esse, ubi depositum verae fidei Majorumque traditiones tutissime custodiantur; omnesque Ecclesias ad Cathedram Petri, tanquam in descriptione circulari lineae ad centrum, respicere; denique eam esse vim unitatis, quae principium & originem a Petri Sede trahit, ut cum ea sentiendi necessitatem ceteris imponat. Hinc autem ceteris Ecclesiis plenam libertatem vindicat ad ejusdem Sedis Apostolicae de fide sanctiones retractandas, easque judicio suo aut probandas aut improbandas. Quomodo enim haec duo cohaerent, necessitas eadem sentiendi, & plena libertas dissentendi? Haec ergo ἀνίσταται esse, & ipse postinodum Vir illustrissimus atque doctissimus intellexit, ac propterea vitae suae postremis mensibus luculenta dissertatione de Romani Pontificis infallibilitate disseruit, ut Stephanus Baluzius, qui illam ex ore dictantis excepit, in ejus vita testatur.

F I N I S.













